

唐 房玄齡 等撰

香巷

中 華

書

局

卷八九至卷一〇〇(傳)

册

晉書卷八十九

列傳第五十九

忠義

帛,畫象丹青,前史以爲美談,後來仰其徽烈者也。 也!是知隕節苟合其宜,義夫豈吝其沒,捐軀若得其所,烈士不愛其存。故能守鐵石之深 衷,厲松筠之雅操,見貞心於歲暮,標勁節於嚴風, 赴鼎鑊其如歸,履危亡而不顧,書名竹 古人有言:「君子殺身以成仁,不求生以害仁。」又云:「非死之難,處死之難。」信哉斯言

君,梓洁恥臣于戎虜,張禪引鴆以全節,王諒斷臂以厲忠,莫不志烈秋霜,精貫白日,足以 若嵇紹之衞難乘輿,卞壼之亡軀鋒鏑,桓雄之義高田叔,周崎之節邁解揚,羅丁致命于舊 蒼生塗炭,干戈日用,戰爭方興。雖背恩忘義之徒不可勝載,而蹈節輕生之士無乏於時。至 晉自元康之後,政亂朝昏,禍難荐興,艱虞孔熾,遂使姦凶放命,戎狄交侵,函夏沸騰,

激清 等已入列傳,其餘卽敍其行事以爲忠義傳,用旌晉氏之有人焉。 風于萬 古, **属薄俗于當年者歟** ! 所謂亂世識忠臣,斯之謂也。 **卞**靈、劉超、鍾雅、周虓

嵇紹 從子含

帝 濤 謂 領 濤 選、啓武帝曰:「康誥 嵇紹字延祖 曰:「如卿所言,乃 ,魏中散大夫康之子也。 、堪爲丞,何但郎也。」乃發詔徵之,起家爲秘 有言。『父子罪不相及。』嵇紹賢侔阁缺, 十歲而孤,事母孝謹。 宜 以父得罪,靖居私門。 加 書丞 旌 命, 請 爲 秘 Щ

服闋 器。 天 未 職 下 見 晞後 其 無 紹 拜徐州刺史。 始入洛,或謂王戎曰:「昨於稠人中始見嵇紹,昂昂然如野鶴之在鷄羣。」戎曰:「君 復遺才 父耳。」累遷汝陰太守。 爲 司 矣。」 州主 沛 簿,以無行被斥,州黨 時石崇爲都督,性雖 國 戴晞少有才 尚書左僕射裴頠亦深器之,每曰:「使延祖 智,與紹從子含相友善, 驕暴,而紹將之以道,崇甚親敬之。 稱紹有知人之明。 轉豫章內史, 時人許以遠致, 爲吏部 以 母 後以 紹 憂,不之官。 以 尚書,可 爲必不成 使 復

| 艦求交於紹,紹距而不答。 元 康 初, 爲給 事 ·黄門侍郎。 及艦誅,紹時在省,以不阿比凶族,封代陽子,遷散騎常侍, 時侍 中賈謐以外戚 心之寵, 年 少居位, 潘岳、杜斌等皆 附

細行 領國子博士。 !受細名,文武顯於功德,靈厲表於闇蔽。 太尉、廣陵公陳準薨,太常奏諡,紹駁曰:「諡號所以垂之不朽,大行受大名, 自頃禮官協情、諡不依本。 **準諡爲過,宜諡日**

繆。」事下太常。 時雖不從,朝廷憚焉。

也。 萌無由而兆矣。」 車不傾,革往弊者則政不爽。太一統于元首,百司役于多士,故周文興于上,成康穆于下 于遠近,兆禍始亂,華實爲之。故鄭討幽公之亂,斲子家之棺,魯黎隱罪,終篇貶翬。未忍 復其爵,紹又駁之曰:「臣之事君,當除煩去惑。 |華歷位內外,雖粗有善事,然闔棺之責,著 重戮,事已弘矣,謂不宜復其爵位,理其無罪。」時帝初反正,紹又上疏曰:「臣聞改前轍者則 存不忘亡、易之善義、願陛下無忘金墉、大司馬無忘潁上、大將軍無忘黃橋、則禍亂之 趙王倫篡位,署爲侍中。 惠帝復阼,遂居其職。 司空張華爲倫所誅,議者追理其事,欲

|艾、葛旟等共論時政。||艾言於||同:「||嵇侍中善於絲竹,公可令操之。」左右進琴,紹推不受。 矣,矢石之殆不可忘也。」問雖謙順以報之,而卒不能用。紹嘗詣問諮事,遇冏讌會,召董 哉!今大事始定,萬姓顒顒,咸待覆潤,宜省起造之煩,深思謙損之理。復主之勳不可棄 德,豐屋蔀家,無益危亡。竊承毀敗太樂以廣第舍,興造功力爲三王立宅,此豈今日之先急 齊王冏旣輔政,大興第舍,驕奢滋甚,紹以書諫曰:「夏禹以卑室稱美,唐虞以茅茨顯

交,紹奔散赴宫,有持弩在東閣下者,將射之,遇有殿中將兵蕭隆,見紹姿容長者,疑非凡 辭也。」冏大慚。 問 忝 人,趣前拔箭,於此得免。遂還榮陽舊宅。 備常伯,腰紱冠冕,鳴玉殿省,豈可操執絲竹,以爲伶人之事 曰:「今日 爲歡,卿何吝此邪!紹對曰:「公匡復社稷,當軌物作則,垂之于後。 |艾等不自得而退。頃之,以公事免, 問以爲左司馬。 ! 若釋公服從 旬日,冏被誅。 私宴,所不敢 紹雖 初,兵 虚鄙,

蒙塵,承詔馳詣行在所。值王師敗績于蕩陰,百官及侍衞莫不散潰,唯紹儼然端冕,以身捍 謝罪於穎,紹等咸見廢黜,免爲庶人。尋而朝廷復有北征之役,徵紹,復其爵位。 衣,帝曰:「此嵇侍中血,勿去。」 衞,兵交御輦,飛箭雨集,,紹遂被害于帝側, 血濺御服, 天子深哀歎之。 及事定, 左右欲浣 力前驅,死猶生也。」遂拜紹使持節、平西將軍。屬以被執,紹復爲侍中。公王以下皆詣鄴 大駕次于城東。 义宣言於衆曰:「今日西討,欲誰爲都督乎。」 六軍之士皆曰:「願嵇侍中勠 尋徵爲御史中丞,未拜,復爲侍中。 河 間王顒、成都王穎舉兵 、向京都,以討長沙王义, 紹以天子

長安,河間王顒表贈紹司空,進爵爲公。會帝還洛陽,事遂未行。東海王越屯許,路經燈 逆,理必有征無戰。若使皇輿失守,臣節有在,駿馬何爲「聞者莫不歎息。及張方逼帝遷 初,紹之行也,侍中秦準謂曰:「今日向難,卿有佳馬否?」紹正色曰:「大駕親征,以正伐

陽,過紹墓,哭之悲慟,刊石立碑,又表贈官爵。帝乃遣使册贈侍中、光祿大夫,加金章紫 綬,進爵爲侯,賜墓田‧一頃,客十戶,祠以少牢。 |元帝爲左丞相,承制,以|紹死節事重,而贈 禮未副勳德,更表贈太尉,祠以太牢。及帝卽位,賜諡曰忠穆,復加太牢之祠。

襲封。成帝時追述紹忠,以翰爲奉朝請。翰以無兄弟,自表還本宗。太元中,孝武帝詔曰: 於是復以翰孫曠爲弋陽侯。 事,愴然傷懷。忠貞之胤,蒸嘗宜遠,所以大明至節,崇獎名敎。可訪其宗族,襲爵主祀。」 「褒德顯仁,哲王令典。故太尉、忠穆公執德高邈,在否彌宣,貞潔之風,義著千載。 每念其 生。門人故吏思慕遺愛,行服墓次,畢三年者三十餘人。長子彫,有父風,早夭,以從孫隊 |紹誕于行己,不飾小節,然曠而有檢,通而不雜。 與從子||含等五人共居,撫卹如所同

之事,畫眞人於刻桷之室,載退士於進趣之堂,可謂託非其所,可弔不可讚也。」其辭曰:「邁 毫丘子,門曰歸厚之門,室曰愼終之室。楚王瑋辟爲掾。暐誅,坐免。舉秀才,除郎中。 弔文,文不加點。其序曰:「帝壻<u>王弘遠華池豐屋,廣延賢彦,圖莊</u>生垂綸之象,記先達辭聘 含字君道。祖喜,徐州刺史。父蕃,太子舍人。含好學能屬文。家在鞏縣亳丘,自號 時弘農王粹以貴公子尙主,館宇甚盛,圖莊周于室,廣集朝士,使含爲之讚。 含援筆爲

列傳第五十九

忠義

之溜,宅非茅茨之宇,馳屈產於皇衢,畫茲象其焉取!嗟乎先生,高跡何局!生處巖 詠恬曠之辭,家畫老莊之象。今王生沈淪名利,身尙帝女,連耀三光,有出無處, 野無訟屈之聲,朝有爭寵之歎,上下相陵,長幼失貫,於是借玄虛以助溺,引道德以自獎,戶 矣莊周,天縱特放,大塊授其生,自然資其量,器虛神清,窮玄極曠。 居,死寄彫楹之屋,託非其所,沒有餘辱,悼大道之湮晦,遂含悲而吐曲。」解有愧色。 人僞俗季, 眞風 池非巖石 (既散)

外 义從之,乃增郎及令史。 置掾屬。 不復過此。 ·廢乏。 穎交戰,[]類軍轉盛,尚書郎旦出督戰,夜還理事。含言于以曰:「昔魏武每有軍事,增 齊王冏辟爲征西參軍,襲爵武昌鄉侯。長沙王乂召爲驃騎記室督、尚書郞。 青龍二年,尚書令陳矯以有軍務,亦奏增郎。 含謂今有十萬人,都督各有主帥,推轂授綏,委付大將,不宜復令臺僚雜與其間。」 但居曹理事,尙須增郎,況今都官中騎三曹晝出督戰,夜還理事,一人兩役,內 今<u>姦逆四逼,王路擁塞,倒懸之急,</u> 乂與成都

以 從 上賓之禮。 事 永興 懷 帝 中 鄎。 初,除太弟中庶子。西道阻閡,未得應召。 爲撫軍將軍,以含爲從事中郎。惠帝北征,轉中書侍郎。及蕩陰之敗,含走歸爃 含性通敏,好薦達才賢,常欲崇趙武之諡,加臧文之罪。屬陳敏作亂,江揚震 尋授振威將軍、襄城太守。 **虓爲劉喬所破,含奔鎭南將軍劉弘** 范陽王虓爲征南將軍,屯許昌,復以含 於襄陽,弘待

蕩,南越險遠,而廣州刺史王毅病卒,

弘表含爲平越中郎將、廣州刺史、假節。 卒,時或欲留含領荆州。 含性剛躁,素與弘司馬郭勱有隙,勸疑含將爲己害,夜掩殺之,時 未發,會弘

王豹

年四十四。

懷帝卽位,諡

日憲。

王豹,順陽人也。 少而抗直。 初爲豫州別駕,齊王冏爲大司馬,以豹爲主簿。 ||間驕縱,

失天下心, 劉致牋於冏曰:

權,進則亢龍有悔,退則蒺藜生庭,冀此求安,未知其福。敢以淺見,陳寫愚情。 計逆,功蓋天下,聖德光茂,名震當世。

今以難賞之功,挾震主之威,獨據京都,專執大 魏、新野大封於江漢、三面貴王、各以方剛强盛、並典戎馬、處險害之地。且明公興義 敗之法,尋中間覆車之軌,欲冀長存,非所敢聞。今河間樹根於關右,成都盤桓於舊 未有一人獲終,乃事勢使然,未爲輒有不善也。今公克平禍亂,安國定家,故復因前傾 者,刑罰不足以爲誅,爲人主而逆其諫者,靈厲不足以爲諡。伏惟明公虚心下士,開懷 納善、款誠以著、而逆耳之言未入於聽。別伏思晉政漸缺,始自元康以來,宰相在位, | 約聞王臣蹇蹇, 匪躬之故, 將以安主定時, 保存社稷者也。 是以爲人臣而欺其君

列

以爲天子百官,則四海長寧,萬國幸甚,明公之德當與周召同其至美,危敗路塞,社稷 其末,霸國之世,不過數州之地,四海强兵不敢入闚九鼎,所以然者,天下習於所奉故 可保。願明公思高祖納婁敬之策,悟張良履足之謀,遠臨深之危,保泰山之安。若合 長,各因本職,出居其方,樹德於外,盡忠於內,歲終率所領而貢於朝,簡良才,命賢儁, 也。今誠能尊用周法,以成都爲北州伯,統河北之王侯,明公爲南州伯,以攝南土之官 **昔武王伐紂,封建諸侯爲二伯,自陝以東,周公主之,自陝以西,召公主之。及至**

書入,無報,劉重牋曰:

聖思,宛許可都也。

今明公自視功德孰如周公。且元康以來,宰相之患,危機竊發,不及容思,密禍潛起, 周公以武王爲兄,成王爲君,伐紂有功,以親輔政,執德弘深,聖恩博遠,至三至忠至仁, 大權,此四大者,域中所不能容,賢聖所以戰戰兢兢,日昃不暇食,雖休勿休者也。昔 霸王之神寶,安危之祕術,不可須臾而忽者也。伏思明公挾大功,抱大名,懷大德,執 不遭皇天之應,神人之察,恐公旦之禍未知所限也。〔三至于執政,猶與召公分陝爲伯。 至孝至敬。而攝事之日,四國流言,離主出奔,居東三年,賴風雨之變,成王感悟。若 豹書御已來,十有二日,而聖旨高遠,未垂採察,不賜一字之令,不敕可否之宜。蓋

輒在呼噏,豈復晏然得全生計!前鑒不遠,公所親見也。 君子不有遠慮,必有近憂,憂

至乃悟,悔無所及也。

之商人也,一開其說,兩國以寧。 規,可先旨與成都共論。雖以小才,願備行人。昔厮養,燕趙之微者耳,百里奚,秦楚 故身雖輕,其言未必否也。 里,以與圻內侯伯子男小大相率,結好要盟,同獎皇家,貢御之法,一如周典。 今若從豹此策,皆遣王侯之國,北與成都分河爲伯,成都在鄴,明公都宛, 況別雖陋,大州之綱紀,加明公起事險難之主簿也。 寬方千 若合聖

冏令曰:「得前後白事,具意,輒別思量也。」

訕上 誠以交亂名實,若趙高詭怪之類也。 成都分陝爲伯、盡出藩王。 別比有白事、敢造異端、謂臣忝備宰相、必遘危害、慮在一旦、不祥之聲可蹻足而待、欲臣與 能嘉豹之策,遂納乂言,乃奏豹曰:「臣忿姦凶肆逆,皇祚顚墜,與成都、長沙、新野共興義 兵,安復社稷,唯欲勠力皇家,與親親宗室腹心從事,此臣夙夜自誓,無負神明。而主簿王 會長沙王乂至,于冏案上見豹牋,謂冏曰:「小子離間骨肉,何不銅駝下打殺」。冏旣不 上誣 聖朝鑒御之威,下長妖惑,疑阻衆心,噂喈背憎,巧賣兩端, 上猜嫌。 別為臣不忠不順不義,輒敕都街考竟,以明邪正。」
別 昔孔丘匡魯,乃誅少正,子產相鄭,先戮鄧析,

將死,曰:「懸吾頭大司馬門,見兵之攻齊也。」衆庶冤之。 俄而冏敗。

劉沈

劉沈字道眞,燕國薊人也。世爲北州名族。少仕州郡,博學好古。 太保衛瓘辟爲掾,

刺史。 尚、梁州刺史許雄等以討流。行次長安,河間王顒請留沈爲軍司,遣席遠代之。後領雍州 領本邑大中正。敦儒道,愛賢能,進霍原爲二品,及申理張華,皆辭旨明峻,爲當時所稱。 齊王冏輔政,引爲左長史,遷侍中。于時李流亂蜀,詔沈以侍中、假節,統益州刺史羅 及張昌作亂,詔願遣沈將州兵萬人弁征西府五千人,自藍田關以討之,願不奉詔。沈

沈渡渭而壘,願每遣兵出鬭,輒不利。 城,遣督護虞夔率步騎萬餘人逆沈于好時。 安定功曹皇甫澹爲先登,襲長安。顧時頓于鄭縣之高平亭,爲東軍聲援,聞沈兵起,還鎭渭 馳檄四境,合七郡之衆及守防諸軍、塢壁甲士萬餘人,以安定太守衞博、善新平太守張光、 間,宜啓上詔與沈,使發兵襲顒,顒窘急,必召張方以自救,此計之良也。」以從之。沈奉詔 自領州兵至藍田,顒又逼奪其衆。長沙王以命沈將武吏四百人還州。 張方旣逼京都,王師屢敗,王瑚、四祖逖言于以曰:四劉沈忠義果毅,雍州兵力足制河 沈乘勝攻之,使膽、博以精甲五千,從長安門而入,力 接戰,變衆敗,顒大懼,退入長安,果急呼張方。

所執。 戰至顒帳下。 以顒干上犯順,虐害忠義,知其滅亡不久也。 日,期之必死,葅醢之戮,甘之如薺。」辭義慷慨,見者哀之。 顧怒,鞭之而後腰斬。 于府門,博父子皆死之,澹又被擒。 敗,率餘卒屯于故營。 沈謂頥曰:「夫知己之顧輕,在三之節重,不可違君父之詔,量强弱以苟全。 沈軍來遲,顯軍見濟等無繼,氣益倍。馮翊太守張輔率衆救顯,橫擊之,大戰 張方遣其將敦偉夜至,沈軍大驚而潰,與麾下百餘人南遁,爲陳倉 **顧奇澹壯勇,將活之。** 灣不爲之屈,於是見殺。 投袂之 有識者 沈 軍 令 遂

麴允 焦嵩

麴允,金城人也。 與游氏世爲豪族,西州爲之語曰:「麴與游,牛羊不數頭。 南開朱門,

北望青樓。」

心 害鼎功,且規權勢,因鼎殺京兆太守梁綜,乃與綜弟馮翊太守緯等攻鼎,〔8〕走之。 洛陽傾覆,閻鼎等立秦王爲皇太子於長安,鼎總攝百揆。 允時爲安夷護軍 、始平太守,

州刺史賈疋爲屠各所殺,允代其任。

、殷凱、 愍帝卽尊位,以允爲尙書左僕射、領軍、持節、西戎校尉、錄尙書事,雍州如故。 趙染數萬 衆逼長安,日允擊破之,擒凱於陣。曜復攻北地,允爲大都督、驃騎將 時劉

軍,次于青白城以救之。〔〇曜聞而轉寇上郡,允軍于靈武,以兵弱不敢進。曜後復圍北地, 「郡城已陷,焚燒向盡,無及矣。」允信之,衆懼而潰。後數日,麴昌突圍赴長安,北地遂陷。 太守麴昌遣使求救,允率步騎赴之。去城數十里,羣賊繞城放火,煙塵蔽天,縱反間詐允曰:

聰嘉其忠烈,贈車騎將軍,諡節愍侯。 劉曜復攻長安,百姓飢甚,死者太半。久之,城中窘逼,帝將出降,歎曰:「誤我事者,麴、索 軍之號,欲以撫結衆心。然諸將驕恣,恩不及下,人情頗離,由是羌胡因此跋扈,關中淆亂, 像、扶風太守竺爽、安定太守焦嵩,皆征鎭杖節,加侍中、常侍,村塢主帥小者,猶假銀靑、將 二公也。」帝至平陽,爲劉聰所幽辱,允伏地號哭不能起。 聰大怒,幽之於獄, 沈發憤自殺, 允性仁厚,無威斷,吳皮、王隱之徒,無賴凶人,皆加重爵,新平太守竺恢、始平太守楊

之。」及京都敗,嵩亦尋爲寇所滅。 焦嵩,安定人。初率衆據確。 曜之逼京都,允告難於嵩,嵩素侮允,曰:「須尤困,當救

賈渾

賈渾,不知何郡人也。 太安中,爲介休令。及劉元海作亂,遣其將喬晞攻陷之。渾抗

殺之,晞將尹崧曰:「將軍舍之,以勸事君。」晞不聽,遂害之。 節不降,曰:「吾爲晉守,不能全之,豈苟求生以事賊虜,何面目以視息世間哉」、晞怒,執將

王育

蒲學書,忘而失羊,爲羊主所責,育將鬻已以償之。 同郡許子章,敏達之士也,聞而嘉之,代 喪,弔之者不過四五人,然皆鄉閭名士。 人。子章以兄之子妻之,爲立別宅,分之資業,育受之無愧色。然行己任性,頗不偶俗。 **|育償羊,給其衣食,使與子同學,遂博通經史。身長八尺餘,鬚長三尺,容貌絕異,音聲動** 王育字伯春,京兆人也。少孤貧,爲人傭牧羊,每過小學,必歔欷流涕。時有暇,卽折

謂吾刀鈍邪,敢如是乎「前將殺之。宣懼,跣下抱廥,乃止。自此知名。 |攸曰:「君辱臣死、自昔而然。我府君以非罪黜降,如日月之蝕耳,小縣令敢輕辱吾君!汝 爲二千石,吾所敬也。今吾儕耳,何故不見迎。欲以小雀遇我,使我畏死鷂乎。〕隋執刀叱 太守杜宣命爲主簿。俄而宣左遷萬年令,杜令王攸詣宣,四宣不迎之,攸怒曰:「卿往

鄴, 又以育為振武將軍。劉元海之爲北單于,育說顯曰:「元海今去,育請爲殿下促之,不 司徒王渾辟爲掾,除南武陽令。 爲政淸約,宿盜逃奔他郡。 遷幷州督護。 成都王穎在

列

傳

第五十

==0

然,懼不至也。」類然之,以濟爲破虜將軍。一元海遂拘之,其後以爲太傅。

韋忠

託我,常恐洪濤蕩嶽,餘波見漂,況可臨尾閭而闚沃焦哉!」 爲僕射,數言之於司空張華,華辟之,辭疾不起。人問其故,忠曰:「吾狹簷賤士,本無宦情。 之,匍匐號訴,哀慟感人。|秀出而告人曰:「此子長大必爲佳器。」歸而命子願造焉。服闋, 交當世,每至吉凶,親表贈遺,一無所受。 年十二,喪父,哀慕毁悴,杖而後起。 司空裴秀弔 **韋忠字子節,平陽人也。少慷慨,有不可奪之志。好學博通,性不虛諾。閉門修己,不** 頠

於是負煙以歸。後仕劉聰,爲鎭西大將軍、平民校尉,討叛民,矢盡,不屈節而死。 之,泣曰:「韋忠願以身代君,(10]乞諸君哀之。」亦遭五矢。 太守陳楚迫爲功曹。會山芜破郡,楚攜子出走,賊射之,中三創。 賊相謂曰:「義士也」」舍之。 忠 忠冒刃伏楚,以身捍

辛勉

遽止之曰:「主上相試耳,君眞高士也」歎息而去。 聰嘉其貞節,深敬異之,爲築室于平陽 齎藥酒逼之,勉曰::「大丈夫豈以數年之命而虧高節,事二姓,下見武皇帝哉!」引藥將飲,度 侍中。及洛陽陷,隨帝至平陽。劉聰將署爲光祿大夫,勉固辭不受。聰遣其黃門侍郎喬度 辛勉字伯力,隴西狄道人也。父洪,左衞將軍。勉博學,有貞固之操。懷帝世,累遷爲

濱起而抱帝大哭。聰曰:「前殺庾珉輩,故不足為戒邪!引出,遂加害焉。 |勉族弟賓、|愍帝時爲尚書郎。及帝蒙塵於平陽,|劉聰使帝行酒洗爵,欲觀||晉臣在朝者 西山,月致酒米,鮑亦辭而不受。年八十,卒。

劉敏元

不好讀史,常謂同志曰:「誦書當味義根,何爲費功於浮辭之文!易者,義之源,太玄,理之 劉敏元字道光,北海人也。厲己修學,不以險難改心。好星曆陰陽術數,潛心易、太玄,

門,能明此者,即吾師也。」

趸, 親。」、敏元日:「同邑人 乃還謂賊曰:「此公孤老,餘年無幾,敏元請以身代,願諸君舍之。」賊曰:「此公於君何 永嘉之亂,自齊西奔。 也。 窮窶無子,依敏元爲命。 同縣管平年七十餘,隨敏元而西,行及滎陽,爲盜所劫。敏元已 諸君若欲役之,老不堪使,若欲食之,復

之。盜長遽止之,而相謂曰:「義士也!害之犯義。」乃俱免之。後仕劉曜,爲中書侍郎、太 使所過稱詠威德,柰何容畜此人以損盛美!當爲諸君除此人,以成諸君霸王之業。」前將斬 曰:「夫仁義何常,寧可失諸君子!上當爲高皇、光武之事,下豈失爲陳項乎!當取之由道, 見投之故,乞以身代。諸大夫慈惠,皆有聽吾之色,汝何有靦面目而發斯言!」顧謂諸盜長 「吾豈望生邪!當殺汝而後死。此公窮老,神祇尙當哀矜之。吾親非骨肉,義非師友,但以 不如敏元,乞諸君哀也。」有一賊瞋目叱敏元曰:「吾不放此公,憂不得汝乎!」敏元奮劍曰:

承大悅。會<u>王敦遣其將魏</u>乂圍承甚急,該乃與湘州從事周崎間出反命,俱爲以所執,考之 武昌。甘安南少著勇名,士馬器械當今爲盛,聞與譙王剋期舉義。此乃烈士急病之秋,吾 敦挾陵上之心,今稱兵構逆,有危社稷之勢。。譙王宗室之望,據方州之重,建旗誓衆,圖襲 忠節士也。聞識王承立義湘州,甘卓又不同王敦之舉,而書檄不至,級謂該曰:「吾嘗疾王 致死之時也,汝其成吾之志,申款于譙王乎。」該欣然奉命,潛至湘州,與承相見,口陳至誠。 尉長史。 周該,天門人也。性果烈,以義勇稱。雖不好學,而率由名教。叔父級爲宜都內史,亦 周該

桓雄

者,進退有禮,知非凡人,有畏憚之色,因害之。 义所執,佐吏奔散,雄與西曹韓階、從事武延並毀服爲僮豎,隨承向武昌。 义見雄姿貌長 桓雄,長沙人也。 少仕州郡。 譙王承爲湘州刺史、命爲主簿。 王敦之逆,承爲敦將魏

韓階

愈固。 佐。 及承爲魏乂所執,送武昌,階與武延等同心隨從,在承左右。 韓階,長沙人也。 及承遇禍,階、延親營殯斂,送柩還都,朝夕哭奠,俱葬畢乃還。 性廉謹篤慎,爲閭里所敬愛。 刺史、譙王承辟爲議曹祭酒,轉西曹書 桓雄被害之後,二人執志

周崎

人所執,乂責崎辭情,臨以白刃。 崎曰:「州將使求援于外,本無定指,隨時制宜耳。」又謂崎 周崎、邵陵人也。爲湘州從事。王敦之難,譙王承使崎求救于外,與周該俱爲魏乂偵

清,外援理絕。 南已克武昌,卽日分遣大衆來赴此急,努力堅守,賊今散矣!以於是數而殺之。 曰:「汝爲我語城中,稱大將軍已破劉隗、戴若思,甘卓住襄陽,無復異議,三江州郡,萬里肅 如是者,我當活汝。」崎僞許之。旣到城下,大呼曰:「王敦 軍敗於于湖 甘安

易雄

者三,贼 斬之,雄 習律令及施行故事,交結豪右,州里稍稱之。仕郡,爲主簿。 易雄字興長,長沙瀏陽人也。少爲縣吏,自念卑賤,無由自達,乃脫幘挂縣門而去。 與賊 乃舍之。 爭論 曲直。賊怒,叱使牽雄斬之,雄趨出自若。 嗣由是獲免,雄遂知名。 舉孝廉,爲州主簿,遷別駕。自以門寒,不宜久 賊叉呼問之,雄對如初。 張昌之亂也,執太守萬嗣,將 因

慷慨 敦遣 數日 處上 能救國之難。 魏乂、李恒攻之,雄勉厲 之中,有衆千人,負糧荷戈而 ,神無懼 刺 史、譙 謝 職還家。 色。 王承旣距王敦,將謀起兵以赴朝廷。雄承符馳檄遠近,列敦罪惡,宣募縣境, 王室如燬,雄安用生爲!今日卽戮,得作忠鬼,乃所願也。」敦憚其辭正,釋 送到 後爲春陵令。 武昌,敦遣 所統,扞禦累旬,士卒死傷者相枕。力屈城陷,爲以所虜,意氣 從之。 人以檄示雄 承旣固守,而湘中殘荒之後,城池不完,兵資又闕。 而 製之。 雄曰:「此實有之,惜雄位微力弱,不

衆人皆賀,雄笑曰:「昨夜夢乘車,挂肉其傍。 夫肉必有筋,筋者斤也,車傍有斤,吾其

戮乎<u></u>]尋而敦遣殺之。當時見者,莫不傷惋。

樂道融

樂道融,丹楊人也。 少有大志,好學不倦,與朋友信,每約己而務周給,有國士之風。爲

王敦參軍。

聞卓已下兵,卓兄子卬時爲敦參軍,使卬求和於卓,令其旋軍。 統致討,又遣齎表詣臺。卓性不果決,且年老多疑,遂待諸方同進,出軍稽遲。 敦衆聞之,必不戰自散,大勳可就矣。」卓大然之,乃與巴東監軍柳純等露檄陳敦過逆,率所 道融勸卓曰:「將軍起義兵而中廢,爲敗軍之將,竊爲將軍不取。 若同之,豈不負義!生爲逆臣,死爲愚鬼,永成宗黨之恥邪!君當僞許應命,而 侯,而王氏擅權日久,卒見分政,便謂被奪耳。王敦背恩肆逆,舉兵伐主,國家待君至厚,今 敦佐,忿其逆節,因說卓曰:「主上躬統萬機,非專任劉隗。今慮七國之禍,故割湘州 一旦而還,恐不可得也。」卓不從。 敦將圖逆,謀害朝賢,以告甘卓。卓以爲不可,遲留不赴。敦遣道融召之。 道融畫夜涕泣諫阜、憂憤而死。 卓信之,將旋,主簿鄧騫 今將軍之下,士卒各求其 至猪口,敦 馳襲武昌, 道融雖爲 以削諸 與

虞悝

倫 爲己任。 **虞悝,長沙人也。** 少仕州郡,兄弟更爲治中、別駕。 弟望,字子都。 並有士操、孝悌廉信爲郷黨所稱,而俱好臧否,以人 元帝爲丞相,招延四方之士,多辟府掾,時人

謂之「百六掾」。望亦被召,恥而不應。

忿疾。 史,望爲司馬, 領馳: 王以宗子之親,奉信順 械 墨 日:「 絰 可 以濟 赴朝廷,而 卽 吾前被詔,遣鎭此州,正以王敦專擅,防其爲禍。 護王承臨州,知其名,檄悝爲長史。 宜且 大王不以猥劣,枉駕訪及,悝兄弟並受國恩,敢不自奮! 戎,况今鯨鯢塞路,王室危急,安得遂罔極之情,忘忠義之節乎!如今起事,將士器 不?」悝、望對曰:「王敦居分陝之任,一旦構逆,圖危社 一收衆固守,傳檄四方,其勢必分,然後圖之, 督護 衆少糧乏,且始到貴州,恩信未著。 諸軍 而 誅有罪,孰 不荷戈致命! 未到,遭母喪。 但鄙州荒弊, 卿兄弟南夏之翹儁,而智勇遠聞,古人 今墩果為逆謀, 吾受任一方, 欲率所 事可捷也。」承以爲然,乃命悝爲長 會王敦作逆,承往弔悝,因留與語 稷,此天地所 糧器空竭,舟艦寡 今天朝中興,人思晉德,大 不容,人神所 少,難以

湘東太守鄭澹,敦之姊夫也,不順承旨,遣望討之。 望率衆一旅,直入郡斬澹,以徇四

謂曰:「人生有死、闔門爲忠義鬼、亦何恨哉!」及|王敦平,贈悝襄陽太守, 及魏乂來攻,望每先登,力戰而死。 城破,悝復爲乂所執,將害之,子弟對之號泣, 望滎陽太守,遣謁 悝

沈勁

者至墓,祭以少牢。

沈勁字世堅,吳興武康人也。父充,與王敦構逆,衆敗而逃,爲部曲將吳儒所殺。 勁當

坐誅,鄉人錢舉匿之得免。 其後竟殺讎人。

義附 於鄉邦,貞固足以幹事。 義督羣心,人思自百,然方翦荆棘,奉宣國恩,艱難急病,非才不濟。 詔聽之。 王胡之深異之,及遷平北將軍、司州刺史,將鎮洛陽,上疏曰:「臣當藩衞山陵,式遏戎狄,雖 亦)動少有節操,哀父死于非義,志欲立勳以雪先恥。年三十餘,以刑家不得仕進。 衆。 勁旣應命,胡之以疾病解職。 勁父亢昔雖得罪先朝,然其門戶累蒙曠蕩,不審可得特垂沛然,許臣所上否。」 且臣今西,文武義故,吳興人最多,若令勁參臣府事者,見人旣悅, 吳興男子沈勁,清操著 那將

因 以 **勁補冠** 升平 中,慕容恪 軍 長史,令自募壯士,得千餘人,以助祐擊賊,頻以寡制衆。 侵逼 山陵。 時冠軍將軍陳祐守洛陽,衆不過二千,勁自表求配酤效力, 而糧

列 傅

第

五.

勁, 必爲後患。」遂遇害。 不能保全。 恪奇而 實有愧於四海。」朝廷聞而嘉之,贈東陽太守。 會許昌已沒,施因奔崖塢。 將宥之,其中軍將軍慕容虔曰:「勁雖奇士,觀其志度,終不爲人用。今若赦之, 會賊寇許昌,滿因以救許昌爲名,興寧三年,自己留勁以五百人守城,滿率衆 恪還,從容言於慕容暐曰:「前平廣固,不能濟辟閭,今定洛陽而殺沈 勁志欲致命,欣獲死所。尋爲恪所攻,城陷,被執,神氣自 子赤黔爲大長秋。赤黔子叔任,義熙中 而

吉挹

爲益州

刺史。

能謀,勇不能死,何忍君臣相隨北面事賊虜乎!」乃自殺。 吉挹字祖沖,馮翊蓮芍人也。 祖朗, 愍帝時爲御史中丞。 西朝不守, 朗歎曰:「吾智不

賊衆繼至,挹力不能抗,城將陷,引刃欲自殺,其友止之曰:「且苟存以展他計,爲計不立,死 未晚也。」挹不從,友人逼奪其刀。會賊執之,挹閉口不言,不食而死 郡 軍 事。 以距壓之功,拜員外散騎侍郎。 挹少有志節。 鍾率衆欲趣裏陽,挹又邀擊,斬五千餘級。 孝武帝初,苻堅陷梁益,桓豁表挹爲魏興太守,尋加輕車將軍,領晉昌太 苻堅將韋鍾攻魏興,挹遣衆距之,斬七百餘級,加督五 鍾怒,迴軍圍之,挹又屢挫其銳。 其後

浮河 擢授, 得還,自己齎挹 刃推戈,期之以隕,將 圍,經歷 **篤忠孝,乃心** 而 車騎將軍 自新 下,挹 時 月,會襄陽 野 本朝。 孤 太守轉在魏興。 臨終手 桓沖上言曰:「故輕車將軍、魏興太守吉挹祖朗,西臺傾覆,隕身守節。 城獨立 臣亡兄溫昔伐咸陽, 疏, 吏持守,用不 失守、邊 、衆無一 幷具 情沮 久處兵任,委以邊成, 疆場 旅,外摧凶銳, 說意狀。 即斃,遂 喪,加衆 挹之忠志, 軍次灞水,挹攜將二弟,單馬來奔,錄其此誠,仍加 乃杜 寡勢殊,以至 內固津要,廣賊舟船,俘馘千計。 口 無言,絕粒 **猶**在 一陷沒。 可錄。 歸懷,著稱所莅。 而 若蒙天地垂曲宥之恩,則 死。 挹辭氣慷慨, 志在 挹參軍史穎,近於賊 前 年狡氐縱逸, 丽 賊幷力攻 不辱,杖 挹 中

王諺

加枯朽,惠隆泉壤矣。」帝嘉之,追贈

益州刺

史。

侃遣人誘湛來詣諒所,諒敕從人不得入閤,旣前,執之。 |機) 任,敦謂曰:「修湛、梁碩皆國賊 自領 初, 王諒 交阯 新昌太守梁碩 字幼 太守, 成 丹楊 乃迎前刺史修 人也。 專威交土,迎立 少有 也, 則 幹略,為王 卿 子湛 至, 陶 便收 咸 行 州 爲 敦所擢,參其府 斬之。」諒 刺 事 史。 永 興 咸卒, 王敦 旣到境,湛退還 三年,敦以諒 碩時在坐,日:「湛故州將之子,有 事,稍遷武昌太守。 以王 爲 機 九眞。 交州 爲 刺 刺 史, 廣州 史。 碩 諒 發 刺 史陶 兵距 將 之

列

傳

刺之, 虐,一境患之,竟爲侃軍所滅,傳首京都。 與,遂斷諒右臂。 罪可遣,不足殺也。」諒曰:「是君義故,無豫我事。」卽斬之。 碩怒而出。 諒陰謀誅碩,使客 弗克, 遂率衆圍諒於龍編。 陶侃遣軍救之,未至而諒敗。 碩逼諒奪其節, 諒固執不 諒正色曰::「死且不畏,臂斷何有!」十餘日,憤恚而卒。 傾據<u>交</u>州,凶暴酷

宋矩

將 刎而死。 父事君,當立功與義, 苟功義不立, 麻秋攻大夏,護軍梁式自己執太守宋晏,以城應秋。秋遣晏以書致矩。矩旣至,謂秋曰:「辭 朱矩字處規,敦煌人也。 秋曰:「義士也」命葬之。 慷慨有志節。 當守名節。 重華嘉其誠節,贈振威將軍。 張重華據涼州地,以矩爲宛戍都尉。 矩終不背主覆宗,偸生於世。」先殺妻子,自 石季龍遣

車濟

不爲秋屈。 可殺,志不可移。」乃伏劍而死。脉歎其忠節,以禮葬之。 車濟字萬度,敦煌人也。 |秋必欲降之,乃臨之以兵。 果毅有大量。張重華以爲金城令,爲石季龍將麻秋所陷, 濟辭色不撓, 曰:「吾雖才 後重華迎致其喪,親臨慟哭,贈宜 非龐德, 而受任同之。 身

丁穆

京師,詣闕上之。 立屋宅,幷給其妻衣食,以終厥身。」 勁,義貫古烈。 軍、梁州刺史。 傾國南寇,穆與關中人士唱義,謀襲長安,事泄,遇害,臨死作表以付其妻周。 其後周 丁穆字彦遠,譙國人也。 受韶未發,會苻堅遣衆寇順陽,穆戰敗,被執至長安,稱疾不仕偽朝。 其喪柩始反,言尋傷悼。 孝武帝下詔曰:「故順陽太守、眞定侯丁穆力屈身陷,而誠節彌固,直亮壯 積功勞, 封眞定侯, 累遷爲順陽太守。 可贈龍驤將軍、雍州刺史,賻賜一依周虓故事。 太元四年,除振武將 得至 堅

叉

辛恭靖

垣 厲色曰:「我寧爲國家鬼,不爲羌賊臣。」興怒,幽之別室。 婦固守百餘日 而遁,歸于江東,安帝嘉之。 辛恭靖、隴西狄道人也。 ·,以 無救而陷,被執至長安。 少有器幹,才量過人。 桓玄請爲諮議參軍,置之朝首。 興謂之曰:「朕將任卿以東南之事, 隆安中,爲河南太守。 經三年, 葬而病卒。 至元興中, 會姚興來寇,恭 可乎。」 誑守者,乃踰 一恭靖

列

羅企生

脫理,策馬而去。 凝之請爲別駕。殷仲堪之鎭江陵,引爲功曹。 何恨!遵生抱之愈急。 何之。」企生揮淚曰:「今日之事,我必死之。 更以企生為諮議參軍。 「作如此分離,何可不執手」」企生迴馬授手,遵生有勇力,便牽下之,謂曰:「家有老母,將欲 成敗,天也,吾當死生以之。」仲堪果走,文武無送者,唯企生從焉。 羅企生字宗伯,豫章人也。多才藝。初拜佐著作郎,以家貧親老,求補臨汝令,刺史王 仲堪多疑少決,企生深憂之,謂弟遵生曰:「殷侯仁而無斷,事必無 仲堪於路待之,企生遙呼曰:「生死是同,願少見待。」仲堪見企生無 汝等奉養不失子道,一門之中有忠與孝,亦復 累遷武陵太守。未之郡而桓玄攻仲堪,仲堪 路經家門,遵生日:

謝!」玄卽收企生,遣人問欲何言,答曰:「文帝殺嵇康,嵇紹爲晉忠臣,從公乞一弟,以養老 取卿誠節,若遂不詣,禍必至矣。」企生正色曰:「我是殷侯吏,見遇以國士,爲弟以力見制, 厚,先遣人謂曰:「若謝我,當釋汝。」 企生曰:「爲殷荆州吏,荆州奔亡,存亡未判,何顏復 遂不我從,不能共殄醜逆,致此奔敗,亦何面目復就

桓求生乎」

」玄聞之大怒,然素待企生 玄至荆州,人士無不詣者,企生獨不往,而營理仲堪家。 或謂之曰:「玄猜忍之性,未能

不能翦滅凶逆,恨死晚也。」玄遂害之,時年三十七,衆咸悼焉。先是,玄以羔裘遺企生母胡 旣興晉陽之甲,軍次尋陽,並奉王命,各還所鎭,升壇盟誓,口血未乾,而生姦計。自傷力劣, 母。」玄許之。又引企生於前、謂曰:「吾相遇甚厚,何以見負? 今者死矣」」企生對曰:「使君

張禕

氏,及<u>企</u>生遇害,即日焚裘。

視息世間哉,不如死也!因自飲之而死。 帝之故吏,素所親信,封藥酒一甖付禕,密令鴆帝。。禪旣受命而歎曰:「鴆君而求生,何面目 張禪、口即吳郡人也。少有操行。恭帝爲琅邪王,以禪爲郎中令。及帝踐阼,劉裕以禪

君,天也,天可讎乎! 謂蘭桂異質而 之極,忠孝爲百行之先者乎!且良獨善其身,故得全其孝,而紹兼濟于物,理宜竭其忠,可 **祖甘赴危亡,所由之理雖同,所趣之塗卽異,而並見稱當世,垂芳竹帛,豈不以君父居在三** 史臣曰:中散以膚受見誅,王儀以抗言獲戾,時皆可謂死非其罪也。 齊芳,韶武殊音而並美。 安旣享其榮,危乃違其禍,進退無據,何以立人!嵇生之隕身全節,用 或有論紹者以死難獲譏,揚搉言之,未爲篤論。 偉元恥臣晉室,延

列傳

此道也。

贊曰: 重義輕生, 亡驅殉節。 勁松方操, 嚴霜比烈。 白刃可陵,貞心難折。 道光振古,

芳流來哲。

校勘記

[1] 乂與成都王穎交戰 「乂」,各本誤作「又」,今從宋本。 册府七二二亦作「乂」。

「恩」,各本作「思」,今從宋本。無府七一三亦作「恩」。

聖恩博遠

レドレ 未知所限 「限」,各本作「恨」,今從殿本。

四四 王瑚 「瑚」,各本作「湖」。。校文:據王隱傳、馬隆傳當作「瑚」。按:通鑑八五亦作「瑚」,今據改。

フガン 衞博 通鑑八五作「衙博」。華陽國志八、廣韻九麻皆有「衙博」。

ハベン 馮翊太守緯 通鑑八八「緯」作「肅」。

いより 趙染 愍紀、劉琨傳作「趙冉」。

青白城 參卷五校記。

杜令 料注:「杜」下當脫「陵」字。

願以身代君 通志一六六「君」上有「使」字。 記

於賊中得還 各本均無「還」字,局本有,蓋據通志一六六補,今從之。

梁式 「式」,各本作「彧」,唯宋本作「式」,與張重華傳、通鑑九七合,今從之。

[12] 張禕 通鑑一一九作「張偉」。

晉書卷九十

列傳第六十

良吏

13,或吏不敢欺,或人懷其惠,或敎移齊魯,或政務寬和,斯並惇史播其徽音,良吏以爲準 唯良二千石乎!此則長吏之官實爲撫導之本。是以東里相鄭,西門宰鄴,潁川黃霸,蜀郡文 漢宣帝有言:「百姓所以安其田里而無歎息愁恨之心者,政平訟理也。與我共此者,其

的。日

明威 膺百王之大寶,勞心庶績,垂意黎元,申敕守宰之司,屢發憂矜之詔,辭旨懇切,誨 欲使直道正身,抑末敦本。 未能厲俗,政刑以之私謁,賄賂於此公行,結綬者以放濁爲通,彈冠者以苟得爲貴,流 有晉肇茲王業,光啓霸圖,授方任能,經文緯武。 當此時也,可謂農安其業,吏盡其能者歟!而帝寬厚足以君人, 泰始受禪,改物君臨,纂三葉之鴻基, 諭 殷勤,

列傳第六十

良吏

之胄,遂使良能之績僅有存焉。 權偪是憂,故羈縻成俗。莅職者爲身擇利,銓綜者爲人擇官,下僚多英儁之才,勢位必高門 州鼎沸,逮於江左,晉政多門,元帝比少康之隆,處仲爲梗,海西微昌邑之罪,元子亂常,旣 內難方殷,而匡救彌縫,方**発傾覆,弘風革弊,彼則未遑。今**采其政績可稱者,以爲良吏傳。 遁忘反,寖以爲常。 劉毅抗賣官之言,當時以爲矯枉,察其風俗,豈虛 雖復茂弘以明允贊經綸,安石以時宗鎭雅俗,然外虞孔熾, 避也哉! 爱及惠懷,中

之。 守,三遷尚書郎。 曹眞掾,轉臨淄侯文學。 勉以黃霸之美,加討寇將軍。 境悉復。 轉天水太守。 乃移居雍, 耽思墳籍。郡舉上計吏, 州辟別駕。魏車騎將軍郭淮爲雍州刺史, 深敬重 舉孝廉,除郞中。 魯芝宇世英,扶風郿人也。世有名德,爲西州豪族。父爲郭氾所害,芝襁褓流離,年十 魯芝 遷廣平太守。 郡鄰于閩,數被侵掠,戶口減削,寇盜充斥,芝傾心鎭衞,更造城市,數年間舊 曹眞出督關右,又參大司馬軍事。眞薨,宣帝代焉,乃引芝參驃騎軍事, 會蜀相諸葛亮侵隴右,淮復請芝爲別駕。事平,薦於公府,辟大司馬 天水夷夏慕德,老幼赴闕獻書,乞留芝。 鄭袤薦於司空王朗,朗卽加禮命。後拜騎都尉、參軍事、行安南太 魏明帝許焉,仍策書嘉歎,

能用,遂委身受戮。 子保許昌,杖大威以羽檄徵四方兵,孰敢不從!拾此而去,欲就東市,豈不痛哉!」爽愞惑不 斬 而起爲使持節、領護匈奴中郎將、振威將軍、幷州刺史。 關 ,馳出赴爽,勸爽曰:「公居|伊周之位,一旦以罪見黜,雖欲牽黃犬,復可得乎! 曹爽輔政,引爲司馬。芝屢有讜言嘉謀,爽弗能納。及宣帝起兵誅爽,芝率餘衆犯門 。芝坐爽下獄,當死,而口不訟直,志不苟免。 以綏緝有方,遷大鴻臚。 宣帝嘉之,赦而 不誅。俄 若挾天

爵武進亭侯,又增邑九百戶。遷大尚書,掌刑理。 州刺史。諸葛誕以壽春叛,文帝奉魏帝出征,徵兵四方,芝率荆州文武以爲先驅。 高貴鄉公卽位,賜爵關內侯,邑二百戶。毌丘儉平,隨例增邑二百戶,拜揚武將軍、荆 誕平,進

常道鄉公即位,進爵斄城鄉侯,又增邑八百戶,遷監青州諸軍事、振武將軍、靑州刺史,

轉平東將軍。五等建,封陰平伯。

馬。羊祜爲車騎將軍,乃以位讓芝,曰:「光祿大夫魯芝潔身寡欲,和而不同,服事華髮,以 禮終始,未蒙此選,臣更越之,何以塞天下之望!」上不從。 其爲人所重如是。 |芝以年及懸車,告老遜位,章表十餘上,於是徵爲光祿大夫,位特進,給吏卒,門施行 **武**府踐阼,轉鎭東將軍,進爵爲侯。帝以|芝清忠履正,素無居宅,使軍兵爲作屋五十

泰始九年卒,年八十四。 帝爲舉哀、赗贈有加、諡曰貞、賜塋田百畝。

第六十

良吏

胡威

之。後因他信以白質,質杖都督一百,除吏名。其父子淸愼如此。於是名譽著聞。 百餘里,要威爲伴,每事佐助。行數百里,威疑而誘問之,旣知,乃取所賜絹與都督,謝而遣 「是吾俸祿之餘,以爲汝糧耳。」威受之,辭歸。質帳下都督先威未發,請假還家,陰資裝於 父,停廏中十餘日。告歸,父賜絹一匹爲裝。|威曰:「大人淸高,不審於何得此絹。]質曰: 貧,無車馬僮僕,自驅驢單行。 每至客舍,躬放驢,取樵炊爨,食畢,復隨侶進道。 旣至,見 名於江淮間,仕魏至征東將軍、荆州刺史。威早厲志尙。質之爲荆州也,威自京都定省,家 胡威字伯武,〔1〕一名。魏、淮南壽春人也。父質,以忠淸著稱,少與鄉人蔣濟、朱績俱知

拜侍御史,歷南鄉侯、安豐太守,遷徐州刺史。 勤於政術,風化大行。

婉,謙而順。累遷監豫州諸軍事、右將軍、豫州刺史,入爲尙書,加奉車都尉。 「卿父以何爲勝耶。」對曰:「臣父淸恐人知,臣淸恐人不知,是臣不及遠也。」帝以威言直而 後入朝,武帝語及平生,因歎其父清,謂威曰:「卿孰與父清。」對曰:「臣不如也。」帝曰:

正謂如臣等輩,始可以肅化明法耳。」拜前將軍、監靑州諸軍事、靑州刺史,以功封平春侯。 |威嘗諫時政之寬,帝曰:「尙書郞以下,吾無所假借。」||威曰:「臣之所陳,豈在丞郞令史,

太康元年,卒于位,追贈使持節、都督青州諸軍事、鎭東將軍,餘如故,諡曰烈。 |奕字次孫,仕至平東將軍。 威弟縢,字季象,亦有幹用,仕至益州刺史、安東將軍 子奕嗣。

杜軫

機,輒自出官舍以俟君子。」弘器之,命復爲功曹,軫固 也。」太守乃出。 功曹史。 杜軫字超宗,蜀郡成都人也。父雄,縣竹令。 時鄧艾至成都,軫白太守曰:「今大軍來征,必除舊布新,明府宜避之,此全福之道, 軫師事譙周,博涉經書。 州辟不就,爲郡

軫 無所受, 察孝 ,廉,除建寧令,導以德政,風化大行,夷夏悅服。 去 如初至。 又除池陽令,爲雍州十一郡最。 秩滿將歸,羣蠻追送,賂遺甚多, 百姓生爲立祠,得罪 者無怨言。

累遷尙書郞。

莫能 踰 幓 博聞 之,號蜀 廣涉 有二郎。軫後拜犍爲) 奏議駁論多見施用。 太守,甚有聲譽。 時陪人李驤亦爲尚書郎,與軫 當遷,會病卒,年五 齊名,每有論議,朝 十 0 子毗 廷

南渡江,王敦 毗 字長基。州舉 表爲益州刺史,將與宜都太守柳純共固白帝。 秀才,成都王穎辟大將軍掾,遷尚 一書郎,參太傅軍事。 杜弢遣軍 要毗,遂遇害 及洛陽覆沒,毗

列

毗弟秀,字彥穎,爲羅尚主簿。州沒,爲氐賊李驤所得,欲用爲司馬。秀不受,見害。

毗次子歆,舉秀才。

兄子幼弱,求去官,詔轉犍爲太守,蜀土榮之。 烈弟良,舉秀才,除新都令、涪陵太守,不就,補州大中正,卒。 後遷湘東太守、爲成都王穎郎中令,病卒。

竇允

冰令。克己厲俗,改修政事,士庶悅服,咸歌詠之。遷鉅應太守,甚有政績。卒於官。 以修勤清白見稱河右。是輩當擢用,使立行者有所勸。主者詳復參訪,有以旌表之。」拜臨 己,然後在公之節乃全。身善有章,雖賤必賞,此興化立敎之務也。謁者實允前爲浩亹長, 勤於爲政,勸課田蠶,平均調役,百姓賴之。遷謁者。泰始中,詔曰:「當官者能潔身修 察孝廉,除浩亹

王宏

王宏字正宗,高平人、魏侍中粲之從孫也。魏時辟公府、累遷尚書郎、歷給事中。 泰始

使聞知。」 更未能盡勤,至使地有遺利而人有餘力,每思聞監司糾舉能不,將行其賞罰,以明沮勸。今 念在於農。雖詔書屢下,敕厲殷勤,猶恐百姓廢惰以損生植之功。而刺史、二千石、百里長 初,爲汲郡太守,撫百姓如家,耕桑樹藝,屋宇阡陌,莫不躬自敎示,曲盡事宜,在郡有殊績。 不減。比年普饑,人食不足,而宏郡界獨無匱乏,可謂能矣。其賜宏穀千斛,布告天下,咸 司 司隸校尉石鑒上其政術,武帝下詔稱之曰:「朕惟人食之急,而懼天時水旱之運,夙夜警戒, 隸校尉石鑒上汲郡太守王宏勤恤百姓,導化有方,督勸開荒五千餘頃,而熟田常課頃畝

常遣左右微行,觀察風俗,宏緣此復遣吏科檢婦人和服,至褰發於路。 由是獲譏於世,復坐冤官。 太康中,代劉毅爲司隸校尉,於是檢察士庶,使車服異制,庶人不得衣紫絳及綺繡錦繢。帝 中,餓不與食,又擅縱五歲刑以下二十一人,爲有司所劾。 俄遷衞尉、河南尹、大司農,無復能名,更爲苛碎。 坐桎梏罪人,以泥墨塗面,置深坑 後起爲尙書。 太康五年卒,追贈太常。 帝以宏累有政績,聽以贖罪論。 論者以爲暮年謬妄,

曹攄

字顏遠,譙國譙人也。 祖肇,魏衞將軍。

器之,調補臨淄令。 日,相率而還,並無違者,一縣歎服,號曰聖君。入爲尚書郎,轉洛陽令,仁惠明斷, 所,如何?新歲人情所重,豈不欲暫見家邪。」衆囚皆涕泣曰:「若得暫歸,死無恨也。」 攄悉開 冤,更加辨究,具得情實,時稱其明。 曰:「宮掖禁嚴,非外人所敢盜,必是門士以燎寒耳。」詰之,果服。 以病去官。復爲洛陽令。 獄出之,剋日令還。 密自殺。 時天大雨雪,宮門夜失行馬,羣官檢察,莫知所在。 及齊王冏輔政,攄與左思俱爲記室督。冏嘗從容問攄曰:「天子爲賊臣所逼,莫有能 親黨告婦殺姑,官爲考鞫,寡婦不勝苦楚,乃自誣。 掾吏固爭,咸謂不可。 縣有寡婦,養姑甚謹。姑以其年少,勸令改適,婦守節不移。 獄有死囚,歲夕,攄行獄,愍之,曰:「卿等不幸致此 據曰:「此雖小人,義不見負,自爲諸君任之。」至 獄當決,適值攄到。 | 捷知其有 姑愍之, 百姓懷

之。 衰,非唯人事,抑亦天理。 竊預下問,敢不盡情。 願大王居高慮危,在盈思沖,精選百官,存 時襄城屢經寇難,攄綏懷振理,旬月克復。 **尋轉中書侍郎,長沙王以以爲驃騎司馬。以敗,免官。因丁母憂。|惠帝末,起爲襄城太守。** 公屛欲,舉賢進善,務得其才,然後脂車秣馬,高揖歸藩,則上下同慶,攄等幸甚。」問不納。 「蕩平國賊,匡復帝祚,古今人臣之功未有如大王之盛也。 然道罔隆而不殺,物無盛而不 吾率四海義兵興復王室,今入輔朝廷,匡振時艱,或有勸吾還國,於卿意如何。」據曰:

邑。 獨與道戰于酈縣,軍敗死之。 簡遣參軍崔曠討之,令攄督護曠。 永嘉二年,高密王簡鎭襄陽,以攄爲征南司馬。其年流人王逌等聚衆屯冠軍,寇掠城 故吏及百姓並奔喪會葬、號哭卽路,如赴父母焉。 **曠**,姦凶人也,譎墟前戰, 期爲後繼,旣 而 不 至。 攄

潘京

武陵 作文,使詣京師,以爲永式。 類。 刺史戲京曰:「辟士爲不孝邪。」京舉版答曰:「今爲忠臣,不得復爲孝子。」其機辯皆此 多號。 後太廟立,州郡皆遣使賀,京白太守曰:「夫太廟立,移神主,應問訊,不應賀。」遂遣京 ·] 京曰:「鄙郡本名義陵,在辰陽縣界,與夷相接,數爲所攻,光武時移東出,遂得全完, 潘京字世長,武陵漢壽人也。弱冠,郡辟主簿,太守趙廞甚器之,嘗問曰:「貴郡何以名 傳曰止戈爲武,詩稱高平曰陵,於是名焉。」爲州所辟,因謁見問策,探得「不孝」

與原共談,原假借之,倡以爲不如己,笑而遣之,令過其子若思,原方極其言論。 乃歎服曰 人,恨不學耳。 京仍舉秀才,到洛。 「才不可假。」遂父子俱屈焉。 若學,必爲一代談宗。」「京處其言,遂勤學不倦。 尚書令樂廣,京州人也,共談累日,深歎其才,謂原曰:「君天才過 歷巴丘、邵陵、泉陵三令。 時武陵太守戴昌亦善談論, 原明於政術,路不拾遺。 昌竊聽之,

列傳第六十 良吏

遷桂林太守,不就,歸家,年五十卒。

范晷

守,甚有政能,善於綏撫,百姓愛悅之。徵拜少府,出爲凉州刺史,轉雍州。于時西土荒毀, 氐羌蹈藉, 田桑失收, 百姓困弊, 晷傾心化導, 勸以農桑, 所部甚賴之。 元康中, 加左將軍, 太守裴楷雅知之,薦爲侍御史。調補上谷太守,遭喪,不之官。後爲司徒左長史,轉馮翊太 范晷字彦長,南陽順陽人也。少游學淸河,遂徙家僑居。郡命爲五官掾,歷河內郡丞。

卒於官。二子:廣、雅。

械。後大旱,米貴,廣散私穀振饑人,至數千斛,遠近流寓歸投之,戶口十倍。卒於官。 賊艱急,終不棄之。

元帝承制,以爲堂邑令。丞劉榮坐事當死,郡劾以付縣。

榮即縣人,家 有老母,至節,廣輒聽暫還,榮亦如期而反。縣堂爲野火所及,榮脫械救火,事畢,還自著 廣字仲將。舉孝廉,除靈壽令,不之官。姊適孫氏,早亡,有孫名邁,廣負以南奔,雖盜 雅少知名,辟大將軍掾,早卒。子汪,別有傳。

丁紹

行。 紹,啓轉爲冀州刺史。到鎭,率州兵討破汲桑有功,加寧北將軍、假節、監冀州諸軍事。 圍,南陽王模窘急,紹率郡兵赴之,模賴以獲全。模感紹恩,生爲立碑。 境內羯賊爲患,紹捕而誅之,號爲嚴肅,河北人畏而愛之。 戀慕,攀附如歸。未之官,復轉荆州刺史。從車千乘,南渡河至許。時南陽王模爲都督,留 于時河北騷擾,靡有完邑,而廣平一郡四境乂安,是以皆悅其法而從其令。 丁紹字叔倫,四譙國人也。少開朗公正,早歷清官。爲廣平太守,政平訟理,道化大 遷徐州刺史,士庶 及臨漳被

海之志矣。是時王浚盛於幽州,苟晞盛於青州,然紹視二人蔑如也。 臨終數曰:「此乃天亡冀州,豈吾命哉」」懷帝策贈車騎將軍。 紹自以爲才足爲物雄,當官莅政,每事克舉,視天下之事若運於掌握,遂慨然有董正四 永嘉三年,暴疾而卒,

喬智明

君」。 兼陰縱之。 輔 喬智明字元達,鮮卑前部人也。少喪二親,哀毁過禮,長而以德行著稱。成都王穎辟 國將軍。 部 人張兒爲父報仇,母老單身,有妻無子,智明愍之,停其獄。 人有勸兌逃者,兌曰:「有君如此,吾何忍累之!縱吾得免,作何面目視息世 穎之敗趙王倫也,表智明爲殄寇將軍、隆慮、共二縣令。 二縣愛之,號爲「神 歲餘,令兄將妻入獄,

間」於獄產一男。會赦,得免。其仁感如是。

共事之義,正若此乎。」智明乃止。 曰:「卿名曉事,投身事孤。主上爲羣小所逼,將加非罪於孤, 惠帝之伐鄴也,穎以智明爲折衝將軍、參丞相前鋒軍事。 尋屬永嘉之亂,仕於劉曜。 卿奈何欲使孤束手就刑邪 智明勸穎奉迎乘輿,穎大怒 1

鄧攸

南也。 簿。 斷其盤囊。〔至〕占者以爲水邊有女,汝字也,斷盤囊者,新獸頭代故獸頭也,不作汝陰,當汝 賈充伐吳,請殷爲長史。後授皇太子詩,爲淮南太守。夢行水邊,見一女子,猛獸自後 鄧攸字伯道,平陽襄陵人也。 果遷汝陰太守。 後爲中庶子。 祖殷, 亮直强正。 鍾會伐蜀,奇其才,自黽池令召爲主

同居。 必也使無訟乎」混奇之,以女妻焉。 不可改也。」嘗詣鎭軍賈混,混以人訟事示攸,使決之。 **攸七歲喪父,尋喪母及祖母,居喪九年,以孝致稱。清和平簡,貞正寡欲。** 越欽其爲人,轉爲世子文學、東部郎。 初,祖父殷有賜官,敕攸受之。後太守勸攸去王官,欲舉爲孝廉,攸曰:「先人所賜, 舉灼然二品,爲吳王文學,歷太子洗馬、 越弟騰爲東中郎將,請攸爲長史。 攸不視, 曰:「孔子稱聽訟吾猶 東海王越參 少孤, 出爲河東 人也, 與弟

太守。

暮及。 先與他比舍,重他名操,因稱他于嘞。 乃攸 陰遺攸馬驢,諸胡莫不歎息宗敬之。 攸度不可與爭,遂對以弟婦散發溫酒爲辭。 西,置攸車營中。 理不可絕,止應自棄我兒耳。 賊,掠其牛馬,步走,擔其兒及其弟子**綏**。 爲 永 郎 嘉 明日,攸繫之於樹而去。 時幹、識 末,沒于石勒。 勒夜禁火,犯之者死。 攸) 攸求紙 然勵宿忌諸官長二千石,聞攸在 筆作 幸而得存,我後當有子。」妻泣而從之,乃棄之。其子朝棄而 辭。 石勒過泗水,攸乃斫壞車,以牛馬負妻子而 幹候 **南召至幕下,與語,悅之,以爲參軍,給** |攸與胡鄰轂, 胡夜失火燒車。 度不能兩全,乃謂其妻曰:「吾弟早亡,唯有一 、

動

赦

之
。 動和悅,致之。 旣而胡人深感, 一營,馳召, 勒 重 其辭,乃勿殺。 將殺之。 更按問, 車 攸至門, 勒長 馬。 胡 逃。 明攸, 乃誣 史 勒 門幹 張 叉遇 息, 毎

他。 丞、長水校尉,皆不果就。後密捨矩去,投荀組於許昌,矩深恨焉,久之,乃送家屬還攸。 攸 至新鄭,投李矩。三年,將去,而矩不聽。 載 散 米之郡,俸祿無所受,唯飮吳水而已。 騎 常侍桓彝、虞駿慰勞饑人,觀聽善不,乃劾攸以擅出穀。 荀組以爲陳郡、汝南太守,愍帝徵爲尚書左 時郡中大饑,攸表振貸,未報,乃輒開倉救 俄而 有韶原之。

列

傅

部尚書。 鳴天欲曙。 在郡刑政清明,百姓歡悅,爲中興良守。後稱疾去職。 百姓數千人留牽攸船,不得進,攸乃小停,夜中發去。吳人歌之曰:「紞如打五鼓,鷄 蔬食弊衣,周急振乏。 鄧侯拖不留,「云謝令推不去。」百姓詣臺乞留一歲,不聽。拜侍中。歲餘,轉吏 性謙和,善與人交,賓無貴賤,待之若一,而頗敬媚權貴。 郡常有送迎錢數百萬,攸去郡,不受

病出拜。 尚白|敦兵數。帝聞而未之信,轉|攸爲太常。時帝南郊,|攸病不能從。 初,王敦伐都之後,中外兵數每月言之於敦。|攸已出在家,不復知護軍事,有惡|攸者,誣|攸 永昌中,代周顗爲護軍將軍。太寧二年,王敦反,明帝密謀起兵,乃遷攸爲會稽太守。 咸和元年卒,贈光祿大夫,加金章紫綬,祠以少牢。 有司奏他不堪行郊而拜道左,坐免。他每有進退,無喜慍之色。久之,遷尚書右 車駕過攸問疾,攸力

道無知,使鄧伯道無兒。」弟子鮾服攸喪三年。 乃||他之甥。||攸素有德行,聞之感恨,遂不復畜妾,卒以無嗣。 時人義而哀之,爲之語曰:「天 |攸棄子之後,妻不復孕。過江,納妾,甚寵之,訊其家屬, 說是北人遭亂, 憶父母姓名,

吳隱之

吳隱之字處默,濮陽鄄城人,魏侍中質六世孫也。 隱之美姿容,善談論,博涉文史,以

至哭臨之時,恒有雙鶴警叫,及祥練之夕,復有羣雁俱集,時人咸以爲孝感所至。 餘,丁父憂,每號泣,行人爲之流涕。 儒雅標名。弱冠而介立,有淸操,雖日晏歠菽,不饗非其栗,儋石無儲,不取非其道。年十 事母孝謹,及其執喪,哀毀過禮 家貧,無人鳴鼓,每

菹,以其味旨,掇而棄之。

泣。 賜皆班親族,冬月無被,嘗澣衣,乃披絮,勤苦同於貧庶。 貌類簡文帝,乃止。尋守廷尉、祕書監、御史中丞,領著作如故,遷左衞將軍。雖居淸顯,祿 中書侍郎、國子博士、太子右衞率,轉散騎常侍,領著作郎。孝武帝欲用爲黃門郎,以隱之 矜而釋之。遂爲溫所知賞,拜奉朝請、尚書郎,累遷晉陵太守。 在郡淸儉,妻自負薪。 入爲 **褐輔國功曹,轉參征虜軍事。兄坦之爲袁眞功曹,眞敗,將及禍,隱之詣桓溫,乞代兄命,溫** 旣而謂康伯曰:「汝若居銓衡,當舉如此輩人。」及康伯爲吏部尚書,隱之遂階淸級,解 與太常韓康伯鄰居,康伯母,殷浩之姊,賢明婦人也,每聞隱之哭聲,輟餐投筯,爲之悲

軍、廣州刺史、假節,領平越中郎將。未至州二十里,地名石門,有水曰貪泉,飲者懷無厭之 立者,求補長史,行立故前後刺史皆多黷貨。朝廷欲革嶺南之弊,隆安中,以隱之爲龍驤將 隱之旣至,語其親 廣州包帶山海,珍異所出,一篋之寶,可資數世,然多瘴疫,人情憚焉。 唯貧窶不能自 人曰:「不見可欲,使心不亂。越臟喪淸,吾知之矣。」乃至泉所,酌而

列傳

菲已潔素,儉愈魚飱。 夫處可欲之地,而能不改其操,饗惟錯之富,而家人不易其服,革奢 務嗇,南域改觀,朕有嘉焉。可進號前將軍,賜錢五十萬、穀千斛。」 魚,每剔去骨存肉,隱之覺其用意,罰而黜焉。 元興初,詔曰:「夫孝行篤於閨門,淸節厲乎 厲,常食不過菜及乾魚而已,帷帳器服皆付外庫,時人頗謂其矯,然亦終始不易。 飲之,因賦詩曰:「古人云此水,一歃懷千金。 風霜,實立人之所難,而君子之美致也。 龍驤將軍、廣州刺史吳隱之孝友過人,祿均九族, 試使夷齊飲,終當不易心。」及在州,清操踰 帳下人進

裁留身糧,其餘悉分振親族,家人績結以供朝夕。時有困絕,或幷日而食,身恒布衣不完, 妻子不霑寸祿 辭。尋拜度支尚書、太常,以竹篷爲屛風,坐無氊席。後遷中領軍,清儉不革,每月初得祿, 無餘資。及至,數畝小宅,籬垣仄陋,內外茅屋六間,不容妻子。劉裕賜車牛,更爲起宅,固 以隱之黨附桓玄,宜加裁戮,詔不許。劉裕與循書,令遣隱之還,久方得反。歸舟之日,裝 火,焚燒三千餘家,死者萬餘人,城遂陷。隱之攜家累出,欲奔還都,爲循所得。隨表朝廷, 及盧循寇南海,隱之率厲將士,固守彌時,長子曠之戰沒。循攻擊百有餘日,踰城放

年,卒,追贈左光祿大夫,加散騎常侍。隱之淸操不渝,屢被褒飾,致事及於身沒,常蒙優錫 義熙八年,請老致事,優詔許之,授光祿大夫,加金章紫綬,賜錢十萬、米三百斛。九

顯贈,廉士以爲榮。

乃令移廚帳助其經營。 初,隱之爲奉朝請,謝石請爲衞將軍主簿。 使者至,方見婢牽犬賣之,此外蕭然無辦。 隱之將嫁女,石知其貧素,遺女必當率薄, 後至自番禺,其妻劉氏

齎沈香一斤,隱之見之,遂投於湖亭之水。

子延之復厲淸操,爲鄱陽太守。 延之弟及子爲郡縣者,常以廉愼爲門法, 雖才學不逮

隱之,而孝悌潔敬猶爲不替。

乎!斯豈慈父仁人之所用心也。卒以絕嗣,宜哉!勿謂天道無知,此乃有知矣。 曹氏,犯門斬關,宣帝收雷霆之威,獎忠貞之烈,豈非旣已在我,欲其駡人者歟! 伯武之潔己克勤,顏遠之申寃緩獄,鄧攸贏糧以述職,吳隱酌水以厲清,晉代良能,此焉爲 而收棄子存姪,以義斷恩,若力所不能,自可割情忍痛,何至預加徽纆,絕其奔走者 史臣曰:魯芝等建旟剖竹,布政宣條,存樹威恩,沒留遺愛,咸見知明主,流譽當年。若 世英盡節

贊曰:猗歟良宰,嗣美前賢。威同御點,靜若烹鮮。唯嘗吳水,但挹食泉。人風旣偃,

俗化斯遷。

校勘記

- [一] 良吏以為準的 「良吏」,各本均作「良能」,今從宋本。
- 行安南太守 周校:地理志無安南郡、秦州有南安郡、故下就近轉天水太守、當作「南安」。
- 伯武 **斠注:魏志胡質傳注、世說德行注引晉陽秋均作「伯虎」,此唐人避諱改。** 按: 通志一七
- 〇亦作「伯虎」。
- 丁紹 考證:「紹」」南陽王模傳作「邵」。 校文:東海王越傳作「劭」。
- 八五山 盤囊 | 斠注: 書鈔七六引王隱晉書作「鞶囊」。按: 御覽六九一引亦作「鞶囊」。 鞶囊見班固典

資將軍牋及東觀漢記,詳桂馥礼樸。

八 六 山

鄧侯拖不留

- 続集八六「拖不留」作「挽不來」,局本蓋從通志一七○改。 局本作「拖」,宋本、殿本及御覽二六一、四六五引並作「挽」,職官分紀四一、樂府
- [4] 求補長史 「長史」,李校:當作「長吏」。

晉書卷九十一

列傳第六十一

儒林

嚴是古之法,抵挾書之罪,先王徽烈,靡有孑遺。漢祖勃興,救焚拯溺,粗修禮律,未遑俎 秦,旣抗禮於邦君,亦馳聲於海內。及嬴氏慘虐,棄德任刑,煬墳籍於埃塵,塡儒林於坑穽, 然嚮風,餘芳遺烈,煥乎可紀者也。 擢賢良之舉,莫不紆靑拖紫,服冕乘軒,或徒步而取公卿,或累旬以膺台鼎,故搢紳之士靡 豆。逮于孝武,崇尙文儒。爰及東京,斯風不墜。於是傍求蠹簡,博訪遺書,創甲乙之科, 至,傷麟出之非時,於是乃删詩書,定禮樂,贊易道,修春秋,載籍逸而復存,風雅變而還 其後上商、衞賜、田、吳、孫、孟之儔,或親稟微言,或傳聞大義,猶能强晉存魯,藩魏卻 昔周德旣衰,諸侯力政,禮經廢缺,雅頌陵夷。夫子將聖多能,固天攸縱,歎鳳鳥之不 **洎當塗草創,深務兵權,而主好斯文,朝多君子,鴻儒**

列傅

碩學,無乏於時。

秩宗、雖媿明揚、亦非遐棄。 旣而|荆|楊底定、區寓乂安、羣公草封禪之儀、天子發謙沖之詔、 等名位旣隆,自有列傳,其餘編之于左,以續前史儒林云。 章弛廢,名教穨毁,五胡乘間而競逐,二京繼踵以淪胥,運極道消,可爲長歎息者矣。鄭沖 崇飾華競,祖述虛玄,擯闕里之典經,習正始之餘論,指禮法爲流俗,目縱誕以淸高,遂使憲 敦悅丘墳,乃招集學徒,弘獎風烈,並時艱祚促,未能詳備。「有晉始自中朝,迄於江左,莫不 成禮度。雖尊儒勸學亟降於綸言,東序西膠未聞於弦誦。明皇聰睿,雅愛流略,簡文玄嘿, 亂弘多,衣冠禮樂,掃地俱盡。 |元帝運鍾百六,光啓中興,賀、凊、l刁、杜諸賢並稽古博文,財 未足比隆三代,固亦擅美一時。 臨幸辟雍。而荀顗以制度贊惟新,鄭沖以儒宗登保傅,茂先以博物參朝政,子眞以好禮居 武帝受終,憂勞軍國、時旣初幷庸濁,方事江湖,訓卒厲兵,務農積穀,猶復修立學校, 惠帝纘戎,朝昏政弛,釁起宮掖,禍成藩翰。惟懷逮愍,喪

范平

該百氏,姚信、賀邵之徒皆從受業。吳時舉茂才,累遷臨海太守,政有異能。孫晧初,謝病 范平字子安,吳郡錢塘人也。其先銍侯馥,避王莽之亂適吳,因家焉。平研覽墳素,遍

還家,敦悅儒學。吳平,太康中,頻徵不起,年六十九卒。 有韶追加諡號曰文貞先生,賀循

勒碑紀其德行。

來讀者恒有百餘人,獻爲辦衣食。 嶎子文才,亦幼知名。 三子: 奭、咸、泉,並以儒學至大官。 泉子廚,關內侯。 家世好學,有書七千餘卷。 遠近

文立

陰,政事修明。後事東宮,盡輔導之節。 陳壽、李虔爲游夏,羅憲爲子貢。仕至尚書。蜀平,舉秀才,除郎中。泰始初,拜濟陰太守, 心,其次傾吳人之望,事皆施行。詔曰:「太子中庶子」文立忠貞淸實,有思理器幹。 入爲太子中庶子。上表請以諸葛亮、蔣琬、費禕等子孫流徙中畿,宜見敍用,一以慰巴蜀之 而濟殊方也。 文立字廣休,巴郡臨江人也。 其以立爲散騎常侍。」 蜀時游太學,專毛詩、三禮,師事譙周,門人以立爲顏回, 昔光武平隴蜀,皆收其賢才以敍之,蓋所以拔幽 前在濟

年垂八十,稟性謙退,無復當時之望,不以上聞耳。」瓊聞之曰:「廣休 也。」時西域獻馬,帝問立:「馬何如?」對曰:「乞問太僕。」帝善之。 蜀故尚書犍爲程瓊雅有德業,與立深交。 武帝聞其名,以問立,對曰:「臣至知其人,但 遷衞尉。 可謂不黨矣,故吾善夫 咸寧末,卒。

二三四八

所著章奏詩賦數十篇行於世。

陳邵

周禮評,甚有條貫,行於世。 通六籍,耽悅典誥,老而不倦,宜在左右以篤儒敎。 陳邵字節良,東海襄賁人也。郡察孝廉,不就。 泰始中,詔曰:「燕王師陳邵淸貞潔靜,行著邦族,篤志好古,博 可爲給事中。」卒於官。 以儒學徵爲陳留內史,累遷燕王師。撰

虞喜

古。 懷帝卽位,公車徵拜博士,不就。 諸葛恢 <u>虞</u>喜字仲寧,會稽餘姚人,光祿潭之族也。 父察,吳征虜將軍。 喜少立操行,博學好 臨郡,屈爲功曹。 察孝廉,州舉秀才,司徒辟,皆不就。 **喜邑人賀循爲司空,先達貴顯,每詣唐,信宿忘歸,自** 元帝初鎭江左, 上疏薦

操,歲寒不移,研精墳典,居今行古,志操足以勵俗,博學足以明道,前雖不至,其更以博士 也。 太寧中,與臨海任旭俱以博士徵,不就。 喪亂以來,儒雅陵夷,每覽子於之詩,未嘗不慨然。 復下詔曰:「夫興化致政,莫尚乎崇道教,明退 臨海任旭、會稽虞喜並潔靜其

云不能測

也

之。」又不起。 雖徵命而不降屈,豈素絲難染而捜引禮簡乎!政道須賢,宜納諸廊廟,其並以散騎常侍徵 勵薄俗。」疏奏,詔曰:「尋陽翟湯、會稽虞喜並守道淸貞,不營世務,耽學高尙,操擬古人。往 味道無風塵之志,高枕柴門,怡然自足。宜使蒲輪紆衡,以旌殊操,一則翼贊大化,二則敦 素,高尙邈世,束脩立德,皓首不倦,加以傍綜廣深,博聞强識,鑽堅研微有弗及之勤,處靜 闡,有自來矣。方今聖德欽明,思恢遐烈,旌輿整駕,俟賢而動。伏見前賢良虞喜天挺貞 軍事,不行。咸康初,內史何充上疏曰:「臣聞二八舉而四門穆,十亂用而天下安,徽 徵之。」喜辭疾不赴。咸和末,韶公卿舉賢良方正直言之士,太常華恒舉喜爲賢良。 會國有 人飲克

博議不能決。 永和初,有司奏稱十月殷祭,京兆府君當遷祧室,征西、豫章、潁川三府君初毁主,內外 時唇在會稽,朝廷遣就喜諮訪焉。其見重如此。

凡所注述數十萬言,行於世。年七十六卒,無子。弟豫自有傳。〔1〕 |喜專心經傳,兼覽讖緯,乃著安天論以難渾、蓋,又釋毛詩略,注孝經,爲志林三十篇

劉兆

劉兆字延世,濟南東平人,漢廣川惠王之後也。 **兆博學洽聞,溫篤善誘,從受業者數千**

绿秋左氏解,名日全綜,公羊、穀梁解詁皆納經傳中,朱書以別之。又撰周易訓注,以正動 官,作養秋調人七萬餘言,皆論其首尾,使大義無乖,時有不合者,舉其長短以通之。 二體互通其文。凡所讚述百餘萬言。 武帝時五辟公府,三徵博士,皆不就。安貧樂道,潛心著述,不出門庭數十年。 以春秋 叉為 人之

燿、育、臍。 難,兆不能對。客去,已出門,兆欲留之,使人重呼還。 更來也。」旣去,兆令人視葬家,不見此客,竟不知姓名。兆年六十六卒。有五子:倬、炤、 所疑。」客問之。兆說疑畢,客曰:「此易解耳。」因爲辯釋疑者是非耳。[三]兆別更立意,客一 大怒。|兆日:「聽前。」旣進,踞牀問||兆日:「聞君大學,比何所作。」||兆答如上事,末云:「多有 嘗有人著鞾騎驢至兆門外,曰:「吾欲見劉延世。」兆儒德道素,青州無稱其字者,門人 客曰:「親親在此營葬,宜赴之,後當

氾毓

無常父,「三衣無常主」。毓少履高操,安貧有志業。父終,居于墓所三十餘載,至晦朔,躬掃 氾毓字稚春,濟北盧人也。奕世儒素,敦睦九族,客居青州,逮毓七世,時人號其家「兒

墳壠,循行封樹,還家則不出門庭。 或薦之武帝,召補南陽王文學、秘書郎、太傅參軍,並

不就。

餘言。年七十一卒。 者諮詢,亦傾懷開誘,以一隅示之。合三傳爲之解注,撰春秋釋疑、肉刑論, 于時青土隱逸之士劉兆、徐苗等皆務教授,惟賦不蓄門人,清淨自守。 時有好古慕德 凡所述造七萬

徐苗

徐苗字叔胄,高密淳于人也。累世相承,皆以博士爲郡守。曾祖華,有至行。

舍,夜有神人告之「亭欲崩」,遽出,得免。祖四,爲魏尚書郎,以廉直見稱。 苗少家貧,畫執鉏耒,夜則吟誦。弱冠,與弟賈就博士濟南宋鈞受業,遂爲儒宗。

經同異評,又依道家著玄微論,前後所造數萬言,皆有義味。

孤遺,慈愛聞于州里,田宅奴婢盡推與之。 性抗烈,輕財貴義,兼有知人之鑒。弟患口癃,膿潰,苗爲吮之。其兄弟皆早亡,撫養 鄉鄰有死者,便輟耕助營棺槨,門生亡於家,卽

斂於講堂。 其行已純至,類皆如此。 遠近咸歸其義,師其行焉。

郡察孝廉,州辟從事、治中、別駕,舉異行,公府五辟博士,再徵,並不就。 武惠時計吏

列傅第六十一 儒林

至臺,帝輒訪其安不。 永寧二年卒,遺命濯巾擀衣,榆棺雜塼,露車載尸,葦席瓦器而已。

崔遊

帝故府僚屬,就家拜郎中。 末,察孝廉,除相府舍人,出爲氐池長,甚有惠政。 崔遊字子相,上黨人也。少好學,儒術甄明,恬靖謙退,自少及長,口未嘗語及財利。魏 年七十餘,猶敦學不倦,撰喪服圖,行於世。 以病免,遂爲廢疾。 泰始初,武帝錄敍文

好學修謹,奉廣如父。博通經籍,無所不覽,著春秋三傳,撰三禮吉凶宗紀,甚有條義。 母,哀號之聲,感慟行路。單孤無緦功之親,疏族范廣愍而養之,迎歸敎書,爲立祠堂。 爲御史大夫,固辭不就。 范隆宇玄嵩,雁門人。父方,魏雁門太守。隆在孕十五月,生而父亡。年四歲,又喪 范隆 卒於家,時年九十三。 及劉元海僭位,命

濱。父老曰:「二公何爲在此。」隆等拜之,仰視則不見。後與紀依于劉元海,元海以隆爲大濱。父老曰:「二公何爲在此。」隆等拜之,仰視則不見。後與紀依于劉元海,元海以隆爲大 知幷州將有氛祲之祥,故彌不復出仕。 與上黨朱紀友善,嘗共紀游山,見一父老於窮澗之 惠帝時,天下將亂,隆隱迹不應州郡之命,畫勤耕稼,夜誦書典。 頗習祕曆陰陽之學,

杜夷

窘,不營產業,博覽經籍百家之書,算曆圖緯靡不畢究。 杜夷字行齊,廬江灣人也。 世以儒學稱,爲郡著姓。 寓居汝潁之間,十載足不出門。 **夷少而恬泊,操尚貞素,居甚貧**

以優賢表德,敦勵末俗。 歸舊居,道遇兵寇,刺史劉陶告廬江郡曰:「昔魏文侯軾干木之閭,齊相曹參尊崇蓋公,皆所 傾心禮接,引爲參軍,夷辭之以疾。馥知不可屈,乃自詣庚,爲起宅宇,供其醫藥。 車,承對册問,必有忠讜良謨,弘益政道矣。」敦於是逼夷赴洛。夷遁於壽陽。鎭東將軍周馥 夷淸虛沖淡,與俗異軌,考槃空谷,肥遁匿跡。蓋經國之良寶,聘命之所急。 |**夷履道彌高,清操絕俗,思學融通,才經王務。|循宰二縣,皆有名績,備僚東宮,忠恪允著。** 登,漢武欽賢,俊彥響應,故能允協時雍,敷崇盛化。 四十餘,始還鄉里,閉門敎授,生徒千人。 詔王公舉賢良方正,刺史王敦以賀循爲賢良,夷爲方正,乃上疏曰:「臣聞有唐疇咨,元凱 惠帝時三察孝廉,州命別駕,永嘉初,公車徵拜博士,太傅、東海王越辟,並不就。 徵士杜君德懋行潔,高尙其志,頃流離道路,聞其頓躓,刺史忝任, 。伏見太孫舍人會稽賀循、處士廬江杜 若得待詔公 馥敗,夷

列

所取 問 庚, 夷陳萬乘之主不宜往庶人之家。 帝乃與 夷書曰:「吾與足下雖情在忘言,然虛心歷載。 棲情遺遠,確然絕俗,才學精博,道行優備,其以|夷爲祭酒。」|夷辭疾,未嘗朝會。 以市租供給家人糧廩,勿令闕乏。」尋以胡寇,又移渡江,王導遣吏周贍之。 不能崇飾有道,而使高操之士有此艱屯。今遣吏宣慰,郡可遣一 **貧樂道,靜志衡門,日不暇給,雖原憲無以加也。其賜穀二百斛。」皇太子三至夷第,執經** 正以足下羸疾,故欲相省,寧論常儀也!又除國子祭酒。建武中,令曰:「國子祭酒杜夷安 曰:「今大義穨替,禮典無宗,朝廷滯義莫能攸正,宜特立儒林祭酒官,以弘 曰:「先王 義。 則焉 **夷雖逼時命,亦未嘗朝謁,國有大政,恒就夷諮訪焉。明帝卽位,夷自表請退。詔** |之道將墜於地,君下帷硏思,今之劉、楊。 搢紳之徒景仰軌訓,豈得高退,而朕靡 吏,縣五吏,恒營卹之,常 其事。 元帝爲丞相,教 帝常欲詣 處士杜夷

雖 見 **「羈錄,冠舄之飾,未嘗加體,其角巾素衣,斂以時服,殯葬之事,務從簡儉,亦不須苟取** 太寧元年卒,年六十六。贈大鴻臚,諡曰貞子。夷臨終,遺命子晏曰:「吾少不出身,頃

嬌異也。」夷所著幽求子二十篇行於世。

任子春秋以刺之。弟援,高平相。援子潛,右衞將軍。 晏仕 |至||蒼悟太守。||夷兄弟三人。兄||崧,[四]字||行高,亦有志節。||惠||帝時,俗多浮僞,著

春秋三傳、京氏易、馬氏尚書、韓詩,皆精究大義。三禮之義,專遵鄭氏,著禮通論非駁諸 董景道字文博,弘農人也。少而好學,千里追師,所在惟晝夜讀誦,略不與人交通。 明

儒,演廣鄭旨。

常侍,並固辭,竟以壽終。 傍,是以劉元海及聰屢徵,皆礙而不達。 永平中,知天下將亂,隱於商洛山,衣木葉,食樹果,彈琴歌笑以自娛,毒蟲猛獸皆繞其 至劉曜時出山、盧于渭汭。 曜徴爲太子少傅、散騎

續咸

續咸字孝宗,上黨人也。 性孝謹敦重, 履道貞素。 好學,師事京兆杜預,專春秋、鄭氏

易,教授常數十人,博覽羣言,高才善文論。 又修陳杜律,明達刑書。

理曹參軍。持法平詳,當時稱其淸裕,比之于公。著遠游志、異物志、汲冢古文釋,皆十卷, 永嘉中、歷廷尉平、東安太守。 劉琨承制于幷州,以爲從事中郎。 後遂沒石勒,勒以爲

行於世。年九十七,死于石季龍之世,季龍贈儀同三司。

徐邈

徐邈,東莞姑幕人也。祖澄之爲州治中,屬永嘉之亂,遂與鄉人臧琨等率子弟幷閭里

士庶千餘家,南渡江,家于京口。父麋,都水使者。

邈 一姿性端雅,勤行勵學,博涉多聞,以愼密自居。少與鄉人臧壽齊名,下帷讀書,不游

城邑。

郎,上南北郊宗廟迭毀禮,皆有證據。 者或有異同,邈固勸中書令王獻之奏加殊禮,仍崇進謝石爲尚書令,玄爲徐州。 酣樂之後,好爲手詔詩章以賜侍臣,或文詞率爾,所言穢雜,邈毎應時收斂,還省刊削,皆使 可觀,經帝重覽,然後出之。 補中書舍人,在西省侍帝。雖不口傳章句,然開釋文義,標明指趣,撰正五經音訓,學者宗 遷散騎常侍,猶處西省,前後十年,每被顧問,輒有獻替,多所匡益,甚見寵待。 及孝武帝始覽典籍,招延儒學之士,邈旣東州儒素,太傅謝安舉以應選。年四十四,始 是時侍臣被詔者,或宣揚之,故時議以此多邈。及謝安薨, 邀轉祠部 帝宴集

豫章太守范甯欲遣十五議曹下屬城採求風政,幷吏假還,訊問官長得失。 邈與甯

者,無非小人,皆先因小忠而成其大不忠,先藉小信而成其大不信,遂使君子道消,善 譽,必由歷試;如有所毀,必以著明。託社之鼠,政之甚害。自古以來,欲爲左右耳目 不惑,豈須邑至里詣,飾其游聲哉!非徒不足致益,乃是蠶漁之所資,又不可縱 理足矣。上有理務之心,則下之求理者至矣。日昃省覽,庶事無滯,則吏愼 吾謂勸導以實不以文,十五議曹欲何所敷宣邪。庶事辭訟,足下聽斷允塞,則物 知足下遣十五議曹各之一縣,又東假歸,白所聞見,誠是足下留意百姓,故廣其視 ' 豈有善人君子而干非其事,多所告白者乎! 君子之心,誰毀誰 譽。如 以其負而 小 有所 吏爲 人聽

以爲監司,則淸濁能否,與事而明。足下但平心居宗,何取於耳目哉!昔明德馬后未嘗 顧與左右言,可謂遠識,況大丈夫而不能発此乎! 足下選綱紀必得國士,足以攝諸曹,諸曹皆是良吏,則足以掌文案,又擇公方之人

人與尸,前史所書,可爲深鑒。

遷中書侍郎,專掌綸韶,帝甚親昵之。

之,因從容言於帝曰:「昔淮南、齊王,漢晉成戒。 會稽王雖有酣媟之累,而奉上純一,宜加 出守遠郡。邈孤宦易危,而無敢排强族,乃爲自安之計。會帝頗疏會稽王道子,邈欲和協 初,范甯與邈皆爲帝所任使,共補朝廷之闕。甯才素高而措心正直,遂爲王國寶所讒,

諠 譁。 **尚道素,笑而不以爲忤也。** 弘貸,消散紛議,外爲國家之計,內慰太后之心。」帝納焉。 道子曰:「君時有暢不。」邈對曰:「邈陋巷書生,惟以節儉淸修爲暢耳。」道子以邈業 道子將用爲吏部郎,邈以波競成俗,非己所能節制,苦辭乃止。 邈嘗詣東府,遇衆賓沈湎,引滿

未及行而帝暴崩。 朝政,修飾文詔,拾遺補闕,劬勞左右。 以來,多使微人教授,號爲博士,不復尊以爲師,故帝有云。邈雖在東宮,猶朝夕入見,參綜 子經。帝謂邈曰:「雖未敕以師禮相待,然不以博士相遇也。」古之帝王,受經必敬,自魏晉 時皇太子尚幼,帝甚鍾心,文武之選皆一時之俊。以邈爲前衞率,領本郡大中正,授太 帝嘉其謹密,方之於虚霍,有託重之意,將進顯位,

五十四,州里傷悼,識者悲之。 安帝卽位,拜驍騎將軍。 隆安元年,遭父憂。邈先疾患,因哀毀增篤,不踰年而卒,年

卯,此宅之左則彼宅之右,何得俱忌於東。 邈以爲太歲之屬,自是遊神,譬如日出之時,向 東皆逆、非爲藏體地中也。所注穀梁傳、見重於時。 邈莅官簡惠,達於從政,論議精密,當時多諮稟之,觸類辯釋,問則有對。 **舊疑歲辰在**

忌請爲功曹,出補西陽太守,與無忌俱爲盧循所害。 邈弟廣,別有傳。 邈長子鰫,有父風,以孝聞,爲太常博士、祕書郎。 |豁弟浩,散騎侍郎。 鎭南將軍何無

引爲安東參軍,專掌記室。書令殷積,而衍每以稱職見知。中興初,與庾亮俱補中書郎。明 術少好學,年十二,能通詩書。弱冠,公府辟,本州舉異行直言,皆不就。避地江東, 元帝 帝之在東宮,領太子中庶子。于時庶事草創, 術經學深博,又練識舊典,朝儀軌制多取正 孔衍字舒元,至魯國人,孔子二十二世孫也。祖文,云 魏大鴻臚。 父毓, 征南軍司。

以戎務廢業。石勒嘗騎至山陽,敕其黨以衍儒雅之士,不得妄入郡境。視職朞月,以太興 惡之,乃啓出衍爲廣陵郡。時人爲之寒心,而衍不形于色。雖郡鄰接西賊,猶敎誘後進,不 三年卒於官,年五十三。 王敦專權,衍私於太子曰:「殿下宜博延朝彦,搜揚才俊,詢謀時政,以廣聖聰。」敦聞而 焉。由是元明二帝並親愛之。

桁雖不以文才著稱,而博覽過於質循,凡所撰述,百餘萬言。

子啓, 廬陵太守。

宗人夷吾有美名,博學不及衙,涉世聲譽過之。 元帝以爲主簿,轉參軍,稍遷侍中,徙

太子左衞率,卒,追贈太僕。

列傳第六十一 儒林

范宣

墳、廬于墓側。太尉都鑒命爲主簿、詔徵太學博士、散騎郎、並不就。 好學,手不釋卷,以夜繼日,遂博綜衆書,尤善三禮。家至貧儉,躬耕供養。 曰:「不足爲痛,但受全之體而致毀傷,不可處耳。」家人以其年幼而異焉。少尙隱遁,加以 親沒,負土成

至樂篇。」客曰:「君言不讀送莊,何由識此。」宣笑曰:「小時嘗一覽。」時人莫之測也 『丘不與易』。」宣言談未嘗及淺莊。客有問人生與憂俱生,不知此語何出。宣云:「出莊子 於石渠之論,實以儒爲弊。正始以來,世尚老莊。逮晉之初,競以裸裎爲高。僕誠太儒,然 疫,厚餉給之,宜又不受。 爰之問宜曰:「君博學通綜,何以太儒。」」宣曰:「漢興,貴經術,至 家于豫章,太守殷羨見宣茅茨不完,欲爲改宅,宜固辭之。 庾爱之以宣素貧,加年荒疾

魯。太元中,順陽范甯爲豫章太守,甯亦儒博通綜,在郡立鄉校,教授恒數百人。由是江州 人士並好經學,化二范之風也。年五十四卒。著禮易論難皆行於世。 宣雖閑居屢空,常以講誦爲業,譙國戴逵等皆聞風宗仰,自遠而至,諷誦之聲,有若齊、

子闡、歷郡守、國子博士、大將軍從事中郎。自免歸,亦以講授爲事。義熙中,連徵

韋謏

之宜,多見允納。著伏林三千餘言,遂演爲典林二十三篇。凡所述作及集記世事數十萬 爲黃門郎。後又入石季龍,署爲散騎常侍,歷守七郡,咸以淸化著名。又徵爲廷尉,識者擬 言,皆深博有才義。 之于、張。前後四登九列,六在尙書,二爲侍中,再爲太子太傅,封京兆公。好直諫,陳軍國 **章瞍字憲道,京兆人也。雅好儒學,善著述,於羣言秘要之義,無不綜覽。仕於劉曜,**

胡,去單于之號,深思聖王苞桑之誠也。」閔志在綏撫,銳於澄定,聞其言,大怒,遂誅之,幷 殺其子伯陽。 有刺客,變起須臾,敗而悔之,何所及也!古人有言,一夫不可狃,日,而况千乎!願誅屛降 曰:「今降胡數千,接之如舊,誠是招誘之恩。 然胡羯本爲仇敵,今之款附,苟全性命耳。 或

我考父父子子,汝爲我對,正值惡抵。」伯陽曰:「伯陽之不肖,誠如尊教,尊亦正值軟抵耳。」 **謏性不嚴重,好徇己之功,論者亦以是少之。嘗謂伯陽曰:「我高我曾重光累徽,我祖**

列

護慚無言。時人傳之以爲嗤笑。

范弘之

時衞將軍謝石薨,請諡,下禮官議。弘之議曰: 范弘之字長文,安北將軍汪之孫也。 襲爵武興侯。 雅正好學,以儒術該明,爲太學博

可謂惜力。 於衆心,不可謂愛人,工徒勞於土木,思慮殫於機巧,統綺盡於婢妾,財用縻於絲桐,不 事君,貨黷京邑,聚斂無厭,不可謂厲身,坐擁大衆,侵食百姓,大東流於遠近,怨毒結 塞素餐之責矣。今石位居朝端,任則論道,唱言無忠國之謀,守職則容身而已,不可謂 次則厲身奉國,夙夜無怠,下則愛人惜力,以濟時務。此數者,然後可以免惟塵之譏, 建學校,以延胄子,雖盛化未洽,亦愛禮存羊。 日與能。 石階藉門蔭,屢登崇顯,總司百揆,翼贊三臺,閑練庶事,勤勞匪懈,內外僉議,皆 當准肥之捷,勳拯危墜,雖皇威遐震,狡寇天亡,因時立功,石亦與焉。 此人臣之大害,有國之所去也。 然古之賢輔,大則以道事君,侃侃終日, 叉開

自頃風軌陵遲,奢僭無度,廉恥不興,利競交馳,不可不深防原本,以絕其流。 先王所以正風俗,理人倫者,莫尙乎節儉,故夷吾受謗乎三歸,平仲流美於約己。 漢文襲

弋綈之服, 諸侯猶侈, 武帝焚雉頭之裘, 靡麗不息。良由儉德雖彰, 而威禁不肅, 道自

我建,而刑不及物。若存罰其違,亡貶其惡,則四維必張,禮義行矣。

案諡法,因事有功曰「襄」,貪以敗官曰「墨」,宜諡曰襄墨公。

又論殷浩宜加贈諡,不得因恒溫之黜以爲國典,仍多敍溫移鼎之迹。

時謝族方顯,桓宗猶盛,尙書僕射王珣,溫故吏也,素爲溫所寵,三怨交集,乃出弘之爲

餘杭令。 將行,與會稽王道子牋曰:

繁,雖仰恃聖主欽明之度,俯賴明公愛物之隆,而交至之患,實有無賴。下官與石本 及,無復藉聞,故老語其遺事耳,於下官之身有何痛癢,而當爲之犯時干主邪 無怨忌,生不相識,事無相干,正以國體宜明,不應稍計强弱。與浩年時邈絕,世不相 黷累,應被淸澄,殷浩忠貞,宜蒙褒顯,是以不量輕弱,先衆言之。 而惡直醜正,其徒實 **謩禹,以侃侃爲先,故下無隱情之責,上收神明之功。 敢緣斯義,志在輸盡。** 智周四海之外者,非徒聰明內照,亦賴羣言之助也。是以舜之佐薨,以啓闢爲首,咎繇 下官輕微寒士,謬得廁在俎豆,實懼辱累淸流,惟塵聖世。竊以人君居廟堂之上、 每觀載籍,志士仁人有發中心任直道而行者,有懷知陽愚負情曲從者,所用 常以謝石 難異,

而並傳後世。故比干處三仁之中,箕子爲名賢之首。後人用捨,參差不同,各信所見, 列

明君,明君所以致法於羣下者也。 之執事,豈與昔人擬其輕重邪!亦以臣之事君,惟思盡忠而已,不應復計利鈍,事不允 主上聖明,明公虚己,思求格言,必不使盡忠之臣屈於邪枉之門也。是以敢獻愚誠,布 非大雅之致,此亦下官所不爲也。世人乃云下官正直,能犯艱難,斯談實過。下官知 率應而至,或榮名顯赫,或禍敗係踵,此皆不量時趣,以身嘗禍,雖有硜硜之稱,[<] 而 心則讜言悟主,義感於情則陳辭靡悔。若懷情藏意,蘊而不言,此乃古人所以得罪於

公,式是令矩,何不奉還萬機,退守藩屏。方提勒公王,匡總朝廷,豈爲先帝幼弱,未可 大聖,以年言之,成王幼弱,猶復遽避君位,復子明辟。漢之霍光,大勳赫然,孝宣年未 明公試復以一事觀之。昔周公居攝,道致升平,禮樂刑政皆自己出。以德言之,周公 其提拔之恩,懷其入幙之遇,託以廢黜昏闇,建立聖明,自謂此事足以明其忠貞之節。 憤發,痛若身首者,明公有以尋之。

王珣以下官議殷浩諡,不宜暴揚桓溫之惡。

珣感 測,求之於事,止免黜耳,非有至怨也。亡父昔爲溫吏,推之情禮,義兼他人。 所以每懷 誰獨無心!舉朝嘿嘿,未有唱言者,是以頓筆按氣,不敢多云。 桓溫於亡祖,雖其意難 二十,亦反萬機。故能君臣俱隆,道邁千歲。岩溫忠爲社稷,誠存本朝,便當仰遵二 桓溫事跡,布在天朝,逆順之情,暴之四海。在三者臣子,情豈或異!凡厥黔首,

親政邪?將德桓溫,不能聽政邪。又逼脅袁宏,使作九錫,備物光赫,其文具存,朝廷 畏怖,莫不景從,惟謝安、王坦之以死守之,故得稽留耳。會上天降怒,姦惡自亡,社稷

危而復安,靈命墜而復構。

殷周,近察漢魏,慮其所以危,求其所以安,如此而已。 審復欲待誰?先王統物,必明其典誥,貽厥孫謀,故令問休嘉,千歲承風。願明公遠覽 主上親覽萬機,明公光讚百揆,政出王室,人無異望,復不於今大明國典,作制百代,不 晉自中興以來,號令威權多出强臣,中宗、肅祖斂衽於王敦,先皇受屈於桓氏。今

文與王珣書曰

莫逆之契,契閻艱難,夷嶮以之,雖受屈姦雄,志達千載,此忠貞之徒所以義干其心不 孝以揚親爲主,忠以節義爲先。〔亡〕殷侯忠貞居正,心貫人神,加與先帝隆布衣之好,著 義聲,實尊大君協贊之力也。足下不能光大君此之直志,乃咸溫小顧,懷其曲澤,公在 旣以虧矣。尊大君以殷侯協契忠規,同戴王室,志厲秋霜,誠貫一時,殷侯所以得宣其 足下不推居正之大致,而懷知己之小惠,欲以幙府之小節奪名敎之重義,於君臣之際 獲以已者也。旣當時貞烈之徒所究見,亦後生所備聞,吾亦何敢苟避狂狡,以欺聖明。 見足下答仲堪書,深具義發之懷。夫人道所重,莫過君親,君親所係,忠孝而已。

以喪氣,父子之道固若是乎。足下言臣則非忠,語子則非孝。二者旣亡,吾誰畏哉! 聖世,欺罔天下,使丞相之德不及三葉,領軍之基一構而傾,此忠臣所以解心,孝子所

先典旣已正其逆順,後人亦已鑒其成敗。 心口憤歎,豈復得計策名昔日,自同在三邪!昔子政以五世純臣,子駿以下委質王莽, 之恨,豈得與足下同其肝膽邪!先君往亦嘗爲其吏,于時危懼,恒不自保,仰首聖朝, 懼,豈暇謀及國家。不圖今日得操筆斯事,是以上憤國朝無正義之臣,次惟祖考有沒身 今況古,乃知一揆耳。 吾少嘗過庭,備聞祖考之言,未嘗不發憤衝冠,情見乎辭。 每讀其事,未嘗不臨文痛歎,憤愾交懷。以 當爾之時,惟覆亡是

弘之詞雖亮直,終以桓、謝之故不調,卒於餘杭令,年四十七。

王歡

哂之。 歡守志彌固,遂爲通儒。 如也。 王歡字君厚,樂陵人也。 其妻患之,或焚毁其書而求改嫁,歡笑而謂之曰:「卿不聞朱買臣妻邪。」時聞者多 安貧樂道,專精耽學,不營產業,常丐食誦詩,雖家無斗儲,意 至慕容暐襲僞號,署爲國子博士,親就受經。 遷祭酒。

暐爲苻堅所滅,歡死於長安。

時之俊。若仲寧之淸貞守道,抗志柴門,行齊之居室屢空,棲心陋巷,文博之漱流枕石, 史臣曰:范平等學府儒宗,譽隆望重,或質疑是屬,或師範攸歸,雖爲未及古人,故亦

鏟跡銷聲,宣子之樂道安貧,弘風闡教: 斯並通儒之高尙者也。 而邈協和主相,刊削繁辭,

抗言立論,不避朝權,貶石抵溫,斯爲當矣,遂乃厄於三怨,以至陵遲,悲夫 可謂將順其美,匡救其惡。舒元入參機務,明主賞其博聞,出莅邊隅,獲狄欽其明德。

贊曰:郁郁周文,洋洋漢典。炙輠流譽,解頤飛辯。 雅誥弗淪,微言復顯。 爱及晉代

斯風逾闡。

校勘記

一〕弟豫自有傳 「豫」當從本傳作「預」。

(三) 因爲辯釋疑者是非耳 周校:「耳」衍文。

兒無常父 斠注:文選奏彈劉整注引王隱晉書「父」作「母」。

[B] 兄崧 <u>斠注:惠紀作「嵩」。</u>

列 孔衍字舒元 六 十 對注:書鈔五七、七四引晉中興書均作「孔演」,御覽二二○引晉中興書作「孔演 校 勘記

字元舒」。按:隋書經籍志、唐書藝文志俱作「孔衍」。

【《】祖文 <u>料注:魏志三少帝紀有散騎常侍諫議大夫孔父奏;倉慈傳稱沛國孔父,注引孔氏譜,孔</u>

义字元儁,是「文」爲「义」之譌。

一夫不可狃 「狃」,各本作「忸」,殿本作「狃」,與左傳傳公十五年原文合,今從之。

雖有硜硜之稱 「硜硜」,各本作「逕踁」,殿本則作「硜硜」,今從殿本,蓋此語本論語「鄙哉硜

硜」。 晉義亦云「當作硜」。

忠以節義爲先 「節義」,各本作「義節」,宋本作「節義」,今從之。

晉書卷九十二

列傳第六十二

文苑

靈篆,金簡成其帝載。旣而書契之道聿興,鍾石之文逾廣,移風俗於王化,崇孝敬於人倫, 夫文以化成,惟聖之高義,行而不遠,前史之格言,是以溫洛禛圖,綠字符其**丕業**,苑山

經緯乾坤,彌綸中外,故知文之時義大哉遠矣!

九流,文律諧於六變。自時已降,軌躅同趨,西都賈馬耀靈蛇於掌握,東漢班張發雕龍於綈 消姬曆云季,歌頌滋繁,荀宋之流,導源自遠,總金羈而齊騖,揚玉軑而並馳,言泉會於

槧,俱標稱首,咸推雄伯。逮乎當塗基命,文宗鬱起,三祖叶其高韵,七子分其麗則,翰林總 其菁華,典論詳其藻絢,彬蔚之美,競爽當年。獨彼陳王,思風遒舉,備乎典奧,懸諸日月。

及金行纂極,文雅斯盛,張載擅銘山之美,陸機挺焚研之奇,潘夏連輝,頡頏名輩,並綜

列 傅 第 六 十 二 文 苑

江右之才傑,曹毗、庾闡,中興之時秀。 採繁縟,杼軸清英,窮廣內之靑編,緝平臺之麗曲,嘉聲茂迹,陳諸別傳。至於吉甫、太沖, 信乃金相玉潤,林薈川沖,埓美前修,垂裕來葉。今

應貞

撰其鴻筆之彥,著之文苑云。

盛族。 爲撫 軍 滂流,仁風 應貞字吉甫,汝南南頓人,魏侍中璩之子也。 天曆在虞。 大將軍,以爲 貞 、善談論,以才學稱。 悠悠太上,人之厥初。 潛扇。 於時上帝,乃顧惟眷。 **※参軍。** 品 內宅心,方隅 及踐阼,遷給事中。 夏侯玄有盛名,貞詣玄,玄甚重之。 皇極肇建,彝倫 迴面 光我 い 所 が 所 が 天垂 帝於華林園宴射、貞賦詩 攸敷。 自漢至魏,世以文章顯,軒冕相襲,爲郡 一其象, 應期納禪。 地耀 五德 其文。 更運,應錄受符。 位以 舉高第,頻歷顯位。 龍飛,文以 鳳鳴朝陽, 最美。 の豹變。 其辭 陶唐 龍翔景雲。 既謝, 日

嘉禾重穎,莫莢載 恢恢 皇度,穆穆聖容。 芬。 率土咸寧,人胥悅欣。 言思其允,貌思 其恭。 在視斯明,在聽斯聰。 登庸 以德,明

斌 虚,同規易簡。 以功。 其恭 %惟何? 六府孔修,九有來踐。 昧旦 **丕**顯。 無義 澤罔不被,化莫不加。 不經,無理 不 踐。 行舍其華,言去 聲教南暨,西漸流沙。 其辯。 游心至 丝

人肆險,遠國忘遐,越常重譯,充牣皇家。 峨峨列辟,赫赫武臣。 內和五品,外威四賓。

順時貢職,入觀天人。備言錫命,羽蓋朱輪。

的、「」有酒斯飫。文武之道、厥猷未墜。 貽宴好會,不常厥數。神心所授,不言而喻。 在昔先王、射御茲器。示武懼荒、過則有失。 於時肆射, 弓矢斯具。 發 彼互

凡厥羣后,無懈于位。

初置太子中庶子官,貞與護軍長史孔恂俱爲之。後遷散騎常侍,以儒學與太尉荀顗撰

定新禮,未施行。秦始五年卒,文集行於世。

弟純。純子紹,永嘉中,至黃門郎,爲東海王越所害。純弟秀,秀子詹,自有傳。

成公綏

盛,可以致思矣。 哺之德,以爲祥禽,乃作賦美之,交多不載。又以「賦者貴能分賦物理,敷演無方,天地之 常晏如也。 成公綏字子安,東郡白馬人也。幼而聰敏,博涉經傳。性寡欲,不營資產,家貧歲飢, 少有俊才,詞賦甚麗,閑默自守,不求聞達。時有孝烏,每集其廬舍,綏謂 歷觀古人未之有賦,豈獨以至麗無文,難以辭贊,不然,何其闕哉。」遂爲 有反

天地賦日:

規,天動以傳,地靜以卑,昏明迭炤,或盈或虧,陰陽協氣而代謝,寒暑隨時而推移。三 載無方,流形品物。鼓以雷霆,潤以慶雲,八風翺翔,六氣氤氳。蚊行蠕動,方聚類分,鱗 才殊性,五行異位,千變萬化,繁育庶類,授之以形,稟之以氣。色表文采,聲有音律,覆 兮,廓開闢而著形。爾乃淸濁剖分,玄黃判離。太極既殊,是生兩儀,星辰煥列,日月重 殊族別,羽毛異羣,各含精而鎔冶,咸受範於陶鈞,何滋育之罔極兮,偉造化之至神 惟自然之初載兮,道虛無而玄清,太素紛以溷淆兮,始有物而混成,何元一之芒昧

人形 蒼 伐,青龍垂尾於心房、玄龜匿首於女虛,朱鳥奮翼於注張,帝皇正坐於紫宮,輔臣列位 徵瑞表祥,災變呈異,交會薄蝕,抱暈帶珥,流逆犯歷,譴悟象事,蓬容著而妖害生,老 於文昌,垣屏駱驛而珠連,三台差池而雁翔,軒轅華布而曲列,攝提鼎跱而相望。 若乃 望舒彌節於九道,羲和正轡於中黃,衆星回而環極,招搖運而指方,白獸峙據於參 而 若夫懸象成文,列宿有章,三辰燭燿,五緯重光,河漢委虵而帶天,虹蜺偃蹇於昊 主受喜,天矢黄而國吉祥,彗孛發而世所忌。

鎭於陰隅, 赤縣據於辰巳。 隆崇而特起,昆吾嘉於南極,燭龍曜於北阯,扶桑高于萬仞,尋木長于千里,崑崙 爾 乃旁觀四極,俯察地理,川瀆浩汗而分流,山嶽磊落而羅峙,滄海沆漭而四周, 於是八十一域。區分方別,風乖俗異,險斷阻絕。萬國羅

衣毛被羽,或介或鳞,棲林浮水,若獸若人,居于大荒之外,處于巨海之濱。 布,九州並列。 |青冀白壤,|荆衡塗泥,海岱赤埴,|華梁青黎,| 兗帶河洛, 揚有江淮。 辯方 至暘谷,西極泰濛,南暨丹炮,北盡空同。遐方外區,絕域殊鄰,人首蛇軀,烏翼龍身, 正土,經略建邦,王圻九服,列國一同,連城比邑,深池高墉,康衢交路,四達五通。 東

糾紛而乾乾,天道不息而自强。統羣生而載育,人託命於所繫,尊太一於上皇,奉萬神 於五帝,故萬物之所宗,必敬天而事地。 於是六合混一而同宅,宇宙結體而括囊,渾元運流而無窮,陰陽循度而率常,回動

而補缺。豈斯事之有徵,將言者之虛設。何陰陽之難測,偉二儀之奓闊 若乃共工赫怒,天柱摧折,東南俄其旣傾,西北豁而中裂,斷鼇足而續毀,鍊玉石 坤厚德以載物,乾資始而至大,俯盡鑒於有形,仰蔽視於所蓋,游萬物而極思,故

綏雅好音律,嘗當暑承風而嘯,冷然成曲,因爲嘯賦曰: 言于天外。

獨超然而先覺,狹世路之阨僻,仰天衢而高蹈,邈跨俗而遺身,乃慷慨而長嘯。 于時曜 浮滄海以游志。於是延友生,集同好,精性命之至機, 研道德之玄奧, 愍流俗之未悟, 逸羣公子,體奇好異,敖世忘榮,絕棄人事,希高慕古,長想遠思,將登箕山以抗節,

懌,悲傷摧藏。 之哀荒,節北里之奢淫,濟洪災於炎旱,反亢陽於重陰。 物,近取諸身,役心御氣。 旣終而響絕, 轉,氣衝鬱而 靈俄景,流光濛汜,逍遙攜手,躊躇步趾,發妙聲於丹脣,激哀音於皓齒,響抑揚而潛 而能反,心雖哀而不傷。 不沈,清激切於竽笙,優潤和於瑟琴,玄妙足以通神悟靈, 熛起,協黃宮於清角,雜商羽於流徵,飄浮雲於泰淸,集長風于萬 遺餘玩而未已,良自然之至音,非絲竹之所擬。 時幽散而將絕,中矯厲而慨慷,徐婉約而優游,紛繁鶩而激揚。 總八音之至和,固極樂而無荒。 動脣有曲、發口成音、觸類感物、因歌隨吟。 引唱萬變, 精微足以窮幽測深, 是故聲不假器,用不借 曲用無方, 大而 不洿,細 收激楚 和樂怡 里。 情旣思 曲 而

喬木,散滯積 將雛,羣 氣奮涌,繽紛交錯,烈烈飇揚,啾啾響作。 反,或徘徊而復放,或冉弱而柔撓,或澎濞而 ,若離若合,將絕 若乃登高臺以臨遠,披文軒而騁望,喟仰抃而抗首,嘈長引而憀亮。 鳴號乎沙漠。 而 播揚,蕩埃靄之溷濁,變陰陽於至和,移淫風 復續。 故能 因形創聲,隨事造曲,應物無窮,機發響速,怫鬱衝流,參譚 飛廉鼓於幽隧,猛獸應於中谷,南箕動於穹蒼,清飈振於 奏胡馬之長思,迴寒風乎北朔, 奔壯。 横鬱嗚而滔涸,咧繚眺 之穢俗。 又似鴻雁之 而 或舒肆而自 淸 昶。 逸

若乃游崇岡,陵景山,臨巖側,望流川,坐磐石,漱清泉,藉臯蘭之猗靡,蔭修竹之

蟬蜎,乃吟詠而發歎,聲驛驛而響連,舒蓄思之悱憤,奮久結之纏緜,心滌蕩而無累,志

離俗而飄然。

信自然之極麗,羌殊尤而絕世,越韶夏與咸池,何徒取異乎鄭衞 **冬熙烝,騁羽則嚴霜夏凋,動商則秋霖春降,奏角則谷風鳴條。** 行而不流,止而不滯,隨口吻而發揚,假芳氣而遠逝,音要妙而流響,擊激嚁 若夫假象金革,擬則陶匏,衆聲繁奏,若笳若簫,磞硠震隱,訇礚 音均不恒, 哪嘈。 曲無定制, 發徵則隆 而清厲。

妙,此音聲之至極。 期棄琴而改聽,尼父忘味而不食,百獸率儛而抃足,鳳皇來儀而拊翼。乃知長嘯之奇 于時縣駒結舌而喪精,王豹杜口而失色,虞公輟聲而止歌,甯子斂手而歎息,鍾

鄎。 十餘卷行於世。 每與華受詔並爲詩賦,又與賈充等參定法律。 |張華雅重||綏,每見其文,歎伏以爲絕倫,薦之太常,徵爲博士。 泰始九年卒,年四十三,所著詩賦雜筆 歷秘書郎,轉丞,遷中書

左思

左思字太沖, 齊國 臨淄人也。 其先齊之公族有左右公子,因爲氏焉。 家 世儒 學。父

列傳第六十二 文苑

雍, 解,不及我少時。」思邃感激勤學,兼善陰陽之術。 起小吏,以能 擢授殿中侍御史。 思少學鍾、胡書及鼓琴,並不成。 貌寢,口訥,而辭藻壯麗。 雍謂友人曰:「思所曉 不好交遊,惟

以閑居爲事

所由,紛散其義矣。 相如子虚擅名於前,班固兩都理勝其辭,張衡二京文過其意。 之。謐稱善,爲其賦序。張載爲注魏都,劉逵注吳蜀而序之曰:「觀中古以來爲賦者多矣, 以經學洽博,才章美茂,咸皆悅玩,爲之訓詁,其山川土域,草木鳥獸,奇怪珍異, 僉皆研精 籍樂道,高尚其事,覽斯文而慷慨,爲之都序。中書著作即安平張載、中書郎濟南劉逵,並 類,稟之圖籍,辭義瓌瑋,良可貴也。有晉徵士故太子中庶子安定皇甫謐,西州之逸士,耽 也。」「三陳留衞權又爲思賦作略解,〔三序曰:「余觀三都之賦,言不苟華,必經典要,品物殊 會義,抑多精致,非夫研覈者不能練其旨,非夫博物者不能統其異。世咸貴遠而賤近,莫 及賦成,時人未之重。思自以其作不謝班張,恐以人廢言,安定皇甫謐有高譽,思造而示 **遂構思十年,門庭藩溷皆著筆紙,遇得一句,即便疏之。** 心於明物。斯文吾有異焉,故聊以餘思爲其引詁,亦猶胡廣之於官箴,蔡邕之於典引 造齊都賦,一年乃成。 余嘉其文,不能默已,聊藉二子之遺忘,又爲之略解,祇增煩重,覽者闕 復欲賦三都,會妹掛入宮,移家京師,乃詣著作郎張載訪岷邛之 自以所見不博,求爲祕書郎 至若此賦,擬議數家,傅辭

餘,久而更新。」於是豪貴之家競相傳寫,洛陽爲之紙貴。初,陸機入洛,欲爲此賦,聞思作 焉。」自是之後,盛重於時,文多不載。司空張華見而歎曰:「班張之流也。使讀之者盡而有 之,撫掌而笑,與弟雲書曰:「此間有傖父,欲作三都賦,須其成,當以覆酒甕耳。」及思賦出,

及張方縱暴都邑,舉家適冀州。數歲,以疾終。 秘書監賈謐請講漢書,謐誅,退居宜春里,專意典籍。 齊王冏命爲記室督,辭疾,不就。

機絕歎伏,以爲不能加也,遂輟筆焉。

趙至

康還山陽, 而還。 「年 牛聲,投書而泣。師怪問之,至曰:「我小未能榮養,使老父不免勤苦。」師甚異之。 先世本非微賤,世亂流離,遂爲士伍耳。爾後能如此不。」至處母言,詣師受業。 少何以問邪。〕曰:「觀君風器非常,所以問耳。」 年十四,詣洛陽,游太學,遇嵇康於學寫石經,徘徊視之不能去,而請問姓名。 趙至字景眞,代郡人也。寓居洛陽。 又將遠學,母禁之,至遂陽狂,走三五里,輒追得之。 改名浚, 字允元。 康每日:「卿頭小而銳,童子白黑分明,有白起之風矣。」及康 一級氏令初到官,至年十三,與母同觀。母曰"「汝 康異而告之。後乃亡到山陽,求康不得 年十六,游鄴,復與 康相 聞 父耕叱 遇,隨 康日:

列

傅

第六十

文

卒,至詣魏興見太守張嗣宗,甚被優遇。 嗣宗遷江夏相,隨到溳川,欲因入吳,而嗣宗卒,乃

向遼西而占戶焉。

初,至與康兄子藩友善,及將遠適,乃與蕃書敍離,幷陳其志曰:

與,莫之與則傷之者至矣。飄颻遠游之士,託身無人之鄉,總轡遐路,則有前言之難, 朔,蔕華藕於修陵,表龍章於裸壤,奏韶武於聾俗,固難以取貴矣。 夫物不我貴則莫之 所懼也。至若蘭芷傾頓,桂林移殖,根萌未樹而牙淺弦急,每恐風波潛駭,危機密發, 隰,則寥廓而無覩,極聽修原,則掩寂而無聞。 吁其悲矣!心傷瘁矣!然後知步驟之 此所以怵惕於長衢也。又北土之性,難以託根,投人夜光,鮮不按劍。今將殖橘柚於玄 退無所據,涉澤求蹊,披榛覓路,嘯咏溝渠, 良不可度。 斯亦行路之艱難,然非吾心之 晨征,日薄西山,則馬首靡託。 得已者哉!惟別之後,離羣獨逝,背榮讌,辭倫好,經迥路,造沙漠。 雞鳴戒旦,則飄爾 懸鞍陋宇,則有後慮之戒,朝霞啓暉,則身疲而遄征,太陽戢曜,則情劬而夕惕,肆目平 迴風狂厲,白日寢光,徙倚交錯,陵隰相望,徘徊九皐之內,慷慨重阜之顚,進無所由, 士不足爲貴也。 昔李叟入秦,及關而歎;梁生適越,登嶽長謠。 **尋歷曲阻,則沈思紆結,登高遠眺,則山川攸隔。** 夫以嘉遁之舉,猶懷戀恨,況乎不 或乃

四據。 仰蔭游鳳之林,榮曜眩其前,艷色餌其後,良疇交其左,聲名馳其右,翱翔倫黨之間,弄 命,孰能不憤悒者哉!吾子殖根芳苑,濯秀淸流,晞葉華崖,飛藻雲肆,俯據潛龍之渚, 九 麥帷房之裏,從容顧眄,綽有餘裕,俯仰吟嘯,自以爲得志矣,豈能與吾曹同大丈夫之 區,恢維宇宙,斯吾之鄙願也。時不我與,垂翼遠逝,鋒距靡加,六翮摧屈,自非知 顧景中原,憤氣雲踊,哀物悼世,激情風厲。龍嘯大野,獸睇六合,猛志紛紜,雄心 思躡雲梯,横奮八極,披艱掃穢,蕩海夷嶽,蹴崑崙使西倒,蹋太山令東覆,平滌

儀`敦履璞沈、繁華流蕩、君子弗欽。 無日矣! 去矣嵇生,遠離隔矣!熒熒飄寄,臨沙漠矣!悠悠三千,路難涉矣!攜手之期,邈 思心彌結,誰云釋矣! 無金玉爾音而有遐心。 臨紙意結,知復何云。 身雖胡越,意存斷金。 各敬爾

憂樂哉

審。 志不就,號憤慟哭,歐血而卒,時年三十七。 父欲令其宦立,弗之告,仍戒以不 太康 至身長七尺四寸,論議精辯,有從橫才氣。 中,以良吏赴洛,方知母亡。 歸,至乃還遼西。 初,至自恥士伍,欲以宦學立名,期於榮養。 遼西舉郡計吏,到洛,與父相遇。 幽州三辟部從事,斷九獄, 時母已 旣而其 見 和精精

鄒湛

博士。 康中,拜散騎常侍,出補渤海太守,轉太傅楊駿長史,遷侍中。 駿誅,以僚佐発官。 尋起爲 散騎常侍、國子祭酒,轉少府。元康末卒,所著詩及論事議二十五首,爲時所重。 鄒湛字潤甫,南陽新野人也。父軌,魏左將軍。湛少以才學知名,仕魏歷通事郎、太學 泰始初,轉尙書郎、廷尉平、征南從事中郎,深爲羊祜所器重。入爲太子中庶子。 太

敗瓦,其中必有死人。、甄舒仲者,予舍西土瓦中人也。」檢之,果然,厚加斂葬。 此人來謝。 初,湛嘗夢見一人,自稱甄舒仲,餘無所言,如此非一。 久之,乃悟曰:「吾宅西有積土 葬畢,逐夢

倫誅、坐下廷尉、遇赦免。後爲太傅參軍。 子捷,字太應,亦有文才。永康中,爲散騎侍郎。及趙王倫篡逆,捷與陸機等俱作禪 永嘉末,卒。

棗據

貌,善文辭。弱冠,辟大將軍府,出爲山陽令,有政績。遷尚書郎,轉右丞。賈充伐吳,請爲 寨據字道彦,潁川長社人也。本姓棘,其先避仇改焉。 父叔禕,魏鉅鹿太守。 據美容

從事中郎。軍還,徙黃門侍郎、冀州刺史、太子中庶子。 太康中卒,時年五十餘。 所著詩賦

論四十五首,遇亂多亡失。

庶子、散騎常侍,爲石勒所殺。 子腆,字玄方,亦以文章顯。 永嘉中爲襄城太守。弟嵩,字臺產,才藝尤美,爲太子中

褚陶

褚陶字季雅,吳郡錢塘人也。弱不好弄,少而聰慧,清淡閑默,以墳典自娛。

作鷗鳥、水磑二賦,見者奇之。陶嘗謂所親曰:「聖賢備在黃卷中,捨此何求

|州之德不孤,[四] 川嶽之寶不匱矣。」遷九眞太守,轉中尉。 年五十五卒。 鳴朝陽,謂東南之寶已盡,不意復見褚生。」機曰:「公但未覩不鳴不躍者耳。」華曰:「故知延 州郡辟,不就。吳平,召補尚書郎。張華見之,謂陸機曰:「君兄弟龍躍雲津,顧彦先鳳

王沈

掾, 鬱鬱不得志, 王沈宇彦伯,高平人也。 乃作釋時論,其辭曰: 少有俊才,出於寒素,不能隨俗沈浮,爲時豪所抑。 仕郡文學

列

堂者,必有赫赫之光。今子困於寒而欲求諸熱,無得熱之方。」冰子瞿然曰:「胡爲其然 已。」 冰子曰:「吾聞宗廟之器不要華林之木,四門之賓何必冠蓋之族。 前賢有解韋索 也。」丈人曰:「融融者皆趣熱之士,其得爐冶之門者,惟挾炭之子。 苟非斯人,不如其 而佩朱韍,舍徒擔而乘丹轂。由此言之,何恤而無祿!惟先生告我塗之速也。」 人曰:「子奚自。〕曰:「自涸陰之鄕。」 「奚適。」曰:「欲適煌煌之堂。」 丈人曰:「入煌煌之 東野丈人觀時以居,隱耕汙腴之墟。有冰氏之子者,出自冱寒之谷,過而問塗。丈

易,才有所應,行有所適。英奇奮於從橫之世,賢智顯於霸王之初,當厄難則騁權譎以 成。賤有常辱,貴有常榮,肉食繼踵於華屋,疏飯襲跡於耨耕。談名位者以諂媚附勢, 隆道寧,羣后逸豫,宴安守平。百辟君子,奕世相生,公門有公,卿門有卿。指禿腐骨, 先卷而後舒。當斯時也,豈計門資之高卑,論勢位之輕重乎!今則不然。上聖下明,時 舉高譽者因資而隨形。至乃空囂者以泓噲爲雅量,瑣慧者以淺利爲鎗鎗,脢胎者以無 良圖,值制作則展儒道以暢攄,是則袞龍出於縕褐,卿相起於匹夫,故有朝賤而夕貴, 檢爲弘曠,僂垢者以守意爲堅貞,嘲哮者以粗發爲高亮,韞蠢者以色厚爲篤誠,痷婪者 不簡蚩儜。多士豐於貴族,爵命不出閨庭。四門穆穆,綺襦是盈,仍叔之子,皆爲老 丈人曰:「嗚呼!子聞得之若是,不知時之在彼。吾將釋子。夫道有安危,時有險

以博納爲通濟,既既者以難入爲凝淸,拉答者有沈重之譽,賺閃者得淸剿之聲,嗆啍怯 除消息,官無大小,問是誰力。今以子孤寒,懷真抱素,志陵雲霄,偶景獨步,直順常 厲容色,心懷內荏,外詐剛直,譚道義謂之俗生,論政刑以爲鄙極。 高會曲宴,惟言遷 職,童僕闚其車乘,閽寺相其服飾,親客陰參於靖室,疏賓徙倚於門側。 時因接見,矜 毁譽交紛。當局迷於所受,聽採惑於所聞。京邑翼翼,羣士千億,奔集勢門,求官買 其所安,責人必急,於已恒寬。德無厚而自貴,位未高而自尊,眼罔嚮而遠視,鼻翳鼽 畏於謙讓,關茸勇敢於饕諍。 斯皆寒素之死病,榮達之嘉名。 凡茲流也,視其用心,察 道,關津難渡,欲騁韓盧,時無狡兔,衆塗圮塞,投足何錯」」 而刺天。忌惡君子,悅媚小人,敖蔑道素,懾吁權門。心以利傾,智以勢惛,姻黨相扇,

屋蔀家,易著明箴。人薄位尊,積罰難任,三部尸晉,宋華咎深,投扃正幅,實獲我心。」 延陵,高節可慕。丹轂滅族,呂霍哀吟,朝榮夕滅,旦飛暮沈。・聃周道師,巢由德林,豐 於淸寒之路,不謂熱勢自共遮錮。敬承明誨,服我初素,彈琴詠典,以保年祚。伯成、 於是冰子釋然乃悟曰:「富貴人之所欲,貧賤人之所惡。僕少長於孔顏之門,久處

元康初,松滋令吳郡蔡洪字叔開,有才名,作孤奮論,與釋時意同,讀之者莫不歎息焉。

是時王政陵遲,官才失實,君子多退而窮處,遂終于里閭。

張翰

爲「江東步兵」。會稽賀循赴命入洛,經吳閶門,於船中彈琴。翰初不相識,乃就循言譚,便 大相欽悅。問循,知其入洛,翰曰:「吾亦有事北京。」便同載卽去,而不告家人。 張翰字季鷹,吳郡吳入也。父儼,吳大鴻臚。翰有淸才,善屬文,而縱任不拘,時人號

愴然曰:「吾亦與子採南山蕨,飮三江水耳。」翰因見秋風起,乃思吳中菰菜、蓴羹、鱸魚膾, 四海之名者,求退良難。吾本山林間人,無望於時。子善以明防前,以智慮後。」榮執其手, 而冏敗,人皆謂之見機。然府以其輒去,除吏名。 曰:「人生貴得適志,何能羈宦數千里以要名爵乎」遂命駕而歸。著首丘賦,文多不載。俄 齊王冏辟爲大司馬東曹掾。冏時執權,翰謂同郡顧榮曰:「天下紛紛,禍難未已。夫有

有身後名,不如卽時一杯酒。」時人貴其曠達。性至孝,遭母憂,哀毀過禮。年五十七卒。 翰任心自適,不求當世。 或謂之曰:「卿乃可縱適一時,獨不爲身後名邪。」答曰:「使我

庾闡

其文筆數十篇行於世。

文。少隨舅孫氏過江。母隨兄肇爲樂安長史,在項城。永嘉末,爲石勒所陷,闡母亦沒。闡 **趫捷無敵,晉人莫敢與校。** 庾闡字仲初,潁川鄢陵人也。祖輝,安北長史。父東,以勇力聞。 帝募勇士,惟東應選,遂撲殺之,名震殊俗。闡好學,九歲能屬 武帝時,有西域健胡

難, 闡出奔郗鑒,爲司空參軍。峻平,以功賜爵吉陽縣男,拜彭城內史。鑒復請爲從事中 州 舉秀才,元帝爲晉王,辟之,皆不行。後爲太宰、西陽王羕掾,累遷尚書郎。 蘇峻之

不櫛沐,不婚宦,絕酒肉,垂二十年,鄉親稱之。

尋召爲散騎侍郎,領大著作。 頃之,出補零陵太守,入湘川,弔賈誼。 其辭曰: 矯乎若鄉鸞拊翼而逸宇宙也。飛榮洛汭,擢穎山東,質淸浮磬,聲若孤桐,琅琅其璞, 誰 汨水,臨賈生投書之川,慨以永懷矣。及造長沙,觀其遺象,喟然有處,乃弔之云。 與比傑!是以高明倬茂,獨發奇秀,道率天真,不議世疚,煥乎若望舒耀景而焯羣星, 一玄風 《其峯,信道居正,而以天下爲公,方駕逸步,不以曲路期通。是以張高弦悲,聲激 , 清唱未和, 而桑濮代作,雖有惠音,莫過韶濩,雖有騰鱗,終仆一壑。 嗚呼! 偉哉蘭生而芳,玉產而潔,陽葩熙冰,寒松負雪,莫邪挺鍔,天驥汗血,苟云其雋, 中興二十三載,余忝守衡南,鼓栧三江,路次巴陵,望君山而過洞庭,涉湘川而觀 悠緬,皇道不以智隆,上德不以仁顯。 三五親譽,其軌可仰而標,霸功雖逸,

列

其塗可翼而闡,悲矣先生,何命之蹇!懷寶如玉,而生運之淺!

補!夫心非死灰,智必存形,形託神王,至故能全生。奈何蘭膏,揚芳漢庭,摧景駿 若蘭芳。是以道隱則蠖屈,數感則鳳覩,若棲不擇木,翔非九五,雖曰玉 折,雋 才 何 風,獨喪厥明。 昔<u></u>各絲謩虞,呂尙歸昌,德協充符,乃應帝王。夷吾相桓,漢登蕭張, 草廬三顧, 臭 悠悠太素,存亡一指,道來斯通,世往斯圮。 吾哀其生,未見其死,敢不

後以疾,徵拜給事中,復領著作。吳國內史虞潭爲太伯立碑,闡製其文。 又作揚都賦,

敬弔、寄之淥水。

爲世所重。 年五十四卒,諡曰貞,所著詩賦銘頌十卷行於世。

子肅之,亦有文藻著稱,歷給事中、相府記室、湘東太守。 太元中卒。

曹毗

賦。 時桂陽 郡察孝廉、除郎中、蔡謨舉爲佐著作郎。父憂去職。 曹毗字輔佐,譙國人也。高祖休,魏大司馬。父識,右軍將軍。 張碩爲神女杜蘭香所降,毗因以二篇詩嘲之,幷續蘭香歌詩十篇,甚有文彩。又著 服闋,遷句章令,徵拜太學博士。 毗少好文籍,善屬詞

揚都賦,亞於庾闡。

累遷尙書郎、鎭軍大將軍從事中郎、下邳太守。以名位不至,著對儒以自釋。其辭曰:

亷 以蘭生幽 或問 澗,玉輝千仞。 曹子曰:「夫寶以含珍爲貴,士以藏器爲峻,麟以絕迹標奇,松以負霜稱雋,是 故子州浮滄瀾而龍蟠,吳季忽萬乘以解印,虞公潛崇巖以頤

逸氣 必以 聽 園 高 之典,覆 之聰。 之場,出不躡 鴻,味道則 虚洞 刑 今子少 禮 一 1``養采幽翳,晦明蒙籠。不追林棲之迹,不希抱鱗之龍,不營練眞之術,不慕內 爲己任,申韓爲宏通!旣登東觀,染史筆,又據太學,理儒功。會無玄韵淡泊, 而 處汎位以核物、扇塵敎以自濛, 睎 理貫莊肆,研妙則穎奪豪鋒。 冥 會城之衝,游不踐綽約之室,趙不希騄駬之蹤,徒以區區 而 塞 (風,弱挺秀容,奇發幼齡,翰披孺童。 北 JII 之洪,檢名實於俄頃之間,定得失乎 固以騰廣莫而萋蒨,排素薄而青葱者矣,何 負鹽車以顯能,飾一已以求恭。 吐辭則藻落楊班,抗心則志 一管之鋒。 一之懷 退不居漆 而整名目

俗 響播六合,聲駭嬰孩,而見毀絳灌之口,身離狼狽之災。由此言之,名爲實賓, 府,對羣 我紛以交爭 子 岩 物以耦怨雙者乎? 謂 我 ,利害渾 果 是邪? 而 彌 則是不必以合俗。子若云俗果非邪? 子不聞乎終軍之穎,賈生之才,拔奇山東, 重,何異執朽轡以御 逸駟,承勁風 以握 則俗非不 一秋蓬,役恬性以 玉 可以苟從。云 映漢臺 福萌禍 充勞 可謂

二三八八

胎,朝敷榮華,夕歸塵埃,未若澄虛心於玄圃,蔭瑤林於蓬萊,絕世事而雋黃綺,鼓滄川

而浪龍鰓者矣。蒙竊惑焉。」

達觀,任化昏曉,出不極勞,處不與皓,在儒亦儒,在道亦道,運屈則紆其清暉,時申則 迷粗者循一往之智,狷介者守一方之矯,豈知火林之蔚炎柯,冰津之擢陽草!故大人 散其龍藻,此蓋員動之用舍,非尋常之所寶也。 云云,孰測其兆!故不登閬風,安以瞻殊目之形。不步景宿,何以觀恢廓之表。是以 主人煥耳而笑,欣然而言曰:「夫兩儀旣闢,陰陽汗浩,五才迭用,化生紛擾,萬類

朔,[t] 蟪蛄無以觀大年,固非管翰之所述,聊敬對以終篇。」 累遷至光祿勳,卒。凡所著文筆十五卷,傳於世。 朱草於庭前。何有違理之患,累眞之嫌!子徒知辯其說而未測其源,明朝菌不可喻晦 不延,風澄于俗,波淸于川。方將舞黃虯於慶雲,招儀鳳於靈山,流玉體乎 華 闥,秀 於百揆,虞音齊響於五絃,安期解褐於秀林,漁父擺鉤於長川。 今三明互照,二氣載宣,玄敎夕凝,朗風晨鮮,道以才暢,化隨理全。 如斯則化無不融,道 故五典克明 無

李充

之,由是知名。善楷書,妙參鍾索,世咸重之。辟丞相王導掾,轉記室參軍。 李充字弘度,江夏人。父矩,江州刺史。 充少孤,其父墓中柏樹嘗爲盜賊所斫,沈手刃

幼好刑名之學,深抑虛浮之士,嘗著學箴,稱:

者寡 **淳風並絕,所以聖人長潛而** 革一代之弘制,垂千載之遺風,則非聖不立。然則聖人之在世,吐言則爲訓辭,莅事則 義之違本,言不流放,庶以袪困蒙之蔽,悟一往之惑乎!其辭曰: 風,見義敎之殺而不觀其隆矣,略言所懷,以補其闕。 尟,不覿千仞之門而逐適物之迹,逐迹逾篤,離本逾遠,遂使華端與薄俗俱興,妙緒與 末,老莊 爲物軌,運通則與時隆,理喪則與世弊矣。是以大爲之論以標其旨。物必有宗,事必 廣,老莊是乃明無爲之益,塞爭欲之門。夫極靈智之妙、總會通之和者,莫尚乎聖人。 有主,寄責於聖人而遺累乎陳迹也。 故化之以絕聖棄智,鎭之以無名之樸。 聖敎救其 王以道德之不行,故以仁義化之,行仁義之不篤,故以禮律檢之,檢之彌繁,而僞亦愈 而利仁義者衆也。道德喪而仁義彰,仁義彰而名利作,禮敎之弊,直在茲也。先 送子云:「絕仁棄義,家復孝慈。」豈仁義之道絕,然後孝慈乃生哉。 蓋患乎情仁義 明其本,本末之塗殊而爲敎一也。人之迷也,其日久矣!見形者衆,及道者 迹未嘗滅矣。 懼後進惑其如此,將越禮棄學而希 引道家之弘旨, 會世教之適當, 無爲之

農宏贊,六位時成,離暉大觀,澤洽雨濡,化流風散,比屋同塵而人罔僭亂。爰暨中古, 猖狂。資生旣廣,羣塗思通,闇實師明,匪予求蒙,遺已濟物而天下爲公。大庭唱基,羲 功蹄筌,先統喪歸而寄旨忘言。政異徵辭,拔本塞源,遁迹永日,尋響窮年,刻意離性 病,違彼夷塗而遵此險徑。狡兔陵岡,游魚遁川,至賾深妙,大象幽玄,棄餌收置而責 乃厲。敦亦旣備,矯亦旣深,彫琢生文,抑揚成音,羣能騁技,衆巧竭心,野無陸馬,山 攸彰,道之攸廢,乃損所隆,乃崇所替,刑作由於德衰,三辟興乎叔世,旣敦旣誘,乃矯 行止復禮克己。風人司箴,敬貽君子。 無散林。風罔不動,化罔不移,人之失德,反正作奇。乃放欲以越禮,不知希竸之爲 哲王胥承,質文代作,禮統迭興,事藉用以繁,化因阻而疑,動非性擾,靜豈神澄!名之, 而失其常然。世有險夷,運有通圮,損益適時,升降惟理。道不可以一日廢,亦不可以 可遠,去其害仁義者而已。力行猶懼不逮,希企邈以遠矣。室有善言,應在千里,況乎 一朝擬,禮不可以千載制,亦不可以當年止。非仁無以長物,非義無以齊恥,仁義固不 芒芒太初,悠悠鴻荒,蚩蚩萬類,與道兼忘。聖迹未顯,賢名不彰,怡此鼓腹,率我

投林,豈暇擇木」乃除剡縣令。遭母憂。服闋,爲大著作郎。 征北將軍褚裒又引爲參軍,充以家貧,苦求外出。 寝將許之爲縣,試問之,充曰:「窮殺,

書侍郎,卒官。 于時典籍混亂,充删除煩重,以類相從,分作四部,甚有條貫,祕閣以爲永制。 | 充注過書及周易旨六篇、釋莊論上下二篇、詩賦表頌等雜文二百四十首,行 累遷中

於世。

| **沈從兄||式以平隱著稱,善楷隸。 中興初,仕至侍中。子顒,亦有文義,多所述作,郡舉孝廉。**

袁宏

宏在 詠史之作也。 風情所寄。 舫 袁宏字彦伯,侍中猷之孫也。父勖,臨汝令。宏有逸才,文章絕美,曾爲詠史詩,是其 中諷詠,聲旣淸會,辭又藻拔,遂駐聽久之,遣問焉。 少孤貧,以運租自業。 尚傾率有勝致,即迎升舟,與之譚論,申旦不寐,自此名譽日茂。 謝尚時鎭牛渚,秋夜乘月,率爾與左右微服泛江。〔5〕會 答云:「是袁臨汝郎誦詩。」卽其

同載,衆爲之懼。 苦諫之。宏笑而不答。溫知之甚忿,而憚宏一時文宗,不欲令人顯問。 尚爲安西將軍 後爲東征賦,賦末列稱過江諸名德,而獨不載桓弊。 行數里,問宏云:「聞君作東征賦,多稱先賢,何故不及家君。」宏答曰:「尊 、豫州刺史,引宏參其軍事。 累遷大司馬桓溫府記室。溫重其文筆,專 時伏滔先在溫府,又與宏善, 後游青山飲 歸,命宏

列

公稱謂非下官敢專,旣未遑啓,不敢顯之耳。」 溫疑不實,乃曰:「君欲爲何辭。」 宏卽答云: 不及陶侃,侃子胡奴嘗於曲室抽刃問宏曰:「家君勳跡如此,君賦云何相忽。」宏窘急,答曰: 「我已盛述尊公,何乃言無?」因曰:「精金百汰,在割能斷,功以濟時,職思靜亂,長沙之勳, 「風鑒散朗,或搜或引,身雖可亡,道不可隕,宣城之節,信義爲允也。」溫泫然而止。 宏賦又

爲史所贊。」胡奴乃止。

後為三國名臣頌曰:

股肱肆力。 傑,漢之得賢,於斯爲貴。 高祖雖不以道勝御物,羣下得盡其忠;蕭曹雖不以三代事 舒,柳下以之三點,接輿以之行歌,魯連以之赴海。 衰世之中,保持名節,君臣相體,若 中古陵遲,斯道替矣。居上者不以至公理物,爲下者必以私路期榮,御員者不以信誠 隆,歷代承基,揖讓之與干戈,文德之與武功,莫不宗匠陶鈞而羣才緝熙,元首經略而 率衆,執方者必以權謀自顯。於是君臣離而名敎薄,世多亂而時不治,故遽甯以之卷 其揆一也。故二八升而唐朝盛,伊呂用而湯武寧,三賢進而小白興,五臣顯而重耳霸。 合符契,則燕昭、樂毅古之流矣。 夫百姓不能自牧,故立君以治之,明君不能獨治,則爲臣以佐之。 然則 三五 迭 雖遭罹不同,迹有優劣,至於體分冥固,道契不墜,風美所扇,訓革千載, 夫未遇伯樂,則千載無一**驥**,時值龍顏,則當年控三

所以咨嗟,有時無君,賈生所以垂泣。 不如語。是以古之君子不患弘道難,患遭時難,遭時匪難,遇君難。故有道無時,孟子 主,百姓不失其業。 遇之不能無欣,喪之何能無慨。 靜亂庇人,抑亦其次。夫時方顚沛,則顯不如隱,萬物思治,則默 古人之言,信有情哉!余以暇日常覽國志,考其 夫萬歲一期,有生之通**塗**,千載一遇,賢智之嘉

朝,豫謀世事。舉才不以標鑒,故人亡而後顯,籌畫不以要功,故事至而後定。雖亡身 明順,識亦高矣。 文若懷獨見之照,而有救世之心,論時則人方塗炭,計能則莫出魏武,故委圖霸

君臣,比其行事,雖道謝先代,亦異世一時也。

漢隸而跡入魏幕,源流趣舍,抑亦文若之謂。所以存亡殊致,始終不同,將以文若旣明 且哲,名教有寄乎!夫仁義不可不明,則時宗舉其致,生理不可不全,故達識攝其契。 董卓之亂,神器遷逼,公達慨然,志在致命。 由斯而譚,故以大存名節。 至如身爲

所以覆舟, 仁義所以全身, 亦所以亡身。然而先賢玉摧於前, 來哲攘袂於後, 豈天懷 !若乃一旦進璽,君臣易位,則崔生所以不與,魏氏所以不容。 夫江湖所以濟舟,亦 崔生高朗,折而不撓,所以策名魏武、執笏霸朝者,蓋以漢主當陽,魏后北面者

相與弘道,豈不遠哉!

發中,[4] 而名敎束物者乎!

餘泣,雖古之遺愛,何以加茲!及其臨終顧託,受遺作相,劉后授之無疑心,武侯受之 無懼色,繼體納之無貳情,百姓信之無異辭,君臣之際,良可詠矣! 孔明盤桓,俟時而動,遐想管樂,遠明風流,治國以禮,人無怨聲,刑罰不濫,沒有

公瑾卓爾,逸志不羣,總角料主,[10]則素契於伯符,晚節曜奇,則三分於|赤壁。

其齡促,志未可量。

杜門不用,登壇受譏。夫一人之身所照未異,而用舍之間饿有不同,況沈跡溝壑,遇與 子布佐策,致延譽之美,輟哭止哀,有翼戴之功,神情所涉,豈徒謇諤而已哉!然

不遇者乎!

川、高鳥候柯。 若夫出處有道,名體不滯,風軌德音,爲世作範,不可廢也。復綴序所懷,以爲之贊曰: 夫詩頌之作,有自來矣。或以吟詠情性,或以紀德顯功,雖大指同歸,所託或乖。 火德旣微,運纏大過。 赫赫三雄、並迴乾軸。 洪飈易海,二溟揚波。 競收杞梓,爭採松竹。 **虯獸雖驚,**[11]風雲未和。潛魚擇 鳳不及棲,龍不暇伏。谷

無幽蘭,嶺無停菊。

英英文若,靈鑒洞照。 應變知微,頤奇賞要。日月在躬,隱之彌曜。文明暎心,鑽

之愈妙。 滄海橫流,玉石俱碎。 達人兼善,廢己存愛。 謀解時紛, 功濟字內。 始救生

靈,終明風概。

之彌泰。 公達潛朗,思同蓍葵。 悟悟幕裏,算無不經。 運用無方,動攝羣會。 亹亹通韵,跡不暫停。 爱初發迹, 遘此顛沛。 雖懷尺璧,顧哂連城。 神情玄定,處 智能極

郎中溫雅,器識純素。貞而不諒,通而能固。 恂恂德心,汪汪軌度。 志成弱冠,道

物、愚足全生。

敷歲暮。 仁者必勇,德亦有言。雖遇履尾,神氣恬然。 行不修飾,名節無愆。

切,素風愈鮮。

邈哉崔生,體正心直。天骨疏朗,牆岸高嶷。忠存軌跡,義形風色。 思樹芳蘭,翦

除荆棘。 人惡其上,世不容哲。琅琅先生,雅杖名節。 雖遇塵霧,猶震霜雪。 運極道

消,碎此明月。

景山恢誕,韵與道合。 形器不存,方寸海納。 和而不同,通而不雜。 遇醉忘辭,在

醒貽答。

言盈耳。 長文通雅,義格終始。 玉 生 雕 麗,光不踰 把。 思戴元首,擬伊同恥。人未知德,懼若在己。 德積雖微,道暎天下。 嘉謀肆庭,讜

列傳第六十二 文苑

存則易。 邈哉 萬物波蕩,孰任其累!六合徒廣,容身靡寄。君親自然,匪由名教。 太初,宇量高雅。 器範自然,標準無假。 全身由直,跡洿必偽。 處死 匪難,理 愛敬旣

同,情禮兼到。

烈烈王生,知死不撓。 求仁不遠,期在忠孝。

玄伯 剛簡,大存名體。 志在高構,增堂及陛。 端委獸門,正言彌啓。 臨危致命,盡

其 八心禮。

堂堂孔明,基宇宏邈。 百六道喪,干戈迭用。苟非命世,孰掃雰霁!宗子思寧,薄言解控。釋褐中 器同生靈,獨稟先覺。 標膀風流,遠明管樂。 初九龍盤,雅

林,鬱爲時棟。

志

一爾確。

士元弘長,雅性內融。 崇善愛物,觀始知終。 喪亂備矣,勝塗未隆。先生標之,振

起清風。 綢繆哲后,無妄惟時。 夙夜匪懈,義在緝熙。 三略旣陳,霸業已基。

公琰殖根,不忘中正。 豈曰模擬,實在雅性。 亦旣羈勒,負荷時命。推賢恭己,久

而 可敬。

不失德。 公衡沖達,秉志淵塞。 六合紛紜,人心將變。 媚茲一人,臨難不惑。 鳥擇高梧,臣須顧眄。 疇昔不造,假翮鄰國。 進能徽音,退

公瑾英達, 朗心獨見。 披草求君, 定交一面。 桓桓魏武,外託霸跡。 志掩衡霍,恃

戰忘敵。卓卓若人,曜奇赤壁。 三光參分,宇宙暫隔。

子布擅名,遭世方擾。撫翼桑梓,息肩江表。王略威夷,吳魏同寶。 遂贊宏謨,匡

此霸道。 面,實由老臣。 桓王之薨,大業未純。 才爲世生,世亦須才。 把臂託孤,惟賢與親。 得而能任,貴在無猜。 **輟哭止哀,臨難忘身。** 成此南

昂昂子敬,拔跡草萊。荷檐吐奇,乃構雲臺。

子瑜都長 ,體性純懿。 諫而不犯,正而不毅。 將命公庭,退忘私位。 **豈無鶺鴒,固**

愼名器。

伯言謇謇,以道佐世。 出能勤功,入亦獻替。 謀寧社稷,解紛挫銳。 正以招疑,忠

而獲戾。

元歎 邈遠、神和形檢。 如彼白珪,質無塵點。 立行以恒,匡主以漸。 清不增潔,濁

不加染。

仲翔 高亮,性不和物。 好是不辜,折而不屈。 屢摧逆鱗,直道受黜。 歎過孫陽,放

同賈屈。

莘莘衆賢、千載一遇。 整轡高衢,驤首天路。 仰揖玄流,俯弘時務。 名節殊塗,雅

列

僔

第

致同 趣。 日月麗天,瞻之不墜。 仁義在躬,用之不匱。尙想遐風,載揖載味。 後生撃

節,懦夫增氣。

賦,至「聞所傳於相傳,云獲麟於此野,誕靈物以瑞德,奚授體於虞者!疾尼父之洞泣,似實 小勝。」溫曰:「卿思益之。」宏應聲答曰:「感不絕於余心,愬流風而獨寫。」 珣誦味久之,謂滔 率耳。今於『天下』之後,移韵徙事,然於寫送之致,似爲未盡。」滔云:「得益寫韵一句,或爲 慟而非假。豈一性之足傷,乃致傷於天下」,其本至此便改韵。 珣云:「此賦方傳千載,無容 從桓溫北征,作北征賦,皆其文之高者。嘗與王珣、伏滔同在溫坐,溫令滔讀其北征

曰:「當今文章之美,故當共推此生。」

呼爲「袁伏」。 宏心恥之,每歎曰:「公之厚恩未優國士,而與滔比肩,何辱之甚。」 性强正亮直、雖被溫禮遇、至於辯論、每不阿屈、故榮任不至。與伏滔同在溫府,府中

賢皆集,安欲以卒迫試之,臨別執其手,顧就左右取一扇而授之曰:「聊以贈行。」」宏應聲答 謝安常賞其機對辯速。後安爲揚州刺史,宏自吏部郎出爲康陽郡,乃祖道於冶亭。時

曰:「輒當奉揚仁風、慰彼黎庶。」時人歎其率而能要焉。

宏見漢時傳毅作顯宗頌,辭甚典雅,乃作頌九章,頌簡文之德,上之於孝武。 太元初,卒於康陽,時年四十九。撰後漢紀三十卷及竹林名士傳三卷、詩賦誄表等雜

文凡三百首,傳於世。

三子:長超子,次成子,次明子。 明子有父風、最知名、官至臨賀太守。

伏滔

溫引爲參軍,深加禮接,每宴集之所,必命滔同游。從溫伐袁眞,至壽陽,以淮南屢叛,著論 <u>伏滔字玄度,平昌安丘人也。有才學,少知名。州舉秀才,辟別駕,皆不就。</u> 大司馬桓

一篇,名曰正淮。其上篇曰:

論之。 溢於世, 自戰國至於晉之中興,六百有餘年,保淮南者九姓,稱兵者十一人,皆亡不旋踵, 全有之,而考烈王都焉。 淮南者,三代揚州之分也。當春秋時,吳、楚、陳、蔡之與地。曰曰戰國之末, 而終莫戒焉。 其天時歟, 秦幷天下,建立郡縣,是爲九江。 地勢歟,人事歟。何喪亂之若是也!試商較而 劉項之際,號日東楚。 禍

誅絕,近 於 、人事。 夫懸象著明,而休徵表於列宿,山河衿帶,而地險彰於丘陵,治亂推移,而興亡見 則 由此 火星晨見而王凌首謀,長彗宵暎而毌丘襲亂。 而 觀,則兼也必矣。 昔妖星出於東南 而弱楚以亡,飛孛橫於天漢 斯則表乎天時 也。 彼 而 劉安

列

者,南 以屢多亡國也。 兼之門,十室而七;藏甲挾劍之家,比屋而發。然而仁義之化不漸,刑法之令不及,所 之所取給。此則係乎地利者也。其俗尚氣力而多勇悍,其人習戰爭而貴詐偽,豪右幷 革之具萃焉,苞木箭竹之族生焉,山湖藪澤之隈,水旱之所不害,土產草滋之實,荒年 里,外有江湖之阻,內保淮肥之固。龍泉之陂,良疇萬頃,舒六之貢,利盡蠻越,金石皮

亡家族。彼十亂者,成乎人事者也。然則侵弱昏迷,以至絕滅,亡煙當之。恃强畏逼, 兵濫楚,力制東夏,屬當多難之世,仍值廢興之會,謀非所議,相係禍敗。祖約助逆,身 稱制下邑,狼狽奔亡,傾城受戮。及至彦雲、仲恭、公休之徒,或憑宿名,或怙前功,握 身嗣俱滅。李憲因亡衙之餘,袁術當衰漢之末,負力幸亂,遂生僭逆之計,建號九江, 賓客,沈溺數術,藉二世之資,恃戈甲之盛,屈强江淮之上,西向而圖宗國,言未絕口, 亂之餘,御新化之俗,無德而寵,欲極禍發。王安內懷先父之憾,外眩姦臣之說,招引 **遂謀圖全之計,庶幾後亡之福,衆潰於一戰,身脂於漢斧。**劉長支庶,奄王大國,承喪 滅。黥布以三雄之選,功成垓下,淮陰旣囚,梁越受戮,嫌結震主之威,慮生同體之禍, 世考<u>烈以衰弱之</u>楚屢遷其都,外迫强秦之威,內遘陽申之禍,逃死劫殺,三世而

首難,士少以驕矜樂禍。 **遂謀叛亂,黥布有焉。 二王遘逆,寵之之過也。 公路僭爲,乘釁之盜也。 二將以圖功** 本其所因,考其成跡,皆寵盛禍淫,福過災生,而制之不漸,積

其下篇曰:

之有由也。

戰陳都, 覺也。 舉京畿之衆,外徵四海之銳,雲合雨集,推鋒以臨淮浦,而誕飲晏然,方嬰城自固,憑軾 以觀王師。 而 而 馳說 廬九之間流溺兵凶者十而七八焉。 然則屠 昔高祖之誅黥布也,撮三策之要,馳赦過之書,乘人主之威以除逆節之虜,然猶決 而高 之士與闔境之人幽囚誅放者,亦已衆矣。光武連兵於肥舒,魏祖馳馬於蘄苦, ,暴尸横野,僅乃克之,害亦深矣!長安之謀,雖兵未交於山東,禍未徧於天下, 於是築長圍,起棼櫓,高壁連塹,負戈擊柝以守之。。自夏及春,而後始知亡 城之禍,其可極言乎。約之出奔,淮左爲墟,悲夫! 祖以之宵征,世宗以之發疾,豈不勤哉!文皇挾萬乘之威,杖伊周之權,內 夫王凌面縛,得之於斫石,仲恭接刃,成之於後

之,無制以節之, 之本淺矣。 信哉魯哀之言,夫生乎深宮,長於膏粱,憂懼不切於身,榮辱不交於前,則其仁義 奉以南面之尊,藉以列城之富,宅以制險之居,養以衆强之盛,而 則厭溢樂禍之心生矣。 夫以昏主御姦臣,利甲資堅城,偽令行於封 無德 以臨

哉!易稱「履霜堅冰,馴致之道」,蓋言漸也。嗚呼!斯所以亂臣賊子亡國覆家累世而 不絕者歟! 內,邪惠結於人心,乘間幸濟之說日交於側,猾詐錮咎之羣各馳於前,見利如歸,安在 其不爲亂乎!況乘舊寵,挾前功,畏逼懼亡,以謀圖身之舉者,望其俛首就羈,不亦适

患哉 者不得資其弊。夫如是,將使天下從風,穆然軌道,慶自一人,惠流萬國,安有向時之 其萌際,重其名器,深根固本,傳之百世。 時修,刑賞無所謬其實。令之有漸,軌之有度,寵之有節,權不外授,威不下黷,所以杜 令,上下有序,無**僭差之嫌,四人安業,無**幷兼之國。 三載考陟,功罪不得逃其跡,九伐 **昔先王之宰天下也,選於有德,訪之三吏,正其分位,明其等級,畫之封疆,宣之政** 雖時有盛衰,弱者無所懼其亡,道有興廢,强

謂曰:「百人高會,天子先問伏滔在坐不,此故未易得。 中,拜著作郎,專掌國史,領本州大中正。 壽陽平,以功封聞喜縣侯,除永世令。 孝武帝嘗會於西堂,滔豫坐,還,下車先呼子系之 溫薨,征西將軍桓豁引爲參軍,領華容令。太元 爲人作父如此,定何如也。」遷游擊

子系之,亦有文才,歷黃門郎、三三侍中、尚書、光祿大夫。

將軍,著作

如故。

卒官。

彩,汝後必有文章。」自此後藻思日新。弱冠,州三辟,不就。含父嘗宰新淦,新淦人楊羨後 新淦人以含舊宰之子,咸致賂遺,含難違而受之。及歸,悉封置而去。由是遠近推服焉。 爲含州將,引含爲主簿,含傲然不顧,羨招致不已,辭不獲而就焉。及羨去職,含送之到縣 羅含字君章,桂陽耒陽人也。 少有志尙,嘗晝臥,夢一鳥文彩異常,飛入口中,因驚起說之。 曾祖彦,臨海太守。父綏,滎陽太守。|含幼孤,爲叔母朱 朱氏曰:「鳥有文

南郡公、引爲郎中令。尋徵正員郎、累遷散騎常侍、侍中、仍轉廷尉、長沙相。 惟荆楚而已。」徵爲尚書郎。溫雅重其才,又表轉征西戶曹參軍。俄遷宜都太守。及溫封 讌會,含後至。溫問衆坐曰:「此何如人。」或曰:「可謂荆楚之材。」溫曰:「此自江左之秀,豈 擾,於城西池小洲上立茅屋,伐木爲材,曰劉織葦爲席而居,布衣蔬食,晏如也。 也。」含曰:「豈有勝公而行非邪!故一無所問。」溫奇其意而不責焉。轉州別駕。 |含至,不問郡事,與尚累日酣飲而還。|溫問所劾事,|含曰:「公謂尚 何 如 人。」|溫曰:「勝我 可謂湘中之琳琅。」尋轉州主簿。後桓溫臨州,又補征西參軍。溫嘗使含詣尚,有所檢劾。 後爲郡功曹,刺史庾亮以爲部江夏從事。太守謝尚與含爲方外之好,乃稱曰:「羅君章 年老致仕,加 溫嘗與僚屬 以解含誼

二四〇四

中散大夫,門施行馬。 德行之威焉。 年七十七卒,所著文章行於世。 初,含在官舍,有一白雀棲集堂宇,及致仕還家,階庭忽蘭菊叢生,以

顧愷之

人曰:「吾賦之比嵇康琴,不賞者必以後出相遺,深識者亦當以高奇見貴。」 顧愷之字長康,晉陵無錫人也。父悅之,尚書左丞。愷之博學有才氣,嘗爲筝賦成,謂

何依!」或問之曰:「卿憑重桓公乃爾,哭狀其可見乎。」答曰:「聲如震 雷 破 山,淚 如 傾 河 桓溫引爲大司馬參軍,甚見親昵。 溫薨後,愷之拜溫墓,賦詩云:「山崩溟海竭,魚鳥將

注海。 」

米劍頭炊。」仲堪曰:「百歲老翁攀枯枝。」有一參軍云:「盲人騎瞎馬臨深池。」「云中堪眇目, 燎。」玄曰:「白布纏根樹旒旐。」「三一中堪曰:「投魚深泉放飛鳥。」復作危語。」玄曰:「矛 木蒙籠,若雲興霞蔚。」桓玄時與愷之同在仲堪坐,共作了語。愷之先曰:「火燒平原無 還,仲堪特以布帆借之,至破冢,遭風大敗。 愷之與仲堪牋曰:「地名破冢,真破冢而出。 行 人安穩,布帆無恙。」還至荆州,人問以會稽山川之狀。愷之云:「千巖競秀,萬壑爭流。草 愷之好諧謔,人多愛狎之。後爲殷仲堪參軍,亦深被眷接。仲堪在荆州,愷之嘗因假

驚曰:「此太逼人」」因罷。愷之每食甘蔗,恒自尾至本。人或怪之。 云"「漸入佳境。」

悅 桓玄,皆其深所珍惜者。 瞳子,飛白拂上,使如輕雲之蔽月,豈不美乎!|仲堪乃從之。|愷之嘗以一廚畫糊題其前,寄 云:「此子宜置丘壑中。」欲圖殷仲堪,仲堪有目病,固辭。 起人形,妙絕於時,嘗圖裴楷象,頰上加三毛,觀者覺神明殊勝。又爲謝鯤象,在石巖裏, 遂密去針而愈。 不點目精。)如初,但失其畫,直云妙畫通靈,變化而去,亦猶人之登仙,了無怪色。 一鄰女,挑之弗從,乃圖其形於壁,以棘針釘其心,女遂患心痛。 愷之因致其情,女從之, 尤善丹青,圖寫特妙,謝安深重之,以爲有蒼生以來未之有也。 人問其故,答曰:「四體娇蚩,本無闕少於妙處,(112)傳神寫照,正在阿堵中。」嘗 愷之每重嵇康四言詩,因爲之圖,恒云:「手揮五絃易,目送歸鴻難。」每寫 **玄乃發其廚後,竊取畫,而緘閉如舊以還之,紿云未開。** 愷之曰:「明府正爲眼耳,若明點 愷之每畫人成,或數年 愷之見封

得。 就溺焉,愷之信其不見己也,甚以珍之。 愷之彌自力忘倦。 詠,答曰:「何至作老婢聲」」義熈初,爲散騎常侍,與謝瞻連省,夜於月下長詠,瞻每遙贊之, 桓玄嘗以一柳葉給之曰:「此蟬所翳葉也,取以自蔽,人不見己。」愷之喜,引葉自蔽,玄 愷之矜伐過實,少年因相稱譽以爲戲弄。又爲吟詠,自謂得先賢風制。或請其作洛生 瞻將眠,令人代己,愷之不覺有異,遂申旦而止。 尤信小術,以爲求之必

絕"才絕,畫絕,癡絕。 年六十二,卒於官,所著文集及啓矇記行於世。 初, 愷之在桓溫府,常云:「愷之體中癡黠各半,合而論之,正得平耳。」故俗傳愷之有三

郭澄之

盧循 意定,謂澄之曰:「當與卿共登霸陵岸耳。」因還。 屬議之,多不同。 作逆,流離僅得還都。 郭澄之字仲靜,太原陽曲人也。少有才思,機敏兼人。調補尚書郎,出爲南康相。值 次問澄之,澄之不答,西向誦王粲詩曰:「南登霸陵岸,迴首望長安。」裕便 劉裕引爲相國參軍。 從裕北伐,旣克長安,裕意更欲西伐,集僚

澄之位至裕相國從事中郎,封南豐侯,卒於官,所著文集行於世。

原親而韜翰,匪惟高步當年,故以騰華終古。 潁川之時秀。 季雅摛屬遒邁,夙備成德,稱爲泉岱之珍,固其然矣。 廓,賦辭人之所遺,特構新情,豈常均之所企!太沖含豪歷載,以賦三都,士安見而 於應貞宴射之文,極形言之美,華林羣藻罕或疇之。 史臣曰:夫賞好生於情,剛柔本於性,情之所適,發乎詠歌,而感召無象,風律殊製。至 鄒湛之持論,棗據之緣情,實南陽之人傑,蓋 子安幼標明敏,少蓄清思,懷天地之寥 彦伯未能混迹光塵,而 稱善,平

思通敏,延譽淸流,德輿西伐之計,取定於微指者矣。 乎精誠,豈獨日者之蛟鳳!長康矜能過實,譚諧取容,而才多逸氣,故有三絕之目。 學藝優贍,筆削擅奇,降帝問於西堂,故其榮觀也。 神之歌,朗暢對儒之論。 初之文,風流可尚,擢秀士林,揚都之美,CI<3尤重時彦。 屈 乎卑位,釋時宏論,亦足見其志耳。季鷹縱誕一時,不邀名爵,黃花之什,濬發神府。 李充之學箴,信清壯也。 袁宏東征、名臣之作,抑潘陸之亞。 君章耀湘中之寶,挺荆楚之材, 曹毗沈研秘籍,踠足下僚, 夢鳥發 仲靜機 綺靡降 玄度 仲

遒文綺爛。 贊曰:爻彖垂法,宮徵流音。 美哉羣彥,揚蕤翰林。 | **袁**、庾、

· 定、

愷,

經藻霞煥。

架彼辭人,

共超清貫。 俱諧振玉,各擅鏘金。 子安、太沖,

校勘記

- 發彼 互的 「互的」,周校:文選作「五的」。 按:「五的」即「五正」,見周禮射人。 「互」蓋形譌。
- 蔡邕之於典引也 「邕」,各本誤作「雍」。 蔡邕注典引,在文選中,今據改。
- 陳留 魏志 流統縣傳養松之注云,臻孫權,晉尚書郎,作左思吳都賦敍及注。 衛權 「權」,各本作「瓘」。嚴可均全晉文注:左思傳有「陳留衞瓘」,乃「衞權」之誤。 今據改
- 故知 延州之德不 孤 「延州」, 各本作「延門」,今從吳本作「延州」, 與世說賞譽注引褚氏家傳

列

傅

第

六 十 二

合。 通志一七五亦作「延州」。 延州指吳季子,見左傳襄公三十一年及淮南子精神訓。

五二 形託 神王 「王」,局本作「川」,殿本作「用」,宋本作「王」,今從宋本。「王」即「旺

[*] 則俗非不可以苟從 周校:「俗」衍文。

明朝菌

不可喻晦朔

ハベン 率爾與左右微服泛江 「率爾」,各本作「率耳」,今從宋本。 通志一七五亦作「率爾」。

「喻」,各本作「踰」,今從宋本,與莊子「朝菌不知晦朔」原義合。

總角料主 「料」,各本作「斷」,局本作「料」,與文選合,今從之。

糾獸雖驚 「獸」,袁宏原文作「虎」,文選及李善注可證。 蓋唐人修史避諱改。下「端委獸門」同。

[1] 吳楚陳蔡之與地 | 斠注::寰宇記一二九引「與」作「輿」。

歷黃門郎 各本於「黃門郎」下有「侍郎」二字、宋本無。 今從宋本。

伐木 爲材 通志一七五「材」作「牀」、與類聚六一引羅含別傳合。

二吾 白布 纏根樹 旒旐 料注:"世說排調「根」作「棺」、「樹」作「豎」。

臨深 池 册府八三四及世說排調「臨」上並有「夜半」二字。

本無闕 少於妙處 (細覽七五○作「本無關於妙處」,與世說巧藝合。

揚都之美 「揚都」,各本誤作「陽都」。 周校:當作「揚都」, 庾闡有揚都賦。

晉書卷九十三

列傳第六十三

外戚

也。 召,此非其效歟! 若樊靡卿之父子,竇廣國之弟兄,陰興之守約戒奢,史丹之掩惡揚善,斯並后族之所美者 以呂霍之家誅夷於西漢,梁鄧之族剿絕於東都,其餘干紀亂常、害時蠹政者,不可勝載。 者,何哉? 要,或威權震主,或勢力傾朝,居安而不慮危,務進而不知退,驕奢旣至,釁隙隨之者乎! 由此觀之,干時縱溢者必以凶終,守道謙沖者永保貞吉,古人所謂禍福無門,惟人所 詳觀往誥, 豈不由祿以恩升,位非德舉, 識慚明悊, 材謝經通, 假椒房之寵靈, 逖聽前聞, 階緣外戚以致顯榮者, 其所由來尚矣。 而多至禍敗,鮮克令終 總 軍 國之樞

逮于晉難,始自宮掖。 列 傅 第 六 + Ξ 外 戚 楊駿藉武帝之寵私,叨竊非據,賈謐乘惠皇之蒙昧,成此厲階,

野之畏避朝權,王叔仁之固求出鎮,用能全身遠害,有可稱焉。 |恭高門領袖,旣而職兼出納,任切股肱。|孝伯竟以亡身,元規幾於敗國,豈不哀哉! 若褚季 遂使悼后遇雲林之災,整懷濫湖城之酷。 天人道盡,喪亂弘多,宗廟以之顚覆,黎庶於焉殄 王恭等已入列傳,其餘卽敍其成敗,以爲外戚篇云。 詩云:「 赫赫宗周、褒姒滅之。」其此之謂也。爰及江左、未改覆車。 賈充、楊駿、庾亮、王獻之、 庾亮世族羽儀,王

羊琇

計,參鎭西鍾會 羊琇字稚舒,景獻皇后之從父弟也。父耽,官至太常。兄瑾,尚書右僕射。琇少舉郡 軍事,從平蜀。及會謀反,勝正言苦諫,還,賜爵關內侯。

撫軍 而識 議。 護各十年。」 散騎常侍。 **琇密為** ,命琇參軍 之。 **||秀沙學有智算,少與武帝通門,甚相親狎,每接筵同席,嘗謂** 其後文帝與武帝論當世之務及人間可否,武帝答無不允,由是儲位遂定。 帝戲而許之。 武帝畫策,甚有匡 **踒在職十三年,典禁兵,豫機密,龍遇甚厚。** 事。 帝卽王位後,擢 初,帝未立爲太子,而聲論不及弟攸,文帝素意重攸,恒有代宗之 一教。 又觀察文帝爲政損益,揆度應所顧問之事,皆令武帝默 | | | | | | | | | 左衞 將軍 ,封甘露亭侯。 帝曰:「若富貴見用,任領 帝踐阼,累遷中護軍,加 及帝爲

初 ,杜預拜鎭南將軍,朝士畢賀,皆連楊而坐。 矮與裴楷後至,曰:「杜元凱乃復以連榻

而坐客邪。〕遂不坐而去。

命。 而已。 徒,特能振 夜續畫,中外五親無男女之別,時人譏之。 然放恣犯法,每爲有司所貸。其後司隸校尉劉毅劾之,應至重刑,武帝以舊恩,直免官 **| 咳性豪侈,費用無復齊限,而屑炭和作獸形以溫酒,洛下豪貴咸竸效之。 又喜遊讌,以** 尋以侯白衣領護軍。 恤。 選用多以得意者居先,不盡銓次之理。 頃之,復職 然黨慕勝己,其所推奉,便盡心無二。 將士有冒官位者,爲其致節,不惜軀 窮窘之

進,加散騎常侍,還第,卒。 三十萬,布百匹。」諡曰威。 不幸早薨,朕甚悼之。 及齊王攸出鎮 也,琇以 其追贈輔國大將軍、開府儀同三司,賜東園祕器,朝服 切諫忤旨,左遷太僕。 帝手詔曰:「誘與朕有先后之親,少 旣失寵憤怨,遂發病,以疾篤求退。 小之恩,歷位外內,忠允茂 一襲,錢 拜特

王恂 弟虔 愷

尹,建立二學,崇明 王 |恂字良夫,文明皇后之弟也。 五經。 **局令袁毅嘗餽以駿馬,恂不受。及毅敗,受貨者皆被廢黜焉。** 父庸, 魏蘭陵侯。 **恂文義通博,在朝忠正,累遷河南**

諸部 魏氏給公卿已下租牛客戶數各有差,自後小人憚役,多樂爲之,貴勢之門動有百數。又 亦以匈奴胡人爲田客,多者數千。 武帝踐位,詔禁募客,恂明峻其防,所部莫敢犯

咸寧四年卒、贈車騎將軍。

恂弟虔、愷。

爲 光祿勳,轉尙書,卒。子士文嗣,歷右衞將軍、南中郎將,鎭許昌,爲劉聰所害。 虔字恭祖。 以功幹見稱,累遷衞尉,封安壽亭侯,拜平東將軍、假節、監靑州諸軍事。徵

後將軍。 千八百戶。 及卒,諡曰醜。 愷字君夫。少有才力,歷位清顯,雖無細行,有在公之稱。以討楊駿勳,封山都縣公,邑 愷旣世族國戚,性復豪侈,用赤石脂泥壁。石崇與愷將爲鴆毒之事,司 遷龍驤將軍,領驍騎將軍,加散騎常侍,尋坐事免官。起爲射聲校尉,久之,轉 隸校尉傅

楊文宗

楊文宗、武元皇后父也。其先事漢,四世爲三公。文宗爲魏通事郎,襲封蓩亭侯。

卒,以后父,追贈車騎將軍,諡曰穆。

羊玄之

進、散騎常侍,更封興晉侯。遷尙書右僕射,加侍中,進爵爲公。 也,以討玄之爲名,遂憂懼而卒。 羊玄之,惠皇后父,尚書右僕射瑾之子也。 追贈車騎將軍、開府儀同三司 玄之初爲尚書郎,以后父,拜光祿大夫、 成都王穎之攻長沙王义 特

虞豫 子胤

位,追贈散騎常侍、驃騎大將軍、開府儀同三司、平山縣侯。 **虞豫,元敬皇后父也。** 少有美稱,州郡禮辟,並不就。 子胤嗣。 拜南陽王文學。 早卒。 明帝即

將軍。 問,徙胤爲宗正卿,加散騎常侍。 徙琅邪、廬陵太守。 胤,敬后弟也。 與南頓王宗俱爲明帝所昵,並典禁兵。及帝不豫,宗以陰謀發覺,事連胤,帝隱忍不 **咸康元年卒,追贈衞將軍,加散騎常侍。子洪襲爵。** 初拜散騎常侍,遷步兵校尉。 咸和二年,宗伏誅,左遷胤爲桂陽太守,秩中二千石。頻 太寧末,追贈豫官,以胤襲侯爵,轉右衛

傳第六十三 外戚

庾琛

守,徵爲丞相軍諮祭酒。卒官,以后父追贈左將軍,妻毌丘氏追封鄉君,子院陳先志不受。 咸和中,成帝又下詔追贈琛驃騎將軍、儀同三司,亮又辭焉。 庾琛字子美,明穆皇后父也。兄袞,在孝友傳。 琛永嘉初爲建威將軍,過江,爲會稽太 亮在列傳。

杜乂

嘗言於朝曰:「恨諸君不見杜火也。」其爲名流所重如此。 清,杜乂形清。」襲封當陽侯,辟公府掾,爲丹楊丞。 早卒,無男,生后而以終,妻裴氏嫠居養 盛名於江左。王羲之見而目之曰:「膚若凝脂,眼如點漆,此神仙人也。」桓彝亦曰:「衞玠神 百戶。至孝武帝時,崇進爲廣德縣君。 后,以禮自防,甚有德音。 杜乂字弘理,自成恭皇后父,鎭南將軍預孫,尚書左丞錫之子也。 **咸康初,追贈金紫光祿大夫,諡曰穆。** 裴氏壽考,百姓號日杜姥。 封裴氏爲高安鄉君,邑五 初,司徒蔡謨甚器重义 性純和,美姿容,有

褚裒

之, 䂮曰:「物各有所施, 榱椽之材不合以爲藩落也, 願明府垂察。」乃捨之。 垂五十,鎭南將軍羊祜與䂮有舊,言於武帝,始被升用,官至安東將軍。父給,武昌太守 褚裒字季野,康獻皇后父也。 祖割,有局量,以幹用稱。 嘗爲縣吏, 事有不合, 令欲鞭 家貧,辭吏。 年

亦備矣。」 裏陽秋。」言其外無臧否,而內有所褒貶也。 裒 少有簡貴之風,與京兆杜乂俱有盛名,冠于中興。 謝安亦雅重之,恒云:「良雖不言, 譙 國 桓彝 見而目之曰:「季野有皮 而四時之氣

建威 州徐州之琅邪諸軍事、假節,鎮金城,又領琅邪 都鄉亭侯,稍遷司徒從事中郎,除給事黃門侍郎。 領中書令。 浴將軍 女爲妃,於是出爲豫章太守。 初辟西陽王掾、吳王文學。 、江州刺史,鎭半洲。 [三] 在官淸約,雖居方伯,恒使私童樵採。 蘇峻之構逆也,車騎將軍都鑒以良爲參軍。 及康帝卽位,徵拜侍中,遷尙書。 內史。 康帝爲琅邪王時,將納妃, 以后父,苦求外出, 頃之,徵爲 妙選素望,詔 峻平,以功封 衞將軍

有司以裒皇太后父,議加不臣之禮,拜侍中、衞將軍、錄尚書事,持節、都督、刺史如故。 卦,不知此年少何以乃表斯祥? 初,裒總角詣庾亮,亮使郭璞筮之。 二十年外,吾言方驗。」及此二十九年而康獻皇太后臨 卦成,蹼駭然,亮曰:「有不祥乎。」璞曰:「此非

五

帝任賢之道,虛己受成,坦平心於天下,無宜內示私親之舉,回朝野失望,所損豈少」於是 寵,負愧實深,豈可復加殊特之命,顯號重疊!臣有何勳可以克堪? 改授都督徐克青揚州之晉陵吳國諸軍事、衞將軍、徐克二州刺史、假節,鎭京口 聖世,豈復遺力!實懼顚墜,所誤者大。今王略未振,萬機至殷,陛下宜委誠宰輔,一遵先 以近戚, 、懼獲譏嫌,上疏固請居藩,曰:「臣以虚鄙,才不周用,過蒙國恩,累忝 何顏可以冒進? 非 無勞受

前 光祿 也,足下宜以大政付之。」「衰長史王胡之亦勸焉,於是固辭歸藩,朝野咸歎服之。 永和初,復徵裒,將以爲揚州、錄尚書事。 吏部尚書劉遐說裒曰:「會稽王令德,國之周 大夫顧和、侍中殷浩。疏奏,卽以和爲尚書令,浩爲揚州刺史。 進號征

先 援,哀遣龐領銳卒三千迎之。龐違哀節度,軍次代陂,爲石遵將李蒐所敗,至死傷太牛,龐 豫 |邳,賊即奔潰,||處率所領據其城池,今宜速發,以成聲勢,於是除征討大都督青、揚、徐、兗、 遣 五 遣督護 州 偏 及石季龍死,悤上表請伐之,卽日戒嚴,直指泗口。朝議以悤事任貴重,不宜深入,可 諸 軍 徐龕伐沛,四獲偽相支重,郡中二千餘人歸降。 事。 夏重 |陳前所遣前鋒督護王頤之等徑造彭城,示以威信,後 遣 督護麋嶷進軍下 魯郡 山有五 百餘家,亦 建

留鎭 執節不撓,爲賊所害。 廣 陵。 韶以偏帥之責,不應引咎,逋寇未殄,方鎭任重,不宜貶降,使還鎭京口 哀以春秋青帥,授任失所,威略虧損,上疏自貶,以征北將軍行事,求 ,解征討

十七,遠近嗟悼,東士哀慕之。 接,莫能自拔,皆爲慕容皝及苻健之衆所掠,死亡咸盡。 知名、歷散騎常侍、祕書監。 了聞哭聲甚衆,哀問:「何哭之多。」左右曰:「代陂之役也。」 哀益慚恨。 時石季龍新死,其國大亂,遺戶二十萬口渡河, 贈侍中、太傅,本官如故,諡 將歸順,乞師救援。 哀以遠圖不就,憂慨發病。 日元穆。 子歆,字幼安,以學行 永和 會裒已旋,威勢不 五年卒,年四 及至原

何準 子澄

卒。 放、惔、澄。 軍,勸其令仕,準曰:「第五之名何減驃騎。」,準兄弟中第五,故有此言。 時,而準散帶衡門,不及人事,唯誦佛經,修營塔廟 升平元年, 何準字幼道 追贈金紫光祿大夫,封晉興縣侯。 ,穆章皇后父也。 高尙寡欲,弱冠知名,州府交辟,並不就。 子||恢以父素行高潔,表讓不受。三子: 而已。 徵拜散騎郎, 充居宰輔之重,權 不起。 兄充為驃騎將 年四十七 傾

放繼充。

|惔官至南康太守,早卒。||惔子元度,西陽太守,次叔度,太常卿、尚書。

領本州大中正。及桓玄執政,以疾奏免,卒于家。安帝反正,追贈金紫光祿大夫。 師。 之,以爲冠軍將軍、吳國內史。太元末,琅邪王出居外第,妙選師傅,徵拜尙書,領琅邪王 安帝卽位、遷尙書左僕射、典選、王師如故。時澄腳疾、固讓、特聽不朝、坐家 澄字季玄,起家秘書郎,轉丞,清正有器望,累遷秘書監、太常、中護軍。 次子融,元熙中,爲大司農。 孝武帝深愛 視事。 長子籍,

王濛 子脩

悅其貌,遺以新帽,時人以爲達。與沛國劉惔齊名友善,惔常稱濛性至通,而自然有節,濛 書。美姿容,嘗覽鏡自照,稱其父字曰:「王文開生如此兒邪!」居貧,帽敗,自入市買之,嫗 少時放縱不羈,不爲鄉曲所齒,晚節始克己勵行,有風流美譽,虛己應物,恕而後行,莫不敬 王濛字仲祖,哀靖皇后父也。曾祖黯,歷位尚書。祖佑,北軍中侯。父訥,新淦令。濛 事諸母甚謹,奉祿資產常推厚居薄,喜慍不形於色,不修小潔,而以淸約見稱。善隸

每云:「劉君知我,勝我自知。」時人以惔方荀奉倩,濛比袁曜卿,凡稱風流者,舉濛、

宗焉

以允答具瞻,云儀形海內」導不答。 尹天下,方將澄淸彝倫,崇重名器。。夫軍國殊用,文武異容,豈可令涇渭混流,虧淸穆之風, 司 徒王導辟爲掾。 韶爲停罰,猶不就。 徙中書郎。 後出補長山令,復爲司徒左西屬。 濛以此職有譴則

應受杖,固辭。

|史語甚不多,可謂有令音。」有二子:脩、蘊。 聞之曰:「人言會稽王癡,竟癡也」疾漸篤,於燈下轉麈尾視之,歎曰:「如此人曾不得四十 幸之,與劉惔號爲入室之賓。轉司徒左長史。 和,桓溫高爽邁出,謝尙淸易令達,而濛性和暢,能言理,辭簡而有會。」及簡文帝輔政,益貴 也」年三十九卒。 簡文帝之爲會稽王也,嘗與孫綽商略諸風流人,綽言曰:「劉惔淸蔚簡令,王濛溫潤恬 臨殯,劉惔以犀杷麈尾置棺中,因慟絕久之。 晚求爲東陽,不許。及濛病,乃恨不用之。濛 謝安亦常稱美濛云:「王長

以示劉惔曰:「敬仁此論,便足以參微言。」起家著作郎、琅邪王文學,轉中軍司馬,未拜而 脩字敬仁,小字苟子。「当明秀有美稱,善隸書,號曰流奕淸舉。年十二,作賢全論。

列 僔

卒,年二十四。 臨終,歎曰:「無愧古人,年與之齊矣。」

王遐

初,追贈特進、光祿大夫,加散騎常侍,諡曰靖。 王遐字桓子,簡順皇后父,<<>>>>>>>>>
惡騎將軍述之從叔也。 少以華族,仕至光祿勳。

長子恪,領軍將軍。恪子欣之,豫章太守,秩中二千石。欣之弟歡之,廣州刺史。

王蘊

子臻,崇德衞尉。

於是大振貸之,賴蘊全者十七八焉。朝廷以違科免蘊官,士庶詣闕訟之,詔特左降晉陵太 饑饉、若表上須報,何以救將死之命乎!專輒之愆、罪在太守,且行仁義而敗,無所恨也。」 有德政。屬郡荒人飢,輒開倉贍卹。主簿執諫,請先列表上待報,鹽曰:「今百姓嗷然,路有 白之,曰:「某人有地,某人有才。」務存進達,各隨其方,故不得者無怨焉。補吳興太守,甚 性平和,不抑寒素,每一官缺,求者十輩,蘊無所是非。時簡文帝爲會稽王,輔政,蘊輒連狀 王蘊字叔仁,孝武定皇后父,司徒左長史濛之子也。起家佐著作郎,累遷尚書吏部郎。

守。復有惠化,百姓歌之。

書左僕射,將軍如故,遷丹楊尹,即本軍號加散騎常侍。 蘊以姻戚,不欲在內,苦求外出,復 在貴權於事不事耳。可暫臨此任,以紓國姻之重。」於是乃受命,鎭於京口。 節,復固讓。 以爲都督浙江東五郡、鎭軍將軍、會稽內史,常侍如故。 非三代令典,固辭不受。 定后立,以后父,遷光祿大夫,領五兵尚書、本州大中正,封建昌縣侯。 謝安謂蘊曰:「卿居后父之重,不應妄自菲薄,以虧時遇,宜依褚公故事,但令 朝廷敦勸,終不肯拜,乃授都督京口諸軍事、左將軍、徐州刺 **蘊以恩澤賜爵** 頃之,徵拜尚 史、假

蘊 五,追贈左光祿大夫、開府儀同三司。 曰:「恐阿太非爾之友。」阿太,悅小字也。後竟乖初好,時以爲知人。太元九年卒,年五十 子恭往省之,素相善,遂留十餘日方還。蘊問其故,恭曰:「與阿太語,蟬連不得歸。」蘊 <u></u> 蘊素嗜酒,末年尤甚。及在會稽,略少醒日,然循以和簡爲百姓所悅。 時王悦來拜墓,

亡姑、亡姊伉儷 止。 爽嘗與 帝崩,王國寶夜欲開門入爲遺詔,爽距之,曰:「大行晏駕,皇太子未至,敢入者斬」乃 長子華、早卒。次恭、在列傳。恭弟爽、字季明、强正有志力、歷給事黃門侍郎、侍中。 會稽王道子飲,道子醉呼爽爲小子,爽曰:「亡祖長史與簡文皇帝爲布衣之交, 二宮,何小子之有」及國寶執權,免爽官。 後兄恭再 起事,並以爽爲寧朔將

列傳第

大

十 三

外

戚

軍,參預軍事。恭敗,被誅。

褚爽

炎之、喩之,義熙中,並歷大官。 「若期生不佳,我不復論士矣。」爲義興太守,早卒,以后父,追贈金紫光祿大夫。|爽子|秀之、 褚爽字弘茂,小字期生,恭思皇后父也。祖裒,父歆。爽少有令稱,謝安甚重之,嘗曰:

流,幼道淸虛寡慾,皆擅名江表,見重當時,豈惟后族之英華,抑亦搢紳之令望者也。 愷地卽渭陽,家承世祿,曾弗聞於恭儉,但崇縱於奢淫,競爽於季倫,爭先於武子,旣塵淸 論,有斁王猷,雖復議行易名,未足懲惡勸善。 便蕃任遇。 史臣曰:羊琇託肺腑之親,處多聞之益,遭逢潛躍之際,預參經始之謀,故得繾綣恩私, 憑寵靈而逞慾,恃勢位而驕陵,屢犯憲章,頻干國紀,幸逢寬政,得免刑書。 弘理儀形外朗,季野神鑒內融,仲祖溫潤 風

贊曰:託屬丹掖,承輝紫宸。 地旣權寵,任惟執鈞。 約乃寡失,驕則陵人。覆車遺戒,

諒足書紳。

蓋

本字「弘治」,唐人避諱改「治」爲「理」。

[1] 半洲 各本誤作「平州」,今從殿本。與庾懌傳合。

無宜內示私親之舉「宜」,各本作「疑」,殿本作「宜」。周校:「無宜」猶「不宜」也。今從之。

徐龕 考異: 太山太守徐龕先已爲石勒所殺,當從穆紀作「王龕」。按: 通鑑九八亦作「王龕」。

校文:此「徐」字疑本「王」之譌。

五五 李菟 周校"穆紀及載記作「李農」。按"通鑑九八亦作「李農」。

以允答具瞻 通志一六五、册府七二三「以」上皆有「何」字。

苟子 各本皆作「荀子」。。斠注:世說文學作「苟子」。按:世說文學、賞譽、品藻稱「苟子」者六七

見,無作「荀子」者。通志一六五亦作「苟子」,今據改。

「C」 簡順皇后父 周校"「簡」下脱「文」字。

晉書卷九十四

列傳第六十四

隱逸

衡,故月令曰「季春之月聘名士,禮賢者」,斯之謂歟! 作制之後,訟息刑清之時,尙乃仄席幽貞以康神化,徵聘之禮賁於巖穴,玉帛之贄委於窐 長往邈而不追,安排窅而無悶,修身自保,悔吝弗生,詩人考槃之歌,抑在兹矣。至於體天 而韜其耀,良畫以符其志,絕機以虛其心。玉輝冰潔,川渟嶽峙,修至樂之道,固無疆之休, 先智士體其若茲,介焉超俗,浩然養素,藏聲江海之上,卷迹囂氛之表,漱流而激其淸,寢巢 <u>孔公;驕乎富貴,厥義詳於孫子。是以處柔伊存,有生之恒性;在盈斯害,惟神之常道。古</u> 岩夫穹昊垂景, 少微以躔其次, 文繫探幽, 貞遁以成其象。 故有避於言色, 其道聞乎

自典午運開,旁求隱逸,譙元彦之杜絕人事,江思悛之嘯詠林藪,峻其貞白之軌,成其 傳第六十四 熤 遡 二四二五

. 二四二六

出 塵之迹,雖不應其嘉招,亦足激其貪競。 今美其高尙之德,綴集於篇。

孫登

之,知非常人,與語,登亦不應。 好讀易,撫一 孫登字公和 時時游人間,所經家或設衣食者,一無所辭,去皆捨棄。[1]嘗住宜陽山,有作炭人見 ,汲郡共人也。 絃琴,見者皆親樂之。 無家屬,於郡北山爲土窟居之,夏則編草爲裳,冬則被髮自 性無恚怒,人或投諸水中,欲觀其怒,登旣出,便大

者也。 遭非命,乃作幽憤詩曰:〔三「昔慚柳下,今愧孫登。」或謂登以魏晉去就,易生嫌疑,故或嘿 才在乎識眞,所以全其年。今子才多識寡,難乎免於今之世矣!子無求乎。」康不能用,果 果在於用光。人生而有才,而不用其才,而果在於用才。故用光在乎得薪,所以保其耀,用 康每歎息。將別,謂曰:「先生竟無言乎。」登乃曰:「子識火乎。 火生而有光,而 文帝聞之,使阮籍往觀,旣見,與語,亦不應。 竟不知所終。 嵇康又從之游三年,問其所圖,終不答, 不用其光,

董京

董京 **小字威** 時乞於市, 一不知何郡人也。 得殘碎繒絮, 結以自覆, 初與隴西計吏俱至洛陽,引 全帛佳緜則不肯受。 被髮 或見推排罵辱, 而行,逍遙吟詠, 曾無怒 常宿

娛 人,藏 世, 有達 尾, 而 大。」 我 逝, 衆 胡 沈 人,深 以 孫楚時爲著作郎,數就社中與語,遂載與俱歸,京不肯坐。 洋洋 器 爲 人所 吟不 爲 於 懷 歡, ·穆其· .乎滿目,而作者七。 翫, 豈合物 靈,縕袍不能令暖,軒冕不 道 決 迷 清流 度, 邦。 忽焉 可飲,至道可餐,何爲 亦 京答之以詩曰:「周道斁兮頌聲沒,夏政衰兮五 失水。 情 沿將闚 ! 玄鳥紆 我,顰願 嗟乎 豈不樂天地之化也? 1 幕,而不被害? 魚鳥 而 能令榮; 去。 **戸樓樓** 相 與,萬 萬 物皆賤,惟 動 自 如川 使疲單? 世而 **赐**隼遠巢, 之流,靜 哀哉乎時之不可 不 ·悟; 人爲 魚 以我 咸 懸 貴, 如 楚乃貽之書,勸以今堯舜之 以 獸檻,鄙 JII 報之, 欲死。 動 之渟。 以九 常泪。 與, 乃明 夫 眄彼 州 鸚鵡 八知之。 對之以 爲 便便 其故。 梁魚, 狹, 能 君子,顧 言, 靜 夫 獨 以 逡巡 泗 處。 焉 古之至 環 知 濱 望 不 倒 浮 無

體 歸 我 敦 自 密,茫茫 後 然 數 之室。」 年,遁 太 素, 去,莫知 叉 日 是則 孔子不 是述 所之,於其所寢處惟有 遇,時彼感麟。 末 世流 奔, 以文 代 麟平麟 一石竹子 . 質, 悠悠世目, 及詩 胡不遁世 篇。 孰 以 知 存眞。 其 其 實 曰:「乾 逝 將 去 道 此至虚 剛 簡,坤

夏統

當 此乎!使統屬太平之時,當與元凱評議出處,遇濁代,念與屈生同汙共泥,若汙隆之間,自 或至海邊,拘嫌螁以資養。雅善談論。宗族勸之仕,謂之曰:「卿淸亮質直,可作郡綱紀,與 府朝接,自當顯至,如何甘辛苦於山林,畢性命於海濱也,」統悖然作色曰:「諸君待我乃至 1耦耕沮溺,豈有辱身曲意於郡府之間乎!聞君之談,不覺寒毛盡戴,白汗四帀,顏如渥 夏統字仲御,會稽永興人也。幼孤貧,養親以孝聞,睦於兄弟,每採梠求食,星行夜歸,

載馳而退,子路見夏南,四 憤恚而忧愾。吾常恨不得頓叔向之頭,陷華父之眼。奈何諸君 諸人曰:「昔淫亂之俗興,衞文公爲之悲惋,螮蝀之氣見,君子尚不敢指,季桓納齊女,仲尼 丹,心熱如炭,舌縮口張,兩耳壁塞也。」言者大慚。|統自此遂不與宗族相見。 疾病得瘳,大小以爲喜慶,欲因其祭祀,並往賀之,卿可俱行乎。」統從之。入門,忽見丹、珠 舌,吞刀吐火,雲霧杳冥,流光電發。 統諸從兄弟欲往觀之,難統,於是共給之曰:「從父間 國色,莊服甚麗,善歌儛,又能隱形匿影。甲夜之初,撞鐘擊鼓,間以絲竹,丹、珠乃拔刀破 一中庭,輕步佪儛,靈談鬼笑,飛觸挑柈,酬酢翩翻。「統驚愕而走,不由門,破藩直出。 歸責 會母疾,統侍醫藥,宗親因得見之。其從父敬寧祠先人,迎女巫章丹、陳珠二人,並有

迎 心此妖 物,夜與游戲,放傲逸之情,縱奢淫之行,亂男女之禮,破貞高之節,何也。〕遂隱牀

海,國 遺風 清激慷慨,大風應至,含水嗽天,雲雨響集,叱咤讙呼,雷電畫冥, 寓稽山,朝會萬國,授化鄙邦,崩殂 之,乃更就 「可。」統乃操柂正櫓,折旋中流,初作鯔 不應, 死,父子喪尸,後乃俱出,國人哀其孝義,爲歌河汝之章。 女曹娥,年甫十四,貞順之德過越梁宋,其父墮江不得尸,娥仰天哀號,中流悲歎,便投水 人歌而善,必反而 逝者三焉。 上,被髮 ,太伯之義讓,嚴遵 後 統時在船 人痛其忠烈,爲作小海唱。 重 其 問,乃徐答曰:「會稽夏仲御也。」充使問其土地風俗,統曰:「其人循循,猶有大禹之 而 母病 。於是風波振駭,雲霧杳冥, 說與語,其應如響,欲使之仕,即俛而 臥,不復言。 篤 中曝所市藥,諸貴 後和之,明先聖前哲無不 乃詣洛市藥。 衆親 之抗志,黃公之高節。」 踧 踖,即退遣<u></u>一一、珠,各各分散。 會三月上巳,洛中王公巳下並至浮橋,士女駢塡,車服燭 人車乘來者如雲, 今欲歌之。」衆人僉曰:「善。」統於是以足叩船、引聲喉囀, m 葬。 俄而白魚跳入船者有八九。 **鰞躍,後作鯆鮮引,飛鷁首,** 恩澤雲布,聖化猶存,百姓感詠,遂作慕歌。 盡歌。 不答。 又問:「卿居 卿頗能作卿 統並不之顧。太尉賈充怪而問之,統 充又謂曰:·「昔堯亦歌,舜亦歌,子與 伍子胥諫吳王,言不納 海濱, 土地 集氣長嘯, 間 掇獸尾, 奮長梢而船 頗能隨水戲乎。」答曰 觀者皆悚遽,充心尤異 .曲乎。]統曰:「先公惟 沙 塵煙起。 用,見戮投 叉孝 王

平立吾左右矣。」充欲耀以文武鹵簿,覬其來觀,因而謝之,遂命建朱旗,舉幡校,分羽騎爲 隊,軍伍 大禹之容。聞河女之音,不覺涕淚交流,卽謂伯姬高行在目前也。 公已下皆恐,止之乃已。諸人顧相謂曰:「若不游洛水,安見是人!聽慕歌之聲,便髣髴見 金翠,繞其船三帀。 肅然。 須臾,鼓吹亂作,胡葭長鳴,車乘紛錯,縱橫馳道,又使妓女之徒服袿獨,炫 統危坐如故,若無所聞。 **沈等各散曰:「此吳兒是木人石心也。」統歸會** 聆小海之唱,謂子胥、屈

朱沖

稽,竟不知所終。

認沖犢以歸,後得犢於林下,大慚,以犢還沖,沖竟不受。 朱沖字巨容,南安人也。 少有至行,閑靜寡欲,好學而貧,常以耕藝爲事。 有牛犯其禾稼,沖屢持芻送牛而 鄰人失犢,

無恨色。主愧之,乃不復爲暴。

|羌戎奉之若君,|沖亦以禮讓爲訓,邑里化之,路不拾遺, 邨無凶人, 毒蟲猛獸皆不爲害。 卒 者,其以沖爲太子右庶子。」沖每聞徵書至,輒逃入深山,時人以爲梁管之流。 咸寧四年, 詔補博士,沖稱疾不應。尋又詔曰:「東宫官屬亦宜得履蹈至行、敦悅典籍 沖居近夷俗,

以壽終。

范粲字承明,陳留外黃人,漢萊蕪長丹之孫也。至聚高亮貞正,有丹風,而博涉强記,

學皆可師,遠近請益者甚衆,性不矜莊,而見之皆肅如也。 魏時州府交辟,皆無所就。

之,乃應命爲治中,轉別駕,辟太尉掾、尙書郎,出爲征西司馬,所歷職皆有聲稱

設防備,敵不敢犯,西域流通,無烽燧之警。又郡壤富實,珍玩充積,燦檢制之,息其華侈。 以母老罷官。郡旣接近寇戎,粲以重鎭輒去職,朝廷尤之,左遷樂涫令。 及宣帝輔政、遷武威太守。到郡、選良吏、立學校、勸農桑。 是時戎夷頗侵疆場,粲明

不履地。子孫恒侍左右,至有婚宦大事,輒密諮焉。合者則色無變,不合則眠寢不安,妻子 之。一燥又稱疾,闔門不出。於是特詔爲侍中,持節使於雍州。一燥因陽狂不言,寢所乘車,足 金墉城,桑素服拜送,哀慟左右。時景帝輔政,召羣官會議,桑又不到,朝廷以其時望,優容 頃之,轉太宰從事中郎。遭母憂,以至孝稱。服闋,復爲太宰中郎。 齊王芳被廢,遷于

使郡縣輿致京師,加以聖恩,賜其醫藥,若遂瘳除,必有益於政。 武帝踐阼,泰始中,桑同郡孫和時爲太子中庶子,表薦燦,稱其操行高潔,久嬰疾病,可 乃詔郡縣給醫藥,又以二

以此知其旨

時年八十四,不言三十六載,終於所寢之車。長子僑。 千石祿養病,歲以爲常,加賜帛百匹。 子喬以父疾篤,辭不敢受,詔不許。以太康六年卒,

孫體 向, 國明。 隆亦思求海內幽遁之士,喬供養衡門,至於白首,於是除樂安令。 也。」元康中,詔求廉讓沖退履道寒素者,不計資,以參選敍。 歲, 之寒素,著厲俗之淸彥。」時張華領司徒,天下所舉凡十七人, 其信篤,益是聖主所宜哀矜。 德眞粹,立操高潔,儒學精深,含章內奧,安貧樂道,棲志 **喬以爲向定一代之書,正羣籍之篇,使雄當之,故非所長,遂著劉楊優劣論,文多不載** 祖母以告喬,喬 應純 喬 喬字伯孫。 司隸校尉劉毅嘗抗論於朝廷曰:「使范武威疾若不篤,是爲伯夷、叔齊復存於今。 好學不倦。 濟陰劉公榮有知 和,理思周密,吾每欲錯其一 年二歲時,祖譽臨終,撫喬首曰:「恨不見汝成人」」因以所用硯與之。 父粲陽狂不言,喬與二弟並棄學業,絕人事,侍疾家庭,至燦沒,足不出 便執硯涕泣。 人之鑒,見喬,深相器重。友人劉彦秋夙有聲譽,嘗謂人曰:「范伯 其子久侍父疾,名德蓍茂,不加敍用,深爲朝廷惜遺賢之譏 九歲請學,在同輩之中,言無媒辭。 事而終不能。」光祿大夫李銓嘗論楊雄才學優於劉 窮巷,簞瓢 於喬特 尚書郎王琨乃薦喬曰:「喬稟 辭疾不拜。 詠業,長 發 弱冠,受業於樂安蔣 優 論 而 彌堅,誠當今 喬凡一舉孝 叉 吏部 郎 如

廉,八薦公府,再舉清白異行,又舉寒素,一無所就。

柴,欲與父母相歡娛耳,何以愧爲!」其通物善導,皆此類也。外黃令高題歎曰:「諸士大夫 仁義,信矣!」其行身不穢,爲物所歎服如此。 未有不及私者,而范伯孫恂恂率道,名諱未嘗經於官曹,士之貴異,於今而見。 初,喬邑人臘夕盜斫其樹,人有告者,喬陽不聞,邑人愧而歸之。 喬往喻曰:「卿節日取 以元康八年卒,年七十八。 大道廢而有

魯勝

子勸其更仕,再徵博士,舉中書郎,皆不就 刑戮,以彰虚妄之罪」。事遂不報。 表上求下羣公卿士考論。「若臣言合理,當得改先代之失,而正天地之紀。如無據驗,甘卽 云::「以冬至之後立晷測影,準度日月星。臣案日月裁徑百里,無千里,星十里,不百里。」 遂 魯勝字叔時,代郡人也。少有才操,爲佐著作郎。元康初,遷建康令。到官,著正天論 嘗歲日望氣,知將來多故,便稱疾去官。 中書令張華遣

其著述爲世所稱,遭亂遺失,惟注墨辯,存其敍曰:

則 事不成。」墨子著書,作辯經以立名本,惠施、公孫龍祖述其學,以正別名顯於世。 名者所以別同異,明是非,道義之門,政化之準繩也。孔子曰:「必也正名,名不正 孟

列傳第六十四 隱逸

子非墨子,其辯言正辭則與墨同。首卿、莊周等皆非毀名家,而不能易其論 也

同無不同,至異無不異,是謂辯同辯異。同異生是非,是非生吉凶,取辯於一物而原極 無序之辯。是有不是,可有不可,是名兩可。 名必有形,察形莫如別色,[K] 故有堅白之辯。 同而有異,異而有同,是之謂辯同異。 名必有分明,分明莫如有無,故有

天下之汙隆,名之至也。

者,亦有樂乎此也! 其章,疑者闕之。又采諸衆雜集爲刑名二篇,〔亡] 略解指歸,以俟君子。其或興微繼絕 絕。 墨辯有上下經,經各有說,凡四篇,與其書衆篇連第,故獨存。今引說就經,各附 自鄧析至秦時名家者,世有篇籍,率頗難知,後學莫復傳習,於今五百餘歲,遂亡

董養

者,以爲王法所不容也。奈何公卿處議,文飾禮典,以至此乎!天人之理旣滅,大亂作矣。」 升堂歎曰:「建斯堂也,將何爲乎?每覽國家赦書,謀反大逆皆赦,至於殺祖父母、父母不赦 董養字仲道,陳留浚儀人也。 泰始初,到洛下,不干祿求榮。及楊后廢,養因游太學,

因著無化論以非之。[公

一昔周 謝鯤、阮孚曰:「易稱知機其神乎,君等可深藏矣。」乃與妻荷擔入閩,莫知所終。 永嘉中、洛城東北步廣里中地陷,有二鵝出焉,其蒼者飛去,白者不能飛。 時所盟會狄泉,即此地也。 今有二鵝, 蒼者胡象, 白者國家之象,其可盡言乎」顧謂 養聞歎曰:

霍原

諫不 叔父。 方成奇器,汝後必薦之。」後歸鄉里。 往,乃夜共造焉。父友同郡劉岱將舉之,未果而病篤,臨終,敕其子沈曰:「霍原慕道淸虚 可出界,猛歎 霍原字休明,燕國廣陽人也。少有志力,叔父坐法當死,原入獄訟之,楚毒備加, 年十八,觀太學行禮,因留習之。貴游子弟聞而重之,欲與相見,以其名微,不 恨 而止 高陽許猛素服其名,會爲幽州刺史,將詣之,主簿當車 終発

答,浚 徒不 王褒等俱以賢 天子在何許? 過,沈乃上表理 原 心銜之。 山居積 良徵,日因累下州郡,以禮發遣,皆不到。 年,門徒百數,燕王月致羊酒。及劉沈爲國大中正,元康中,進原爲二品, 近 又有遼東囚徒三百餘人,依 在豆田中。」 之。 韶 下司徒參論,中書監張華令陳準奏爲上品,詔可。元康末,原與 **浚以豆爲霍,收原斬之,懸其首。諸生悲哭,夜竊尸共埋殯** 山爲賊,意欲劫原爲主事,亦未行。 後王沒稱制謀僭,使人問之,原不 時有謠曰:

列

傳

第

六

+

四

隱

逸

之。遠近駭愕,莫不冤痛之。

郭琦

趙王倫篡位,又欲用琦,琦曰:「我已爲武帝吏,不容復爲今世吏。」終身處於家。 素疾琦,答云:「不識。」帝曰:「若如卿言,烏丸家兒能事卿,即堪爲郞矣。」遂決意用之。 梁、京氏易百卷。鄉人王游等皆就琦學。 郭琦字公偉,太原晉陽人也。少方直,有雅量,博學,善五行,作天文志、五行傳,注穀 武帝欲以琦爲佐著作郎,問琦族人尚書郭彰。

就。 風尙。」奏可,而朝不就,終於家。 南之奇才,丘園之逸老也。不加飾進,何以勸善!且白衣爲郡,前漢有舊,宜聽光顯,以與 退讓之風薄。 亂之餘運,承百王之遺弊,進趨者乘國故以僥倖,守道者懷蘊匵以終身,故令敦褒之化虧, 刺史劉弘薦朝爲零陵太守,主者以非選例,不聽。尚書郎胡濟奏曰:「臣以爲當今資喪 伍朝字世明,武陵漢壽人也。少有雅操,閑居樂道,不修世事。 伍朝 案朝游心物外,不屑時務,守靜衡門,志道日新,年過耳順而所尙無虧,誠江 性好學,以博士徵,不

魯褒字元道,南陽人也。 好學多聞,以貧素自立。 元康之後,綱紀大壞,廢傷時之貪

鄙,乃隱姓名,而著錢神論以刺之。其略曰:

之口。 餘,臣僕者窮竭而不足。 兄,字曰「孔方」,失之則貧弱,得之則富昌。 行藏有節,市井便易,不患秏折。難折象壽,不匱象道,故能長久,爲世神寶。 錢之爲體,有乾坤之象,內則其方,外則其圓。 錢多者處前,錢少者居後。處前者爲君長, 無翼而飛,無足而走,解嚴毅之顏,開難 **其積如山,其流如川。** 在後者爲臣僕。 君長者豐衍而有 動靜有時, 親之如

勢而 致。 不勝,幽 版,漢祖克之於贏二,文君解布裳而被錦繡,相如乘高蓋而解犢鼻,官尊名顯,皆錢所 見我家兄,莫不驚視。 一熱,排金門而入紫闥。 空版至虚,而況有實,贏二雖少,以致親密。 錢之爲言泉也,無遠不往,無幽不至。京邑衣冠,疲勞講肄,厭聞淸談,對之睡寐, .滯非錢不拔,怨讎非錢不解,令問非錢不發。 錢之所祐,吉無不利, 危可使安,死可使活,貴可使賤,生可使殺。 何必讀書,然後富貴!昔呂公欣悅於空 由此 論之, 謂爲 神 物。 是故忿爭非錢 無德 而 拿, 無

列傳

財、士不來、軍無賞、士不往。 欲飛,無足而欲行。 年紀,賓客輻輳,門常如市。 諺曰:「錢無耳,可使鬼。」凡今之人,惟錢而已。 故曰軍無 |洛中朱衣,當途之士,愛我家兄,皆無已已。 執我之手,抱我終始,不計優劣,不論 仕無中人,不如歸田。雖有中人,而無家兄,不異無**翼而**

蓋疾時者共傳其文。

褒不仕,莫知其所終。

氾騰

門不見,禮遺一無所受。歎曰:「生於亂世,貴而能貧,乃可以免。」散家財五十萬,以施宗 族,柴門灌園,琴書自適。 氾騰字無忌,敦煌人也。舉孝廉,除郎中。屬天下兵亂,去官還家。太守張閟造之,閉

任旭

而卒。

任旭字次龍,臨海章安人也。父訪,吳南海太守。旭幼孤弱,兒童時勤於學。 及長,立

慨 旭 操淸修,不染流俗,鄉曲推而愛之。 然歎 正色苦諫。 曰:「任功曹眞人也。 秀旣 不納,旭謝去,閉門講習,養志而已。 吾違 」其讜言,以至於此,復何言哉!」尋察孝廉,除郎中,州郡仍 郡將蔣秀嘉其名,請爲功曹。 **外之,秀坐事被收,旭狼狽營送,秀** 秀居官貪穢,每不奉法,

造。 旭 與賀循 永 旭 康 以 朝 初 守死不 廷多故,志尚 惠帝博求清節儁異之士,太守仇馥薦旭清貞潔素,學識通博,詔下州郡以禮發 迴。 敏卒不能 隱遁,辭疾不行。 屈 尋天下大亂, 陳敏作逆,江東名豪並見羈繫,惟

舉

爲

郡

中正、固辭歸

家

大將 導散立學校,選天下明經之士,旭與會稽虞喜俱 帝崩,事遂寢 軍,復召之,及爲左丞相,辟爲祭酒,並 元帝 初 鎭江 東,聞其名,召爲參軍,手書與旭, 不 就 以以隱 中興建,公 欲使必到, 學被召。 車徵,會遭母憂。 事未行, 旭固辭以疾。 會有王敦之難,尋 後帝進位 於 時 司 鎭 空 東

可。 太寧末,明 明帝知 卽 位, 帝 叉 徴 復 拜給 下 詔 備 事中,旭稱疾篤,經年不 禮徵旭 ,始下而帝崩。 到, 咸和二年卒,太守馮懷上疏謂宜贈九列, 尚書以稽留 除名,僕射荀崧議以

子踞,位至大宗正,終於家。

値

蘇峻

作

亂

事竟

不

行

郭文

而 視其口中有横骨, 乃以手探去之, 猛獸明旦致一鹿於其室前。 獵者時往寄宿, 这夜爲擔水 若須此,自當賣之。所以相語,正以不須故也。」聞者皆嗟歎之。嘗有猛獸忽張口向文,文 其粗者,示不逆而已。 有猛獸殺大塵鹿於菴側,这以語人,人取賣之,分錢與这。 这曰:「我 供。人或酬下價者,亦卽與之。後人識文,不復賤酬。食有餘穀,輒恤窮匱。人有致遺,取 文獨宿十餘年,卒無患害。恒著鹿裘葛巾,不飲酒食肉,區種菽麥,採竹葉木實,貿鹽以自 辟山中窮谷無人之地,倚木於樹,苫覆其上而居焉,亦無壁障。 時猛獸爲暴,入屋害人,而 終,服畢,不娶,辭家游名山,歷華陰之崖,以觀石室之石函。洛陽陷,乃步擔入吳興餘杭大 無倦色。 郭文字文舉,河內軹人也。 少愛山水,尙嘉遁。年十三,每游山林,彌旬忘反。父母

不納,辭歸山中。颺追遣使者置衣室中而去,这亦無言,韋衣乃至爛於戶內,竟不服用。 餘杭令顧颺與葛洪共造之,而攜與俱歸。颺以文山行或須皮衣,贈以韋袴褶一具,文

又有鳥獸麋鹿,因以居文焉。於是朝士咸共觀之,文頹然踑踞,傍若無人。溫嶠嘗問文曰: 王導聞其名,遣人迎之,文不肯就船車,荷擔徒行。旣至,導置之西園,園中果木成林,

林野。 之心, 稱曰:「|文有賢人之性,而無賢人之才,柳下、梁踦之亞乎!」|永昌中,大疫,|文病亦殆。 螻蟻所食,復何異乎!」又問曰:「猛獸害人,人之所畏,而先生獨不畏邪。」|文曰:「人無害獸 情。」又問曰:「先生獨處窮山,若疾病遭命, 「人皆有六親相娛,先生棄之何樂。」」文曰:「本行學道,不謂遭世亂,欲歸無路,是以來 遺藥,|文曰:「命在天,不在藥也。 夭壽長短,時也。」 又問曰:「飢而思食,壯而思室,自然之性,先生安獨無情乎。」|文曰:「情由憶生,不憶 「山草之人,安能佐世」」導嘗衆賓共集,絲竹並奏,試使呼之。 於時坐者咸有鉤深味遠之言,文常稱不達來語。 則獸亦不害人。」又問曰:「苟世不寧, 則爲烏鳥所食,顧不酷乎。」|文曰:「藏 身不得安。 天機鏗宏,莫有闚其門者。 今將用先生以濟時,若何ご文曰 文瞪眸不轉,跨躡華堂如行 埋者亦爲 溫 故無 也。 嶠嘗

不瘦。 令萬 之,葛洪、庾闡並爲作傳,贊頌其美云。 舉手指麾,以宣其意。 寵迎置縣 居導園七年,未嘗出入。 中。 及蘇峻反,破餘杭,而臨安獨全,人皆異之,以爲 病甚,求還山,欲枕石安尸,不令人殯葬,龐不 一旦忽求還山,導不聽。 後逃歸臨安、結廬舍於山中。 龍葬之於所居之處而祭哭 聽。 知機。 不食二十餘日,亦 自後 不 復 語 臨安 但

襲壯

肚上書說壽以歸順,允天心,應人望,永爲國藩,福流子孫。壽省書內愧,祕而不宜。乃遣 文章,[10]至李勢時卒。 使入胡,肚又諫之,壽又不納。肚謂百行之本莫大忠孝,旣假壽殺期,私仇以雪,又欲使其 歸朝,以明臣節。壽旣不從,壯遂稱聾,又云手不制物,終身不復至成都,惟研考經典,譚思 率衆討期,果克之。 壽猶襲僞號,欲官之,壯誓不仕,賂遺一無所取。 會天久雨,百姓饑墊, 喪,力弱不能復仇。及李壽戍漢中,與李期有嫌,期,特孫也,壯欲假壽以報,乃說壽曰:「節 下若能幷有西土,稱藩於晉,人必樂從。且捨小就大,以危易安,莫大之策也。」壽然之,遂 龔壯字子瑋,巴西人也。潔己自守,與鄉人譙秀齊名。 父叔爲|李特所害,|肚積年不除

初,壯每歎中夏多經學,而巴燭鄙陋,兼遭李氏之難,無復學徒,乃著邁德論,文多

孟陋

不載。

孟陋字少孤,武昌人也。吳司空宗之曾孫也。兄嘉,桓溫征西長史。陋少而貞立,清

操 無父母?誰有父母 亦不知其所之也。 「絕倫,布衣蔬食,以文籍自娛。 ! 聖人制禮,令賢者俯就,不肖企及。 若使毀性無嗣,更爲不孝也。」陋 喪母,毁瘠殆於滅性,不飲酒食肉十有餘年。 口不及世事,未曾交游,時或弋釣,孤興獨往,自己雖家人 親族迭謂之曰:「少孤

威此言,然後從吉。

由是名著海內。

不往故耳。 宜引在府,以和鼎味。」溫歎曰:「會稽王尙不能屈,非敢擬議也。」陋聞之曰:「桓公正當以我 也。」由是名稱益重。 簡文帝輔政,命爲參軍,稱疾不起。 億兆之人,無官者十居其九,豈皆高士哉!我疾病不堪恭相王之命,非敢爲高 桓溫躬往造焉。或謂溫曰:「孟陋高行,學爲儒宗)

博學多通,長於三禮。注論語,行於世。卒以壽終。

韓績

未宜備禮,於是召拜博士。 學,以潛退爲操,布衣蔬食,不交當世,由是東土並宗敬焉。司徒王導聞其名,辟以爲掾,不 咸康末,會稽內史孔愉上疏薦之, 詔以安車束帛徵之。尚書令諸葛恢奏續名望猶輕, 韓績字興齊,廣陵人也。其先避亂,居於吳之嘉興。父建,仕吳至大鴻臚。 稱老病不起,卒於家。 績少好文

列

二四四四四

舉動 行,化流邦邑。 士徵之。 有禮。 於時高密劉鮞字長魚、城陽邴郁字弘文,並有高名。 郁辭以疾,觚隨使者到京師,自陳年老,不拜。 咸康中,成帝博求異行之士, 鮞、郁並被公卿薦舉,於是依績及翟湯等例,以博 郁,魏徵士原之曾孫,少有原風,敕身謹潔,口不妄說,耳不妄聽,端拱 各以壽終。 **鮞幼不慕俗,長而** 希古,篤學厲 · 恂恂,

譙秀

存問。 人欲代之負擔,秀曰:「各有老弱,當先營護。 壯常歎服焉。 巴西,雄叔父驤、驤子壽皆慕秀名,具束帛安車徵之,皆不應。常冠皮弁,弊衣,躬耕 將亂,預絕人事,雖內外宗親,不與相見。 職秀字元彦, 巴西人也。祖周, 以儒學著稱, 顯明蜀朝。 尋而范賁、蕭敬相繼作亂,秀避難宕渠,鄕里宗族依憑之者以百數。 桓溫滅蜀,上疏薦之,朝廷以秀年在篤老,兼道遠,故不徵,遣使敕所在四時 郡察孝廉,州舉秀才,皆不就。 吾氣力猶足自堪,豈以垂朽之年累諸君也」」 秀少而靜默,不交於世,知天下 及李雄據蜀,略有 秀年出八十,衆 山藪,襲

翟湯 子莊

年九十餘卒。

翟湯字道深,自己尋陽人。 **篤行純素,仁讓廉潔,不屑世事,耕而後食,人有饋贈,雖釜**

庾 無所受。 永嘉末,寇害相繼,聞陽名德,皆不敢犯,鄉人賴之。

將軍 疾,不至。 奉旨一無所受,湯依 益愧歎焉。 廉讓,卿致書訖,便委船還。」陽無人反致,乃貨易絹物,因寄還實。 庾翼北征石季龍,大發僮客以充戎役, 司 徒王導辟,不就,隱於縣界南山。始安太守干寶與湯通家,遣船餉之,敕吏云:「翟公 年七十三,卒於家 咸康中,征西大將軍庾亮上疏薦之,成帝徵爲國子博士,湯不起。 所調限,放免其僕,使令編戶爲百姓。 敕有司特蠲湯所調。 康帝復以散騎常侍徵湯 湯悉推僕使委之鄉吏,吏 寶本以爲惠,而更煩之, 建元初,安西 ,固辭老

端居篳門、歠菽 事。 自物,未能 及長,不復獵。 莊字祖休。 頓盡,故先節其甚者。 飲水。 少以孝友著名,遵陽之操,不交人物,耕而後食, 或問:「漁獵同是害生之事,而先生止 州府 禮命,及公車徵,並不就。 且夫貪餌吞鈎,豈我哉!」時人以爲 年五十六,卒。 去其 一,何哉?」莊 語不 知言。 及俗, 晚節 曰:「獵 惟以弋釣爲 亦不復釣, 自 我 釣

子 矯亦有高操,屢辭辟命。 **燆子法賜,孝武帝以散騎郎徵,亦不至。** 世有隱行云。

郭翻

嘗以車獵,去家百餘里,道中逢病人,以車送之,徒步而歸。其漁獵所得,或從買者,便與之 經年無主,然後乃作。稻將熟,有認之者,悉推與之。縣令聞而詰之,以稻還翻,翻遂不受。 及賢良之舉。家於臨川,不交世事,惟以漁釣射獵爲娛。居貧無業,欲墾荒田,先立表題, 而不取直,亦不告姓名。由是士庶咸敬貴焉。 郭翻字長翔,武昌人也。伯父訥,廣州刺史。父察,安城太守。翻少有志操,辭州郡辟

狹,欲引就大船。 庾翼以帝舅之重,躬往造翻,欲强起之。翻曰:「人性各有所短,焉可强逼!」翼又以其船小 與翟湯俱爲庾亮所薦,公車博士徵,不就。咸康末,乘小船暫歸武昌省墳墓,安西將軍 翻曰:「使君不以鄙賤而辱臨之,此固野人之舟也。」 翼俯屈入其船中,終

日而去。

路人曰:「我若取此,將爲天地鬼神所責矣。」翻知其終不受,復沈刀於水。路人悵焉,乃復 沈沒取之。翻於是不逆其意,乃以十倍刀價與之。其廉不受惠,皆此類也。卒於家。 嘗墜刀於水,路人有爲取者,因與之。路人不取,固辭,翻曰:「爾向不取,我豈能得!」

以證 固辭不受。又歷石勒、季龍之世,並不應辟命。雖處喪亂之中,頹然高邁,視榮利蔑如也。 工草隸書,爲時楷法。 兼散騎常侍,慰撫關中。 辛謐字叔重,隴西狄道人也。父怡,幽州刺史,世稱冠族。諡少有志尚,博學善屬文, 性恬靜,不妄交游。 證以洛陽將敗,故應之。及長安陷沒於劉聰,聰拜太中大夫**,** 召拜太子舍人、諸王文學, 累徵不起。 永嘉末,

節。 **松喬之壽,永爲世輔,豈不美哉!」因不食而卒。** 之上,無異於山林之中,斯窮理盡性之妙,豈有識之者邪! 而久處之,非所以顧萬全遠危亡之禍也。 但冥心至趣而與吉會耳。 伯夷去國,子推逃賞,皆顯史牒,傳之無窮。 及冉閔僭號,復備禮徵爲太常,謐遺閱書曰:「昔許由辭堯,以天下讓之,全其淸高之 宜因茲大捷,歸身本朝,必有許由、伯夷之廉,享 此往而不反者也。 是故不嬰於禍難者,非爲避之, 然賢人君子雖居廟堂 君王功以成矣,

劉驎之

劉麟之字子驥,南陽人,光祿大夫耽之族也。 麟之少尚質素,虛退寡欲,不修儀操,

莫之知。 困閉,一囷開,水深廣不得過。 好游 山澤,志存遁逸。 欲還,失道,遇伐弓人,問徑,僅得還家。 嘗採藥至衡山,深入忘反,見有一澗水,水南有二石囷, 或說囷中皆仙靈方

藥諸雜物,麟之欲更尋索,終不復知處也。

使從者,非野人之意也。」沖慨然,至昏乃退。 還,拂短褐與沖言話。 父使麟之於內自持濁酒蔬菜供賓,沖敕人代麟之斟酌,父辭曰:「若 命,麟之曰:「使君旣枉駕光臨,宜先詣家君。」沖聞大愧,於是乃造其父。父命麟之,然後方 車騎將軍桓沖聞其名,請爲長史,麟之固辭不受。沖嘗到其家,麟之於樹條桑,使者致

卒以壽終。 官道之側,人物來往,莫不投之。臟之躬自供給,士君子頗以勞累,更憚過焉。凡人致贈, 何由令知。」麟之先聞其有患,故往候之,值其命終,乃身爲營棺殯送之。 其仁愛隱惻若此。 無所受。去驎之家百餘里,有一孤姥,病將死,歎息謂人曰:「誰當埋我,惟有劉長史耳! 麟之雖冠冕之族,信義著於羣小,凡厮伍之家婚娶葬送,無不躬自造焉。居於陽岐,在

索襲

索襲字偉祖,敦煌人也。虛靖好學,不應州郡之命,舉孝廉、賢良方正,皆以疾辭。游

思於陰陽之術,著天文地理十餘篇,多所啓發。不與當世交通,或獨語獨笑,或長歎涕泣,

或請問不言。

謂也。 形居塵俗而棲心天外,雖黔婁之高遠,莊生之不願,蔑以過也。」乃諡曰玄居先生。 灣曰:「世人之所有餘者,富貴也,目之所好者,五色也,耳之所玩者,五音也。 義。」澹欲行鄉射之禮,請襲爲三老,曰:「今四表輯寧,將行鄉射之禮,先生年耆望重,道冠 人之所收,收衆人之所棄,味無味於慌惚之際,兼重玄於衆妙之內。 宅不彌畝而志忽九州, 相屈,遵道崇敎,非有爵位,意者或可然乎!」會病卒,時年七十九。。澹素服會葬,贈錢二萬。 時,養老之義,實繫儒賢。旣樹非梧桐,而希鸞鳳降翼,器謝曹公,而冀蓋公枉駕,誠非所 張茂時,敦煌太守陰澹奇而造焉,經日忘反,出而歎曰:「索先生碩德名儒,眞可以諮大 然夫子至聖,有召赴焉,孟軻大德,無聘不至,蓋欲弘闡大猷,敷明道化故也。 而先生棄衆 今之

楊軻

不堪 欲所論授,須旁無雜 其憂,而 楊 啊,天水人也。少好易,長而不娶,學業精微,養徒數百,常食粗飲水,衣褐縕袍,人 **軻悠然自得,疏賓異客,音旨未曾交也。** 人,授入室弟子,令遞相宣授。 雖受業門徒,非入室弟子,莫得親言。

列傳第六十四 隱逸

季龍,不拜,與語,不言,命舍之於永昌乙第。其有司以軻倨傲,請從大不敬論,季龍不從, 人 東徙,軻留長安。及石季龍嗣爲位,備玄纁束帛安車徵之,軻以疾辭。 劉 曜僭號,徵拜太常,軻固辭不起,曜亦敬而不逼,遂隱於隴山。 曜後爲石勒所擒,秦 迫之,乃發。 旣見

下書任軻所尚。

之。 中,下無茵褥。 觀 刀,臨之以兵,幷竊其所賜衣服而去,軻視而不言,了無懼色。 !其眞趣,乃密令美女夜以動之,|軻蕭然不顧。 又使人將其弟子盡行,遣魁壯羯士衣甲持 **軻神體頹然,無驚怒之狀。** 軻在永昌,季龍每有饋餼,輒口授弟子,使爲表謝,其文甚美,覽者歎有深致。 潁川 荀鋪,好奇之士也,造而 于時咸以爲焦先之徒,未有能量其深淺也。 :談經, 軻瞑目不答。 餔發軻被,露其形, 常臥土牀,覆以布被,倮寢其 季龍欲 大大笑

秦 人西奔凉州,軻弟子以牛負之,爲戍軍追擒,幷爲所害。 後 上疏陳鄉思,求還,季龍送以安車蒲輪,獨十戶供之。 自歸秦州,仍教授不絕。 其後

公孫鳳

器,停令臭敗,然後食之。 公孫鳳字子鸞,上谷人也。 彈琴吟咏,陶然自得,人咸異之,莫能測也。 隱於昌黎之九城山谷, 冬衣單布, 寢處土牀, 夏則幷食於 慕容暐以安車徵至

|鄴,及見障,不言不拜,衣食舉動如在<u>九城</u>。 賓客造請, 尟得與言。 數年病卒。

公孫永

不衣食之,吟詠巖間,欣然自得,年餘九十,操尙不虧 公孫永字子陽,襄平人也。少而好學恬虛,隱於平郭南山,不娶妻妾,非身所墾植,則

問。 端然自若。一歲餘,詐狂,暐送之平郭。後苻堅又將備禮徵之,難其年耆路遠,乃遣使者致 未至而永亡、堅深悼之、諡曰崇虛先生。 與公孫鳳俱被慕容暐徵至鄴,及見暐,不拜,王公以下造之,皆不與言,雖經隆冬盛暑,

張忠

左右居人饋之衣食,一無所受。 以形不以言,弟子受業,觀形而退。 導養之法。冬則縕袍,夏則帶索,端拱若尸。無琴書之適,不修經典,勸教但以至道虛 張忠字巨和,中山人也。永嘉之亂,隱於泰山。 恬靜寡欲,清虛服氣,餐芝餌石,修 其居依崇巖幽谷,鑿地爲窟室。 弟子亦以窟居,去忠六十餘步,五日一朝。 好事少年頗或問以水旱之祥, 忠曰:「天不言而四時行 立道壇於窟上,每旦朝拜之。 食用瓦器,鑿石爲釜。 其教 無

列

焉,萬物生焉,陰陽之專非窮山野叟所能知之。」其遣諸外物,皆此類也。年在期頤,而視聽

無爽

岱宗。」堅以安車送之。行達華山,歎曰:「我東嶽道士,沒於西嶽,命也,奈何!」行五十 奉聖顏。 將任齊尚父。」忠曰:「昔因喪亂,避地泰山,與鳥獸爲侶,以全朝夕之命。屬堯舜之世,思一 里,及關而死。使者馳驛白之,堅遣黃門郎|韋華持節策弔,祀以太牢,褒賜命服,諡曰|安道 見,堅謂之曰::「先生考磐山林,[1三)研精道素,獨善之美有餘,兼濟之功未也。故遠屈先生, 浴訖就車。及至長安,堅賜以冠衣,辭曰:「年朽髮落,不堪衣冠,請以野服入覲。」從之。及 苻堅遣使徵之。使者至,忠沐浴而起,謂弟子曰:「吾餘年無幾,不可以逆時主之意。」 年衰志謝,不堪展效,尚父之況,非敢竊擬。山棲之性,情存巖岫,乞還餘齒,歸死

石垣

或同日共時,咸皆見焉。又能闇中取物,如晝無差。 或有遺其衣服,受而施人。 石垣字洪孫、江巴自云北海劇人。 人有喪葬,輒杖策弔之。 居無定所,不娶妻妾,不營產業,食不求美,衣必粗 姚萇之亂,莫知所終。 路無遠近,時有寒暑,必在其中,

奇木蓊鬱,蔚若野林。 其人如玉,維國之琛。 室邇人遐,實勞我心。」 弟子受業三千餘人。不應州郡辟命,惟與陰顒、齊好友善。 張祚時,太守楊宣畫其象於閤 可仰而形不可覩,吾而今而後知先生人中之龍也。」銘詩於石壁曰:「丹崖百丈,青壁萬尋。 之士也,具威儀,鳴鐃鼓,造焉。 上,出入視之,作頌曰:「爲枕何石。爲漱何流。身不可見,名不可求。」酒泉太守馬岌,高尙 宋纖字令艾,敦煌效穀人也。少有遠操,沈靖不與世交,隱居於酒泉南山。 纖高樓重閣,距而不見。 岌歎曰:「名可聞而身不可見,德 明究經緯,

時年八十二,諡曰玄虛先生。 投水,處澤露形,在人親土。[18]聲聞書疏,勿告我家。今當命終,乞如素願。」遂不食而卒, 曰:「臣受生方外,心慕太古。 其太子太和以執友禮造之,〔三〕纖稱疾不見,贈遺一皆不受。尋遷太子太傅。 興逼喻甚切,纖喟然歎曰:「德非莊生,才非干木,何敢稽停明命」。遂隨興至姑臧。 **纖注論語,及爲詩頌數萬言。年八十,篤學不倦。** 生不喜存,死不悲沒。 素有遺屬,屬諸知識,在山投山,臨水 張祚後遣使者張興 備禮 徵爲太子 頃之, | 祚遣

郭荷

掖東山。 爲博士祭酒,使者迫而致之。及至,署太子友。 及荷,世以經學致位。 郭荷字承休,略陽人也。 年八十四卒,諡曰玄德先生。 荷明究羣籍,特善史書。 六世祖整,漢安順之世,公府八辟,公車五徵,皆不 荷上疏乞還,腓許之,遣以安車蒲輪送還脹 不應州郡之命。 張祚遣使者以安車束帛徵 就 自整

郭瑀

蓋聖人謙也,遂服斬衰,廬墓三年。禮畢,隱於臨松薤谷,鑿石窟而居,服柏實以輕身,作春 雅辯談論,多才藝,善屬文。一荷卒,稱以爲父生之,師成之,君爵之,而五服之制,師不服重, 秋墨說、孝經錯緯,弟子著錄千餘人。 郭瑀字元瑜,敦煌人也。少有超俗之操,東游張掖,師事郭荷,盡傳其業。 精通經義,

遠, 思與賢明同贊帝道。昔傳說龍翔殷朝,尚父鷹揚周室,孔聖車不停軌,墨子駕不俟旦,皆以 心與至境冥符,志與四時消息,豈知蒼生倒懸,四海待拯者乎!孤忝承時運,負荷大業, 張天錫遣使者孟公明持節,以蒲輪玄纁備禮徵之,遺瑀書曰:「先生潛光九臯,懷眞獨

與人言,不食七日,輿疾而歸,旦夕祈死。夜夢乘靑龍上天,至屋而止,寤而歎曰:「龍飛在 麋鹿游於此庭矣。」穆不從。稱出城大哭,舉手謝城曰:「吾不復見汝矣」」還而引被覆面,不 老,冀功成世定,追伯成之蹤 起兵五千,運粟三萬石,東應王穆。穆以瑀爲太府左長史、軍師將軍。雖居元佐,而口詠黃 長,脈病三年,不豫絕其餐饋,魯連在趙,義不結舌,況人將左袵而不救之一乃與敦煌索嘏 義,害及門人一乃出而就徵。及至姑臧,值天錫母卒,瑀括髮入弔,三踊而出,還於南山 鳥也,安可籠哉」遂深逃絕迹。 黔首之禍不可以不救,君不獨立,道由人弘故也。況今九服分爲狄場,二都盡爲戎穴,天子 乎」遂還酒泉南山赤厓閣,飲氣而卒。 天,今止於屋。屋之爲字,尸下至也。龍飛至尸,吾其死也。古之君子不卒內寢,況吾正士 及苻氏之末,略陽王穆起兵酒泉,以應張大豫,遣使招瑀。 瑀歎曰:「臨河救溺,不卜命之短 孤竊惑焉。 陋江東,名敎淪於左袵,創毒之甚,開闢未聞。先生懷濟世之才,坐觀而不救,其於仁智, 膠惑於讒間,西伐索嘏,瑀諫曰:「昔漢定天下,然後誅功臣。今事業未建而誅之,立見 及天錫滅,苻堅又以安車徵瑀定禮儀,會父喪而止,太守辛章遣書生三百人就受業焉。 故遣使者虛左授綏,鶴企先生,乃眷下國。」公明至山,兩指翔鴻以示之曰:「此 公明拘其門人, 瑪歎曰: 「吾逃祿, 非避罪也, 豈得隱居行

列傳

第六十四

笾

祈嘉

賓 教授門生百餘人。張重華徵爲儒林祭酒。性和裕,教授不倦,依孝經作二九神經。在朝卿 敦煌,依學官誦書,貧無衣食,爲書生都養以自給,[19]遂博通經傳,精究大義。西游海渚, 士、郡縣守令彭和正等受業獨拜牀下者二千餘人,天錫謂爲先生而不名之。竟以壽終。 隱去來,隱去來!修飾人世,甚苦不可諧。所得未毛銖,所喪如山崖。」旦而逃去,西至 所嘉字孔賓,酒泉人也。 少清貧,好學。年二十餘,夜忽窗中有聲呼曰:「耐孔寶,耐孔

瞿硎先生

僚佐數十人皆莫測之,乃命伏滔爲之銘贊。竟卒於山中。 硎,因以爲名焉。 大司馬桓溫嘗往造之。 旣至,見先生被鹿裘,坐於石室,神無忤色,溫及 瞿

謝敷

謝敷字慶緒,會稽人也。性澄靖寡欲,入太平山十餘年。鎭軍郗悟召爲主簿,臺徵博

士,皆不就。

敷死,故會稽人士以嘲吳人云:「吳中高士,便是求死不得死。」 初,月犯少微,少微一名處士星,占者以隱士當之。 譙國戴達有美才,人或憂之。 俄而

戴逵

綜。 聞命欣然,擁琴而往。 其善鼓琴,使人召之,逵對使者破琴曰:「戴安道不爲王門伶人」、晞怒,乃更引其兄述。 不樂當世,常以琴書自娛。 總角時,以鷄卵汁溲白瓦屑作鄭玄碑,又爲文而自鐫之,詞麗器妙,時人莫不驚歎。 戴逵字安道,譙國人也。少博學,好談論,善屬文,能鼓琴,工書畫,其餘巧藝靡不畢 師事術士范宣於豫章,宣異之,以兄女妻焉。太宰、武陵王晞聞 述 性

逵後徙居會稽之剡縣。 性高潔,常以禮度自處,深以放達爲非道,乃著論曰:

而折其巾角,所以爲慕者,非其所以爲美,徒貴貌似而已矣。夫紫之亂朱,以其似朱 遁跡而不求其本,故有捐本徇末之弊,舍實逐聲之行,是猶美<u>西施而學其顰眉,</u>慕有道 未始以彼害名教之體者何?達其旨故也。達其旨,故不惑其迹。若元康之人,可謂好 夫親沒而採藥不反者,不仁之子也,**君危而屢出近關者,**苟**発之臣也**。 而古之人

列

也。 也,元康之爲放,無德而折巾者也,可無察乎 故鄉原似中和,所以亂德, 放者似達, 所以亂道。 然竹林之爲放,有疾而爲顰者

主,以塵垢翳其天正,貽笑千載,可不愼歟! 則流遁忘反,爲風波之行,自驅以物,自誑以僞,外眩囂華,內喪道實,以矜尙奪其眞 旨,採其被褐懷玉之由。若斯,塗雖殊,而其歸可觀也,跡雖亂,而其契不乖也。不然, 苟迷擬之然後動,議之然後言,固當先辯其趣舍之極,求其用心之本,識其枉尺直尋之 有常經,而弊無常情,是以六經有失,王政有弊,日己苟乖其本,固聖賢所無奈何也。 仰詠兼忘,其弊必至於本薄。夫僞薄者,非二本之失,而爲弊者必託二本以自通。夫道 其弊必至於末偽。 道家去名者,欲以篤實也,苟失其本,又有越檢之行。 嗟夫!行道之人自非性足體備、闇蹈而當者, 亦曷能不棲情古烈, 擬規前修。[15] 且 |儒家尙譽者,本以興賢也,旣失其本,則有色取之行。 懷情喪眞,以容貌相欺, 情禮俱 、虧,則

回,超然絕跡,自求其志。 疏曰:「伏見譙國戴逵希心俗表,不嬰世務,棲遲衡門,與琴書爲友。 內史王珣有別館在武丘山,逵潛詣之,與珣游處積旬。會稽內史謝玄慮逵遠遁不反,乃上 孝武帝時,以散騎常侍、國子博士累徵,辭父疾不就。郡縣敦逼不已,乃逃於吳。吳國 且年垂耳順,常抱羸疾,時或失適,轉至委篤。 雖策命**屢加**,幽操不 今王命未回,將

離風霜之患。 陛下旣已愛而器之,亦宜使其身名並存,請絕其召命。」疏奏,帝許之,逵復

還/剡。

含味獨游,年在耆老,清風彌劭。 年,皇太子始出東宮,太子太傅會稽王道子、少傅王雅、詹事王珣又上疏曰:「逵執操貞厲, 之操,必以難進爲美,宜下所在備禮發遣。」會病卒。 後王珣爲尚書僕射,上疏復請徵爲國子祭酒,加散騎常侍,徵之,復不至。 東宮虛德,式延事外,宜加旌命,以參僚侍。」逵旣重幽居 太元二十

長子勃,有父風。 義熙初,以散騎侍郎徵,不起,尋卒。

襲玄之

陋巷。 侍,領國子博士,指下所在備禮發遣,不得循常,以稽**側席之望。」郡縣敦逼,苦辭疾篤,不** 業,朕虛懷久矣。二三君子,豈其戢賢於懷抱哉!思挹雅言,虛誠諷議,可並以爲散騎常 之詠,丘園旅東帛之觀。譙國戴達、武陵襲玄之並高尙其操,依仁游藝,潔已貞鮮,學弘儒 尋卒,時年五十八。 襲玄之字道玄,如以武陵漢壽人也。父登,歷長沙相、散騎常侍。玄之好學潛默,安於 州舉秀才,公府辟,不就。孝武帝下詔曰:「夫哲王御世,必搜揚幽隱,故空谷流繁維

二四六〇

散騎侍郎、給事中累徵,遂不起。 弟子元壽,亦有德操,高尚不仕,舉秀才及州辟召,並稱疾不說。 卒於家。 孝武帝以太學博士、

陶淡

年十五六,便服食絕穀,不婚娶。家累千金,僮客百數,淡終日端拱,曾不營問。頗好讀易, 近之。州舉秀才,淡聞,遂轉逃羅縣埤山中,終身不返,莫知所終。 善卜筮。 陶淡字處靜,太尉侃之孫也。父夏,以無行被廢。 於長沙臨湘山中結廬居之,養一白鹿以自偶。 淡幼孤,好導養之術,謂仙道可耐。 親故有候之者,輒移渡澗水,莫得

陶潛

羈、任真自得、爲鄕鄰之所貴。 嘗著五柳先生傳以自況曰:「先生不知何許人,不詳姓字,宅 不吝情。 性嗜酒,而家貧不能恒得。 邊有五柳樹,因以爲號焉。閑靜少言,不慕榮利。好讀書,不求甚解,每有會意,欣然忘食。 陶潛字元亮,大司馬侃之會孫也。 祖茂,武昌太守。 潛少懷高尚,博學善屬文,穎脫不 環堵蕭然,不蔽風日,短褐穿結,簞瓢屢空,晏如也。常著文章自娛,頗示已志,忘 親舊知其如此,或置酒招之,造飲必盡,期在必醉,旣醉而退,曾

懷得失,以此自終。」其自序如此,時人謂之實錄。

澤令。 爲五 秫,五十畝種杭。 疾。 |斗米折腰,拳拳事鄉里小人邪!|義熙二年,解印去縣,乃賦歸去來。 復爲鎭軍 以 親 在縣公田悉令種秫穀,曰:「令吾常醉於酒足矣。」妻子固請種稅,乃使一頃五十畝 老家 、建威參軍、謂親朋曰:「聊欲絃歌,以爲三徑之資可乎。」執事者聞之,以 貧,起爲州祭酒,不堪 素簡貴,不私事上官。郡遣督郵至縣,吏白應束帶見之,潛歎曰:「吾不能 吏職,少**日**自解歸。 州召主簿,不就,躬耕自資,遂 其辭曰 抱贏 爲 彭 種

之易安。 夫以前路,恨晨光之希微。乃瞻衡宇,載欣載奔,僮僕來迎,稚子候門。 岫,鳥倦飛而知還,景翳翳其將入,撫孤松而盤 菊猶存。 知 來者之可追。 歸去來兮,田園將蕪,胡不歸?旣自以心爲形役,奚惆悵 **攜幼入室**,有酒盈樽。 園日涉而成趣,門雖設而常關,策扶老而流憩,時翹首而遐觀。 實迷途其未遠,覺今是而昨非。 引壺觴以自酌,眄庭柯以怡顏,倚南窗以寄傲,審容膝 桓 舟遙遙以輕颺, 而 獨悲? 風 飄 飄 悟已往之不諫, 三徑就荒, 而 雲無心而 吹衣,問征 松 出

嶇 以消憂。 而 經 歸去來兮,請息交以絕游,世 丘。 農人告余以暮春,將有事乎西疇。 木欣欣以向榮,泉涓涓而始流,善萬物之得時,咸吾生之行休。 與我而 相遺,復駕言兮焉求!悅親 或命巾車,或棹孤舟,旣窈窕以尋壑,亦崎 戚之情話,樂琴書

列

傅

第

六

+

四

隱

歸盡,樂夫天命復奚疑

帝鄉不可期。 已矣乎!寓形宇內復幾時,曷不委心任去留,胡爲乎遑遑欲何之?富貴非吾願, 懷良晨以孤往,或植杖而芸秆,登東臯以舒嘯,臨淸流而賦詩,聊乘化而

之,或要之共至酒坐,雖不識主人,亦欣然無忤,酣醉便反。未嘗有所造詣,所之唯至田舍 及廬山游觀而已。 頃之,徵著作郎,不就。 旣絕州郡觀謁,其鄉親張野及周旋人羊松齡、寵遵等或有酒要

後欲見,輒於林澤間候之。至於酒米乏絕,亦時相贍。 乘籃輿,亦足自反。」乃令一門生二兒共轝之至州,而言笑賞適,不覺其有羨於華軒也。弘 之造履。左右請履度,潛便於坐申脚令度焉。 弘要之還州,問其所乘,答云:「素有脚疾,向 之。潛旣遇酒,便引酌野亭,欣然忘進。弘乃出與相見,遂歡宴窮日。 子,其罪不細也。」弘每令人候之,密知當往廬山,乃遣其故人龐通之等齎酒,先於半道要 世,因疾守閑,幸非潔志慕聲,豈敢以王公紆軫爲榮邪!夫謬以不賢,此劉公幹所以招謗君 刺史王弘以元熙中臨州,甚欽遲之,後自造焉。 潛稱疾不見,旣而語人云:「我性不狎 潛無履,弘顧左右爲

委之兒僕。未嘗有喜慍之色,惟遇酒則飲,時或無酒,亦雅詠不輟。嘗言夏月虛閑,高臥北 其親朋好事,或載酒肴而往,潛亦無所辭焉。每一醉,則大適融然。又不營生業,家務悉

而和之,日:「但識琴中趣,何勞絃上聲」」以宋元嘉中卒,時年六十三,所有文集並行於 窗之下,清風颯至,自謂巖皇上人。性不解音,而畜素琴一張,絃徽不具,每朋酒之會,則撫

屈其志,激凊風於來葉者矣。 或移病而去官,或著論而矯俗,或箕踞而對時人,或弋釣而棲衡泌,含和隱璞,乘道匿輝,不 宋纖幼懷遠操,清規映拔,楊宣頌其畫象,馬岌歎其人龍,玄虛之號,實斯爲美。 高其諒直,歌小海之曲,則伍胥猶存,固貞石之心,則公閭尤愧,時幸洛濱之觀,信乎兹言。 衣無全帛,對子荆 自牧。詳求厥義,其來夐矣。 史臣曰:"君子之行殊塗,顯晦之謂也。 而陳貞則:並滅景而弗追,柳禽、尚平之流亞。夏統遠邇稱其孝友,宗黨 公和之居窟室,裳唯編草,誠叔夜而疑神鑒,威輦之處叢祠 出則允釐庶政,以道濟時,處則振拔囂埃,以卑 餘之數子,

贊曰:厚秩招累,修名順欲。 確乎羣士,超然絕俗。 養粹巖阿, 銷聲林曲。 激貪止競

校勘記

永垂高躅。

(二) 一無 列 傅 所 第 辭去皆捨棄 六 + 四 校 各本「所」下原有「受」字。李校:「受」字衍。按:李說是、今删。 勘 記 二四六三 若有「受」

字,而從「受」字句絕,則「辭去皆捨棄」爲複語矣。 魏志王粲傳注引嵇康集目錄云「每所止家,輒

給其衣服食飲,得無辭讓」。「得無辭讓」卽此「一無所辭」,可證「受」字爲衍文,或淺人所妄加。

- (二) 乃作幽憤詩 「乃」,各本作「仍」,今從宋本作「乃」。
- 初與隴西計吏 「與」,各本作「爲」,今從殿本,與通志一七七合。
- 「四」子路見夏南 顧炎武日知錄:「夏」當作「衞」。
- ハ 英 し 漢萊蕪長丹之孫也 後漢書獨行傳「丹」作「冉」、注云、一作「丹」。

[六] 名必有形察形莫如別色 各本「必」上無「名」字、「察」下無「形」字、殿本有之。今從殿本。 孫

計讓墨子閒計附錄亦謂當有「名」「形」兩字。

- [7] 為刑名二篇 孫詒讓墨子閒詁附錄:「刑」當作「形」。
- 無化論 **御覽五九五引作「元化論」。謝鯤有沅化論序,見世說賞譽注。蓋「元」訛爲「无」,又轉**

訛爲「無」。

- (九) 王褒 周校"[褒」當作「裒」。
- 譚思文章 周校:"覃思之覃不從言旁。按:海覽五〇三引王隱晉書作「覃」。
- 孤興獨往 「往」,各本作「歸」,宋本、吳本作「往」,今從之。
- 道深 對注:"世說棲逸及注引晉陽秋、又御覽八一七引中興書「深」作「淵」。按:"御覽四二五引

記

- 考磐山林 通志一七七、册府二二八「磐」作「槃」、與詩衞風合。
- [18] 石垣 「垣」、宋本作「坦」。
- 二吾 太子太和 「太和」,册府二二八作「泰和」,與張祚傳合。
- [1六] 在人親土 「土」,各本作「土」,今從殿本作「土」。
- 書生都養 局本脫「生」字,殿本作「書生都養」,與通志一七七合,今從之。 「書生都養」與漢書
- 王政有弊 「王」,各本均作「二」,唯吳本作「王」,今從之。
- (14) 亦曷能不棲情古烈擬規前修 「不」字疑行。
- 襲玄之 士漢壽襲玄之墓銘。,水經注刊誤曰:宋本晉書作「襲玄之」。,通志氏族略,晉有隱士襲玄之。 商權:舊本作「襲玄之」。「襲」是僻姓,不學者妄改爲「襲」。、斠注:水經沅水注有晉徵

晉書卷九十五

列傳第六十五

藝術

忤時而嬰罪戾,斯固通人之所蔽,千慮之一失者乎! 史不絕書。漢武雅好神仙,世祖尤耽讖術,遂使文成、五利逞詭詐而取寵榮,尹敏、桓譚由 語怪力亂神,良有以也。 來;幽贊冥符,弼成人事;旣興利而除害,亦威衆以立權,所謂神道設敎,率由於此。 託近於妖妄,迂誕難可根源,法術紛以多端,變態諒非一緒,眞雖存矣,僞亦憑焉。 藝術之興,由來尙矣。 逮丘明首唱,敍妖夢以垂文,子長繼作,援龜策以立傳,自茲厥後, 先王以是決猶豫,定吉凶,審存亡,省禍福。 日神與智, 藏往知 然而詭 聖人不

備,晉謂之乘,義在於斯。今錄其推步尤精、伎能可紀者,以爲藝術傳,式備前史云。 詳觀衆術,抑惟小道,棄之如或可惜,存之又恐不經。 載籍旣務在博聞,筆削則理宜詳

列傳第六十五 藝術

陳訓

入洛, 平,青蓋入洛陽。 皓以問訓,訓曰:「臣止能望氣,不能達湖之開塞。」 退而告其友曰:「青蓋 爲奉禁都尉,使其占候。、暗政嚴酷,訓知其必敗而不敢言。 時錢唐湖開,〔〕或言天下當太 陳訓字道元,歷陽 將有輿櫬銜璧之事,非吉祥也。」尋而吳亡。訓隨例內徙,拜諫議大夫。俄而去職 人。少好秘學,天文、算曆、陰陽、占候無不畢綜,尤善風角。 孫皓以

得理。」命將士攻之,果爲彥所敗,方信訓有道術,乃優遇之。 望氣,曰:「不過五百人。然不可攻,攻之必敗。」」宏復大怒曰:「何有五千人攻五百人而有不 之。時宏攻征東參軍衡彥於歷陽,乃問訓曰:「城中有幾千人。 攻之可拔不。」訓登牛渚山 斬之,訓鄉人|秦璩爲|宏參軍,乃說|宏曰:「訓善風角,可試之。 如不中,徐斬未晚也。」乃赦 及陳敏作亂,遣弟宏爲歷陽太守,曰訓謂邑人曰:「陳家無王氣,不久當滅。」宏聞,將

時劉聰、王彌寇洛陽,歷陽太守武瑕問訓曰:「國家人事如何。」訓曰:「胡賊三逼,國家當敗, 都水參軍淮南周亢嘗問訓以官位,訓曰:「君至卯年當剖符近郡,酉年當有曲蓋。」 亢

以問訓 州刺 入,不出十年,必以兵死,不領兵則可以免。」卓果爲王敦所害。 甘卓為歷陽太守,訓私謂所親曰:「甘侯頭低而 **灭子野死。** 史當死,武昌大火,上方節將亦當死。」至時,劉陶、周訪皆卒,武昌大火,燒數千家。 |訓曰:「公耳豎垂肩,必壽,亦大貴,子孫當興於江東。」 咸如其言。 今尚未也。」其後懷愍二帝果有平陽之酷焉。或問其以明年吉凶者,訓 :視仰, 相法名爲眄刀,又目有赤 丞相 王導多病,每 訓年八十餘卒。 脈,自外而 自

戴洋

之曰:「汝後當得道,爲貴人所識。」及長,遂善風 符錄,給東從幡麾,將上蓬萊、崐崘、積石、太室、恒、廬、衡等諸山。 戴洋字國流,吳興長城人也。年十二,遇病死,五日而蘇。 角。 說死時天使其爲酒藏吏,授 既而遺歸,逢一老父,謂

吳平,還鄉里。 藏應鳳曰:「去二十餘年,嘗有人乘馬東行,過老君而不下馬,未達橋,墜馬死者不。」鳳言有 人短陋,無風望,然好道術,妙解占候卜數。 後行至瀨鄉、經老子祠、皆是洋昔死時所見使處、但不復見昔物耳。 吳末爲臺吏, 知吳將亡,託病 不 · 仕。 因 問 及

之。 所問之事,多與洋同。

揚州 列 傳 刺史嘗問吉凶於洋,答曰:「熒惑入南斗,八月有暴水,九月當有客軍西南來。」如 第 六 + H. 藝 術

期果 敏爲 洛,夢神人謂之曰:「洛中當敗,人盡南渡,後五年揚州必有天子。」洋信之,遂不去。旣而皆 末,敏弟昶攻堂邑,混遂以單身走免。 右將軍,堂邑令孫混 大水,而 初,混欲迎其家累,洋曰:「此地當敗,得臘不得正,豈可移家於賊 石冰 作亂 冰旣據揚州,洋謂人曰:「視賊雲氣,四月當破。」果如 見而羨之。 洋曰:「敏當作賊 其後都水馬武舉洋爲都水令史,洋請急還鄉。 族滅,何足願也」未幾,敏果反而誅 中乎」混便 漢其言。 北 將赴 歲

果以十二月十七日卒,十九日臘,冠以明年七月晦亡。王導遇病,召洋問之。 耳。」導即移居東府,病遂差。 命在申,金爲土使之主,而於申上石頭立冶,火光照天,此爲金火相爍,水火相煎,以故受害 「人言江南當有貴人,顧彦先、周宣珮當是不。」「三洋曰:「顧不及臘,周不見來年八月。」傑 廬江太守華譚問洋曰:「天下誰當復作賊者。」洋曰:「王機。」尋而機反。 洋曰:「二 陳眇問洋日: 君侯本

將軍。 颺後果坐吏免官。洋又謂曰:「卿雖免官,十一月當作郡,加將軍。」至期,爲太山太守、 元帝增颺衆二千,使助祖逖。 洋勸颺不行,颺乃稱疾。 鎭東從事中郞張闓舉洋爲丞相令史。時司馬颺爲烏程令,將赴職,洋曰:「君宜深愼下 颺賣宅將行,洋止之曰:「君不得至,當還,不可 ·無宅。」颺果爲徐龕所逼,不得之 收付延尉、俄而因赦得出。

此 今大王內無含咎,外無怨憤,當承天洪命,納祚無窮,何爲追越王去國留殃故事邪! 元 帝 同。」洋曰:「越王爲吳所囚,雖當時遜媚,實懷怨憤,尷故用甲辰,乘德 將登阼,使洋擇日,洋以爲宜用三月二十四日丙午。太史令陳卓奏用二十二日, 用甲辰三月反國,范蠡稱在陽之前,當主盡出,上下盡空,德將出遊,刑入中宮, 而 歸, 留刑吳

軍於水 時垂 僅以 罪被收,洋救之。 妖,白約收烊,付刺姦而絕其食五十日,言語如故。|約知其有神術,乃赦之而讓振。 自東 而 不可。」約 **[未決,洋曰:「賊以八月辛酉日反,日辰俱王,辛德在南方,酉受自刑,梁在譙北,乘德伐** 身免,士卒皆死。約表洋爲下邑長。 餓 南 及 :,折木。 祖約代兄鎭譙,請洋爲中典軍,遷督護。永昌元年四月庚辰,四禺中時有大風, 北斷要路,賊必敗。」約竟不追,賊乃掠城父婦女輜重 至十月三日,石勒騎果到譙城東。 死,洋養活之,振猶尙遺忘。 不從,使兄子智與延追之。 洋謂約曰:「十月必有賊到譙城東,至歷陽,南方有反者。」主簿王振以洋爲 約曰:「振往日相繫,今何以救之。」洋曰:「振不識風角,非有宿嫌。 夫處富貴而不棄貧賤甚難。」約義之,卽原振,賜洋米三 賊 爲棄婦女輜重走,智與延等爭物,賊還掩之,智、延 洋言於約日:「賊必向城父,可遣騎水南追之,步 時梁 國人反, 逐太守袁晏。 一而去。 約將鲁延求追賊,洋曰: 梁 城峻嶮,約欲討之 振後 振往 有 起

列

傳

第六

刑 賊 必破亡。

在 前 ,周瑜拜賀。今與往同,故知必克。」約從之,果平梁城。

爲客。 曠,宜還固守。 之。」約乃率衆向合肥。俄而敦死衆敗,遂住壽陽。洋又曰:「江淮之間當有軍事, 醮城虛 敗,洋曰:「太白在東方,辰星不出。兵法先起爲主,應者爲客。辰星若出,太白爲主,辰 太寧三年正月,有大流星東南行,洋曰:「至秋,府當移壽陽。」及王敦作逆,約問其勝 辰星不出,太白爲客,先起兵者敗。今有客無主,有前 不者,雍丘、沛皆非官有也。」約不從,豫土遂陷於賊。 無後, 宜傳檄所部,應韶伐

戰。 夏,汝南人反,執約兄子濟,送於石勒。 血 丸 其 丸,當有下反上者。』恐十月二十七日胡馬當來飲淮水。」至時,石勒騎大至,至改城大 咸和元年 日西 風,日五兵火俱發,約大懼。 春,約南行佃,遇大雷雨西南來,洋曰:「甲子西南天雷,其夏必失大將。」至 會風 約府內地忽赤 迴, 賊退。 如丹,洋日:「案河圖徵云:『 時傳言勒遣騎向壽陽, 約欲送其家 地 赤 如 丹

還江東,洋日:「必無此事。」尋而傳言果妄。

其變。」約不從,遂與峻反。 至三年五月,大風雷雨西北來,城內晦暝,洋謂約曰:「雷鳴人 饿 而 蘇 咸 峻 和初,月暈 遺 使招約俱反,洋謂約日 左角,有赤白珥。 「蘇峻必 約問洋,洋日:「角爲天門,開布陽道,官門當有大戰。」 敗,然其初起,兵鋒 不 可當, 可 外和 內嚴, 以待

約率所 胡? 約姊及嫂奔於石勒。 槪 反者。 上,明使君當遠佞近直,愛下振貧。 將 |歷陽,可得幾時。]洋曰:「得六月耳。」約問洋:「臺下及此氣候何如。」洋曰:「此當復有 |洋曰:「東入失半,入胡滅門,留壽陽尚可。」|約欲東向歷陽,其衆不樂東下,皆叛約,劫 兵到 臺下來年三月當太平,江州當大喪。 親將家屬奔於石勒。 廬江, 其衆盡散。 約到歷陽,祖煥問洋日:「も」「君昔言平西在壽陽可得五年,果如君言。 約召洋出,問之曰:「吾還東何如留壽陽。 若留壽陽,何如入 二月而天子反正,四月而溫嶠卒,郭默據湓口以叛。後勸誅約 昔秦有此變,卒致亂亡。」約大怒,收洋繫之。 後南方復有軍事,去此千里。」尋而 牽騰叛約, 遣部將李

時,府內大聚骨埋之。」胤問在何處,洋曰:「不出州府門也。」胤架府東門。 雖還,使君故作江州。」俄如其言。九月甲寅申時,迴風從東來,入胤兒船中, 將君還野中治病。」洋曰:「使君當作江州,不得解職。」胤曰:「溫公不復還邪。」洋曰:「溫公 練,長五六丈。洋曰:「風從咸池下來,攝提下去,咸池爲刀兵,大殺 星,在下爲害氣。』年與命幷,必凶當忌。十二月二十二日庚寅勿見客。」胤曰:「我當解職, 憂使君今年有大厄。 親屬並盡,皆如洋言。 約 旣敗,洋往尋陽。 使君年四十七, 行年入庚寅。太公陰謀曰: 『六庚爲白獸, 在上爲客 時劉胤鎭尋陽,胤問洋日:「我病當差不。」洋日:「不憂使君不差, 爲死喪。 洋叉日:「東爲天 西過, 到 甲子 狀 日申 如

備東北寅上,以却害氣。」胤不從。 二十四日壬辰,胤遂爲郭默所害。 牢,牢下開門,憂天獄至。」十二月十七日,洋又曰:「臘近可閉門,以五十人備守, 幷以百人

亢,鄭之分。 歲星移入房,太白在心。 心房,宋分。 順之者昌,逆之者亡。 石季龍若興兵東 原,聞而大喜。會病篤,不果行。 南,此其死會也。官若應天伐刑,徑據宋鄭,則無敵矣。若天與不取,反受其咎。」侃志在中 今年官與太歲、太陰三合癸巳,癸爲北方,北方當受災。 歲鎮二星共合翼軫,從子及巳,徘 兵,主胡夷,故置天弓以射之。熒惑逆行,司無德之國,石勒死是也。勵之餘燼,以自殘害。 徊六年。荆楚之分,歲鎭所守,其下國昌,豈非功德之徵也!今年六月,鎭星前角亢。角 月退,從畢右順行入黃道,未及天關,以八月二十二日復逆行還鉤,繞畢向昴。 「前年十一月熒惑守胃昴,至今年四月,積五百餘日。昴,趙之分野,石勸遂死。熒惑以七 南中郎將桓宣以洋爲參軍,將隨宣往襄陽,太尉陶侃留之住武昌。時侃謀北伐,洋曰: 昴畢爲邊

從城上出,如大車狀,白布幔覆,與火俱出城東北行,至江乃滅。洋聞而歎曰:「此與前白氣 同。」時亮欲西鎭石城,或問洋:「此西足當欲東不。」洋曰:「不當也。」 咸康三年,洋言於亮 必應。」尋有大鹿向西城門,洋曰:「野獸向城,主人將去。」城東家夜半望見城內有數炬火, 侃薨,征西將軍庾亮代鎭武昌,復引洋問氣候。 洋曰:「天有白氣,喪必東行,不過數年

寅數七,子數九,賊高可九千人,下可七千人。從魁爲貴人加丁,下克上,有空亡之事,不敢 死問。 宜更擇吉處,武昌不可久住。」五年,亮令毛寶屯邾城。九月,洋言於亮日:「毛豫州今年受 立宮城,至已酉,還下秣陵。陶公亦涉八年。土地盛衰有數,人心去就有期,不可移也。 害氣三合己亥,己爲天下,亥爲戎胡,季龍亦當受死。 渡,無嫌也。」寶卽遣兒婦還武昌。尋傳賊當來攻城,洋曰:「十月丁亥夜半時得賊問,干爲 曰:「武昌土地有山無林,政可圖始,不可居終。山作八字,數不及九。 昔吳用壬寅來上,創 賽其牛,至今未解,故爲此鬼所考。」 亮曰:「有之, 君是神人也。」或問洋曰:「庾公可得幾 進武昌也。」 賊果陷邾城而去。 亮問洋曰:「故當不失石城否。」洋曰:「賊從安陸向石城,逆 君,支爲臣,丁爲征西府,亥爲料城,功曹爲賊神,加子時十月水王木相,王相氣合,賊必來。 歸本,慮有後患。」明日,又曰:「昨夜火殃,非國福,今年架屋,致使君病,可因燒屋,移家南 日內。」其夕,又曰:「九月建戊,朱雀飛驚,征軍還歸,乘戴火光,天示有信,災發東房,葉落 「恨晚,猶差不也。」亮竟不能解二州,遂至大困。洋曰:「昔蘇峻時,公於白石祠中祈福,許 方敘我疾。]洋曰:「荆州受兵,江州受災,公可去此二州。」亮曰:「如此,當有解不。]洋曰: 太白,當伐身,無所慮。」亮曰:「天何以利胡而病我。」」洋曰:「天符有吉凶,土地有盛衰,今年 昨朝大霧晏風,當有怨賊報仇,攻圍諸侯,誠宜遠偵邏。」實問當在何時,答曰:「五十 今乃不憂賊,但憂公病耳。」亮曰:「何

二四七六

時。〕洋曰:「見明年。」時亮已不識人,咸以爲妄,果至正月一日而薨。 庾翼代亮,洋復爲占候。少時卒,年八十餘。所占驗者不可勝紀。

韓友

韓友字景先,廬江舒人也。 爲書生,受易於會稽伍振,善占卜,能圖宅相冢,亦行京費

厭勝之術。

囊大 豹皮馬鄣泥臥上,立愈。 覺佳,於是遂差。 縛囊口,懸著樹二十許日,漸消,開視有二斤狐毛,女逐差。 脹 龍舒長鄧林婦病積年,垂死,醫巫皆息意。 如吹,因決敗之,女仍大發。 友筮之,命作布囊,依女發時,張囊著窗牗間,友閉戶作氣,若有所驅。 斯須之間,見 舒縣廷掾王睦病死,已復魄。 劉世則女病魅積年,巫爲攻禱,伐空冢故城間,得狸鼉數十,病猶 友乃更作皮囊二枚,沓張之,施張如前,囊復脹滿,因急 皮為筮之,令以丹畫版作日月置牀頭,又以 友爲筮之,使畫作野猪著臥處屛風上,一宿

敢發火。 積 於庚地,至七月丁酉放火燒之,咎可消也。 宣城 洪後爲廣陽領校,遭母喪歸家,友來投之,時日已暮,出告從者,速裝束,吾當夜 邊洪以四月中就友卜家中安否,友曰:「卿家有兵殃,其禍 不爾,其凶難言。」洪卽 聚柴。 甚 重。 至日, 可伐七十束柴, 大風,不

復住 出亡走。 從者曰:「今日已暝"數十里草行,何急復去。」友曰:「非汝所知也。此間血覆地,寧可 !」苦留之,不待食而去。 明日,其宗族往收殯亡者,尋索洪,數日,於宅前林中得之,已自經死。 其夜洪欻發狂,絞殺兩子,幷殺婦,又斫父妾二人,皆被創,因

者爲善,不獲將成禍。」酤乃謹爲其備。 宣城 太守殷祐有病,友筮之,曰:「七月晦日,將有大鸛鳥來集廳事上,宜勤 至日、果有大鸜垂尾九尺、來集廳事上、掩捕得之、 **弱**伺取,

滿乃遷石頭督護,後爲吳郡太守。

案方投藥治病,以冷熱相 友 卜占神效甚多 一,而 救。 消殃轉禍,無不皆驗。 其差與不差,不可必也。」友以元康六年舉賢良,元帝渡江,以 干寶問其故,友曰:「筮卦用五行相 生殺,如

淳于智

爲

廣武將軍,永嘉末卒。

田 手 一字,辟方一寸二分,使露手 中指,以問智。 淳于智字叔平,濟北盧人也。 一狐當門向之嘷。 智曰:「是欲殺君 藻怖愕,馳見智。 以 臥。 有思義,能易筮,善厭勝之術。 而 明旦, 不能,當爲君使其反死。」乃以 智曰:「其禍甚急、君速歸、在狐嘷處拊 有大鼠伏死 手 前。 **譙人夏侯藻母** 高平劉柔夜臥,鼠齧其左 朱書手腕橫文後三寸作 病因, 心啼哭,令 詣 智卜,

列

禍,不 家人旣集,堂屋五 家 市,入門數十步,當有一人持荆馬鞭者,便就買以懸此樹,三年當暴得財。」暖承言詣市,果 爲 驗,莫能學也。 喪病貧苦,或謂之曰:「淳于叔平神人也,君何不試就卜,知禍所在。」暖性質直,不信卜筮, 搥拍,恒使作聲,三日放去。 得馬鞭,懸之三年,浚井,得錢數十萬,銅鐵器復二十餘萬,於是致贍,疾者亦愈。 曰:「人生有命,豈卜筮所移 人驚怪,大小必出,一人不出,哭勿止,然後其禍可救也。」藻還,如其言,母亦扶病而出 卦。」智乃爲卦,卦成,謂暖曰:「君安宅失宜,故令君困。 可 勝紀,而 **卜筮所占,千百皆中。** 間拉然而崩。 」會智來,應詹謂曰:「此君寒士,每多屯虞,君有通靈之思,可 劭從之。 護軍張砌母病篤,智筮之,使西出市沐猴,繫母臂,令傍人 其猴出門卽爲犬所咋死,母病遂差。 應詹少亦多病,智乃爲符使詹佩之,誦其文,旣而皆 君舍東北有大桑樹,君徑 上黨鮑瑗家多 其消災轉 至

猶當不應此乎!」太康末,爲司馬督,有**寵於楊駿,故見殺**。 性深沈,常自言短命,曰:「辛亥歲天下有事,當有巫醫挾道術者死。 吾守湯義以行之,

步熊

步熊字叔羆,陽平發干人也。 少好卜筮數術,門徒甚盛。 熊學舍側有一人燒死,吏持

熊 便縛之。」 諸 生, 謂爲失火。 更 如熊言,果是耕人,自言草惡難耕,故燒之,忽風起延燒遠近,實不知草中有人。 熊曰:「已爲卿卜得其人矣。使從道南行,當有一人來問得火主未者,

叉鄰 人兒遠行,或告已死,其父母號哭制服,熊爲之卜,剋日當還,如期果至。

覆,物 乃使 浴諸 趙 無所失。 生著其裘南走,倫兵悉赴捉之,熊密從北出,得脫。後爲成都王穎所辟,穎使熊射 王 倫 聞 其名,召之。 後穎奔關中,平昌公模鎭鄴,以熊穎黨,誅之。 熊謂諸生曰:「倫死不久,不足應也。」倫怒,遣兵圍之數重。 熊

杜不愆

淹! 筮之。 置東檐 飛入籠, 都除,又是休 然未 超 杜 時 不愆 下,却後 不 與雄 您, 廬江人也。 之信。 正羸 日 雉 應,年將 篤 "「案卦言之,卿所苦尋除。 九日 交而 或勸 慮命在旦夕, 去, 丙 八十, 依 午日 雄雉 其言,索雉 少就外祖郭璞學易卜,屢有驗。 午時,必當有雌雉飛來與交,旣 位極 不動。 笑而 人臣。 果得。 超歎息曰:「雖管郭之奇,何以尚 ·答曰:「若保八十之半,便 若但雌逝雄 然宜於東北三十里上宮姓家索其所養雄 至丙 .午日,超臥南 留者, 高平郗超年二十餘,得重疾,試 病 而 軒之下 雙去。 有餘矣。 周 方差, ·觀之, 此 若如 年半八十,名 超 此,不 至 周 海彌 日 病 晏,果有 出二十 差, 年乃起,至 雉 何 一、籠盛 雌 位 日 足 雉 病 亦

列

傳

第

四十,卒於中書郎。

不愆後占筮轉疏,無復此類。後爲桓嗣建威參軍。

嚴卿

外獨 當餘小毒,正及六畜輩耳,無所復憂。」序行半路,狗忽然作聲甚急,有如 愼不可東行,必遭暴害之氣,而非劫也。」 脖不之信。 已死,吐黑血斗餘。其夕,序墅上白鵝數頭無故自死,而序家無恙。 ·母家白雄狗繫著船前。」求索止得駮狗, 嚴卿,會稽人也。 善卜筮。鄉人魏序欲暫東行,荒年多抄盜,令卿筮之。 無白者。卿曰:「駮者亦足,然猶恨其色不純, 卿曰:「旣必不停,宜以禳之,可索西郭 人打之者。 卿筮曰「君 **比视**

隗炤

也。 執版惘然,不知所以。 亡後,其家大困乏,欲賣宅,憶夫言輒止。 卻後五 隗炤, 汝陰人也。 年春,當有韶使來頓此亭,姓襲,此人負 妻曰:「夫臨亡,手書版見命如此,不敢妄也。」使者沈吟良久而悟,謂 善於湯。 臨終,書版授其妻曰:「吾亡後當大荒窮,雖爾,愼莫賣宅 期日,有龔使者止亭中,妻遂齎版往責之。 〈吾金,卽以此版往責之,勿違言也。」炤 使者

之,卦成,撫掌而歎曰:「妙哉隗生!含明隱迹,可謂鏡窮達而洞吉凶者也。」於是告炤妻曰: 頭,去壁一丈,入地九尺。」妻還掘之,皆如卜焉。 「吾不相負金也,賢夫自有金耳,知亡後當暫窮,故藏金以待太平,所以不告兒婦者,恐金盡 曰:「賢夫何善。」妻曰:「夫善於易,而未曾爲人卜也。」使者曰:「噫,可知矣」」乃命取蓍筮 而困無已也。 知吾善易,故書版以寄意耳。金有五百斤,盛以青甕,覆以銅柈,埋在堂屋東

卜琊

厄」 於龍門山 月。」翊曰:「子勿爲公吏,可以殆諸。」]璞曰:「吾不能殆公吏,猶子之不能殆卿將也。」翊曰: 見子之令終也。」八選曰:「吾禍在江南,甚營之,未見觅兆。 ·吾此雖當有帝王子,終不復奉二京矣。 琅邪可奉,卿謹奉之,主晉祀者必此人也。」**翊**遂隱 |翊曰:「然。吾大厄在四十一,位爲卿將,當受禍耳。不爾者,亦爲猛獸所害。 下 翔字子玉, 匈奴後部人也。 少好讀易,郭璞見而歎曰:「吾所弗如也,柰何不免兵 雖然,在南猶可延期,住此 不 吾 亦未 過時

何異高祖四公哉 劉元 海 **僭號,徵爲大司農、侍中,固以疾辭。元海曰:「人各有心,** 可遂其高志。」後復徵爲光祿大夫,翔謂使者曰:「非吾死所也。」及劉聰

列

傳

嗣爲位,徵爲太常。 所敗,翔卒先奔,爲其元帥所殺。 | **琢使持節、平北將軍。將行、謂其妹曰:「此行也,死自吾分,後愼勿紛紜。」及攻晉陽,爲**現 矣。」聰戲曰:「朕欲勞先生一行可乎。」」琢曰:「臣所以來不及裝者,正爲是行也。」聰大悅,署 時劉琨據幷州,聰問何時可平,珝答曰:「幷州陛下之分,今茲克之必

鮑靚

閱嘗見仙人陰君,授道訣,百餘歲卒。 衣,與機相捍,良久擒之,得二物似烏鴨。開曰:「此物不祥。」機焚之,徑飛上天,機尋誅死。 嘗行部入海,遇風,飢甚,取白石煑食之以自濟。 鮑靚字太玄,東海人也。年五歲,語父母云:「本是曲陽李家兒,九歲墜井死。」其父母 王機時爲廣州刺史,入厠,忽見二人著鳥

吳猛

始授其神方。 吳猛,豫章人也。 因還豫章,江波甚急,猛不假舟楫,以白羽扇畫水而渡,觀者異之。 少有孝行,夏日常手不驅蚊,懼其去己而噬親也。 年四十,邑人丁義 庾亮為江

州 如生。 刺史,嘗遇疾,聞猛神異,乃迎之,問己疾何如。 未及大斂,遂失其尸。識者以爲亮不祥之徵。 **| 猛辭以算盡,請具棺服。** 亮疾果不起。 旬日而死,形狀

幸靈

汝言,復用 見而怒之,靈曰:「夫萬物生天地之間,各欲得食。 母兄弟亦以爲癡也。 幸靈者,豫章建昌人也。 |理壞者何爲。]|靈曰:「此稻又欲得終其性,牛自犯之,靈可以不收乎」| 嘗使守稻,羣牛食之,靈見而 性少言,與小人羣居,見侵辱而無慍色,邑里號之癡, 牛方食,柰何驅之!其父愈怒曰 不驅,待牛去乃往理 其殘 亂者。 記即 其父 雖其父 母

但部 行人 是 靈曰:「若爾不以情告我者,今眞死矣。」竊者急遽,乃首出之。 輸,或竊之焉。 知知 分未 由 時順陽樊長賓爲建昌令,發百姓作官船於建城山中,吏令人各作箸一雙。〔云〕靈作而未 此敬畏之。 至耳。 俄而竊者心痛欲死,靈謂之曰:「爾得無竊我箸乎?」竊者不應。 靈請自牽之。」乃手執箸,惟用百人,而船去如流。 船成、當下,吏以二百人引一艘,不能動, 方壽益 靈於是飲之以水,病卽 衆大驚怪,咸稱其神,於 人。 靈曰:「此 有頃,愈急, 以 過足, 立愈

有 襲 仲儒 女病積年,氣息財屬,靈使以水含之,已而强起,應時大愈。 又呂猗母皇氏得

列

發動,靈乃留水一器令食之,每取水,輒以新水補處,二十餘年水清如新,塵垢不能加焉。 令去扶,卽能自行,由此遂愈。於是百姓奔趣,水陸輻輳,從之如雲。皇氏自以病久,懼有 曰:「老人得病累年,柰何可倉卒起邪。」靈曰:「但試扶起。」於是兩人夾扶以立。 少選,靈又 痿痹病,十有餘年,靈療之,去皇氏數尺而坐,冥目寂然,有頃,顧謂漪曰:「扶夫人令起。」漪

不能 「知之足矣。」悝固請之,靈不得已,至門,見符索甚多,謂悝曰:「當以正止邪,而以邪救邪, 惡得已乎!」並使焚之,惟據軒小坐而去,其夕鬼怪卽絕。 !絕。適值靈,乃要之。靈於陌頭望其屋,謂悝曰:「此君之家邪。」悝曰:「是也。」靈曰: 時。周悝家有鬼怪,言語訶叱,投擲內外,不見人形,或器物自行,再三發火,巫祝厭劾而

遺,於是其術稍衰,所療得失相半焉。 以保性命,可悉免遣之。」十餘年間,賴其術以濟者極多。後乃娶妻,畜車馬奴婢,受貨賂致 凡草木之夭傷於山林者,必起理之,器物之傾覆於途路者,必舉正之。周旋江州間,謂其士 人曰:「天地之於人物,一也,咸欲不失其情性,柰何制服人以爲奴婢乎!諸君若欲享多福 靈所救愈多此類,然不取報謝。行不騎乘,長不娶妻,性至恭,見人卽先拜,言輒自名。

佛圖澄

歲,常服氣自養,能積日不食。 書,則拔絮,孔中出光,照于一室。 佛圖 一澄,天竺人也。 本姓帛氏。少學道,妙通玄術。 善誦 又嘗齋時,平旦至流水側,從腹旁孔中引出五藏六府洗 神咒,能役使鬼神。 腹旁有一孔,常以絮塞之,每 永嘉四年,來適洛陽,自云百有 夜讀

之,訖,還內腹中。

又能聽鈴音以言吉凶,莫不懸驗

須臾鉢中生靑蓮花,光色曜日,勸由 晶 知 大將軍郭黑略家,黑略每從勸征伐,輒豫克勝負,勸疑而問曰:「孤不覺卿有出衆智謀 一夏,己應爲師。 軍 ·行吉凶何也。」黑略曰:「將軍天挺神武,幽靈所助, 及洛中寇亂,乃潛草野以觀變。 臣前後所白、皆其言也。」勵召澄、試以道術。 [此信之。 石勒屯兵萬陂, 專行殺戮,沙門遇害者甚衆。燈投勸 有一沙門智術非常, 澄即 取 **鉢盛水,燒香呪之,** 云將軍當 略有 而 毎

之。」旣而勵使至,覓燈不得。使還報勵,勵驚曰:「吾有惡意向澄,澄捨我去矣。」通夜不寢, 所在。」使人始至,未及有言,燈逆問曰:「平居無寇,何故夜嚴。」勵益信之。 闡後因忿,欲 思欲見澄。 諸道士,幷欲苦澄。澄迺潛避至黑略舍,語弟子曰:「若將軍信至,問吾所在者,報云不知所 其言,有備,故不敗。 勒 自葛陂還河北,過枋頭,枋頭人夜欲斫營,澄謂黑略曰:「須臾賊至,可令公知。」 澄知勸意悔,明旦造勵。 勒欲試澄,夜冠胄衣甲,執刀而坐,遣人告澄云:「夜來不知大將 勒曰:「昨夜何行。」澄曰:「公有怒心,昨故權避公。今 果 軍 害 如 何

列

改意,是以敢來。」勒大笑曰:「道人謬矣。」

流,有一小龍長五六寸許,隨水而來,諸道士競往視之。有頃,水大至,隍塹皆滿。 迺與弟子法首等數人至故泉源上, 坐繩牀, 燒安息香, 呪願數百言。 襄國城塹水源在城西北五里,其水源暴竭,勒問澄何以致水。 澄曰:「今當敕龍取水。」 如此三日,水泫然微

其用。 波。」勒登城望末波軍,不見前後,失色曰:「末波如此,豈可獲乎」更遣變安問澄。澄曰: 「已獲末波矣。」時城北伏兵出,遇末波,執之。 澄勸勒宥末波,遣還本國,勒從之,卒獲 鮮卑段末波攻勒,衆甚盛。勒懼,問澄。澄曰:「昨日寺鈴鳴云,明旦食時,當擒段末

忽歎曰:「劉岳可憫」,弟子法祚問其故,澄曰:「昨日亥時,岳已敗被執。」果如所言。 劉 曜遣從弟岳攻勒,勒遣石季龍距之。岳敗,退保石梁塢,季龍堅栅守之。澄在襄國,

「此卽曜也。」勸甚悦,遂赴洛距曜,生擒之。 手示童子,粲然有輝。童子驚曰:「有軍馬甚衆,見一人長大白皙,以朱絲縛其肘。」澄曰: 禿當、捉也。此言軍出捉得曜也。」又令一童子潔齋七日,取麻油合胭脂,躬自研於掌中,舉 支替戾岡,僕谷劬禿當。』此羯語也。秀支,軍也。替戾岡,出也。僕谷,劉曜胡位也。劬 及曜自攻洛陽、勒將救之,其羣下咸諫以爲不可。勒以訪澄,澄曰:「相輪鈴音云:『秀

人,可令百姓 勒僭稱趙天王,行皇帝事,敬澄彌篤。 時石蔥將叛,澄誡勒曰:「今年蔥中有蟲,食必害 無食蔥也。」勸班告境內,愼無食蔥。 俄而石蔥果走。 勒益重之, 事必諮而

行,號日大和

尙。

不出今年矣。」旣而勵果死 多在澄寺中養之。 澄 勒 取楊枝沾水,灑而呪之,就執斌手曰:「可起矣」」因此遂蘇,有頃,平復。 愛子斌暴病死,將殯,勸歎曰:「朕聞號太子死,扁鵲能生之,今可得效乎。」乃令告 勒死之年,天靜無風,而塔上一鈴獨鳴,澄謂衆曰:「鈴音云,國有大喪, 自是勒諸子

可斷趙 引之升殿,常侍以下悉助舉輿,太子諸公扶翼而上,主者唱大和尚,衆坐皆起,以彰其尊 代初傳其道,惟聽西域人得立寺都邑,以奉其神,漢人皆不出家。魏承漢制,亦循前軌。 混淆,多生愆過。一季龍下書料簡,其著作郎王度奏曰:「佛,外國之神,非諸華所應祠奉。 石遊,乃曰:「澄公其以季龍爲海鷗鳥也。」百姓因澄故多奉佛、皆營造寺廟,相競出家,眞僞 又使司空李農旦夕親問,其太子諸公五日一朝,尊敬莫與爲比。支道林在京師,聞澄與諸 祀同罪。 及季龍僭位,遷都於鄴,傾心事澄,有重於勱。 人悉不聽詣寺燒香禮拜,以選典禮,其百辟卿士下逮衆隸,例皆禁之,其有犯者,與 其趙人爲沙門者,還服百姓。」朝士多同度所奏。 季龍以澄故,下書曰:「朕出自 下書衣澄以綾錦,乘以彫輦,朝會之日 漢

列

邊戎,忝君諸夏,至於饗祀,應從本俗。 佛是戎神,所應棄奉,其夷趙百姓有樂事佛者,特

汝師邪。」」佐愕然愧懺。於是國人每相語:「莫起惡心,和尚知汝。」及澄之所在,無敢向其方 於梁基城下,對車夜談,言及和尚,比旦各去。性始入,澄逆笑曰:「昨夜爾與法常交車共說 面涕唾者。 澄時止鄴城寺中,弟子徧於郡國。嘗遣弟子法常北至襄國,弟子法佐從襄國還,相遇

儻有所過,汝當止我。」

澄常入,必過邃。遊知澄入,要候甚苦。

澄將上南臺,僧慧引衣,澄 先除之。」澄月望將入覲季龍,謂弟子僧慧曰:「昨夜天神呼我曰:『明日若入,還勿過人。』我 疾、況此等乎」後三日果死。邃將圖爲逆、謂內豎曰:「和尚神通、儻發吾謀。明日來者、當 欲言難言,欲忍難忍。」乃因事從容箴季龍,季龍終不能解。俄而事發,方悟澄言。 果已得疾。太醫殷騰及外國道士自言能療之,澄告弟子法牙曰:「正使聖人復出,不愈此 曰:「事不得止。」坐未安便起,邃固留不住,所謀遂差。還寺,歎曰:「太子作亂,其形將成, 季龍太子邃有二子,在襄國,澄語邃曰:「小阿彌比當得疾,可往看之。」邃卽馳信往視,

乃唱云:「衆僧祝願。」澄又自祝願。須臾,更曰:「若東南出者活,餘向者則困。」復更祝願。有 後郭黑略將兵征長安北山羌,墮羌伏中。時燈在堂上坐,慘然改容曰:「郭公今有厄。」

乘此馬,小人乘公馬,濟與不濟,命也。」略得其馬,故獲免。 頃,曰:「脫矣。」後月餘,黑略還,自說墜羌圍中,東南走,馬乏,正遇帳下人,推馬與之曰:「公 推檢時日,正是澄祝願時也

遭驗幽州,云爾日火從四門起,西南有黑雲來,驟雨滅之,雨亦頗有酒氣。 龍升中臺,澄忽驚曰:「變,變,幽州當火災。」乃取酒噀之,云,久而笑曰:「救已得矣。」季龍 季龍。澄見而歎之曰:「桓溫入河,其不久乎」,溫字元子,後果如其言也。季龍嘗晝寢,夢 子在某處被劫垂死。」因燒香祝願,遙救護之。弟子後還,云某月某日某處爲賊所劫,垂當 見羣羊負魚從東北來,寤以訪澄。澄曰:「不祥也,鮮卑其有中原乎」,後亦皆驗。澄嘗與季 見殺,忽聞香氣,賊無故自驚曰:「救兵已至。」棄之而走。」黃河中舊不生黿,時有得者,以獻 祠 · 所,其日大雨方數千里。 澄嘗遣弟子向西域市香,既行, 澄告餘弟子曰:「掌中見買香弟 時天旱,季龍遣其太子詣臨漳西滏口祈雨,久而不降,乃令澄自行,卽有白龍二頭降於

問訊之。||澄曰:「脅下有賊,不出十日,自浮圖以西,此殿以東,當有血流,愼勿東也。」|杜后 度。」宣變色曰:「是何言歟。」」蹬謬曰:「老胡爲道,不能山居無言,重茵美服,豈非洛度乎」」 石韜後至,澄孰視良久。「韜懼而問澄,澄曰:「怪公血臭,故相視耳。」季龍夢龍飛西南,自天 而落,旦而問澄,澄曰:「禍將作矣,宜父子慈和,深以愼之。」季龍引澄入東閤,與其后杜氏 石宣將殺石韜,宣先到寺與澄同坐,浮屠一鈴獨鳴,澄謂曰:「解鈴音乎。鈴云胡子洛

髦尾皆有燒狀,入中陽門,出顯陽門,東首東宮,皆不得入,走向東北,俄爾不見。 龍 加慈者,尚有六十餘歲。如必誅之,宣當爲彗星下掃鄴宮。」季龍不從。後月餘,有一妖馬, 季龍令發殿石下視之,有棘生焉。冉閔小字棘奴。 曰:「災其及矣」」季龍大享羣臣於太武前殿,澄吟曰:「殿乎,殿乎!棘子成林,將壞人衣。」 卽 日:「和尙耄邪!何處有賊!」燈即易語云:「六情所受,皆悉是賊。 老自應耄,但使少者不昏 以澄先誡,故獲免。及宣被收,澄諫季龍曰:「皆陛下之子也,何爲重禍邪!陛下若含怒 好耳。」遂便寓言,不復彰的。 後二日,宣果遣人害韜於佛寺中,欲因季龍臨喪殺之。季 澄聞而歎

化矣。」卒於鄴宮寺。後有沙門從雍州來,稱見澄西入關,季龍掘而視之,惟有一石而無尸。 季龍惡之曰:「石者,朕也,葬我而去,吾將死矣。」因而遇疾。明年,季龍死,遂大亂 「不得。」遂無復言。謂弟子法祚曰:「戊申歲禍亂漸萌,己酉石氏當滅。吾及其未亂,先從 陌,還寺,獨語曰:「得三年乎。」自答:「不得。」又曰:「得二年、一年、百日、一月乎。」自答: 季龍造太武殿初成,圖畫自古賢聖、忠臣、孝子、烈士、貞女,皆變爲胡狀,旬餘,頭悉縮

麻襦

時人謂之麻襦。言語卓越,狀如狂者,乞得米穀不食,輒散置大路,云飴天馬。趙興太守籍 襦者,不知何許人也,莫得其姓名。石季龍時,在魏縣市中乞丐,恒着麻襦 布裳,故

狀收送詣季龍。

此患。 龍 迹,莫已已之懿。 裔苗葉繁,其來方積。 休期於何期,永以歎之。」澄曰:「天迴運極,否將不 云:「我當有所過,君至合口橋見待。」使人如言而馳,至橋,麻襦已先至。 支,九木水爲難,無可以術寧。玄哲雕存世,莫能基必莫能基必穨。[1]人遊閻浮利,擾擾多 與共語,了無異言,惟道「陛下當終一柱殿下」。季龍不解,送以詣澄。 麻襦謂澄曰:「昔在 中會,奄至今日。 酉戎受玄命,[10]絕曆終有期。 金離消于壤,邊荒不能遵,驅除靈期 先是,佛圖澄謂季龍曰:「國東二百里某月日當送一非常人,勿殺之也。」如期果至。季 行登陵雲字,會於虛游間。」其所言人莫能曉。季龍遣驛馬送還本縣,旣出城,請步,

<u>江左,亦以爲「天馬」之應云。</u> 後慕容儁投季龍尸於漳水,倚橋柱不流,時人以爲「一柱殿下」卽謂此也。及元帝嗣位

單道開

單道開 ,敦煌人也。常衣粗褐,或贈以繒服,皆不著,不畏寒暑,晝夜不臥。 恒服細石

列傳

第

六十五

藝術

吞數枚,日一服,或多或少。好山居,而山樹諸神見異形試之,初無懼色。

若去者,當有大亂。」及季龍末,道開南渡許昌,尋而鄴中大亂 而已。 者,道開都不答。日服鎭守藥數丸,大如梧子,藥有松蜜薑桂伏苓之氣,時復飲茶蘇一二升 閣,

高八九尺,於上編

菅爲禪室,常坐其中。 令佛圖澄與語,不能屈也。 石季龍時,從西平來,一日行七百里,其一沙彌年十四,行亦及之。 自云能療目疾,就療者頗驗。視其行動, 初止鄴城西沙門法綝祠中,後徙臨漳昭德寺。 季龍資給甚厚,道開皆以施人。 狀若有神。 佛圖澄曰:「此道士觀國興衰, 至秦州,表送到鄴, 人或來諮問 於房內造重

耳。」乃爲之贊云。 羅浮山, 弟子以尸置石穴中,弟子乃移入石室。 升平三年至京師,後至南海,入羅浮山,獨處茅莢,蕭然物外。 至石室口 見道開形骸如生,香火瓦器猶存。 陳郡袁宏爲南海太守,與弟穎叔及沙門支法防共登 宏曰:「法師業行殊羣,正當如蟬蛻 年百餘歲,卒於山舍,敕

黄泓

史,尤明疆易。性忠勤,非禮不動。 黄泓字始長,魏郡斥丘 人也。 **父沈,善天文秘術。** 永嘉之亂,與渤海高瞻避地幽州,說瞻曰:「王浚昏暴, 泓從父受業, 精妙踰深, 兼博覽經

藝

乎? 終必無成,宜思去就以圖久安。 宜 相 與歸之,同建事業。」瞻不從。 慕容廆法政修明,虛懷引納,且讖言眞人出東北,儻或是 泓乃率宗族歸廆,廆待以客禮,引爲參軍,軍國之務

動輒訪之。泓指說成敗,事皆如言。應常曰:「黃參軍,孤之仲翔也。」

皝益奇之。 孤未敢信。 可憂 (也)不過二日,必當奔潰。 及 皝嗣位,遷左常侍,領史官,甚重之。 」泓曰:「殿下言盛者,人事耳,臣言必走者,天時也,胡足爲疑」及期,季龍果退, 宜嚴勒士馬,爲追擊之備。」、號曰:「今寇盛如此,卿言必走, 石季龍攻皝, 皝將走遼東, 泓曰: 「賊有敗氣,無

乃以泓 封平舒縣五等伯,常從左右,諮決大事。 及僭號,署爲進謀將軍、太史令、關內侯,尋加奉車都尉、西海太守、領太史令、開陽亭侯,又 及慕容儁卽王位,遷從事中郎。 爲 太史靈臺諸署統,加給事中。 **儋聞冉閔亂,將圖中原,訪之於泓。 泓勸行,儁從之。** 泓待敦 靈臺令許敦害其寵,諂事慕容評,設異議以毀之, 彌厚,不以毀己易心。

慕容暐 敗、以老 歸 家,數曰:「燕必中興,其在吳王,恨吾年過不見耳。」年九十七卒。卒

後三年,偽吳王慕容垂興焉。

索紞

術數占候。 「攻乎異端,戒在害已;無爲多事,多事多患。」遂詭言虛說,無驗乃止。 惟以占夢爲無悔吝, 索統 字叔徹,敦煌 司徒辟、除郎中、知中國將亂、避世而歸。鄉人從統占問吉凶、門中如市、統曰: 人也。少遊京師,受業太學,博綜經籍,遂爲通儒。明陰陽天文,善

乃不逆問者

泮而 曹而舉孝廉。 也。 火。 妻,迨冰未泮,婚姻事也。君在冰上與冰下人語,爲陽語陰,媒介事也。 昨夜夢舍中馬舞、數十人向馬拍手、此何祥也。」統曰:「馬者、火也、舞爲火起。向馬拍手、 也,當有京師貴人舉君。二官者,頻再遷。」俄而司徒王戎書屬太守使舉充,太守先署充功 肉字也。 生男。」終如其言。宋桷夢內中有一人著赤衣,楫手把兩杖,極打之。 | 統曰:「內中有人, 後三年必有大禍。」完果以謀反伏誅。索充初夢天上有二棺落充前。統曰:「棺者, 火,禍也。人上山,爲凶字。但見松柏,墓門象也。不知門處,爲無門也。三周,三朞 :婚成。」策曰:「老夫耄矣,不爲媒也。」會太守田豹因策爲子求鄉人張公徵女,仲春而 孝廉令狐策夢立冰上,與冰下人語。|統曰:「冰上爲陽,冰下爲陰,陰陽事也。 士如歸 郡主簿張宅夢走馬上山,還繞舍三周,但見松柏,不知門處。 肉色,赤也。 充後夢見一虜,脫上衣來詣充。 兩杖,箸象也。極打之,飽肉食也。」俄而亦驗焉。黃平問就曰:「我 統曰:「虜去上中,下半男字,夷狄陰類,君婦 **統**曰:[馬屬離 君當爲人作媒,冰 離 成 職

背也。當有凶背之問。」時綏父在東,居三日而凶問至。郡功曹張邈嘗奉使詣州,夜夢狼啖 救火人也。」平未歸而火作。索綏夢東有二角書詣綏,大角朽敗,小角有題韋囊角佩,一在 前,一在後。統曰:「大角朽敗,腐棺木。小角有題,題所詣。一在前,前凶也。一在後,後 脚。然曰:「脚肉被啖,爲卻字。」會東虜反,遂不行。凡所占莫不驗。

于家。 林之操,游學京師,交結時賢,希申鄙藝。會中國不靖,欲養志終年。老亦至矣,不求聞達。 似隱者,統因從父老問占夢之術,審測而說,實無書也。」澹命爲西閤祭酒,統辭曰:「少無山 又少不習勤,老無吏幹,濛汜之年,弗敢聞命。」澹以束帛禮之,月致羊酒。 年七十五,卒 太守陰澹從求占書,統曰:「昔入太學,因一父老爲主人,其人無所不知,又匿姓名,有

孟欽

融誅之。俄而欽至,融留之,遂大讌郡僚,酒酣,目左右收飲。欽化爲旋風,飛出第外。頃 不知所在。 之,有告在城東者,融遣騎追之,垂及,忽然已遠,或有兵衆距戰,或前有谿澗,騎不得過,遂 孟欽,洛陽人也。有左慈、劉根之術,百姓惑而赴之。一苻堅召詣長安,惡其惑衆,命苻 堅末,復見於靑州。 苻朗尋之,入于海島。

王嘉

不食五穀,不衣美麗,清虛服氣,不與世人交游。隱於東陽谷,鑿崖穴居,弟子受業者數百 王嘉字子年,隴西安陽人也。輕舉止,醜形貌,外若不足,而聰睿內明。滑稽好語笑,

人,亦皆穴處。

皆隨問而對。 於倒獸山。 石季龍之末,棄其徒衆,至長安,潛隱於終南山,結菴廬而止。門人聞而復隨之,乃遷 苻堅累徵不起,公侯已下咸躬往參詣,好尙之士無不師宗之。問其當世事者, 好爲譬喻,狀如戲調,言未然之事,辭如讖記,當時尟能曉之,事過皆驗

取之,衣架踰高,而屋亦不大,履杖諸物亦如之。 策馬馳反,脫衣服,棄冠履而歸,下馬踞牀,一無所言。使者還告,堅不悟,復遣問之,曰: 之者,至心則見之,不至心則隱形不見。衣服在架,履杖猶存,或欲取其衣者,終不及,企而 吾世祚云何。」嘉曰:「未央。」咸以爲吉。 堅將南征,遺使者問之。 嘉曰:「金剛火强。」乃乘使者馬,正衣冠,徐徐東行數百步,而 明年癸未,敗於淮南,所謂未年而有殃也。 人候

得殺苻登定天下不。」嘉曰:「略得之。」萇怒曰:「得當云得,何略之有」」遂斬之。先此,釋道 姚萇之入長安,禮嘉如苻堅故事,逼以自隨,每事諮之。 萇旣與苻登相持,問嘉曰:「吾

安謂嘉曰:「世故方殷,可以行矣。」嘉答曰:「卿其先行, 子略方殺登,「略得」之謂也。嘉之死日,人有隴上見之。 猶傳之。又著拾遺錄十卷,其記事多詭怪,今行於世。 而 嘉戮死,所謂「負債」者也。 苻登聞嘉死,設壇哭之,贈太師,諡曰文。及萇死,萇子興字 吾負債未果去。」 俄而道安亡,至是 其所造牽三歌讖,事過皆驗,累世

僧涉

鉢中,天輒大雨,堅及羣臣親就鉢觀之。卒於長安。後大旱移時,苻堅歎曰:「涉公若在,豈 憂此乎! 行五百里,言未然之事,驗若指掌。能以祕祝下神龍,每旱,堅常使之呪龍請雨。俄而龍下 僧涉者,西域人也,不知何姓。少爲沙門,苻堅時入長安。虛靜服氣,不食五穀, 日能

郭曆

凝使磨筮之,磨曰:「若郡內二月十五日失囚者,東軍當至,涼祚必終。」與乃申約屬 五日,鮮卑折掘送馬於凝,凝怒其非駿,幽之內廐,鮮卑懼而夜遁。 郭麐,西平人也。少明式易,公司仕郡主簿。張天錫末年,苻氏每有西伐之間,太守趙 凝以告磨, 磨日:「是 至

列

傅

也。 國家將亡,不可復振。」

|來朝主上,一當反國,一死此城。」歲餘而鄯善及前部王朝於苻堅,西歸, 苻堅末,當陽門震,刺史梁熙問摩曰:「其祥安在。」摩曰:「爲四夷之事也。 當有外國二 鄯善王死於

雖得 磨自伏鈇鉞之誅。 以 所難,況王者之師天下所聞,何可僥倖以邀成功!摩不可從,誤人大事。」摩曰:「若其不捷, 爲 此 必 呂光之王河西也,西海太守王楨叛, 麐勸光襲之。光之左丞呂寶曰:「千里襲人, 自昔 光將伐乞伏乾歸,磨諫曰:「今太白未出,不宜行師,往必無功,終當覆敗。」太史令賈曜 城 有 秦隴之地。 ,憂在不守。 如其克也,左丞爲無謀矣。」光從而克之。光比之原管,常參帷幄密謀。 及克金城,光使曜詰摩,摩密謂光曰:「昨有流星東墜,當有伏尸死將, 正月上旬,河冰將解,若不早渡,恐有大變。」後二日而敗問至,光引 光以磨爲散騎常侍、太常。

興以王尚爲涼州刺史,終如曆言。 事,事無不 之命盡在一時。」後統死三日而光死。 黁 後以光年老,知其將敗,遂與光僕射王祥起兵作亂。曰司百姓聞麘起兵,咸以聖人起 成,故相率從之如不 及。 摩之與光相持也,逃人稱呂統病死, 磨曰:「未也, 光、統 磨以爲代呂者王,乃推王乞基爲主。□□後呂隆降姚興, 摩嘗曰:「涼州謙光殿後當有索頭鮮卑居之。」終於禿

軍渡河

訖,冰泮。

時人服其神驗。

髮傉檀、沮渠蒙遜迭據姑臧。磨性褊酷,不爲士庶所附。 戰敗,奔乞伏乾歸。乾歸敗,入姚

興。摩以滅姚者晉,遂將妻子南奔,爲追兵所殺也。

鳩摩羅什

許,及見炎,心欲當之,王乃逼以妻焉。旣而羅什在胎,其母慧解倍常。及年七歲,母遂與 俱出家。 東渡蔥嶺。龜茲王聞其名,郊迎之,請爲國師。王有妹,年二十,才悟明敏,諸國交娉,並不 鳩摩羅什,天竺人也。世爲國相。父鳩摩羅炎,聰懿有大節,將嗣相位,乃辭避出家,

化、諸學者皆共師焉。年二十、龜茲王迎之還國、廣說諸經、四遠學徒莫之能抗。 若符契。爲性率達,不拘小檢,修行者頗共疑之。然羅什自得於心,未嘗介意,專以大乘爲 到沙勒,國王甚重之,遂停沙勒一年。博覽五明諸論及陰陽星算,莫不必盡,妙達吉凶,言 羅什從師受經,日誦千偈,偈有三十二字,凡三萬二千言,義亦自通。年十二,其母攜

爾之力。但於汝無利,其可如何。」什曰:「必使大化流傳,雖苦而無恨。」母至天竺,道成,進 有頃,羅什母辭龜茲王往天竺,留羅什住,謂之曰:「方等深教,不可思議,傳之東土,惟 西域諸國咸伏羅什神儁,每至講說,諸王皆長跪坐側,令羅什踐而登焉。

列

光密異之。 辭。

了乃飲以醇酒,同閉密室。

羅什被逼,

逐妻之。

光還,中路置軍於山下,將士已休,羅什 來,宜恭承之,勿抗其鋒。」純不從,出兵距戰,光遂破之,乃獲羅什。 光見其年齒尙少,以凡 曰:「在此必狼狽,宜徙軍隴上。」光不納。至夜,果大雨,洪潦暴起,水深數丈,死者數千人, 人戲之,强妻以龜茲王女,羅什距而不受,辭甚苦至。光曰:「道士之操不踰先父,何所固 「若獲羅什,即馳驛送之。」光軍未至,羅什謂龜茲王白純曰:「國運衰矣,當有勍敵從日下 曰:「朕聞西域有鳩摩羅什,將非此邪。」乃遣驍騎將軍呂光等率兵七萬,西伐龜茲,謂光曰: 苻堅聞之,密有迎羅什之意。會太史奏云:「有星見外國分野,當有大智入輔中國。」堅

勞自定也。」俄而有叛者,尋皆殄滅 州,聞苻堅已爲姚萇所害,於是竊號河右。屬姑臧大風,羅什曰:「不祥之風當有姦叛,然不 光欲留王西國,羅什謂光曰:「此凶亡之地,不宜淹留,中路自有福地可居。」光還至凉

勢必全克。光以訪羅什,答曰:「此行未見其利。」旣而篡敗於合黎,口思俄又郭磨起兵, 沮渠蒙遜先推建康太守段業爲主,光遣其子纂率衆討之。 時論謂業等烏合, 纂有威

툃棄大軍輕還,復爲摩所敗,僅以身免。

中書監張資病,光博營救療。 有外國道人羅叉,云能差資病。光喜,給賜甚重。羅什

之,燒爲灰末,投水中,灰若出水還成繩者,病不可愈。 須臾,灰聚浮出,復爲繩,叉療果無 知叉誑詐,告資曰:「叉不能爲益,徒煩費耳。 冥運雖隱,可以事試也。」乃以五色絲作繩結

效,少日資亡。

變。 日 以爲美瑞, 一、一、比 宜克己修德,以答天戒。」纂不納,後果爲呂超所 頃之,光死,纂立。 日潛龍出游,豕妖表異,龍者陰類,出入有時,而今屢見,則爲災眚,必有下人謀上之 號其殿爲龍翔殿。 有猪生子,一身三頭。龍出東箱井中,於殿前蟠臥,比旦失之。 俄而 有黑龍升於當陽 殺 九宮門,纂改九宮門爲 龍 興門。 羅什

皆其式也。」羅什雅好大乘,志在敷潢,常歎曰:「吾若著筆作大乘阿毗曇,非迦旃子比也。 論 破呂隆 今深識者旣寡,將何所論!惟爲姚興**著實相論二卷,**興奉之若 異,云:「天竺國俗甚重文制,其宮商體韵,以入管弦爲善。 不究其義旨,旣覽舊經多有紕繆,於是興使沙門僧叡、僧肇等八百餘人傳受其旨, 凡三百餘卷。 羅什之在涼州積年,呂光父子旣不弘道,故蘊其深解,無所宣化。 · 乃迎羅什,待以國師之禮,仍使入西明閤及逍遙園, 沙門慧叡才識高明,常隨羅什傳寫,羅什每爲慧叡論西方辭體 凡覲 譯出衆經。 國王,必有贊德,經 姚興遣姚碩德西伐 羅什 . 多所 暗誦, 中 更出 商略同 偈 頌, 經

嘗講經於草堂寺,興及朝臣、大德沙門千有餘人肅容觀聽,羅什忽下高坐,謂興曰:「有

列傳

第六

明超悟,天下莫二,何可使法種少嗣。」遂以伎女十人,逼令受之。爾後不住僧坊,別立 進針,與常食不別,諸僧愧服乃止。 舍,蓄僧多效之。什乃聚針盈鉢,引諸僧謂之曰:「若能見效食此者,乃可畜室耳。」因舉匕 |小兒登吾肩,慾鄣須婦人。」興乃召宮女進之,一交而生二子焉。 興嘗謂羅什曰:「大師聰 解

未及致· 遲 言。」死於長安。 有遇於來生耳。」羅什未終少日,覺四大不念,乃口出三番神咒,令外國弟子誦之以自救, 杯渡 力, 比丘在彭城、聞羅什在長安、乃歎曰:「吾與此子戲,別三百餘年,相見杳然未期, 轉覺危殆,於是力疾與衆僧告別曰:「因法相遇,殊未盡心,方復後世,惻愴可 姚興於逍遙園依外國法以火焚尸,薪滅形碎,惟舌不爛。

曇霍

其窮兵好殺,禍將及己。」傉檀不能從。 汙。 眼, 而 取之,咸奇其神異,莫能測也。每謂傉檀曰:「若能安坐無爲,則天下可定,祚胤克昌。 奉之可以得道。」時人咸異之。 行步如 沙門曇霍者,不知何許人也。 、風雲,言人死生貴賤無毫釐之差。 秃髮傉檀時從河南來,持一錫杖,令人跪曰:「此是般若 或遺以 衣服,受而投之於河, 人或藏其錫杖,曇霍大哭數聲,閉目 後日 以還其本主, 須 衣無所 (臾, 起 如

命邪 則死。」傉檀命開之,不及而死。後兵亂,不知所在也。 傉檀女病甚,請救療,曇霍曰:「人之生死自有定期,聖人亦不能轉禍爲福,曇霍安能 正可知早晚耳。」傉檀固請之。時後宮門閉,曇霍曰:「急開後門,及開門則生,不及 延

臺產

交當世。 星算、六日七分之學,尤善望氣、占候、推步之術。隱居商洛南山,兼善經學,汎情教授,不 臺產字國儁,上洛人,漢侍中崇之後也。少專京氏易,善圖讖、祕緯、天文、洛書、風角、

之禍,政化之闕,辭甚懇至。曜改容禮之,署爲博士祭酒、諫議大夫,領太史令。 章紫綬,爵關中侯。 堂,遣中黃門策問之,產極言其故。曜覽而嘉之,引見,訪以政事。產流涕歔欷,具陳災變 其言皆驗,曜彌重之,轉太中大夫,歲中三遷。歷位尙書、光祿大夫、太子少師,位特進, 劉曜時,災異特甚,命公卿各舉博識直言之士一人。其大司空劉均舉產。 至明年而 曜親臨東

史臣曰:陳戴等諸子並該洽墳典,研精數術,究推步之幽微,窮陰陽之祕奧,雖前代京 第 六 + 五 虁 二五〇三

或受教神方,遂能厭勝禳災,隱文彰義,雖獲譏於妖妄,頗有益於世用者焉。 教、諒見珍於道藝、非取貴於他山、姚石奉之若神、良有以也。 管,何以加之!郭麐知有晉之亡姚,去姚以歸晉,追兵奄及,致斃中塗,斯則遠見秋毫,不能 近知目睫。 人,未宜枉轡。 澄什爰自遐裔,來游諸夏。什旣兆見星象,澄乃驅役鬼神,並通幽洞冥,垂文闡 鮑、吳、王、<mark>幸等或假靈道訣,</mark> 然而碩學通

必致流弊。 贊曰:傳敍災祥,書稱龜筮。 應如影響,叶若符契。 怪力亂神,詭時惑世。 崇尙弗已?

校勘記

- 一〕錢唐湖 吳志孫晧傳、建康實錄四並作「臨平湖」。
- 三〕弟宏 校文"陳敏傳「宏」作「閎」。
- 〔1〕周宣珮 周玘傳「珮」作「佩」。
- (B) 永昌元年四月庚辰 是月甲辰朔,無庚辰。
- 〔五〕石勒騎大至 據成紀、通鑑九三「石勒」當作「石聰」●
- ハベン 其日西風 朱本、殿本「西風」作「西南」,局本作「西風」,蓋據通志一八二改,今從之

- 作箸一雙 料注:太平廣記八一引豫章記「箸」作「楫」,曉讀書齋雜錄疑是「篙」之訛
- ハガリ 乃取酒噀之「乃」,各本作「仍」,宋本作「乃」,與專類賦八引合,今從之。
- 酉戎受玄命 「酉戎」,高僧傳作「西戎」,神僧傳作「酉戍」。
- 莫能基必莫能基必穨 高僧傳、神僧傳皆不重「莫能基必」四字,疑此四字駁文。
- 少明式易 「式易」,不明其義。殿本作「老易」,通篇未涉及老子。 御覽一九全句引作「少明於

易,或然。

- 二言 王祥 周校"呂光載記作「王詳」。按"通鑑一〇八亦作「王詳」。
- 王乞基 周校 呂光載記作「王氣乞機」。按:通鑑一○九作「田胡王乞基」,胡注云:田胡,胡之

一種也。

(三) 合黎 呂光載記作「合離」。

晉書卷九十六

列傳第六十六

列女

操可稱,一藝可紀,咸皆撰錄,爲之傳云。或位極后妃,或專因夫子,各隨本傳,今所不錄。 華,挺峻節而孤標,周篇於焉騰茂。 在諸爲國,暫阻王猷,天下之善,足以懲勸,亦同搜次,附於篇末。 擅 樊授規而霸楚,譏文伯於奉劍。讓子發於分菽,少君之從約禮,孟光之符隱志,旣昭婦則,且 懿淑,魏代揚芬,斯皆禮極中闈,義殊月室者矣。至若恭姜誓節,孟母求仁,華率傅而經濟, <u>娲</u>汭,夏盛塗山,有娀、有藪廣隆殷之業,大姙、大姒衍昌姬之化,馬鄧恭儉,漢朝推德,宣昭 母儀。 夫三才分位, 室家之道克隆, 二族交歡, 貞烈之風斯著。 子政緝之於前,元凱編之於後,具宣閨範,有裨陰訓。故上從泰始,下迄恭安,一 徽烈棄劭,柔順無愆,隔代相望,諒非一緒。 振高情而獨秀, 魯册於是飛 然則虞興

列傳

第

六 十

· 六

列女

羊耽妻辛氏

代君不可以不戚,主國不可以不懼,宜戚而喜,何以能久!魏其不昌乎。」 子,抱毗項謂之曰:「辛君知我喜不。」毗以告憲英,憲英歎曰:「太子,代君主宗廟社稷者也。 羊耽妻辛氏,字憲英,隴西人,魏侍中毗之女也。聰朗有才鑒。初,魏文帝得立爲太

從衆而已。」敞遂出。宣帝果誅爽。事定後,敞歎曰:「吾不謀於姊,幾不獲於義」」 也。凡人在難,猶或恤之,爲人執鞭而棄其事,不祥也。且爲人任,爲人死,親昵之職也,汝 不直,此舉不過以誅爽耳。」敞曰:「然則敞無出乎。」憲英曰:「安可以不出!職守,人之大義 後事,此言猶在朝士之耳。且曹爽與太傅俱受寄託之任,而獨專權勢,於王室不忠,於人道 爾乎。」憲英曰:「事有不可知,然以吾度之,太傅殆不得不爾。明皇帝臨崩,把太傅臂,屬以 關赴爽,呼敞同去。敞懼,問憲英曰:「天子在外,太傅閉城門,人云將不利國家,於事可得 弟敞爲大將軍曹爽參軍,宣帝將誅爽,因其從魏帝出而閉城門,爽司馬魯芝率府兵斬

英憂曰:「他日吾爲國憂,今日難至吾家矣。」]琇固請於|文帝,帝不聽。憲英謂琇曰:「行矣,戒 憲英曰:「會在事縱恣,非持久處下之道,吾畏其有他志也。」及會將行,請其子琇爲參軍,憲 其後鍾會爲鎭西將軍,憲英謂耽從子祜曰:「鍾士季何故西出。」 祜曰:「將爲滅蜀也。」

其華,反而覆之,其明鑒儉約如此。 而已。 之!古之君子入則致孝於親,出則致節於國,在職思其所司,在義思其所立,不遺父母憂患 軍旅之間可以濟者,其惟仁恕乎」。會至蜀果反,琇竟以全歸。。祜嘗送錦被,憲英嫌 泰始五年卒,年七十九。

杜有道妻嚴氏

求爲繼室,憲便許之。時玄與何晏、鄧颺不穆,晏等每欲害之,時人莫肯共婚。及憲許玄, 親! 植、女韡並孤藐,憲雖少,誓不改節,撫育二子,敎以禮度,植遂顯名於時,韡亦有淑德,傅玄 行自有在。」遂與玄爲婚。晏等尋亦爲宣帝所誅。植後爲南安太守。 內外以爲憂懼。或曰:「何、鄧執權,必爲玄害,亦由排山壓卵,以湯沃雪耳,柰何與之爲 |憲曰::「爾知其一,不知其他。晏等驕侈,必當自敗,司馬太傅獸睡耳, 杜有道妻嚴氏,字憲,京兆人也。貞淑有識量。年十三,適於杜氏,十八而嫠居。子 吾恐卵破雪銷,

咸曰:「汝千里駒也,必當遠至。」以其妹之女妻之。 咸後亦有名於海內。 矣,能忍之,公是卿坐。」「三預後果爲儀同三司。」玄前妻子咸年六歲,嘗隨其繼母省憲,謂 植從兄預爲秦州刺史,被誣,徵還,憲與預書戒之曰:「諺云忍辱至三公。 其知人之鑒如此。 卿今可謂辱

年六十六卒。 六十六

列

傳第

列 女

王渾妻鍾氏

慧弘雅,博覽記籍。美容止,善嘯詠,禮儀法度爲中表所則。旣適渾,生濟。渾嘗共琰坐, 琰,琰曰:「要令我見之。」濟令此兵與羣小雜處,琰自幃中察之,旣而謂濟曰:「緋衣者非汝 其人數年果亡。琰明鑒遠識,皆此類也。 所拔乎?」濟曰:「是。」琰曰:「此人才足拔萃,然地寒壽促,不足展其器用,不可與婚。」遂止。 如此。」參軍,謂渾中弟淪也。琰女亦有才淑,爲求賢夫。時有兵家子甚俊,濟欲妻之,白 王渾妻鍾氏,字琰,潁川人,魏太傅爲曾孫也。父徽,黃門郎。琰數歲能屬文,及長,聰

人稱鍾夫人之禮,郝夫人之法云。 渾弟湛妻郝氏亦有德行,琰雖貴門,與郝雅相親重,郝不以賤下琰,琰不以貴陵郝, 時

鄭袤妻曹氏

勤,以充奉養,至於叔妹羣娣之間,盡其禮節,咸得歡心。及家爲司空,其子默等又顯朝列, 鄭袤妻曹氏,魯國薛人也。 袤先娶孫氏,早亡,娉之爲繼室。事舅姑甚孝,躬紡績之

時人稱其榮貴。 曹氏深懼盛滿,每默等升進,輒憂之形於聲色。 然食無重味,服浣濯之衣,

袤等所獲祿秩,曹氏必班散親姻,務令周給,家無餘貲。

聞者莫不歎息,以爲趙姬之下叔隗,不足稱也。 葬,何可使孤 初,孫氏瘞於黎陽,及袤薨,議者以久喪難舉,欲不合葬。 魂 無所依邪。」「三於是備吉凶導從之儀以迎之,具衣衾几筵,親執雁行之禮, 太康元年卒,年八十三。 曹氏曰:「孫氏元妃,理當從

愍懷太子妃王氏

距屬曰:「吾太尉公女,皇太子妃,義不爲逆胡所辱。」屬遂害之。 惠風號哭而 <u>愍懷太子妃王氏,太尉衍女也,字惠風。貞婉有志節。太子旣廢居於金墉,衍請絕婚,</u> 歸,行路爲之流涕。 及劉曜陷洛陽,以惠風賜其將喬屬, 屬將妻之。 惠風拔劍

鄭休妻石氏

遂養沈及前妻女。 休前妻女旣幼,又休父布臨終,有庶子沈生,命棄之, <三石氏曰:「柰何使舅之胤不存 鄭休妻石氏,不知何許人也。 力不無舉,九年之中,三不舉子。 少有德操, 年十餘歲, 鄉邑稱之。 既歸鄭氏, 為九族所

列傳

第

六 十

六

列

女

陶侃母湛氏

子」侃竟以功名顯。 爲吏,以官物遺我,非惟不能益吾,乃以增吾憂矣。」鄱陽孝廉范達寓宿於侃,時大雪,湛氏 之,使交結勝己。侃少爲尋陽縣吏,嘗監魚梁,以一坩鮓遺母。 湛氏封鮓及書,責侃曰:「一 乃徹所臥新薦,自剉給其馬,又密截髮賣與鄰人,供肴饌。 逵聞之,歎息曰:「非此母不生此 陶侃母湛氏,豫章新淦人也。初,侃父丹娉爲妾,生侃,而陶氏貧賤,湛氏每紡績資給

爾

賈渾妻宗氏

仰天大哭。 晞欲納之。 賈渾妻宗氏,不知何許人也。 晞遂害之, 時年二十餘。 宗氏罵曰:「屠各奴!豈有害人之夫而欲加無禮,於爾安乎。何不促殺我」因 渾爲介休令,被劉元海將喬晞攻破,死之。宗氏有姿色,

梁緯妻辛氏

梁緯妻辛氏,隴西狄道人也。 緯爲散騎常侍,西都陷沒,爲劉曜所害。 辛氏有殊色,曜

婦人再辱,明公亦安用哉!乞卽就死,下事舅姑。」遂號哭不止。 將妻之。 辛氏據地大哭,仰謂曜曰:「妾聞男以義烈,女不再醮。 曜曰:「貞婦也,任之。」乃 妾夫已死, 理無獨全。 且

自縊而死。曜以禮葬之。

許延妻杜氏

遂害之。 哭守夫尸,罵驤曰:「汝輩逆賊無道,死有先後,寧當久活!我杜家女,豈爲賊妻也」賺怒, 許延妻杜氏,不知何許人也。延爲益州別駕,爲李驤所害。驤欲納杜氏爲妻,杜氏號

虞潭母孫氏

亡,遺孤藐爾,孫氏雖少,誓不改節,躬自撫養,劬勞備至。 性聰敏,識鑒過人。 潭始自幼 虞潭母孫氏,吳郡富春人,孫權族孫女也。 初適潭父忠,恭順貞和,甚有婦德。及忠

童,便訓以忠義,故得聲望允洽,爲朝廷所稱。

永嘉末,潭爲南康太守,值杜弢構逆,率衆討之。 孫氏勉潭以必死之義,俱傾其資產以

飽戦 士,潭遂克捷。 及蘇峻作亂,潭時守吳興,又假節征峻。孫氏戒之曰:「吾聞忠臣出言子

列

傳

第六十六

列女

五二

之門,汝當捨生取義,勿以吾老爲累也。」仍盡發其家僮,四一令隨潭助戰,貿其所服景風以 潭立養堂於家,王導以下皆就拜謁。咸和末卒,年九十五。咸帝遣使弔祭,諡曰定夫人。 不『潭卽以子楚爲督護,與允之合勢。其憂國之誠如此。拜武昌侯太夫人,加金章紫綬。 爲軍資。 於時會稽內史王舒遣子允之爲督護,孫氏又謂潭曰:「王府君遣兒征,汝何 獨

周顗母李氏

之曰:「我屈節爲汝家作妾,門戶計耳。汝不與我家爲親親者,吾亦何惜餘年」」顕等從命, 絡秀之家。會其父兄不在,絡秀聞沒至,與一婢於內宰猪羊,具數十人之饌,甚精辦而 由 人聲。沒怪使覘之,獨見一女子甚美,沒因求爲妾。 其父兄不許,絡秀曰:「門戶殄瘁,何惜 一女!若連姻貴族,將來庶有大益矣。」父兄許之。遂生顗及嵩、謨。而顗等旣長,絡秀謂 此李氏遂得爲方雅之族。 周 題母李氏,字絡秀,汝南人也。少時在室,題父沒爲安東將軍,時嘗出獵,遇雨,過止 不聞

乘人之弊,此非自全之道。嵩性抗直,亦不容於世。唯阿奴碌碌,當在阿母目下耳。」阿奴, 爾等並貴,列吾目前,吾復何憂」、嵩起曰:「恐不如尊旨。怕仁志大而才短,名重 中興時,顗等並列顯位。嘗冬至置酒,絡秀舉觴賜三子曰:「吾本渡江,託足無所,不謂 而 識闇,好

謨小字也。後果如其言。

張茂妻陸氏

討克。克敗,陸詣闕上書,爲茂謝不克之責。詔曰:「茂夫妻忠誠,舉門義烈,宜追贈茂太僕。 張茂妻陸氏,吳郡人也。茂爲吳郡太守,被沈充所害,陸氏傾家產,率茂部曲爲先登以

尹虞二女

尹虞二女,長沙人也。 虞前任始興太守,起兵討杜弢,戰敗,二女爲弢所獲,並有國色,

弢將妻之。女曰:「我父二千石、終不能為賊婦、有死而已」]弢並害之。

荀崧小女灌

弟,訪卽遣子撫率三千人會石覽俱救崧。 士,且戰且前, 荀崧小女灌,幼有奇節。 計無從出。 得入魯陽山獲免。 灌時年十三, 乃率勇士數十人, 踰城突圍夜出。 崧爲襄城太守,爲杜曾所圍,力弱食盡,欲求救於故吏平南將 自詣覽乞師,又爲崧書與南中郎將 賊聞兵至,散走,灌之力也。 賊追甚急,灌督厲將 周訪請援,仍結爲兄

列傳第六十六 列女

王凝之妻謝氏

集,俄 道韞稱:「吉甫作頌,穆如淸風。仲山甫永懷,以慰其心。」 王疑之妻謝氏,字道韞,安西將軍奕之女也。 而雪驟下,安曰:「何所似也?」安兄子郞曰:「散鹽空中差可擬。」 道韞曰:「未若柳絮因 聰識有才辯。 安謂有雅人深致。 叔父安嘗問:「毛詩 叉嘗 何 句最 內

朗, 步鄣自蔽、申獻之前議、客不能屈。 邪。」疑之弟獻之嘗與賓客談議,詞理將屈,道韞遣婢白獻之曰:「欲爲小郎解圍。」乃施青綾 風起。」安大悅。 有阿大、中郎,羣從兄弟復有封、胡、羯、末,不意天壤之中乃有王郎」封謂謝韶,至胡謂 羯謂謝玄,末謂謝川,皆其小字也。 初適凝之,還,甚不樂。 安曰:「王郎, 逸少子, 不惡, 汝何恨也。」答曰:「一門叔父則 又嘗譏玄學植不進,曰:「爲塵務經心,爲天分有限

謝

肅。 至,手殺數人,乃被虜。 必其 太守劉柳聞其名,請與談議。 及遭孫恩之難, 如 此,寧先見殺。」恩雖毒虐,爲之改容,乃不害濤。 舉厝自若,旣聞夫及諸子已爲賊所害,方命婢肩輿抽刃出門,亂兵稍 其外孫劉濤時年數歲,賊 道韞素知柳名,亦不自阻,乃簪髻素褥坐於帳中,柳束脩 叉欲 害之,道韞 自爾嫠居會稽,家中莫不嚴 日:「事在 三王門, 何關他

退而 整帶造於別榻。 歎曰:「實頃所未見、瞻察言氣,使人心形俱服。」<u>道</u>韞亦云:「親從凋亡,始遇此士,聽其 道轀風韵高邁,敍致淸雅,先及家事,慷慨流漣,徐酬問旨,詞理 一無滯。 柳

所問,殊開

人胸府。」

所著詩賦誄頌並傳於世。 之,濟尼答曰:「王夫人神情散朗,故有林下風氣。 初,同 郡張玄妹亦有才質,適於顧氏,玄每稱之,以敵道韞。 顧家婦淸心玉映,自是閨房之秀。」道 有濟尼者,游於二家,或問

劉臻妻陳氏

儀,行於世 陽散輝,澄景載煥。 劉 |臻妻陳氏者,亦聰辯能屬文。 標美靈葩, 爱採爱獻。 嘗正 旦獻椒花頌, 聖容映之, 永壽於萬。」又撰元日及冬至進見之 其詞曰:「旋穹周迴,三朝肇建。 靑

皮京妻龍氏

無胤嗣,又無朞功之親。 皮京妻龍氏,字憐, 西道 憐貨其嫁時資裝,躬自紡織,數年間三喪俱舉, 縣人也。 年十三適原,未逾年而原卒, 京二弟亦相 葬斂旣 畢 次 而 毎時享 隕, 旣

祭無闕。 州里聞其賢,屢有娉者,憐誓不改醮,守節窮居五十餘載而卒。

孟昶妻周氏

中,潛自剔縣,以絳與昶,遂得數十人被服赫然,悉周氏所出,云而家人不之知也。 以除之,且不宜赤色,我當悉取作七日藏厭。」」與妻信之,所有絳色者悉斂以付焉。 貴,相迎不晚也。」周氏曰:「君父母在堂,欲建非常之謀,豈婦人所諫!事之不成,當於奚官 資產以給之,而託以他用。及事之將舉,周氏謂顗妻云:「一昨夢殊不好,門內宜浣濯沐浴 不過欲得財物耳。」時其所生女在抱,推而示之曰:「此而可賣,亦當不惜,况資財乎」。遂傾 中奉養大家,義無歸志也。」昶愴然久之而起。周氏追昶坐,云:「觀君舉厝,非謀及婦人者, 大事,乃謂之曰:「劉邁毀我於桓公,便是一生淪陷,決當作賊。卿幸可早爾離絕,脫得富 知,深自惋失。 孟昶妻周氏,昶弟顗妻又其從妹也。二家並豐財產。 及劉裕將建義,與昶定謀,昶欲盡散財物以供軍糧,其妻非常婦人,可語以 初,桓玄雅重昶而劉邁毀之,昶 乃置帳

何無忌母劉氏

何無忌母劉氏,征虜將軍建之女也。少有志節。弟牢之爲桓玄所害,劉氏每銜之,常

孤其誠,常恐壽促,汝能如 文,劉氏 思報復。 潛以器覆燭,徐登橙於屛風上窺之,旣知,泣而撫之曰:「我不如東海呂母明矣!旣 及無忌與劉裕定謀,而劉氏察其舉厝有異,喜而不言。會無忌夜於屏風裏制檄 ,此,吾讐恥雪矣。」因問其同謀,知事在俗,彌喜,乃說桓玄必敗、

劉聰妻劉氏

義師必成之理以勸勉之。

後果如其言。

廷尉之禍由妾而招,人怨國疲,咎歸於妾,距諫害忠,亦妾之由。 之禍,宜賞廷尉以美爵,酬廷尉以列土,如何不惟不納,而反欲誅之。陛下此怒由妾而起, **!鷦儀非急。四海未一,禍難猶繁,動須人力資財,尤宜愼之。廷尉之言,國家大政。** 聰大怒,將斬之。 娥時在後堂,私敕左右停刑,手疏啓曰:「伏聞將爲妾營殿,今昭德足居, 之,娥敦習彌厲。 婦人者也。 之諫,豈爲身哉。帝王距之,亦非顧身也。妾仰謂陛下上尋明君納諫之昌,下忿誾主距諫 聰旣僭位,召爲右貴嬪,甚寵之。俄拜爲后,將起鷦儀殿以居之,其廷尉陳元達切諫, 聰妻劉氏,名娥,字麗華,僞太保殷女也。幼而聰慧,晝營女工,夜誦書籍,傅母恒止 妾每覽古事, 忿之忘食, 何意今日妾自爲之!後人之觀妾, 亦猶妾之視前人也, 每與諸兄論經義,理趣超遠,諸兄深以歎伏。性孝友,善風儀進止。 自古敗國喪家,未始不由 夫忠臣

復何面目仰侍巾櫛,請歸死此堂,以塞陛下誤惑之過。」聰覽之色變,謂其羣下曰:「朕比得 風疾,喜怒過常。 元達,忠臣也,朕甚愧之。」以娥表示元達曰:「外輔如公,內輔如此后,朕

尋卒,僞追諡武德皇后。 其姊英,字麗芳,亦聰敏涉學,而文詞機辯,曉達政事,過於娥。 初與娥同召拜左貴嬪,

無憂矣。」及娥死,偽諡武宣皇后。

王廣女

不得梟汝首於通逵,以塞大恥。」辭氣猛厲,言終乃自殺,芳止之不可。 無狀,害人父母,而復以無禮陵人,吾所以不死者,欲誅汝耳!今死自吾分,不待汝殺,但恨 故反邪。]|王罵曰:「蠻畜!我欲誅反賊,何謂反乎。吾聞父仇不同天,母仇不同地,汝反逆 蠻帥梅芳攻陷揚州,而廣被殺。 王廣女者,不知何許人也。 王時年十五,芳納之。 容質甚美,慷慨有丈夫之節。 俄於闇室擊芳,不中,芳驚起日…「何 廣仕劉聰,爲西揚州刺史。

陝婦人

陝婦人,不知姓字,年十九。 劉曜時嫠居陝縣,事叔姑甚謹,其家欲嫁之,此婦毁面自

時有羣鳥悲鳴尸上,其聲甚哀,盛夏暴尸十日,不腐,亦不爲蟲獸所敗, 後叔姑病死,其叔姑有女在夫家,先從此婦乞假不得,因而誣殺其母,有司不能察而誅 曜遣呼延謨爲太守,旣知其冤,乃斬此女,設少牢以祭其墓,諡曰孝烈貞婦,其日大雨。 其境乃經歲不

靳康女

請死,曜哀之,免康 下旣滅其 靳康 女者,不知何許人也。 父母兄弟,復 子。 何 用妾爲 美姿容,有志操。 1 妾聞逆人之誅也,尚汚宮伐樹,而況其子女乎」因號泣 劉曜之誅斯氏,將納斯女爲妾,斯曰:「

陛

韋逞母宋氏

<u></u>
周官音義,謂之曰:「吾家世學周官,傳業相繼,此又周公所制 吾今無男可傳,汝可受之,勿令絕世。」屬天下喪亂,宋氏 韋逞 母宋氏,不知何郡人也,家世以儒學稱。 宋氏幼喪母,其父躬自養之。 諷誦不輟 ,經紀典誥,百官品物,備於此 及長,授以

富人程安壽,壽養護之。 後 爲石季龍徙之於山東,宋氏與夫在徙中,推鹿車,背負父所授書,到冀州 逞時年小,宋氏畫則樵採,夜則教逞,然紡績 無廢。 壽毎歎日 ,依膠東

列

非此母. 有其師。 憫禮樂遺闕。 氏爲宣文君,賜侍婢十人。獨官學復行於世,時稱韋氏宋母焉。〔七〕 家多士大夫, 無可以傳授後生。」於是就宋氏家立講堂,置生員百二十人,隔絳紗幔而受業,號宋 竊見太常韋逞母朱氏世學家女,傳其父業,得周官音義,今年八十,視聽無闕,自 得無是乎」逞遂學成名立,仕苻堅爲太常。 時博士盧壼對曰:「廢學旣久,書傳零落,比年綴撰,正經粗集,唯周官禮注未 堅嘗幸其太學,問博士經典,乃

張天錫妾閻氏薛氏

何 及其疾篤,二姬皆自刎。 以報我? 張天錫妾閻氏、薛氏,並不知何許人也,咸有寵於天錫。 吾死後,豈可爲人妻乎!皆曰:「尊若不諱,妾請效死,供灑掃地下,誓無他志。 天錫疾瘳,追悼之,以夫人禮葬焉。 天錫寢疾,謂之曰:「汝二人將

苻堅妾張氏

龍門,決洪河,因水之勢也,后稷之播殖百穀,因地之氣也,湯武之滅夏商,因人之欲也。 「妾聞天地之生萬物,聖王之馭天下,莫不順其性而暢之,故黃帝服牛乘馬,因其性也,禹鑿 苻堅妾張氏,不知何許人,明辯 有才識。 堅將入寇江左,羣臣切諫不從。 張氏進日: 是

所知。 壓果大敗於壽春,張氏乃自殺。 誠非微妾所論,願陛下詳而思之。」 堅曰:「軍旅之事非婦人所豫也。」 遂興 兵。 軍敗不歸。』秋冬已來,每夜羣犬大嘷,衆雞夜鳴,伏聞廏馬驁逸,武庫兵器有聲,吉凶之理, 天猶若此,況於人主乎!妾聞人君有伐國之志者,必上觀乾象,下採衆祥。 以 有因成,無因敗。今朝臣上下皆言不可,陛下復何所因也。 以人事言之,未見其可。諺言:『雞夜鳴者不利行師,犬羣嘷者宮室必空,兵動馬驚, 書曰:『天聰明自我民聰明。』 天道崇遠,非妾 張氏請從。

竇滔妻蘇氏

蘇氏思之,織錦爲迴文旋圖詩以贈滔。宛轉循環以讀之,詞甚悽惋,凡八百四十字,文多 竇滔妻蘇氏,始平人也,名蕙,字若蘭。 善屬文。滔, 苻堅時爲秦州刺史,被徙流沙,

苻登妻毛氏

率壯士數百人,與萇交戰,殺傷甚衆。衆寡不敵,爲萇所執。 萇欲納之,毛氏罵曰:「吾天子 **苻登妻毛氏,不知何許人,壯勇善騎射。登爲姚萇所襲,營壘旣陷,毛氏猶彎弓跨馬,**

列

后,豈為賊|羌所辱,何不速殺我!]因仰天大哭曰:「姚萇無道,前害天子,今辱皇后,皇天后

慕容垂妻段氏

土,寧不鑒照」「萇怒,殺之。

爲皇后 繼室,遂有殊寵。 「我終不作凡人妻。」季妃亦曰:「妹亦不爲庸夫婦。」鄰人聞而笑之。 |垂之稱|燕王,納元妃爲 慕容垂妻段氏,字元妃,爲右光祿大夫儀之女也。少而婉慧,有志操,常謂妹季妃曰: 偽

范陽王

德亦娉季妃焉。姊妹俱爲

無、德之妻,卒如其志。

垂旣僭位,拜

難則 哉!主上百年之後,太子必亡社稷。范陽王有非常器度,若燕祚未終,其在王乎」 獻公乎。」元妃泣而退,告季妃曰:「太子不令,羣下所知,而主上比吾爲驪戎之女,何其苦 擇一以樹之。 事,宜深圖之。」 垂不納。 寶及麟聞之,深以爲恨。 其後元妃又言之, 垂曰:「汝欲使我爲晉 非濟世之雄,陛下託之以大業,妾未見克昌之美。遼西、高陽二王,陛下兒之賢者,宜 |垂立其子||寶爲太子也,元妃謂||垂曰:「太子姿質雍容,柔而不斷,承平則爲仁明之主,處 趙王麟姦詐負氣,常有輕太子之心,陛下一旦不諱,必有難作。 此陛下之家

|垂死,|寶嗣僞位,遣麟逼||元妃曰:「后常謂主上不能嗣守大統,今竟何如?宜早自裁,以

良久。

朝曰:「公「子無廢母之義,漢之安思閻后親廢順帝,猶配饗安皇,先后言虛實尙未可知,宜 全段氏。」元妃怒曰:「汝兄弟尙逼殺母,安能保守社稷!吾豈惜死,念國滅不 久 耳。」遂自 寶議以元妃謀廢嫡統,無母后之道,不宜成喪,羣下咸以爲然。 偽中 書 令 眭 邃 大 言 於

依閻后故事。」實從之。其後麟果作亂,實亦被殺,德復僭稱尊號,終如元妃之言。

段豐妻慕容氏

夕 死。 聞忠臣不事二君,貞女不更二夫。段氏旣遭無辜,己不能同死,豈復有心於重行哉! 熾覩之甚喜。 上不顧禮義嫁我,若不從,則違嚴君之命矣。」於是剋日交禮。 四,適於豐。 ,密書其**帮帶云:「死後當埋我於段氏墓側,** 及葬,男女觀者數萬人,莫不歎息曰:「貞哉公主」」路經餘熾宅前,熾聞挽歌之聲,慟絕 段豐妻慕容氏,德之女也。 豐爲人所譖,被殺,慕容氏寡歸,將改適爲壽光公餘熾。 經再宿,慕容氏僞辭以疾,熾亦不之逼。 有才慧,善書史,能鼓琴。德旣僭位,署爲平原公主。 若魂魄有知, 三日還第,沐浴置酒,言笑自若,至 當歸彼矣。」遂於浴 慕容氏姿容婉麗,服飾光華, 慕容氏謂侍婢曰:「我 室 自 縊 而

呂纂妻楊氏 呂紹妻張氏

西。 之,謂其父桓曰:「后若自殺,禍及卿宗。」桓以告楊氏,楊氏曰:「大人本賣女與氐以圖富貴, 我旦夕死人,何用金寶!」超慚而退。 一之已甚,其可再乎!乃自殺。 將出宮,超慮齎珍物出外,使人搜之。楊氏厲聲責超曰:「爾兄弟不能和睦,手刃相屠, 呂纂妻楊氏,弘農人也。美艷有義烈。纂被呂超所殺,楊氏與侍婢十數人殯纂於城 又問楊氏玉璽所在,楊氏怒曰:「盡毀之矣。」超將妻

「欽樂至道,誓不受辱。」遂昇樓自投於地,二脛俱折,口誦佛經,俄然而死。 時呂紹妻張氏亦有操行,年十四,紹死,便請爲尼。 呂隆見而悅之,欲穢其行,張氏曰:

涼武昭王李玄盛后尹氏

·卒,爲玄盛繼室。以再醮之故,三年不言。 凉武昭王李玄盛后尹氏,天水冀人也。 撫前妻子踰於己生。玄盛之創業也,謨謀經略 幼好學,清辯有志節。 初適扶風馬元正,元正

多所毗贊,故西州諺曰:「李、尹王敦煌。」

及玄盛薨,子士業嗣位,尊爲太后。士業將攻沮渠蒙遜,尹氏謂士業曰:「汝新造之國,

追? 之事 泉。 其 地 勉 誡 吾,后能 矣。」蒙遜嘉之, 師 人手,柰何倨傲 、數年 `修德政,蓄力以觀之。彼若淫暴,人將歸汝,汝苟德之不建,事之無日矣。 鬼 敗,國亦將亡。」士業不從,果爲蒙遜所滅 狹 也。 也。」 ,起兒女之悲 旣而 汝可斬吾首歸,終不迴矣。」使者不敢逼而還。 尹氏至姑 人稀,靖以守之猶懼其失,云何輕舉,闚冀非望! Ė 且 去不ご 女卒, 先王臨薨,遺令殷勤,志令汝曹深愼兵戰,俟時而動。 來 俄 有幷兼之志,且天時人事似欲歸之。 而 夫繁霜降節,彰勁心於後凋, 横流在辰, 表貞期於上德, 臧 潛奔 |尹氏未測其言,答曰:「子孫流漂,託 ! 撫之不 不誅, ,蒙遜引見勞之, 且. ! 伊吾,無諱遣騎追及之。 吾 國 爲子 一婦 敗子孫屠滅,何獨 哭, 日:「汝死 茂虔娉其 人,不能死亡, 對曰:「李氏爲胡所滅,知復何言」」或諫之曰:「母子命懸 晚矣」沮 女爲妻。 7無悲? **豈憚斧鉞之禍,求爲** 尹氏 及魏氏 渠無諱 尹氏 今國 謂使者曰:「沮渠酒泉許 年七十五,卒於伊吾 身醜虜,老年餘命 曰:「興滅死生,理之大分,何爲 時鎭 蒙遜驍武, 雖 以武威公主妻茂虔,尹氏及女遷 小,足以爲 酒泉,毎謂尹氏 言猶在耳,柰何忘之! 臣妾乎! 若殺 善用兵, 政。 當 匪伊 知 死於此,不 汝非其敵。 曰:「后 汝此行也,非唯 君子,抑亦婦人 足不辱, 我 歸 我者,吾之願 北 諸 道家 能 何 孫 同

不如

明

吾 觀

列 傳 第 六 + 六 列 女 二五二七

故

作

在

伊

居酒

凡

揚千載矣。 纂之妃,捐生匪吝,宗辛抗情而致夭,王靳守節而就終,斯皆冥踐義途,匪因教至。 之喬葉,有裕徽音,振幽谷之貞蕤,無慚雅引,比夫懸梁靡顧,齒劍如歸,異日齊風,可以激 惠風之數喬屬,道韞之對孫恩,荀女釋急於重圍,張妻報怨於强寇,僭登之后,蹈死不迴,爲 見爭新之飾,一朝辭漢,曾微戀舊之情。 自晉政陵夷、罕樹風檢、虧閑爽操、相趨成俗、荐之以劉石、汨之以苻姚。 馳騖風埃,脫落名敎,頹縱忘反,於茲爲極。 三月歌胡,唯 聳淸漢 至若

清芬靡忒。 贊曰:從容陰禮,婉娩柔則。 載循六行,爱昭四德。 操潔風霜,譽流邦國。 形管貽訓,

校勘記

- 〔1〕公是卿坐 御覽五一三引「公」上有「三」字。
- 何可使孤 魂無所依邪 「何」,各本作「不」。 通志一八五作「豈」,吳本作「何」,今從吳本。
- 有庶子沈 生命棄之 御覽五一七引「生」作「休」、「休」連下爲句。
- 「P」仍盡發其家僮 | 斠注:錢塘先賢傳贊引「仍」作「**乃**」。
- 五 謝韶 各本作「謝歆」,今從謝萬傳改。 世說賢媛、人名譜均作「韶」。

[47 時稱韋氏宋母焉

周校"當作「韋母宋氏」。

【八】 眭邃

「眭」,各本均作「畦」,今據魏書、北史隱逸傳、慕容廆傳及通鑑一〇八改。

晉書卷九十七

列傳第六十七

四夷

矣。 時遵聲教,鍾無妄則爭肆虔劉,趨扇風塵,蓋其常性也。 物;訊淡昊於前辟,爱制地而疏疆。襲冠帶以辨諸華,限要荒以殊遐裔,區分中外,其來尙 九夷八狄,被青野而亙玄方,七戎六蠻,縣西宇而橫南極。繁種落,異君長,遇有道則 夫恢恢乾德, 萬類之所資始, 蕩蕩坤儀, 九區之所均載。 考國軒於往統, 肇承天而理 詳求遐議,歷選深謨,莫不待以羈

歲時 化所覃,江外而已,賝貢之禮,於茲殆絕,殊風異俗,所未能詳。故採其可知者,爲之傳云。 無怠,凡四夷入貢者,有二十三國。 武帝受終衰魏,廓境全吳,威略旣申,招攜斯廣,迷亂華之議,矜來遠之名,撫舊懷新, 旣而惠皇失德,中宗遷播,凶徒分據,天邑傾淪,朝

縻,防其猾夏

列

傳

北狄竊號中壤,備於載記,在其諸部種類,今略書之。

東夷 夫餘國 馬韓 辰韓 肅愼氏 倭人 裨離等十國

夫餘國

布面衣、去玉佩。 凶,蹄解者爲凶,合者爲吉。 其王印文稱「穢王之印」。 死,沒入其家,盜者一責十二,男女淫,婦人妬,皆殺之。 五穀。其人强勇,會同揖讓之儀有似中國。 夫餘國在玄菟北千餘里,南接鮮卑,北有弱水,地方二千里,戶八萬,有城邑宮室,地宜 出善馬及貂豽、美珠,珠大如酸棗。 國中有古穢城,本穢貊之城也。 死者以生人殉葬,有椁無棺。 其出使,乃衣錦罽,以金銀飾腰。 其國殷富, 若有軍事,殺牛祭天,以其蹄占吉 其居喪,男女皆衣純白,婦人著 自先世以來,未嘗被破。 其法,殺人者

餘後王依羅遣詣龕,日了求率見 又要之於路,沈與戰,大敗之,廆衆退,羅得復國。爾後每爲廆掠其種人,賣於中國。 使得存立。」有司奏護東夷校尉鮮于嬰不救夫餘,失於機略。 爲下詔曰:「夫餘王世守忠孝,爲惡虜所滅,甚愍念之。 武帝時,頻來朝貢,至太康六年,爲慕容廆所襲破,其王依慮自殺,子弟走保沃沮。 人還復舊國,仍請援。 龐上列, 造督郵買沈以兵送之。<a>[三] 廆 若其遺類足以復國者,當爲之方計, 韶兔嬰,以何龕代之。明年,失

馬韓

韓種有三:一日馬韓、二日辰韓、三日弁韓。 辰韓在帶方南,東西以海爲限。

所行善惡有異。 俗信鬼神,常以五月耕種畢,羣聚歌舞以祭神,至十月農事畢,亦如之。 以大繩,以杖搖繩,終日讙呼力作,不以爲痛。 知乘牛馬,畜者但以送葬。俗不重金銀錦罽,而貴瓔珠,用以綴衣或飾髮垂耳。 少綱紀,無跪拜之禮。 天神、謂爲天君。 頭露紒,衣布袍,履草蹻,性勇悍。 **|馬韓居山海之間,無城郭,凡有小國五十六所,大者萬戶,小者數千家,各有渠帥。** 又置別邑,名曰蘇塗,立大木,懸鈴鼓。 居處作土室,形如冢,其戶向上,舉家共在其中,無長幼男女之別。不 國中有所調役,及起築城隍,年少勇健者皆鑿其背皮,貫 善用弓楯矛櫓,雖有鬭爭攻戰,而貴相 其蘇塗之義,有似西域浮屠也,而 國邑各立一人主祭 其男子科 屈服。

東夷校尉 武帝太康元年、二年,其主頻遣使入貢方物,七年、八年、十年,又頻至。 何龕上獻。 咸寧三年復來, [三] 明年又請內附。 太熙元年,詣

列

辰韓

初生子,便以石押其頭使扁。喜舞,善彈瑟,瑟形似筑。 韓所制也。地宜五穀,俗饒蠶桑,善作縑布,服牛乘馬。其風俗可類馬韓,兵器亦與之同。 帥,皆屬於辰韓。辰韓常用馬韓人作主,雖世世相承,而不得自立,明其流移之人,故爲馬 由是或謂之爲秦韓。初有六國,後稍分爲十二,又有弁辰,亦十二國,合四五萬戶,各有渠 辰韓在馬韓之東,自言秦之亡人避役入韓,韓割東界以居之,立城栅,言語有類秦人,

武帝太康元年,其王遣使獻方物。二年復來朝貢,七年又來。

肅愼氏

水。 受四五升以食。坐則箕踞,以足挾肉而啖之,得凍肉,坐其上令暖。土無鹽鐵,燒木作灰,灌 其皮,績毛以爲布。 有樹名雒常,若中國有聖帝代立,則其木生皮可衣。 無井竈,作瓦鬲, 爲君長。 其土界廣袤數千里,居深山窮谷,其路險阻,車馬不通。夏則巢居,冬則穴處。父子世 肅愼氏一名挹婁,在不咸山北,去夫餘可六十日行。東濱大海,西接寇漫汗國,北極弱 無文墨,以言語爲約。有馬不乘,但以爲財產而已。無牛羊,多畜猪,食其肉,衣

咫。其國東北有山出石,其利入鐵,將取之,必先祈神。 積其上,以爲死者之糧。 性凶悍,以無憂哀相尙。 父母死,男子不哭泣,哭者謂之不壯。 持歸,然後致禮娉之。婦貞而女淫,貴壯而賤老,死者其日卽葬之於野,交木作小椁, 取 **盗竊,無多少皆殺之,故雖野處而不相犯。** 汁而食之。俗皆編髮,以布作襜,徑尺餘,以蔽前後。將嫁娶,男以毛羽插女頭,女和 有石砮,皮骨之甲,檀弓三尺五寸, 楛矢長尺有 殺猪 相 則

盛,莫之致也。及文帝作相,魏景元末,來貢楛矢、石砮、弓甲、貂皮之屬。魏帝詔歸於相 有大國所在,故來」云。 至成帝時,通貢於石季龍,四年方達。季龍問之,答曰「每候牛馬向西南眠者三年矣,是知 府,賜其王傉雞、錦罽、縣帛。至武帝元康初,復來貢獻。四元帝中興,又詣江左貢其石砮。 周武王時,獻其楛矢、石砮。逮於周公輔成王,復遣使入賀。爾後千餘年,雖秦漢之

倭人

古使詣中國,皆自稱大夫。昔夏少康之子封於會稽,斷髮文身以避蛟龍之害,今倭人好沈 接,至魏時,有三十國通好。戶有七萬。男子無大小,悉黥面文身。自謂太伯之後,又言上 **倭人在帶方東南大海中,依山島爲國,地多山林,無良田,食海物。舊有百餘小國相**

列

沒取 無縫 澡浴自潔,以除不祥。 其舉大事, 輒灼骨以占吉凶。 嫁娶不持錢帛,以衣迎之。死有棺無椁,封土爲冢。 桑織績。 人多壽百年,或八九十。 魚,亦文身以厭水禽。 舊以男子爲主。漢末,倭人亂,攻伐不定,乃立女子爲王,名曰卑彌呼。 婦人衣如單被,穿其中央以貫頭,而皆被髮徒跣。 土無牛馬, 有刀楯弓箭,以鐵爲鏃。 計其道里,當會稽東冶之東。其男子衣以橫幅,但結束相連,略 國多婦女,不淫不妬。 有屋宇, 父母兄弟臥息異處。 初喪,哭泣,不食肉。 不知正歲四節,但計秋收之時以爲年 無爭訟,犯輕罪者沒其妻孥,重者族滅 其地溫暖,俗種禾稻紵麻 已葬,舉家入水 食飲用俎豆。 而蠶

宣帝之平公孫氏也,其女王遣使至帶方朝見,其後貢聘不絕。及文帝作相,又數至。

泰始初,遣使重譯入貢。

裨離等十國

萬。 寇莫汗國去養雲國又百日行,領戶五萬餘。 一羣國去莫汗又百五十日,計去肅愼五萬 **裨離國在肅愼西北,馬行可二百日,領戶二萬。養雲國去裨離馬行又五十日,領戶二**

餘里。其風俗土壤並未詳。

泰始三年,各遣小部獻其方物。至太熙初,復有牟奴國帥逸芝惟離、模盧國帥沙支臣

芝、于離末利國帥加牟臣芝、蒲都國帥因末、繩余國帥馬路、沙樓國帥釤加,各遣正副使詣

東夷校尉何龕歸化。

西戎 吐谷渾 焉耆國 龜茲國 大宛國 康居國 大秦國

吐谷渾 吐延 葉延 辟奚 視連 視羆 樹洛干

樓馮遣從者二千騎,擁馬東出數百步,輒悲鳴西走。如是者十餘輩,樓馮跪而言曰:「此非 庶也,理無並大,今因馬而別,殆天所啓乎!諸君試驅馬令東,馬若還東,我當相隨去矣。」 那樓馮及父時耆舊追還之。吐谷渾曰:「先公稱卜筮之言,當有二子克昌,祚流後裔。 其常性,何怒於人!乖別甚易,至當去汝於萬里之外矣。」於是遂行。應悔之,遣其長史史 人事也。」遂止。鮮卑謂兄爲阿干,廆追思之,作阿干之歌,歲暮窮思,常歌之。 而二部馬鬭,廆怒曰:「先公分建有別,奈何不相遠離,而令馬鬭!」吐谷渾曰:「馬爲畜耳,鬭 吐谷渾,慕容廆之庶長兄也,其父涉歸分部落一千七百家以隸之。 及涉歸卒,廆嗣位, 我卑

白蘭數千里。 乎!於是乃西附陰山。屬永嘉之亂,始度隴而西,其後子孫據有西零已西甘松之界,極乎 吐谷渾謂其部落曰:「我兄弟俱當享國, 應及曾玄纔百餘年耳。 然有城郭而不居,隨逐水草,廬帳爲屋,以肉酪爲糧。其官置長史、司馬、將 我玄孫已後,庶其昌

其婚姻,富家厚出娉財,竊女而去。父卒,妻其羣母;兄亡,妻其諸嫂。 軍,頗識文字。 吐谷渾年七十二卒,有子六十人,長曰吐延,嗣。 地宜大麥,而多蔓菁,頗有菽粟。出燭馬、氂牛。 國無常稅,調用不給,輒斂富室商人,取足而止。殺人及盜馬者罪至死,他犯則徵物以贖。 其男子通服長裙,帽或戴羃羅。婦人以金花爲首飾,辮髮縈後,綴以珠貝。 西北雜種謂之爲阿柴虜,或號爲野虜焉。 喪服制,葬訖 而除。

偸觀 謂其將紇拔泥曰:「豎子刺吾,吾之過也,上負先公,下愧士女。 所以控制諸羌者,以吾故 潛竄窮山,隔在殊俗,不聞禮敵於上京,不得策名於天府,生與麋鹿同羣,死作氊裘之鬼,雖 「大丈夫生不在中國,當高光之世,與韓、彭、吳、鄧並驅中原,定天下雌雄,使名垂竹帛,而 日月,獨不愧於心乎!」性酷忍,而負其智,不能恤下,爲羌酋姜聰所刺。 劍猶在其身, 吾死之後,善相葉延,速保白蘭。」言終而卒。在位十三年,有子十二人,長子葉延嗣。 吐延身長七尺八寸,雄姿魁傑,羌虜憚之,號曰項羽。性俶儻不羣,嘗慷慨謂其下曰:

中則瞋目大呼。其母謂曰:「姜聰、諸將已屠鱠之矣,汝何爲如此。]葉延泣曰:「誠知射草人 葉延年十歲,其父爲羌酋姜聰所害,每旦縛草爲姜聰之象,哭而射之,中之則號泣,不

不益於先讐,以申罔極之志耳。」性至孝,母病,五日不食,葉延亦不食。

『夏蟲不知冬冰』,良不虛也。」又曰:「禮云公孫之子得以王父字爲氏,吾祖始自昌黎光宅於 此,今以吐谷渾爲氏,尊祖之義也。」在位二十三年卒,年三十三。有子四人,長子辟奚嗣。 子,五帝誰母所生。」延曰:「自羲皇以來,符命玄象昭言著見,而卿等面牆,何其鄙哉!語曰 長而沈毅,好問天地造化、帝王年曆。司馬薄洛鄰曰:「臣等不學,實未審三皇何父之

辟奚性仁厚慈惠。初聞,苻堅之盛,遣使獻馬五十匹,金銀五百斤。堅大悅,拜爲安遠

將軍。

憂卒。 地,先君有問,其將何辭!吾今誅之矣。」宿雲請白辟奚,惡地曰:「吾王無斷,不可以告。」於 弟之寵,宗祀幾傾,況今三孼並驕,必爲社稷之患。吾與公忝當元輔,若獲保首領以沒於 連曰:「吾禍滅同生,何以見之於地下!國事大小,汝宜攝之,吾餘年殘命,寄食而已。」遂以 云:『三弟將爲逆亂,汝速除之。』臣謹奉先王之命矣。」辟奚素友愛,因恍惚成疾,謂世子視 是因羣下入覲,遂執三弟而誅之。辟奚自投於牀,惡地等奔而扶之,曰:「臣昨夢先王告臣 時辟奚三弟皆專恣,長史鍾惡地恐爲國害,謂司馬乞宿雲曰:「昔鄭莊公、秦昭王以一 在位二十五年,時年四十二。有子六人,視連嗣。

此四者,聖帝明王之所先也,而公皆略之。昔昭公儉嗇而喪,偃王仁義而亡,然則仁義所以 不飲酒遊田七年矣。鍾惡地進曰:「夫人君者,以德御世,以威齊衆,養以五味,娛以聲色。 刑禮,付之將來。」臨終,謂其子視羆曰:「尽」「我高祖吐谷渾公常言子孫必有興者,永爲中國 存身,亦所以亡己。經國者,德禮也,濟世者,刑法也。二者或差,則綱維失緒。明公奕葉 視連泣曰:「先王追友于之痛,悲憤升遐,孤雖纂業,尸存而已。 聲色遊娛,豈所安也! 綱維 重光,恩結西夏,雖仁孝發於天然,猶宜憲章周孔,不可獨追徐偃之仁,使刑德委而不建。」 長日視羆,少日鳥紇堤。 之西藩,慶流百世。吾已不及,汝亦不見,當在汝之子孫輩耳。」在位十五年而卒。有二子, 視連旣立,通聘於乞伏乾歸,拜爲白蘭王。 視連幼廉愼有志性,以父憂卒,不知政事,

以仁宰世,不任威刑,所以剛柔靡斷,取輕鄰敵。當仁不讓,豈宜拱默者乎!今將秣馬厲 兵,爭衡中國,先生以爲何如。」「庖曰:「大王之言,高世之略,秦隴英豪所願聞也。」於是虛襟 視羆性英果,有雄略,嘗從容謂博士金城騫苞曰:「易云:『動靜有常,剛柔斷矣。』先王

撫納、衆赴如歸

之功,流芳來葉邪!乾歸大怒,然憚其强,初猶結好,後竟遣衆擊之。視羆大敗,退保白蘭。 藩之節,終不能如季孟、子陽妄自尊大。爲吾白河南王,何不立勳帝室,策名王府,建當年 彼沙凉,然後飲馬涇渭,戮問鼎之豎,以一丸泥封東關,閉燕趙之路,迎天子於西京,以盡遐 在位十一年,年三十三卒。子樹洛干年少,傳位於鳥紇堤。 懲不順,奈何私相假署,擬僭羣凶!寡人承五祖之休烈,控弦之士二萬,方欲掃氛|秦隴,淸 曰:「自晉道不綱,姦雄競逐,劉、石虐亂,秦、燕跋扈,河南王處形勝之地,宜當糾合義兵,以 乞伏乾歸遣使拜爲使持節、都督龍涸已西諸軍事、沙州牧、白蘭王。 視羆不受,謂使者

時年三十五。視羆之子樹洛干立。 乾歸怒,率騎討之。鳥紇堤大敗,亡失萬餘口,保於南涼,遂卒於胡國。[4]在位八年, 鳥紇堤一名大孩,性愞弱,耽酒淫色,不恤國事。乞伏乾歸之入長安也,鳥紇堤屢抄其

此,豎孤七世,思與羣賢共康休緒。今士馬桓桓,控弦數萬,孤將振威深益,稱霸西戎,觀兵 王。化行所部,衆庶樂業,號爲戊寅可汗,沙澀雜種莫不歸附。乃宣言曰:「孤先祖避地於 稱世子,年十六嗣立,率所部數千家奔歸莫何川,自稱大都督、車騎大將軍、大單于、吐谷渾 樹洛干九歲而孤,其母念氏聰惠有姿色,烏紇堤妻之,有寵,遂專國事。洛干十歲便自

列

三秦,遠朝天子,諸君以爲何如。〕衆咸曰:「此盛德之事也,願大王自勉!」

也。」有子四人,世子拾虔嗣。 蘭,慚憤發病而 軍、赤水都護,又以其弟吐護眞爲捕虜將軍、層城都尉。其後屢爲乞伏熾磐所破,云又保白 乞伏乾歸甚忌之,率騎二萬,攻之於赤水。 卒。 在位九年,時年二十四。 其後世嗣不絕。 熾磐聞其死,喜曰:「此虜矯矯,所謂有豕白蹄 樹洛干大敗,遂降乾歸,乾歸拜爲平狄將

焉耆國

姦詭。 險隘,百人守之,千人不過。其俗丈夫翦髮,婦人衣襦,著大袴。婚姻同華夏。好貨利,任 焉耆國西去洛陽八千二百里,其地南至尉犂,北與烏孫接,方四百里。四面有大山,道 王有侍衞數十人,皆倨慢無尊卑之禮。

蔥嶺以東莫不率服。然恃勇輕率,嘗出宿於外,爲龜茲國 乃吾子也。」及會立,襲滅白山,遂據其國,遣子熈歸本國爲王。會有膽氣籌略,遂霸西胡, 之爲世子。會少而勇傑,安病篤,謂會曰:「我嘗爲龜茲王白山所辱,不忘於心。汝能雪之, 武帝太康中,其王龍安遣子入侍。安夫人獪胡之女,姙身十二月,剖脅生子,曰會,立 人羅雲所殺。

其後張駿遣沙州刺史楊宣率衆疆理西域,宣以部將張植爲前鋒,所向風靡。 軍次其

發。 將至,或曰:「漢祖畏於柏人,岑彭死於彭亡,今谷名遮留,殆將有伏。」植單騎嘗之,果有伏 ,熙距戰於賁崙城,爲植所敗。植進屯鐵門,未至十餘里,熙又率衆先要之於遮留谷。植 植馳擊敗之,進據尉犂,熙率羣下四萬人肉袒降於宣。呂光討西域,復降於光。 及光

龜茲國

僭位,熙又遣子入侍。

龜茲國西去洛陽八千二百八十里,俗有城郭,其城三重,中有佛塔廟千所。人以田種

畜牧爲業,男女皆翦髮垂項。王宮壯麗,煥若神居。

遣其將呂光率衆七萬伐之,其王白純距境不降,光進軍討平之。 武帝太康中,其王遣子入侍。惠懷末,以中國亂, 遣使貢方物於張重華。 苻堅時,

大宛國

有 試之,不男者絕婚。 蒲 **陶酒,多善馬,馬汗血。 其人皆深目多鬚。 其俗娶婦先以金同** 大宛西去洛陽萬三千三百五十里,南至大月氏,北接康居,大小七十餘城。 姦淫有子,皆卑其母。 與人馬乘不調墜死者,馬主出斂具。 心指鐶 爲娉,又以三婢 善市賈、爭 土宜稻麥,

列

傅

分銖之利,得中國 金銀,輒爲器物,不用爲幣也。

太康六年,武帝遣使楊顥拜其王藍庾爲大宛王。 藍庾卒,其子摩之立,遣使貢汗血馬。

康 派居國

略同大宛。 康居國在大宛西北可二千里,與粟弋、伊列鄰接。 地和暖, 饒桐柳蒲陶,多牛羊,出好馬。 其王居蘇薤城。 風俗及人貌、衣服

罽。 宮聽事、終而復始。若國有災異、輒更立賢人、放其舊王、被放者亦不敢怨。 胡服。其土多出金玉寶物、明珠、大貝,有夜光璧、駭雞犀及火浣布,又能刺金縷 屋宇皆以珊瑚爲梲栭,琉璃爲牆壁,水精爲柱礎。其王有五宮,其宮相去各十里,每旦於一 而文字習胡,亦有白蓋小車、旌旗之屬,及郵驛制置,一如中州。 以金銀爲錢,銀錢十當金錢之一。安息、天竺人與之交市於海中,其利百倍。 大秦國一名犂鞬,在西海之西,其地東西南北各數千里。 大秦國 泰始中,其王那鼻遣使上封事,幷獻 有城邑,其城周迴百餘里 其人長大,貌類 有官曹簿領, 繡 公中國 及 鄰國使 織 人而 錦 縷

到者,輒廩以金錢。 途經大海,海水鹹苦不可食,商客往來皆齎三歲糧,是以至者 孫少。

漢 時都護班超遣掾甘英使其國,入海,船人曰:「海中有思慕之物,往者莫不悲懷。

南蠻 林邑 扶南

林邑國

絡,每聽政,子弟侍臣皆不得近之。 盤衣,橫幅合縫如井欄,首戴寶花。居喪翦鬢謂之孝,燔尸中野謂之葬。其王服天冠,被纓 戶以向日,至於居止,或東西無定。人性凶悍,果於戰鬭,便山習水,不閑平地。四時暄暖, 無霜無雪,人皆倮露徒跣,以黑色爲美。貴女賤男,同姓爲婚,婦先娉壻。女嫁之時,著迦 日 · 連,殺令自立爲王,子孫相承。 其後王無嗣,外孫范熊代立。 熊死,子逸立。 其俗皆開北 林邑國本漢時象林縣,則馬援鑄柱之處也,去南海三千里。後漢末,縣功曹姓區,有子

自孫權以來,不朝中國。至武帝太康中,始來貢獻。咸康二年,范逸死,奴文篡位。

對大石嶂而呪之曰:「鯉魚變化,治成雙刀,石嶂破者,是有神靈。」進斫之,石卽瓦解,以知 文,日南西卷縣夷帥范椎奴也。嘗牧牛澗中,獲二鯉魚,化成鐵,用以爲刀。 刀成,乃

列

其神,乃懷之。 隨商賈往來,見上國制度,至林邑,遂教逸作宮室、城邑及器械。 逸甚愛信

之,使爲將。」文乃譖逸諸子,或徙或奔。

餘奔九眞,以覽尸祭天,鏟平西卷縣城,遂據日南。 表入貢於帝,其書皆胡字。至永和三年,文率其衆攻陷日南,害太守夏侯覽,殺五六千人, 是乃攻大岐界、小岐界、式僕、徐狼、屈都、乾魯、扶單等諸國,幷之,有衆四五萬人。 及逸死,無嗣,文遂自立爲王。以逸妻妾悉置之高樓,從已者納之,不從者絕其食。於 告交州刺史朱蕃,求以日南北鄙橫山 遣使通

且林邑少田、貪日南之地、戢死絕、岳、繼以謝擢、侵刻如初。及覽至郡,又耽荒於酒,政敎 至刺史姜壯時,使韓戢領日南太守,戢估較太半,又伐船調枹,聲云征伐,由是諸國恚憤。 愈亂,故被破滅 初,徼外諸國嘗齎寶物自海路來貿貨,而交州刺史、日南太守多貪利侵侮,十折二三。

士庶十八九。 旣而文還林邑。 明年,征西督護滕畯率交廣之兵伐文於盧容,爲文所敗,退次九眞。 是歲、朱蕃使督護劉雄戍於日南、文復攻陷之。四年、文又襲九眞、害 其年,文

死,子佛嗣。

升平末,廣州刺史滕含率衆伐之,佛懼,請降,含與盟而還。 至孝武帝寧康中,遣使貢

疲弊。

佛死,子胡達立,上疏貢金盤椀及金鉦等物。

扶南國

倮身跣行。性質直,不爲寇盜,以耕種爲務,一歲種,三歲穫。又好雕文刻鏤,食器多以銀 扶南西去林邑三千餘里,在海大灣中,其境廣袤三千里,有城邑宮室。人皆醜黑拳髮,

爲之,貢賦以金銀珠香。亦有書記府庫,文字有類於胡。喪葬婚姻略同林邑。

灒旦詣神祠,得弓,遂隨賈人汎海至扶南外邑。 葉柳率衆禦之,混潰舉弓,葉柳懼,遂降之。 其王本是女子,字葉柳。時有外國人混潰者,先事神,夢神賜之弓,又敎載舶入海。

於是混潰納以爲妻,而據其國。後胤衰微,子孫不紹,其將范尋復世王扶南矣。 武帝泰始初,遣使貢獻。 太康中,又頻來。 穆帝升平初,復有|竺旃檀稱王,遣使貢馴

※。帝以殊方異獸,恐爲人患,韶還之。

北狄

匈奴

君臣,不稟中國 匈奴之類,總謂之北狄。 「正朔。 夏日薰鬻,殷曰鬼方,周曰獫狁,漢曰匈奴。 匈奴地南接燕趙,北暨沙漠,東連九夷,西距六戎。 其强弱盛衰、風俗好尙 世世自相

區域所在,皆列於前史。

部都尉 都尉。 中,魏武帝始分其衆爲五部,部立其中貴者爲帥,選漢人爲司馬以監督之。 代不絕。 意, 彌漫北朔,轉難禁制。 來朝,漢因留之,賜其邸舍,猶因本號,聽稱單于, 割幷州北界以安之。 前漢末,匈奴大亂,五單于爭立,而呼韓邪單于失其國,攜率部落,入臣於漢。 其左部都尉所統可萬餘落, 居於太原故茲氏縣, 可三千餘落,居庸子縣,北部都尉可四千餘落, 其部落隨所居郡縣,使宰牧之,與編戶大同,而不輸貢賦。 後漢末,天下騷動,羣臣競言胡 於是匈奴五千餘落入居朔方諸郡,與漢 歲給縣絹錢穀, 人猥多,懼必爲寇,宜先爲其防 居新興縣,中部都尉可六千餘落,居 右部都尉可六千餘落, 有如列侯。 人雜處。 多歷年所,戶 呼韓邪 魏末,復改帥 子孫 居祁 口 傳襲,歷 感漢恩 漢嘉其 縣 建安 漸滋, 南

大陵縣。[10]

單 o 武 于 後 踐 復 叛, 與晉 作後,塞外匈奴大水,塞泥、黑難等二萬餘落歸化,帝復納之,使居河西故 人雜居,由 是平陽、西河、太原、新興、上黨、樂平諸郡靡不有焉。 衆凶悍, 泰始 非 宜陽 兵

城下 也。 華,漸徙平陽、 定,復上郡,實馮 河 所制 年, 匈 爲戎居。 都 奴胡 太原 帝 督 乃潛 大豆 都 漸 不 猛 今雖服 納。 爲 大博 馮翊 邊患。 誘猛左部督李恪殺猛,於是匈奴震服,積年不敢復反。其後稍因忿恨, 得 至太康 及萎莎胡等各率 弘農、魏郡、京兆、上黨 屯孔邪城。 育鞠 郊,於平陽已北諸縣募取 從, 安定、 侍御 若 等復 五 上郡 史西河 百年之後有風 年,復有 率 武帝遣婁侯何楨持節討之。楨素有志略,以猛 盡爲狄 種落 郭欽 種 匈奴胡太阿厚率 大 類大小凡十萬 庭矣。 上疏 小 雑 塵之警,胡騎自平陽、上黨不三日而至孟津,北地 萬 胡 一千二 曰:「戎狄强獷、歷古爲患。 ,峻四 死罪, 徙三河、三魏見士四萬家以充之。 裔不 宜及平吳之威,謀臣猛將之略,出北地、西河 五 百 餘 夷出入之防, ·其部落二萬九千三百人歸化。 П, 口,詣 、牛二萬二千頭, 雍 州 明先王荒服之制, 刺 史扶 魏初 風 羊十萬五千口,車廬 王 駿降附。 人寡,西北諸郡 萬世之長策 七年,又有 明 殺害長 年,匈 西 亂 皆

什 奴 物不可 勝 紀 ,來降,幷貢 其 方物,帝 並 撫 納 之。

狠 種 、赤沙 北 狄 以 種 部 一鬱與種 落爲 類,其入居 一、菱莎種、禿童種、勃蔑種、羌渠種 塞者 1有屠 各 種 鮮支種 、賀賴種、鍾跂 寇頭種、烏譚種、赤勒 種 大樓種 一、捍蛭 雍屈 種、黑

列 傳 第 六 十 七 四 夷

氏。 眞樹 國號 或 當戶、右當戶,喬氏則有左都侯、右都侯。又有車陽、沮渠、餘地諸雜號,猶中國百官也。其 等,皆用單于親子弟也。其左賢王最貴,唯太子得居之。其四姓,有呼延氏、卜氏、蘭氏、喬 朔方王、右朔方王、左獨鹿王、右獨鹿王、左顯祿王、右顯祿王、左安樂王、右安樂王,凡十六 人有綦毋氏、勒氏,皆勇健,好反叛。 有 而呼延氏最貴,則有左日逐、右日逐,世爲輔相,卜氏則有左沮渠、右沮渠,關氏則有左 種、力羯 惠帝元康中,匈奴郝散攻上黨,殺長吏,入守上郡。明年,散弟度元又率馮翊、北地羌 左賢王、右賢王、左奕蠡王、右奕蠡王、左於陸王、右於陸王、左漸尚王、右漸尚王、左 種,凡十九種,皆有部落,不相雜錯。屠各最豪貴,故得爲單于,統領諸種。 武帝時,有騎督綦毋俔邪伐吳有功,遷赤沙都尉。

胡攻破二郡。 自此已後、北狄漸盛、中原亂矣。

史,憑陵匪一。 可勝載。爰及泰始,匪革前迷,廣闢塞垣,更招種落,納萎莎之後附,開育鞠之新降,接帳連 匈奴最强;元成之間,呼韓委質,漢嘉其節,處之中壤。 凶 獷者爲 史臣 外夷、譬諸草木、區以別矣。 日:夫宵形稟氣,是稱萬物之靈,繫土隨方,迺有羣分之異。蹈仁義者爲中萬,肆 軒皇北逐,唐帝南征,殷后東戡,周王西狩,皆所以禦其侵亂也。 夷狄之徒,名敎所絕, 歷年斯永, **闚邊候隙**, 種類逾繁,舛號 自古爲患,稽諸前 嬴劉 殊名,不 之際,

髒, 充郊掩甸。 凶,假鳳圖 奉順者必敗,豈天亡晉乎! 視連蒸蒸,光奉先之義;視羆矯矯,蘊經時之略;洛干童幼,早擅英規,未騁雄心,先摧凶手, 夭於姜聰,高節不羣,亦殊藩之秀也。 廓萬里之基,貽一匡之訓,弗忘忠義,良可嘉焉。 之失也。 姦萌,郭欽馳疏,無救於妖漸。未環星紀,坐傾都邑,黎元塗地,凶族滔天。迹其所由,抑武皇 吐谷渾分緒偽燕,遠辭正嫡,率東胡之餘衆,掩西羌之舊字,網疏政暇,地廣兵全, 而竊號,渾嗣忠謹,距龍涸而歸誠。 旣而沸脣成俗,鳴鏑爲羣,振鴞響而挻災,恣狼心而逞暴。何楨縱策,弗沮於 且渾廆連枝,生自邊極,各謀孫而翼子,咸革裔而希華。 葉延至孝,寄新哀於射草,辟奚深友,邁古烈於分荆, 懷姦者數世而亡,資忠者累葉彌劭,積善餘 吐延夙標宏偉,見方於項籍,始遵朝化,遽 廆胤姦

多謝明謨。 贊曰: 逖矣前王, 區別羣方。 谷渾英奮,思矯穨運;克昌其緒,實資忠訓 叛由德弛,朝因化昌。 武后升圖,智昧遷胡。 遽淪家國, 慶,斯言信矣。

校勘記

[一]依羅遣詣龕。經覽七八一引「遣」下有「使」字。

督郵 周校"當照慕容廆載記作「督護」。按"通鑑八一亦作「督護」。

第六十七 校勘記

列

傅

咸寧三年復來 斠注:咸寧建元在太康太熙之前,本傳先後互倒。

至武帝元康初復來貢獻 斠注:武紀獻楛矢石砮在咸寧五年。「元康」爲惠帝年號,大誤。 按

咸寧五年十二月使來,翌年春卽改元太康,疑「元康」爲「太康」之誤。

五五 乖別甚易 「羆」,各本均作「熊」,今據下文及魏書、北史吐谷渾傳改。 「易」,各本均作「異」,但宋書、魏書、通典、北史、通志一九五均作「易」,今據改。

[th] 胡國 斠注:通鑑作「胡園」。

視羆

乞伏熾磐 「磐」,各本均作「盤」,唯殿本作「磐」,今從殿本,以歸一致。

八九 戢死絕 「絕」字疑衍。册府一〇〇〇引無。

居大陵縣 「大」,各本作「太」,據地理志上、劉元海載記改「大」。

殺害長史 周校:「長吏」誤「長史」。

晉書卷九十八

列傳第六十八

王敦 沈充

稱之。 滔見敦而目之曰:「處仲蜂目已露,但豺聲未振,若不噬人,亦當爲人所噬。」及太子遷許昌, 詔東宮官屬不得送。敦及洗馬江統、潘滔,舍人杜蕤、魯瑤等,冒禁於路側望拜流涕, 時論 飲,恐行酒者得罪,遂勉强盡觴。 客飲不盡,輒殺之。酒至敦、導所,敦故不肯持,美人悲懼失色,而敦慠然不視。 導素不能 女伎吹笛小失聲韵,愷便敺殺之,一坐改容,敦神色自若。他日,又造愷,愷使美人行酒,以 城公主,拜駙馬都尉,除太子舍人。時王愷、石崇以豪侈相尙,愷嘗置酒,敦與導俱在坐,有 王敦字處仲,司徒導之從父兄也。父基,治書侍御史。敦少有奇人之目,尙武帝女襄 遷給事黃門侍郎。 導還,歎曰:「處仲若當世,心懷剛忍,非令終也。」 洗馬潘

刺

傅

第六十八

王敦

倫 兵强, 趙 王倫 不敢 篡位,敦叔父彦爲兗州刺史,倫遣敦慰勞之。 應命,敦勸彥起兵應諸王,故彥遂立勳績。 惠帝反正,敦遷散騎常侍、左衞將 會諸王起義兵,彥被齊王冏傲,懼

軍、大鴻臚、侍中、出除廣武將軍、靑州刺史。

刺史, 揚州 尙書 散 弟 漢等同 之於 猶 其後 刺 永 加廣 、嘉初, 史,潘滔說越曰:「今樹處仲於江外,使其肆豪强之心,是見賊也。」越不從。 以舊制裁之,太傅今至,必有誅罰。」俄而越收中書令繆播等十餘人殺之。 衆,單車還洛。 徴 心 武 翼戴、 拜尙書,不就。 徴爲 將軍。 以隆中興,時人爲之語曰:「汪與馬,共天下。」尋與甘卓等討江州刺史譁 中書監。于時天下大亂,敦悉以公主時侍婢百餘人配給將 尋進左將軍、都督征討諸軍事、假節。帝初鎭

江東,威名未著,敦與從 東海王越自滎陽來朝,敦謂所親曰:「今威權悉在太傅,而選用 元帝召爲安東軍諮祭酒。會揚州刺史劉陶卒,帝復以敦爲揚州 士、金銀寶物 越以敦為 表請,

都督江揚荆湘交廣六州諸軍事、江州刺史、封漢安侯。 失所,自 住 了斬之。 豫章 蜀 一爲諸 賊 貶爲 杜弢作亂,荆州 廣武將軍,帝不 軍繼援。 及侃破弢, 刺史周顗退走,敦遣武昌太守陶侃、豫章太守周訪等討弢,而敦進 許。 侃之滅弢也,敦 敦 上侃 爲 荆州刺史。 以元帥進鎭東大將軍、開府儀同三司,加 敦始自選置,兼統州郡焉。頃之,杜 旣而 侃爲弢將杜曾所敗,敦以處分

送弘 弢將杜弘南走廣州,求討桂林賊自效,敦許之。 與敦 ,敦以爲將,遂見寵待。 南康人何欽所居嶮固 陶侃距弘不得進,乃詣零陵太守尹奉降,奉 , 聚黨數千人, 敦就加四品將軍,於

是專擅之迹漸彰矣。

趙誘伐杜曾,爲曾所殺,敦自貶,免侍中,幷辭牧不拜。 建武 、初,又遷征南大將軍,開府如故。 中興建,拜侍中、大將軍、江州牧。 尋加荆州牧,敦上疏曰: 遣部將朱軌、

指擿 皆欲附翼天飛。 謂前者賊寇未殄,苟以濟事,朝廷諸所加授,頗多爵位兼重。 侈,晉文思崇周室,至有求隧之請,襄王讓之以禮,聞義 事變,皆非忠義,率以一朝之榮。天下漸弊,實由於此。 遣使求效忠節,尚未有勞,便以方州與之。 賈誼歎息,以爲天下倒懸,雖言有抑揚,不失事體。 且 以塞羣小矜功之望,夷狄無懕之求。若復遷延,顧望流俗,使姦狡生心,遂相怨誇, **]朝廷,讒諛蜂起,臣有以知陛下無以正之。此安危之機,天下之望。** 昔漢祖以神武革命,開建帝業,繼以文帝之賢,纂承洪緒,清虚玄默,擬跡成康**。** 雖功大宜報,亦宜有以裁之,當杜漸防萌,愼之在始。 今斬明等爲國雪恥,欲除大逆, **今聖朝肇建,漸振宏綱,往段匹磾** 而服, 春秋之時,天子微弱,諸侯奢 今自臣以下,宜皆除之, 自 爾 諸侯莫敢越度。 中間 此之志望, 不逞,互生

[門戶特受榮任,備兼權重,渥恩偏隆,寵過公族。 行路厮賤猶謂不可,臣獨何心

列

諒臣至款,及今際會,小解散之,並授賢儁,少慰有識,各得盡其所懷,則人思竸勸矣。 州牧之號,所不敢當,輒送所假侍中貂蟬。又宜幷官省職,以塞羣小覬覦之望。 可以安之。臣一宗誤陛下,傾覆亦將尋至,雖復灰身剖心,陛下追悔將何所及!伏顧

帝優韶不許。又固辭州牧,聽爲刺史。

時劉隗用事,頗疏間王氏,導等甚不平之。敦上疏曰:

勳,疇昔之顧,情好綢繆,足以厲薄俗,明君臣,合德義,同古賢。 昔臣親受嘉命,云: **詳所由,惶愧踧踖,情如灰土。 天下事大,盡理實難,導雖凡近,未有穢濁之累,旣往之** 量,陛下亦愛忘其短。常人近情,恃恩昧進,獨犯龍鱗,迷不自了。臣竊所自憂慮,未 所陳如昨,而其萌已著,其爲咎責,豈惟導身而已。羣從所蒙,並過才分。導誠不能自 宗,是以前後表疏,何嘗不寄言及此。陛下未能少垂顧眄,暢臣微懷,云導頃見疏外, 事 之於心,竊猶眷眷,謂前恩不得一 一吾與 ,義不同,雖皇極初建,道敎方闡,惟新之美,猶有所闕。 臣每慷慨於遐遠,愧憤於門 導昔蒙殊寵,委以事機,虛己求賢,竭誠奉國,遂藉恩私,居輔政之重。帝王體遠, (卿及||茂弘當||管鮑之交。] 臣忝外任,漸冉十載,訓誘之誨,日有所忘;至於斯命,銘 一朝而 盡

伏惟陛下聖哲日新,廣延俊义,臨之以政,齊之以禮。 頃者令導內綜機密,出錄尚

表至,導封以還燉,敦復遺奏之。 私得所。今皇祚肇建,八表承風,聖恩不終,則遐邇失望。天下荒弊,人心易動;物聽 賢 闇 書,杖節京都,幷統六軍,旣爲刺史,兼居重號,殊非人臣之體。 一移,將致疑惑。臣非敢苟私親親,惟欲忠於社稷。 圄,然終爲良佐。以|導之才,何能無失!當令任不過分,役其所長,以功補過, 宜省錄尚 (使能, 識,未見其才。 導性愼密,尤能忍事,善於斟酌,有文章才義,動靜顧問,起予聖懷,外無過寵, 共相終始!管仲有三歸反坫之譏,子犯有臨河要君之責,蕭何、周勃得罪囹 書、杖節 然於見人,未踰于導,加輔翼積年,實盡心力。 及都督。 且王佐之器,當得宏達遠識、高正明斷、道德優備者,以臣 流俗好評,必有譏謗, 霸王之主,何嘗 要之將 不任 公

以為 蒼蠅之人交構 欲以從事中郎陳頒代卓,帝不從,更以譙王承鎭湘州。敦復上表陳古今忠臣見疑於君,而 千里。烈士暮年,壯心不已。」以如意打睡壺爲節,壺邊盡缺。及湘州刺史甘卓遷梁州,敦 控强兵、羣從貴顯,威權莫貳,遂欲專制朝廷,有問鼎之心。帝畏而惡之,遂引劉隗、刁協等 心膂。敦益不能平,於是嫌隙始構矣。每酒後輒詠魏武帝樂府歌曰:「老驥伏櫪,志在 初,敦務自矯厲,雅尙淸談,口不言財色。旣素有重名,又立大功於江左,專任閫外,手 其間、欲以感動天子。帝愈忌憚之。俄加敦羽葆鼓吹、增從事中郎、掾屬、舍

人各二人。帝以劉隗爲鎮北將軍,戴若思爲征西將軍,悉發揚州奴爲兵,外以討胡,實禦敦

也。 永昌元年,敦率衆內向,以誅隗爲名,上疏曰:

行險慝,進人退士,高下任心,姦狡饕餮,未有隗比,雖無忌、宰嚭、弘恭、石顯未足爲 有所不得,輒罪本主,百姓哀憤,怨聲盈路。 客,從來久遠,經涉年載,或死亡滅絕,或自贖得免,或見放遣,或父兄時事身所不及, 陛下踐阼之始,投刺王官,本以非常之慶使豫蒙榮分。而更充征役,復依舊名,普取出 之,使三軍之士莫不怨憤。又除州流人辛苦經載,家計始立,隗悉驅逼,以實已府。當 自可使其大田以充倉廩,今便割配,皆充隗軍。臣前求迎諸將妻息,聖恩聽許,而隗絕 |魏已來,未有此比。 傾盡帑藏,以自資奉,賦役不均,百姓嗟怨, 觅良人奴,自爲惠澤。 有識杜口。大起事役,勞擾士庶,外託舉義,內自封植,奢僭過制,乃以黃散爲參軍,晉 是以遐邇憤慨,羣后失望。 劉隗前在門下,邪佞諂媚,譖毁忠良,疑惑聖聽,遂居權寵,撓亂天機,威福自由, 身欲北渡,以遠朝廷爲名,而密知機要,潛

以虧 皇祚復隆。 臣 備 聖美。 位宰輔,與國存亡,誠乏下勃濟時之略,然自忘駑駘,志存社稷,豈忍 事不獲已,今輒進軍,同討姦擘,願陛下深垂省察,速斬隗首,則衆望厭 隗首朝懸,諸軍夕退。昔太甲不能遵明湯典,顚覆厥度,幸納伊尹之 坐視成

一般道復昌。 漢武雄略,亦惑江亢讒佞邪說,至乃父子相屠,流血丹地,終能克悟,不 大綱。今日之事,有逾於此,願陛下深垂三思,諮詢善道,則四海乂安,社稷永固矣。

叉曰:

蔽, 至虛擾。 言,遂信 **覺胸臆摧破,泣血橫流。** 豫奉徽猷,是以遐邇望風,有識自竭,王業遂隆,惟新克建,四海延頸,咸望太平。 陛下昔鎭揚州,虛心下士,優賢任能,寬以得衆,故君子盡心,小人畢力。 自 [從信隗已來,刑罰不中,街談巷議,皆云如吳之將亡。 姦佞,誰不痛心!願出臣表,諮之朝臣,介石之幾,不俟終日,令諸軍早還,不 陛下當全祖宗之業,存神器之重,察臣前後所啓,奈何棄忽忠 聞之惶惑,精魂飛散,不 臣以闇

寵靈,敢肆狂逆,方朕太甲,欲見幽囚。 殺敦者、封五千戶侯。」召戴若思、劉隗並會京 敦黨吳興 人沈充起兵應敦。 敦至蕪湖,又上表罪狀刁協。 是可忍也,孰不可忍也 師。 敦兄含時爲光祿勳,叛奔於敦 ! 今親率六軍,以誅大逆,有 帝大怒,下詔曰:「王敦憑恃

敗績。 恩,兵不爲用,攻之必敗。 敦 既入石頭,擁兵不朝,放肆兵士劫掠內外。 至石頭,欲攻劉隗,其將杜弘 札敗,則隗 自走。」敦從之。 曰:「劉隗死 士衆多, 未易可克, 官省奔散,惟有侍中二人侍帝。 札果開 城門納弘。 不如攻石頭。 諸將 與敦 戦、王 帝脫戎 周札

列

尉、荆州刺史,以義陽太守任愔督河北諸軍事、南中郎將,敦又自督寧、益二州。 並僞讓不受。 若思害之。 衣,著朝服,顧 以敦爲丞相、江州牧,進爵武昌郡公,邑萬戶,使太常荀崧就拜,又加羽葆鼓吹, 還屯武昌,多害忠良,寵樹親戚,以兄含爲衞將軍、都督沔南軍事、領南蠻校 而言曰:「欲得我處,但當早道,我自還琅邪,何至困百姓如此」,敦收周顗、戴

齎牛酒犒勞,敦稱疾不見,使主簿受詔。以王導爲司徒,敦自爲揚州牧。 授加黃鉞,班劍武賁二十人,奏事不名,入朝不趨,劍履上殿。敦移鎭姑孰,帝使侍中阮孚 及帝崩,太寧元年,敦諷朝廷徵己,明帝乃手詔徵之,語在明帝紀。又使兼太常應詹拜

揚州江 事,豈常人所能!且應年少,安可當大事。我死之後,莫若解衆放兵,歸身朝廷,保全門戶, 此計之上也。退還武昌,收兵自守,貢獻不廢,亦中計也。及吾尙存,悉衆而下,萬一僥倖, 甚,拜應爲武衞將軍以自副。錢鳳謂敦曰:「脫其不諱,便當以後事付應。」敦曰:「非常之 咸知其禍敗焉。敦從弟豫章太守棱日夜切諫,敦怒,陰殺之。敦無子,養焓子應。及敦病 並凶險驕恣,共相驅扇,殺戮自己;又大起營府,侵人田宅,發掘古墓,剽掠市道,士庶解體, 敦貴重,故歷顯位。敦以沈充、錢鳳爲謀主,諸葛瑤、鄧嶽、周撫、李恒、謝雍爲爪牙。 充等 |敦旣得志,暴慢愈甚,四方貢獻多入己府,將相嶽牧悉出其門。 徙含爲征東將軍、都督 [西諸軍事,從弟舒爲荆州,彬爲江州,邃爲徐州。含字處弘,凶頑剛暴,時所不齒,以

計之下也。」鳳謂其黨曰:「公之下計,乃上策也。」遂與沈充定謀,須敦死後作難。

至蕪湖,察其營壘,又屢遣大臣訊問其起居。 衞尙多,奏令三番休二。 敦 又忌周札, 殺之而盡滅其族。 。及敗病篤,詔遣侍中陳晷、散騎常侍虞駿問疾。時帝將討敦,微服 常從督冉曾、公乘雄等爲元帝腹心,敦又害之。 遷含驃騎大將軍、開府儀同三司,含子瑜散騎 以宿

敦以溫嶠爲丹楊尹,欲使覘伺朝廷。嶠至,具言敦逆謀。帝欲討之,知其爲物情所畏

服,乃偽言敦死,於是下詔曰:

盛夏來至,輒以天官假授私屬,將以威脅朝廷,傾危宗社。 股愍其狂戾,冀其覺悟,故 酷罰,熒熒在疾,哀悼靡寄。而燉曾無臣子追遠之誠,又無輔孤同獎之操,繕甲聚兵, 合阻心,人情同憤。先帝含垢忍恥,容而不責,委任如舊,禮秩有加。朕以不天,尋丁 之後,劫掠城邑,放恣兵人,侵及宮省,背違赦信,誅戮大臣,縱凶極逆,不朝而退。六 **隗立朝不允,敦抗義致討,情希鬻拳,兵雖犯順,猶嘉乃誠,禮秩優崇,人臣無貳。事解** 或內或外,夾輔之勳,與有力焉。階緣際會,遂據上宰,杖節專征,委以五州。刁協、劉 且含隱以 先帝以聖德應運,創業江東,司徒導首居心膂,以道翼讚。故大將軍敦參處股肱, 觀其終。 而敦矜其不義之强,有侮弱朝廷之志,棄親用羇,背賢任惡。

列

鳳承凶宄,彌復煽逆。是可忍也,孰不可忍也! 冶工,輒割運漕,志騁凶醜,以闚神器。社稷之危,匪夕則旦。天不長姦,敦以隕斃。 多樹私黨,莫非同惡,自未有宰相繼體而不由王命者也。 天下駭心,道路以目。 豎子,專爲謀主,逞其凶慝,誣罔忠良。 構,殘夷其宗。 秦人之酷,刑不過五。敦之誅戮,傍濫無辜,滅人之族,莫知其罪。 。神怒人怨,篤疾所嬰,昏荒悖逆,日以滋甚,輒立兄息以自承代, 周嵩亮直,讜言致禍,周札、周莚累世 **頑凶相獎,無所顧忌,擅錄** 忠義,聽

罪。罪止一人,朕不濫刑。有能殺鳳送首,封五千戶侯,賞布五千匹。 軍虎,右衞將軍胤,護軍將軍詹,領軍將軍瞻,中軍將軍虛,驍騎將軍艾,驃騎將軍、南 邃率兗州刺史遐、奮武將軍峻、奮威將軍瞻精銳三萬,水陸齊勢, 脫親御六軍,左衞將 頓王宗,鎭軍將軍、汝南王祜,太宰、西陽王| 蒙被練三千,組甲三萬,總統諸軍,討鳳之 今遣司徒導,鎮南將軍、丹楊尹嶠,建威將軍趙胤武旅三萬,十道並進,平西將軍

情 到奉承,自求多福,無或猜嫌,以取誅滅。敦之將士,從敦彌年,怨曠日久,或父母隕 方任之以事。 其餘文武,諸爲敦所授用者,一無所問,刺史二千石不得輒離所職。 書 :義兼常,往年從敦,情節不展,畏逼首領,不得相違,論其乃心,無貳王室,殷嘉其誠, 冠 **【軍將軍鄧嶽志氣平厚,識經邪正,前將軍周撫質性詳簡,義誠素著,功臣之胄,**

皆遺歸家,終身不調,其餘皆與假三年,休訖還臺,當與宿衞同例三番。明承詔書,朕 沒,或妻子喪亡,不得奔赴,銜哀從役,朕甚愍之,希不悽愴。 其單丁在軍無有兼重者,

不負信。

叉詔曰:「敢有捨王敦姓名而稱大將軍者,軍法從事。」

天子!便盡卿兵勢,保護東海王及裴妃而已。」乃上疏罪狀溫嶠,以誅姦臣爲名。 便當行。」於是以含爲元帥。 鳳等問敦曰:「事克之日,天子云何。」敦曰:「尙未南郊,何得稱 |敦病轉篇,不能御衆,使錢鳳、鄧嶽、周撫等率衆三萬向京師。|含謂敦曰:「此家事,吾

|含至江寧,司徒||導遺||含書曰:

明於門宗,年踰耳順,位極人臣,仲玉、安期亦不足作佳少年,本來門戶,良可惜也! 命,具如檄旨。近有嘉詔,崇兄八命,望兄奬羣賢忠義之心,抑姦細不逞之計,當還武 不謀同辭。都邑大小及二宮宿衞咸懼有往年之掠,不復保其妻孥,是以聖主發赫斯之 姦逆、朝士忿憤、莫不扼腕。去月二十三日,得征北告、劉遐、陶瞻、蘇峻等深懷憂慮、 近承大將軍困篤縣縣,或云已有不諱,悲怛之情,不能自勝。尋知錢鳳大嚴,欲肆 卒奉來告,乃承與犬羊俱下,雖當逼迫,猶以罔然。 兄立身率素,見信

兄之此舉,謂可得如大將軍昔年之事乎。 昔年佞臣亂朝,人懷不寧,如導之徒,心

思外濟。 道和恒有好情,往來人士咸皆明之,方欲委任,與共戮力,非徒無慮而已也。 聰明,德洽朝野,思與賢哲弘濟艱難。不北面而執臣節,乃私相樹建,肆行威福,凡在 孺子者不?諸有耳者皆是將禪代意,至非人臣之事也。先帝中興,遺愛在人。聖主 重安期,安期斷乳未幾日,又乏時望,曰便可襲宰相之迹邪。自開闢以來,頗有宰相 人臣,誰不憤歎!此直錢鳳不良之心聞於遠近,自知無地,遂唱姦逆。至如鄧伯山、周 今則不然。 大將軍來屯于湖,漸失人心,君子危怖,百姓勞弊。將終之日,委

省來告,爲兄羞之,且悲且慚。 是竹素之事,非惟免禍而已。 旦為逆節之臣,負先人平素之志,旣沒之日,何顏見諸父於黃泉,謁先帝於地下邪。執 目 張膽爲六軍之首,寧忠臣而死,不無賴而生矣。但恨大將軍桓文之勳不遂,而兄一 導門戶小大受國厚恩,兄弟顯寵,可謂隆矣。導雖不武,情在寧國。今日之事,明 願速建大計,惟取錢鳳一人,使天下獲安,家國有福,故

城六千人,劉遐已至,征北昨已濟江萬五千人。 可追,兄早思之。大兵一奮,導以爲灼炟也。 夫福· 如反手,用之卽是。以以所統六軍,石頭萬五千人,宮內後苑二萬人,護軍屯金 以天子之威,文武畢力,豈可當乎!事

才兼文武者,世將、處季皆早死,今世事去矣。」語參軍呂寶曰:「我當力行。」因作勢而 帝遣中軍司馬曹渾等擊含于越城,含軍敗,敦聞,怒曰:「我兄老婢耳,門戶衰矣!兄弟 起,困

外,埋于廳事中,與諸葛瑤等恒縱酒淫樂。 乘軺車導從,瞋目令左右執之。俄而敦死,時年五十九。應祕不發喪,裹尸以席,蠟塗其 後,應便卽位,先立朝廷百官,然後乃營葬事。」初,敦始病,夢白犬自天而下嚙之,又見己協 鳳等至京師,屯于水南。帝親率六軍以禦鳳,頻戰破之。敦謂羊鑒及子應曰:「我亡

喉,情離衆沮,鋒摧勢挫,持疑猶豫,必致禍敗。 今若決破栅塘,因湖水灌京邑,肆舟檻之 也。」充不能用,颺逃歸於吳。含復率衆渡淮,蘇峻等逆擊,大敗之,充亦燒營而退。 俱進,衆寡過倍,理必摧陷,中策也。轉禍爲福,因敗爲成,召錢鳳計事,因斬之以降,下策 勢,極水軍之用,此所謂不戰而屈人之兵,上策也。藉初至之銳,幷東南衆軍之力,至一十道 沈充自吳率衆萬餘人至,與含等合。充司馬顧颺說充曰:「今舉大事,而天子已扼其

宜依崔杼 同日懸于南桁,觀者莫不稱慶。 、王凌故事,剖棺戮尸,以彰元惡。」於是發瘞出尸,焚其衣冠,跽而刑之。。敦、宄首 敦首既懸,莫敢收葬者。 尚書令郗鑒言於帝曰:「昔王莽漆

旣而

周光

斬錢鳳,吳儒斬沈充,並傳首京師。

有司議曰:「王敦滔天作逆、有無君之心、

列

傅

第

然 以爲可聽私葬,於義爲弘。」詔許之,於是敦家收葬焉。。含父子乘單船奔荆州刺史王舒,舒 頭 以 春秋許齊襄之葬紀侯、魏武義王修之哭袁譚。 朝車,董卓然腹以照市,王凌儭土,徐馥焚首。 由斯言之,王誅加於上,私義行於下。臣 前朝誅楊駿等,皆先極官刑,後聽私殯。

使人沈之于江,餘黨悉平。

汁,有如廁者,皆易新衣而出。客多羞脫衣,而敦脫故著新,意色無怍。 皆有所說,惟敦都無所關,意色殊惡。 十人並放之,時人歎異焉。 必能作賊。」又嘗荒恣於色,體爲之弊,左右諫之,敦曰:「此甚易耳。」乃開後閣,驅諸婢妾數 無人,舉坐歎其雄爽。石崇以奢豪矜物,廁上常有十餘婢侍列,皆有容色,置甲煎粉、沈香 敦眉目疏朗,性簡脫,有鑒裁,學通左氏,口不言財利,尤好淸談,時人莫知,惟族兄戌 經略指麾,千里之外肅然,而麾下擾而不能整。武帝嘗召時賢共言伎藝之事,人人 自言知擊鼓,因振袖揚枹,音節諧韵,神氣自得,傍若 羣婢相謂曰:「此客

騰,敦以爲鎧曹參軍,數得進見。 知敦有不臣之心,因進邪說,遂相朋構,專弄威權,言成禍 福。 遭父喪,外託還葬,而密爲敦使,與沈交構。 沈充字士居。少好兵書,頗以雄豪聞於鄉里。 敦引爲參軍,充因薦同郡錢鳳。 鳳字世 列傳第六十八 王敦

位,鮮不敗業。」敦作色曰:「小人阿誰?」庸無懼容, 起蓋山陵,氛霧蔽日玉石焚。往事旣去可長歎,念別惆悵復會難。」敦知其諷己而 初,敦參軍熊甫見敦委任鳳,將有異圖,因酒酣謂敦曰:「開國承家,小人勿用,佞倖在 因此告歸。 臨與敦別, 因歌 曰:「徂 不 納 風 颰

任! 尾,終不還也。」及敗歸吳興,亡失道,誤入其故將吳儒家。 舉,將行篡弑耳,豈同於往年乎?是以疆場諸將莫不歸赴本朝,內外之士咸願致死,正 「三千戶侯也。」充曰:「封侯不足貪也。 黨類,猶宥其罪,與之更始,況見機而作邪!」充不納。 國易主,義不北面以事之也,奈何協同逆圖,當不義之責乎! **幣厚言甘,古人所畏。** 舍忠與順,未有不亡者也。大將軍阻兵不朝, 爵賞自己, 五尺之童知其異志。 明帝將伐敦,遣其鄉人沈禛 且丈夫共事,終始當同, 諭充,臣許以爲司空。 勁見忠義傳。 爾以大義存我,我宗族必厚報汝。 寧可中道改易,人誰容我!順 率兵臨發,謂其妻子曰:「男兒不豎豹 懦誘|| 沈內重壁中,因笑謂|| 沈曰: 朝廷坦誠,順所知也。云 若必殺我,汝族 今此之 日二不 賊之 善所 以移

王敦歷官中朝,威名夙著,作牧淮海,望實逾隆,遂能託魚水之深期,定金蘭之密契,弱成王 史臣曰:琅邪之初鎭建鄴,龍德猶潛, 雖當壁膺圖預定於冥兆, 豐功厚利未被於黎氓。

位,股肱勠力,用能運茲廟算,殄彼凶徒,克固鴻圖,載清天步者矣。 侍勢逼 而肆驕陵。 **豺聲又發,擅竊國命,殺害忠良,遂欲篡盜乘輿,逼遷龜鼎。** 度,光佐中興,卜世延百二之期,論都創三分之業,此功固不細也。 釁隙起自己劉,禍難成於錢沈。 興晉陽之甲,纏象魏之兵。 賴嗣 君英略、晉祚靈長、諸侯釋 旣而 負勳高而圖非望, 蜂目旣露,

桓溫 孟嘉

終,子彪兄弟三人居喪,置刃杖中,以爲溫備。溫詭稱弔賓,得進,刃彪於廬中,幷追二弟殺 也。」彝爲韓晃所害,涇令江播豫焉。溫時年十五,枕戈泣血,志在復讎。 啼。」及聞其聲,曰:「眞英物也」」彝以嶠所賞,故遂名之曰溫。嶠笑曰:「果爾,後將易吾姓 之,時人稱焉。 桓溫字元子,宣城太守彝之子也。生未春而太原溫嶠見之,曰:「此兒有奇骨,可試位 至年十八,會播已

鬚作蝟毛磔,孫仲謀、晉宣王之流亞也。」選尙南康長公主, 拜駙馬都尉, 襲爵萬寧男,除琅 溫 豪爽有風概,姿貌甚偉,面有七星。少與沛國劉惔善,惔嘗稱之曰:「溫眼如紫石梭,

邪太守,累遷徐州刺史。

溫與庾翼友善,恒相期以寧濟之事。翼嘗薦溫於明帝曰:「也」「桓溫少有雄略,願陛下

勿以常人遇之,常壻畜之,宜委以方召之任,託其弘濟艱難之勳。」翼卒,以溫爲都督荆梁四

州諸軍事、安西將軍、荆州刺史、領護南蠻校尉、假節。

散騎常侍常璩等,皆蜀之良也,並以爲參軍,百姓咸悅。軍未旋而王誓、鄧定、隗文等反,溫 櫬,送于京師。溫停蜀三旬,舉賢旌善,偽尙書僕射王誓、中書監王瑜、〔5〕鎭東將軍鄧定、 等禦之,福退走。 模,乃命參軍周楚、孫盛守輜重,自將步卒直指成都。 城、勢遂夜遁九十里、至晉壽葭萌城、其將鄧嵩、昝堅勸勢降,乃面縛輿櫬請命。 橋,參軍襲護戰沒,衆懼欲退,而鼓吏誤鳴進鼓,於是攻之,勢衆大潰。 復討平之。振旅還江陵,進位征西大將軍、開府,封臨賀郡公。 之上,疊石爲八行,行相去二丈。溫見之,謂「此常山蛇勢也」。文武皆莫能識之。 而 時李勢微弱,溫志在立勳于蜀,永和二年,率衆西伐。 朝廷以蜀險遠,而溫兵寡少,深入敵場,甚以爲憂。 溫又擊權等,三戰三捷,賊衆散,自間道歸成都。 勢使其叔父福及從兄權等攻彭模,楚 時康獻太后臨朝,溫將發, 初,諸葛亮造八陣圖於魚復 勢於是悉衆與溫戰于管 溫乘勝直進,焚其小 溫解縛焚 及軍次彭 平沙

以抗己,溫甚忿之,然素知浩,弗之憚也。以國無他釁,遂得相持彌年,雖有君臣之跡,亦相 羈 · 縻而已,八州士衆資調,殆不爲國家用。 及石季龍死、溫欲率衆北征,先上疏求朝廷議水陸之宜,久不報。 擊言北伐,拜表便行,順流而下,行達武昌,衆四 時知朝廷杖殷浩等

列

第

五萬。 為撫軍,與溫書明社稷大計,疑惑所由。溫卽迴軍還鎭,上疏曰: 殷浩慮爲溫所廢,將謀避之,又欲以騶虞幡住溫軍,內外噂略,人情震駭。 簡文帝時

說,以惑朝聽? 今歷年矣。 丹誠坦然,公私所察,有何纖介,容此嫌忌? 豈醜正之徒心懷怵惕,操弄虛 會,匹夫有志,猶懷憤慨,臣亦何心,坐觀其弊!故荷戈驅馳,不遑寧處,前後表陳,于 蔽,忝荷重任,雖才非其人,職在靜亂。 寇讎不滅,國恥未雪,幸因開泰之期,遇可乘之 妄生疑惑,辭旨危急,憂及社稷。省之惋愕,不解所由,形影相顧,隕越無地。臣以闇 臣近親率所統,欲北掃趙魏,軍次武昌,獲撫軍大將軍、會稽王昱書,說風塵紛紜,

公,所務者國,然外難未弭,而內弊交興,則臣本心陳力之志也。 横 寇賊冰消,大事垂定,晉之遺黎鵠立南望,赴義之衆慷慨卽路,元凶之命懸在漏刻,而 通於羣才,布德信於遐荒。況臣世蒙殊恩,服事三朝,身非羈旅之賓,跡無韓彭之釁, 患,存亡之所由也。今主上富於陽秋,陛下以聖淑臨朝,恭己委任,責成羣下,方寄會 而 反間起於胸心,交亂過於四國,此古賢所以歎息於旣往,而臣亦大懼於當年也。今 '議妄生,成此貝錦, 使垂滅之賊復獲蘇息, 所以痛心絕氣, 悲慨彌深。 昔樂

毅竭誠,垂涕流奔,霍光盡忠,上官告變。

讒說殄行,姦邪亂德,乃歷代之常 臣雖所存者

進位太尉,固讓不拜。

沖所破。 陣,殺溫將應誕 郷,步自淅 怨, 爲軍資,而健芟苗淸野,軍糧不屬,收三千餘口 堵復業,持牛酒迎溫於路者十八九,耆老感泣曰:「不圖今日復見官軍 進擊靑泥, 乃奏廢浩, 時 殷浩至洛陽 雄遂馳襲司 破之。 Ш 以征 自此 劉泓 關 健又遣子生、 修 內外大權 中, 馬勳 復 ,死傷千數。 命梁州 園陵, 勳退次女媧堡。 經涉數年,屢戰 歸溫 刺 弟雄衆數萬屯嶢柳、愁思塠以距溫,亞遂大戰, 史司馬勳出子午道。 溫軍 矣。 ·力戰, 溫 逐統 溫進至霸上,健以五 生衆乃散。 屢敗, 而還。 步騎 四萬發江陵,水軍自襄陽 器械都盡。 帝使侍中黃門勞溫于 別軍攻上洛,獲苻健荆州 雄 又與將軍 千人深溝 溫復進督 」初,溫恃麥熟, 桓沖戰白鹿原, 自固 司州, 襄 入 ,居人皆安 均口 刺史郭敬, 生親 因朝 叉為 自陷 野之 取以

赤,形甚似,恨短,聲甚 |空。」|溫大悅,出外整理衣冠,又呼 方得一巧作老婢,訪之,乃强伎女 初,溫 自 以雄 ·麥風氣是宣帝、劉琨之儔,有以其比王敦者, 似,恨雌。」溫於是褫 婢問。 也,一見溫, 婢云:「面甚似,恨薄,〔10〕眼甚似,恨小,鬚甚似,恨 冠解帶,昏然 便潸然 而 泣。 而睡,不怡者 溫問 意甚不平。 其故, 數 答 H 曰:「公甚似劉 及是征還, 於北

謁 者 監護喪事 母 孔氏 卒,上疏解 ,旬月之中,使者八至,軺軒相望於道。 職,欲送葬宛陵, 詔 不 許。 贈臨賀 溫 葬畢 太夫人印 視事,欲 綬,諡 修復園陵,移都洛陽, 日 敬, 遣 侍 中 弔

疏十餘上, 進溫征討大都督、督司冀二州諸軍事,委以專征之任

芒而 京都。 豊 **猶**如 守滕畯出黃城,討蠻賊文盧等,又遣江夏相劉姑、義陽太守胡驥討妖賊李弘,皆破之, 皆繕復之,兼置陵令。遂旋軍, 北,距水而戰。 遠,曾不若一羸牸,魏武入荆州,以享軍士。」意以況宏,坐中皆失色。 中原、慨然曰:「遂使神州陸沈、百年丘墟、王夷甫諸人不得不任其責」」袁宏曰:「運有興廢、 次子 豫兵乘淮泗入河。 |必諸人 之 過 |] 溫作色謂四座曰:「頗聞||劉景||)有千斤大牛,噉芻豆十倍於常牛,負重致 西走,追之不及,遂奔平陽。 、此,人何以堪·」攀枝執條,泫然流涕。於是過淮泗,踐北境,與諸僚屬登平乘樓,眺矚 溫 遣 溫還軍 唇護高武據魯陽,輔國將軍戴施屯河上,勒舟師以逼許洛,以騰梁水道旣通,請徐 之後,司、豫、靑、兗復陷于賊。升平中,改封南郡公,降臨賀爲縣公,以封其 溫結陣而前,親被甲督弟沖及諸將奮擊,襄大敗,自相 溫自江陵北伐,行經金城,見少爲琅邪時所種柳皆已十圍, 慨然曰:「木 執降賊周成以歸,遷降人三千餘家於江漢之間。 溫屯故太極殿前,徙入金墉城,謁先帝諸陵,陵被侵毁者 殺死者數千人,越北 師次伊水,姚襄 遣西陽 傳首 屯水 太

肺、并欲還都洛陽、上疏曰: 和 初,寇逼 河南,太守戴施出奔,冠軍將軍陳祐告急,溫使竟陵太守鄧遐率三千人助

陛下稟乾坤自然之姿,挺羲皇玄朗之德,鳳棲外藩,龍飛皇極,時務陵替,備徹 之情偽,盡知之矣。是以九域宅心,幽遐企踵,思佇雲羅,混網四裔。 , 賊雙起,海內崩裂,河洛蕭條,山陵危逼,所以遐邇悲惶,痛心於旣往者也。 巴蜀旣平,逆胡消滅,時來之會旣至,休泰之慶顯著。 而人事乖違,屢喪王略, 誠宜遠圖廟算, 天聽,人 伏惟

大存經 悔。 逆知滅亡之無日, 垂,廢神 無滯,明哲尙於應機,砎如石焉,所以成務。 靈休,天人齊契!今江河悠闊,風馬殊邈,故向義之徒覆亡相尋,而建節之士猶繼 況辰 一略,光復舊京,疆理華夏,使惠風陽澤洽被八表,霜威寒飇陵振無外,豈不 州 極旣迴,衆星斯仰,本源旣運,枝泒 、於龍漠,令五尺之童掩口 騁思順之心,鼓雷霆之勢,則二豎之命不誅而自絕矣。 而 歎息。 若乃海運旣徙,而鵬翼不舉,永結根於南 自遷,則晉之餘黎欣皇德之攸憑,羣凶 故員 通 允應 貴 踵

於

妖

無

載,先舊徂沒,後來童幼,班荆輟音,積習成俗, 之,不覺悲歎!臣雖庸劣,才不周務,然攝官承乏,屬當重任,願竭筋骨,宣力先鋒,翦 以 露惟均,冠冕萬 · 待龍伸之會,潛蟠以俟風雲之期,蓋屯圮所鍾,非理 **夫先王經始,玄聖宅心,畫爲九** .國,朝宗四海故也。 州,制爲 自强胡 陵暴,中華蕩覆,狼狽 、九服,貴中區而內諸夏,誠以晷度 遂望絕於本邦, 宴安於所託。 勝 而 然也。 失據,權幸揚越,蠖屈 而喪亂 緬 邈,五 自中,霜 眷言悼 干餘

除荆 修,綱 土字,勤農桑之務,盡三時之利,導之以義,齊之以禮,使文武兼宣,信順交暢,井邑旣 棘 維 粗 諸豺狼。 .舉。 然後陛下建三辰之章,振旂旗之旌,冕旒鍚鑾,朝服濟江,則宇宙之內 自永嘉之亂,播流江表者,請一切北徙,以實河南,資其舊業,反其

誰

不幸

外,責臣以興復之效,委臣以終濟之功。此事旣就,此功旣成,則陛下盛勳比隆前代, 周宣之詠復興當年。 夫人情昧安,難與圖始,非常之事,衆人所疑。伏願陛下決玄照之明,斷常均之 如其不效,臣之罪也,褰裳赴鑊,其甘如薺。

洛 滌氛穢,廓淸中畿,光復舊京,非夫外身殉國,孰能若此者哉!諸所處分,委之高算。 詔 表辭不受。 丘 曰:「在昔喪亂,忽涉五紀,戎狄肆暴,繼襲凶跡,眷言西顧,慨歎盈懷!知欲躬率三軍,蕩 | 墟,所營者廣,經始之勤,致勞懷也。」於是改授|丼、同、冀三州,以||夾||廣遼遠,罷都督,溫 又加侍中、大司馬、都督中外諸軍事、假黃鉞。 但 河

停廢,常行文案宜爲限日。 競,莫使能植。 其六,宜述遵前典,敦明學業。其七,宜選建史官,以成鬥書。 溫 以旣總督內外,不宜在遠,又上疏陳便宜七事:其一,朋黨雷同,私議沸騰,宜抑杜浮 其二,戶口 凋寡,不當漢之一 其四,宜明長幼之禮,獎忠公之吏。 郡,宜幷官省職,令久於其事。 有司皆奏行之。 其五,褒貶賞罰,宜允其實。 其三,機務不可 尋加羽葆鼓

吹, 置左右長史、司馬、從事中郞四人。 受鼓吹,餘皆辭。 復率舟軍進合肥。 加揚州牧、錄

尚書事,使侍中顏旄宣旨,召溫入參朝政。 溫上疏日

敢背 勢處 苦, 於 顧 寇,廣宜皇靈,襟帶秦趙 圖 、戎狄。 以江漢 若得解帶逍 **豈敢** 之而 方攘 上流,江湖 **勒逐!** 無怨, 若 艱難,不同曩日,而 除羣凶,掃平禍亂,當竭天下智力,與衆共濟,而朝議咸疑, 憑宗廟之靈 悠遠, 遙,鳴玉闕廷,參贊無爲之契,豫聞曲成之化,雖實不敏,豈不是願 願 至於入參朝政, 奮臂投身造事 當制命侯伯, 一遠不 一,則 雲徹 益梁新平,寧州始服,懸兵漢川, 五 非所敢聞。 席 載,大事 中原者,實恥帝道皇居仄陋於 卷,呼 自 非望實重威, 必 吸蕩淸。 定。 臣違離宮省二十餘載, 如當假息游 無以鎭御 遐外。 戍禦彌廣,加强 魂, 東 水南,痛; 則 **鞸棒戎務**,役勤 臣據 臣 聖詔彌固,事異本 知 神 河洛,親 拾此之艱 華桑梓 **蠻盤** 逐埋 但 思

圉 今臣是 表 裏 相 濟,實深實 以 親賢贊國 重。 一光輔 伏願 _ 世, 陛下察臣 卽 無煩 所陳, 以臣 疏 兼 鈍,並 訪 內 外,乞 間 機務。 時還屯 且不有行者,誰扞牧 撫寧方隅

詔 屬 鮮 不 卑 攻洛陽,陳祐出奔,簡文帝時輔政,會溫於洌洲 復徽 溫 溫 至 赭圻, 詔 叉使 尙 書車灌 止之, 溫 逐城 議征 赭圻 討事,溫移鎭姑孰 固 讓 內 錄 遙領! 會哀帝崩 揚 州

事遂寢。

列傳第六十八 桓溫

寂寂 當 溫竊窺之。 嘗行經王敦墓,望之曰:「可人,可人」其心迹若是。 四如是。」 溫性儉, ,將爲文景所笑。」衆莫敢對。 尼倮身先以刀自破腹,次斷兩足。浴竟出,溫問吉凶,尼云:「公若作天子,亦 每讌惟下七奠柈茶果而已。然以雄武專朝,窺覦非望,或臥對親僚曰:「爲爾 旣而撫枕起曰:「旣不能流芳後世,不足復遺臭萬載邪」」 時有遠方比丘尼名有道術,於別室浴,

苻堅 頭。 陸,四以東容暐將慕容忠,獲之, 敗績,死者三萬 舟步退,自東燕出倉垣,經凍留,鑿井而飲,行七百餘里。 舟運,自清水入河。

障將慕容垂、傅末波等率衆八萬距溫,戰于林渚。 刺 史, 先使袁眞伐騰梁,開石門以通運。 、慕容暐 率弟南中郎沖、西中郎袁眞步騎五萬北伐。 四年,又上疏悉衆北伐。平北將軍郗愔以疾解職,又以溫領平北將軍、徐兗二州 人。 溫甚恥之,歸罪於眞,表廢爲庶人。 進次金鄉。時亢旱,水道不通,乃鑿 **眞討譙梁皆平之,而不能開石門,** 百官皆於南州祖道,都邑盡傾。 **真怨溫誣己,據壽陽以自固 垂以八千騎追之,戰于襄邑,溫** 鉅 溫擊破之, 軍 野三百餘里以通 ·糧竭盡。 軍次湖 逐至 潛 溫 焚 枋

將軍 豫州刺史、假節。 帝遣侍中羅含以牛酒搞溫於山陽,使會稽王昱會溫于涂中,詔以溫世子給事熈爲征虜 及南康公主薨,詔賻布千匹,錢百萬,溫辭不受。 又陳息熙三年之

孤,且年少未宜使居偏任,詔不許。 發州人築廣陵城,移鎭之。時溫行役旣久,又兼疾癘,

死者十四五,百姓嗟怨。

於路次,文武論功賞賜各有差。 送於京都而斬之,運所侍養乞活數百人悉坑之,以妻子爲賞。溫以功,詔加班劍十人,犒軍 固守,溫築長圍守之。一苻堅乃使其將王鑒、張蚝等率兵以救瑾,屯洛澗,先遣精騎五千次於 之等與水軍擊之。時暐軍已至,瑤等與戰於武丘,破之。溫率二萬人自廣陵又至,瑾嬰城 袁眞病死,其將朱輔立其子瑾以嗣事。慕容暐、苻堅並遣軍援瑾,溫使督護竺瑤、矯陽 溫遣桓伊及弟子石虔等逆擊,大破之,瑾衆遂潰,生擒之,并其宗族數十人及朱輔

都 輿入朝,旣見,欲陳廢立本意,帝便泣下數十行,溫兢懼不得一言而 絹二萬匹,布十萬匹。溫多所廢徙,誅庾倩、殷涓、曹秀等。是時溫威勢翕赫,侍中謝安見 而遙拜,溫驚曰:「安石,卿何事乃爾!」安曰:「未有君拜於前,臣揖於後。」時溫有腳疾,詔乘 進廢立之計,溫乃廢帝而立簡文帝。詔溫依諸葛亮故事,甲仗百人入殿,賜錢五千萬, 溫旣負其才力,久懷異志,欲先立功河朔,還受九錫。旣逢覆敗,名實頓減,於是參軍 岜。

人姓李,兒專 初,元 明世 「郭璞爲讖曰:「君非無嗣,兄弟代禪。」謂成帝有子,而以國祚傳弟。又曰: 征 戦 譬如車軸,脫在一面。」見者,子也,李去子木存,車去軸爲三,台成

列傳

第

國,而其死亦晉衰之由也,故云痛也。 其暮。」二子者,元子、道子也。溫志在篡奪,事未成而死,幸之也。會稽王道子雖首亂晉 縣,溫也。 成康旣崩,桓氏始大,故連言之。又曰:「賴子之薨,延我國祚。痛子之隕,皇運 又曰:「爾來,爾來,河內大縣。」爾來謂自爾已來爲元始,溫字元子也,故门內大

進公丞相,其大司馬本官皆如故,留公京都,以鎭社稷。」溫固辭,仍請還鎭。 遣侍中王坦之 萬斛,又以熈弟濟爲給事中。 徵溫入相,增邑爲萬戶,又辭。詔以西府經袁眞事故,軍用不足,給世子熈布三萬匹,米六 明德應期,光大深遠,上合天心,含章時發,用集大命,在予一人,功美博陸,道固萬世。今 利。古之哲王咸賴元輔,姬旦光于四表,而周道以隆,伊尹格于皇天,而殷化以洽。大司馬 溫復還白石,上疏求歸姑孰。詔曰:「夫乾坤體合,而化成萬物,二人同心,則不言所

漢高枕疾,呂后問相,孝武不豫,霍光啓嗣。嗚噎以問身後,蓋所存者大也。今皇子幼稚, 四詔。溫上疏曰:「聖體不和,以經積日,愚心惶恐,無所寄情。 夫盛衰常理,過備無害,故 而朝賢時譽惟謝安、王坦之才識智能皆簡在聖鑒。內輔幼君,外禦强寇,實羣情之大懼,然 盡於此。陛下便宜崇授,使羣下知所寄,而安等奉命陳力,公私爲宜。至如臣溫位兼將 及帝不豫,詔溫曰:「吾遂委篤,足下便入,冀得相見。便來,便來」於是一日一夜頻有

詔家 公居攝。 相,加陛下垂布衣之顧,但朽邁疾病,懼不支久,無所復堪託以後事。」疏未及奏而 國事 事旣不副所望,故甚憤怨,與弟沖書曰:「遺詔使吾依武侯、王公故事耳。 王、謝處 一稟之於公, 如諸葛武侯、王丞相故事。 溫初望簡文臨終禪位於己,不爾便爲周 帝崩,遺

大事之際,日憤憤少懷。」

識也。 皇太后與帝臨於朝堂三日,詔賜九命衮冕之服,又朝服一具,衣一襲,東園秘器,錢二百萬, 側。」初,殷浩旣爲溫所廢死,涓頗有氣尙,遂不詣溫,而與武陵王晞游,故溫疑而害之,竟不 拜高平陵, 左右覺其有異, 旣登車, 謂從者曰:「先帝向遂靈見。」旣不述帝所言, 故衆莫之 其無敬。」又敕尚書安等於新亭奉迎,百僚皆拜于道側。當時豫有位望者咸戰慴失色,或云 加己九錫,累相催促。謝安、王坦之聞其病篤,密緩其事。錫文未及成而薨,時年六十二。 知,但見將拜時頻言「臣不敢」而已。又問左右殷涓形狀,答者言肥短,溫云:「向亦見在帝 因此殺王、謝,內外懷懼。 吹,武賁六十人,溫讓不受。及溫入朝,赴山陵,詔曰:「公勳德尊重,師保朕躬,兼有風患, 馬社稷所寄,先帝託以家國,內外衆事便就關公施行。」復遣謝安徵溫入輔,加前部羽葆鼓 及孝武即 及是,亦見涓爲祟,因而遇疾。凡停京師十有四日,歸於姑孰,遂寢疾不起。諷朝廷 ;位,詔曰:「先帝遺敕云:『事大司馬如事吾。』令答表便可盡敬。」又詔:「大司 溫旣至,以盧悚入宮,乃收尚書陸始付廷尉,責替慢罪也。 於是

列傳

戶,進地方三百里,賜錢五千萬,絹二萬匹,布十萬匹,追贈丞相。 輅,黃屋左纛,輼輬車,挽歌二部,羽葆鼓吹,武賁班劍百人,優册卽前南郡公增七千五百 布二千匹,臘五百斤,以供喪事。 及葬,一依太宰安平獻王、漢大將軍霍光故事,賜九旒鸞

無益 |於沖,更失時望,所以息謀。 初,沖問溫以謝安、王坦之所任,溫曰:「伊等不爲汝所處分。」溫知己存彼不敢異,害之

玄嗣爵, 秦梁五州諸軍事 臨賀公。 病,熈與叔祕謀殺沖,沖知之,徙于長沙。 溫六子:熙、濟、歆、三三禕、偉、玄。 別有傳。 禪最愚,不辨菽麥。 、安西將軍、領南蠻校尉、荆州刺史、西昌侯、贈驃騎將軍、開府儀同三司。 偉字幼道,平厚篤實,居蕃爲士庶所懷。歷使持節 熙字伯道,初爲世子,後以才弱,使沖領其衆。 濟字仲道,與熈同謀,俱徙長沙。 飲字叔道,賜爵 督荆 及溫 益寧

故是盛德 事 坐次甚遠。 嘉還都,亮引 孟嘉字萬年,江夏郿人,吳司空宗會孫也。 人。」轉勸學從事。 度問亮:「聞江州有孟嘉,其人何在。」亮曰:「在坐,卿但自覓。」 良歷觀,指嘉謂 問風俗得失,對曰:「還傳當問 褚裒時爲豫章太守,正 東。」亮舉麈尾掩口 嘉少知名,太尉庾亮領江州,辟部廬陵從 旦朝亮,裒有器識,亮大會州府人士,嘉 而 笑,謂弟翼曰:「孟嘉

亮曰:「此君小異,將無是乎。」亮欣然而笑,喜哀得嘉,奇嘉爲裒所得,乃益器焉。

孫盛作文嘲嘉,著嘉坐處。嘉還見,即答之,其文甚美,四坐嗟歎。 風至,吹嘉帽墮落,嘉不之覺。溫使左右勿言,欲觀其舉止。嘉良久如廁,溫令取還之,命 後爲征西桓溫參軍,溫甚重之。九月九日,溫燕龍山,僚佐畢集。時佐吏並著戎服,有

問:「聽妓,絲不如竹,竹不如肉,何謂也。」」嘉答曰:「漸近使之然。」「三一坐咨嗟。轉從事中 郎,遷長史。年五十三卒于家。 嘉好酣飲,愈多不亂。溫問嘉:「酒有何好,而卿嗜之。」 嘉曰:「公未得酒中趣耳。」又

形勝 修復 立威,殺人以逞欲,曾弗知寶命不可以求得,神器不可以力征。 逮乎石門路阻,襄邑兵摧,懟謀略之乖違,恥師徒之撓敗,遷怒於朝廷,委罪於偏裨,廢主以 思齊,睥睨漢廷,窺覦周鼎。 場多虞,受寄扞城,用恢威略,乃踰越險阻,戡定岷峨,獨克之功,有可稱矣。及觀兵洛汭, 之地,自謂英猷不世,勳績 五 史臣曰:桓溫挺雄豪之逸氣,韞文武之奇才,見賞通人,夙標令譽。時旣豺狼孔熾,疆 |陵,引旆||秦郊,威懷三輔,雖未能梟除凶逆,亦足以宣暢王靈。 旣而總戎馬之權,居 復欲立奇功於趙魏,允歸望於天人,然後步驟前王,憲章虞夏。 泛冠時。 挾震主之威,蓄無君之志,企景文而慨息,想處仲而 **豈不悖哉 豈不悖哉!斯**

實斧鉞之所宜加,人神之所同棄。 然猶存極光寵,沒享哀榮,是知朝政之無章,主威之不

立也。

心窺舜禹。 贊曰:播越江潰,政弱權分。 樹威外略,稱兵內侮。 元子恃力,處仲矜勳。 惟身與嗣,竟罹齊斧。 迹旣陵上,志亦無君。 罪浮浞躄,

校勘記

莫非同惡 「非」,各本作「能」,宋本作「非」,與通志一三〇合,今從之。

安期斷乳未幾日又乏時望「未」,各本作「來」;「乏」,各本作「於」。今從宋本作「未」、作「乏」。

□ 」皆是將禪代意 通志一三○「皆」下有「謂」字。

幷東南衆軍之力 通鑑 九三作「幷東西衆軍之力」,胡注云:東軍謂沈充軍, 西軍謂王含、錢鳳

等軍也。按:疑此「南」字誤。

C. 新 沈 液 通鑑九三「 禎」作「 楨」。

「公」前所知也「知」、各本作「具」。今從宋本、吳本。

翼嘗薦溫於明帝 舉正:「明帝」、翼傳作「成帝」、為是。按:通鑑九七亦作「成帝」。

[八] 王瑜 李班、李勢載記作「王嘏」。 疑此誤。

へたし 愁思塠 「塠」,各本作「搥」,今從殿本。 載記作「堆」、「堆」「塠」同。

C10)面甚似恨薄。御覽五〇〇引「面」作「脣」。

[l] 湖陸 見卷一四校記。

歆 「歆」,各本作「韵」。 斠注: 世說政事注引桓氏譜云畝字叔道,溫第三子。 「韵」當爲「歆」字

之誤。按"桓玄傳亦作「歆」,今據改。

一漸近使之然 世說識鑒注引嘉別傳作「漸近自然」。

晉書卷九十九

列傳第六十九

桓玄

玄,有光照室,占者奇之,故小名靈寶。 妳媼每抱詣溫,輒易人而後至,云其重兼常兒,溫甚 墜銅盆水中,忽如二寸火珠,冏然明淨,競以瓢接取,馬氏得而呑之,若有感,遂有娠。 桓玄字敬道,一名靈寶,大司馬溫之孼子也。其母馬氏嘗與同輩夜坐,於月下見流星 及生

愛異之。臨終,命以爲嗣,襲爵南郡公。

衆咸憚之,朝廷亦疑而未用。年二十三,始拜太子洗馬,時議謂溫有不臣之跡,故折炫兄弟 面,衆並異之。及長,形貌瓊奇,風神疏朗,博綜藝術,善屬文。常負其才地,以雄豪自處, 年七歲,溫服終,府州文武辭其叔父沖,沖撫玄頭曰:「此汝家之故吏也。」玄因涕淚覆

列傳第六十九 桓玄

而爲素官。

太元末,出補義興太守,鬱鬱不得志。 嘗登高望震澤, 歎曰:「父爲九州伯,兒爲五湖

長」、棄官歸國。自以元勳之門而負謗於世,乃上疏曰

邑雖昏,弊無三孼。 四凶 王之師、功非一捷。 室永安,祖宗血食,於陛下一門,實奇功也。 邪枉之路者也。先臣勤王艱難之勞,匡復克平之勳,朝廷若其遺之,臣亦不復計也。 往,蒙謗清時,聖世明王黜陟之道,不聞廢忽顯明之功,探射冥冥之心,啓嫌謗之塗,開 巴蜀,北清伊洛,使竊號之寇繫頸北闕,園陵修復,大恥載雪,飲馬灞滻,懸旌趙魏,勤 之刺,惡直醜正,何代無之!先臣蒙國殊遇,姻婭皇極,常欲以身報德,投袂乘機,西平 至於先帝龍 一兼澄。 臣聞周公大聖而四國流言,樂毅王佐而被謗騎劫,巷伯有豺獸之慨,蘇公興飄風 向使此功不建,此事不成,宗廟之事豈可孰念!昔太甲雖迷,商祚無憂,昌 **「飛九五,陛下之所以繼明南面,請問談者,誰之由邪?誰之德邪?豈惟曆** 因茲而言,晉室之機危於殷漢,先臣之功高於伊霍矣。 太和之末,皇基有潛移之懼,遂乃奉順天人,翼登聖朝,明離旣朗, 而負重旣

復何 說,臣等自當奉還三封,受戮市朝,然後下從先臣,歸先帝於玄宮耳。若陛下述遵先 理可以苟 自 頃 .權門日盛,醜政實繁,咸稱述時旨,互相扇附,以臣之兄弟皆晉之罪人,臣等 存聖 世? 何顏可以尸饗封祿? 若陛下忘先臣大造之功,信 貝 錦萋菲之

旨,追錄舊勳,竊望少垂愷悌覆蓋之恩。

疏寢不報。

文之舉也。」仲堪持疑未決。 <u> 玄乃求爲廣州,會稽王道子亦憚之,不欲使在荆楚,故順其意。</u> 廷,己當悉荆楚之衆順流而下,推汪爲盟主,僕等亦皆投袂,當此無不響應。 之。」一件堪曰:「憂之久矣,君謂計將安出。」玄曰:「國寶姦兇,天下所知,孝伯疾惡之情每 以爲允,咸謂君雖有思致,非方伯人。若發詔徵君爲中書令,用殷顗爲荆州,曰己君 之地,正情爲朝野所重,必未便動之,唯當以君爲事首。 君爲先帝所拔,超居方任,人 對,唯患相弊之不速耳。今旣執權要,與王緒相爲表裏,其所迴易,罔不如志。|孝伯居元舅 方鎭,內外騷動,知王恭有憂國之言,玄潛有意於功業,乃說仲堪曰:「國寶 而當,今日之會,以理推之,必當過人。君若密遣一人,信說王恭,宜興晉陽之師,以內匡朝 俄而王恭信至,招仲堪及玄匡正朝廷。 刺史殷仲堪甚敬憚之。及中書令王國寶用事 國寶旣死,於是兵罷。 與君諸人素已爲 此事旣行,桓 ,謀削 何 (情未 以 處 弱

年,王恭又與庾楷起兵討江州刺史王愉及譙王尚之兄弟。」玄、仲堪謂恭事必克捷,一時響 仲堪給玄五千人,與楊佺期俱爲前鋒。軍至湓口,王愉奔於臨川,玄遣偏將軍追獲之。 隆安初,韶以玄督交廣二州、建威將軍、平越中郎將、廣州 刺史、假節,玄受命不

得志,乃連名上疏申理王恭,求誅尚之、牢之等。 韶以 玄、佺期至石頭,仲堪 玄爲江州 荆州豪縱,士庶憚之,甚於州牧。 ,仲堪等皆被換易,乃各迴舟 至蕪湖。 恭將劉牢之背恭歸順。 西還,屯於 仲堪親黨勸殺之, 朝廷深憚之,乃免桓脩、復仲堪 尋陽, 恭旣 死,庾楷 共 相 仲堪 結約,推玄 戦 不 敗,奔於 聽。及還 爲盟主。 玄 以 軍 尋陽,資 相 和解。 玄始 而

寒士 裁之,佺期 於是各奉韶還鎭。 地,故推 玄在 爲盟主,玄逾自矜重。 甚處,即欲於壇所襲玄 玄亦知佺期有異謀,潛有吞幷之計,於是屯於夏口。 **佺期爲人驕悍,常自謂承藉華胄,江表莫比,而」玄每以** 仲堪惡怪期兄弟婋勇,恐克玄之後復爲己害,苦禁

初,

襲玄。 佺期 分佺 期 陵,宜共罪之。 結 聽 一,乃出 旣 期 旣 婚 隆 至,以 仲堪 安 不 所 爲 能 督 援。 中,韶加 廣 獨 雖 四 爲 爲 舉,且 外 郡 初,玄旣 宜都 今親率戎旅,逕造金墉,使仲堪收楊廣, 諮 結
住
期 與玄 玄都督荆州 議 參軍。 不 建平二 測 佺期甚忿懼。 與仲堪、佺期 而疑其心、距而 仲堪本意,遂息 玄於是興軍 郡太守,加征虜將軍 四郡,以兄偉爲輔國將軍、南蠻校尉。 ?有隙, 會姚 西征 不許,猶慮弗能禁,復遣從弟適屯於北境以遏佺期 甲。 興侵洛陽,佺期乃建牙, 恒慮掩襲,求廣其所統。 一,亦聲 南 蠻校尉楊廣,佺期之兄也,欲距桓偉,仲堪 云救洛,與 佺期弟孜敬先 如其不爾,無以相信。 (仲堪 書,說佺期受國 爲江夏相,玄 聲云援洛,密欲與仲堪共 仲堪慮玄跋扈,遂與佺 朝廷亦欲成其釁隙,故 以兵襲 仲堪本計欲 恩而 而召 棄 Щ

兩全之,旣得」玄書,知不能禁,乃曰:「君自沔而行,不得一人入江也。」」玄乃 止

當之所鎭,路經夏口,玄聲云朝廷遣銓爲己前鋒,三乃授以江夏之衆,使督 後 兄偉令爲內應。 荆 玄曰:「仲堪爲人不能專決,常懷成敗之計,爲兒子作慮,我兄必無憂矣。」 州 大水,仲堪振恤飢者,倉廩空竭。 偉遑遽不知所爲,乃自齎疏示仲堪。 玄乘其虚而伐之, 先遣 仲堪執偉爲質,令與玄書, 軍襲巴陵。 諸軍 梁州 並 刺史

獲之。 得,玄令害之。 軍馬頭 ,去江陵二十里,仲堪遣軍數道距之。佺期自襄陽來赴,與兄廣共擊玄,玄懼其銳, 玄 廣爲 既至巴陵,仲堪遣衆距之,爲玄所敗。」玄進至楊口,又敗仲堪弟子道護,乘勝至零 佺期等方復追玄苦戰,佺期敗,走還襄陽,仲堪出奔酇城,玄遣將軍馮該躡佺期, 人所縛,送玄,並殺之。仲堪聞佺期死,乃將數百人奔姚興,至冠軍城,爲該所

用腹 刺史。 刺史、 欲觀釁而進,復 心,兵馬 於 假節, 玄又輒 是遂平荆雍,乃表求領江、荆二州。 日盛,屢 以桓脩 以偉為 Ŀ 一疏請 爲江州 冠軍 上疏 討之。 ·將軍、雍州 求 刺史。 討孫恩,韶 會恩已走,玄又奉詔解嚴。 玄上疏固爭江州, 刺史。 輒不許。 韶以玄都督荆司瘫秦梁益寧七州、後將軍、荆州 時寇賊未平,朝廷難違 其後恩逼京都,玄建牙聚衆,外託勤王,實 於是進督八州及楊豫八郡,復領江州 以偉爲江州,鎭夏口, 其意,許之。玄於是樹 司馬刁暢為

列

傳

第

六

+

九

桓

玄

輔 國將軍,督八郡,鎭襄陽,遣桓振、皇甫敷、馮該等戍湓口。 更招集流人,立綏安郡。又置諸郡丞。 自謂三分有二,知勢運所歸,屢上禎祥以爲已瑞 詔徵廣州刺史刁達、豫章太守郭昶之,玄皆留 移沮漳蠻二千戶於江南,立武

邑 何 不遣。 其將馮該、苻宏、皇甫敷、索元等先攻譙王尚之,尚之敗。 朝 有迴旆之計。 於天下 養 这從兄石生時爲太傅長史,密書報玄。 有延敵 廷構怨,恐事不克,禍及於己,乃密結於後將軍元顯,許爲內應。元興初,元顯稱詔伐玄, 衆,觀釁而 ,罪狀元顯。 初 · 元 顯 ,庾楷旣奔於玄,玄之求討孫恩也,以爲右將軍。 入境自取蹙弱者乎!」玄大悦,乃留其兄偉守江陵,抗表率衆,下至尋陽, 口尚乳臭、劉牢之大失物情、若兵臨近畿、示以威賞、則土崩之勢可翹足而待、 動。 旣過尋陽,不見王師,意甚悅,其將吏亦振。 檄至,元顯大懼,下船而 旣聞元顯將伐之,甚懼,欲保江陵。長史下範之說」玄曰:「公英略威名振 玄本謂揚土饑饉,孫恩未滅,必未遑討己,可得蓄力 不克發。 玄旣失人情,而興師犯順,慮衆不爲用,恒 玄旣解嚴,楷亦去職。 楷以玄方與 劉牢之遣子 庾楷謀泄, 敬宣詣玄降 收絷之。 至姑孰,使 移檄京

嚴 領徐州刺史,又加假黃鉞、羽葆鼓吹、班劍二十人,置左右長史、司馬、從事中郎四人,甲仗 息甲,以副義 玄 至新亭,元顯自潰。 心。」又矯詔加己總百揆,侍中、都督中外諸軍事 玄入京師、矯詔曰:「義旗雲集、罪在元顯。 、丞相、錄尙書事 太傅已別有教,其解 揚州牧,

於交廣 郎袁遵 署太尉、領平西將軍 卞範之爲建武 爲 居太傅府,害太傅中郎毛泰、泰弟游擊將軍邃、太傅參軍荀遜、前豫州刺史庾楷父子、吏部 左 |僕射、加中軍將軍、領選,脩爲右將軍、徐|| 完二州刺史,石生爲前將軍、江州刺史,長史 人上殿。 諸郡 、譙王尙之等,流尙之弟丹楊尹恢之、廣晉伯允之、驃騎長史王誕、太傅主簿毛遁 ,尋追害恢之、允之於道。以兄偉爲安西將軍、荆州刺史,領南蠻校尉,從兄賺 將軍、丹楊尹,王謐爲中書令、領軍將軍。 玄表列太傅道子及元顯之惡,徙道子於安成郡, [三] 害元顯於市。於是玄入 豫州刺史。 又加袞冕之服,綠綟綬,增班劍爲六十人,劍履上殿,入朝 大赦,改元爲大亨。 玄讓丞相, 自

旣 願 至姑孰 靜 根本,以公旦為 玄 將 出居姑孰,訪之於衆,王謐對曰:「公羊有言,周公何以不之魯?欲天下一乎周也。 固辭錄尚 書事、詔許之、而大政皆諮焉、小事則決於桓謙、卞範之。 心。」玄善其對而 不能從。 遂大築城府,臺館山池莫不<u>壯</u>麗,乃出

不趨,讚奏不名

粗 備 京師 時給,頓 時 自 會稽饑荒,玄令賑貸之。 祁 難屢 欣 然。 仆道路死 (構)干戈不戢,百姓厭之,思歸 後乃 陵 者十八九焉。 侮朝廷, 百姓散在江湖採梠,內史王愉悉召之還。 幽擯宰輔, | 玄又害吳興太守高素、輔國將軍竺謙之、 豪奢 一統。 縱 欲, 及玄初至也,黜 衆務繁興, 凡佞,擢儁賢,君子之道 於是 朝野 請米、米旣不多, 失望,人不安 謙之從兄高

列

降爲西道縣公。又發詔爲桓溫諱,有姓名同者一皆改之,贈其母馬氏豫章公太夫人。 也。 平相朗之、輔國將軍劉襲、襲弟彭城內史季武、冠軍將軍孫無終等,皆牢之之黨,北府舊將 功,封豫章公,食安成郡地方二百二十五里,邑七千五百戶,平仲堪、佺期功,封桂陽郡公, 地方七十五里,邑二千五百戶,本封南郡如故。」玄以豫章改封息昇,桂陽郡公賜兄子濬、四 襲兄冀州刺史軌及寧朔將軍高雅之、牢之子敬宣並奔慕容德。 玄諷朝廷以己平元顯

「書畫服玩旣宜恒在左右,且兵凶戰危,脫有不意,當使輕而易運。」衆咸笑之。 行,乃云奉詔故止。 元興二年,玄詐表請平姚興,又諷朝廷作詔,不許。 | 玄本無資力,而好爲大言,旣不克 初欲飾裝,無他處分,先使作輕舸,載服玩及書畫等物。 或諫之,玄曰:

琅邪王司徒,遷太宰,加殊禮,以<u>桓謙爲侍中、衞將軍、開府、錄尚書事,王謐散騎常侍、中書</u> 監,領司徒,桓胤中書令,加桓脩散騎常侍、撫軍大將軍。置學官,敎授二品子弟數百人。 之迹已著,自知怨滿天下,欲速定篡逆,殷仲文、卞範之等又共催促之,於是先改授羣司,解 |玄便作樂。初奏,玄撫節慟哭,旣而收淚盡歡。|玄所親仗唯偉,偉旣死,玄乃孤危。 居內外,恐權傾天下,玄納之,乃以南郡相桓石康爲西中郎將、荆州刺史。偉服始以公除, 又矯詔加其相國,總百揆,封南郡、南平、宜都、天門、零陵、營陽、桂陽、衡陽、義陽、建平十 是歲,玄兄偉卒,贈開府、驃騎將軍,以桓脩代之。從事中郎曹靖之說玄以桓脩兄弟職 而不臣

列傳第六十九 桓玄

父溫 叉諷 叔 那為楚王,揚州牧,領平西將軍、豫州刺史如故,加九錫備 文 爲 爲楚王,南康公主爲楚王后。 天子 左衞,至 御前殿而策授焉。 皇甫敷爲右衞,凡衆官合六十餘人,爲楚官屬。 玄屢偽讓,詔遣百僚敦勸,又云:「當親 以平西長史劉瑾爲尚書,刁逵爲 物, 楚國 玄解平西、豫州、以平西文 置丞相已下,一 中領軍,王嘏 降鑾輿乃受命 爲太常,殷 。」矯韶 遵舊典。 贈

刺史, 偉旣 祭 武 祖 宗七廟。 新野 死, 相 以 國府。 ,石康未至,故乘間而發,江陵震動。 桓濟之子,亮起兵於羅縣,自號 討仄爲名。 人庾仄聞玄受九錫,乃起義兵,襲馮該於襄陽,走之。 南蠻參軍庾彬、安西參軍楊道護、江安令鄧襄子謀爲 南蠻校尉羊僧壽與石康共攻襄陽,仄衆散,奔姚興,彬等皆遇害。 灰有衆七千,於城南設壇, 內應。 平南 仄本 將軍、 仲堪 黨,桓 湘州 長沙

相 陶 延壽 以亮 乘亂起兵,遣收之。 玄徙亮於衡陽、誅其同謀桓奧等。

使衆 士,而已世 是乎始, 玄 好逞 官 玄 1集賀。 僞 偽 六合同 辭 上表 獨 無,乃徵 塵穢簡牘,皆此 求 矯 悦, 詔 歸藩,又自作詔留之,遣使宣旨,玄又上表固請,又諷 曰:「靈瑞之事非所敢聞也,斯誠 情何可言 皇甫謐六世孫希之爲著作,幷給其資用,皆令讓而不受,號曰高士,時 類 」又詐云江州甘露降王成基家竹上。 玄以歷代 咸有肥遁之 也。 謂代謝之際宜有禎祥,乃密令所在上臨平湖開除清 相國至德,故事爲之應。 天子作手詔固留 太平之化,於

逼奪之,皆蒱博而取。遣臣佐四出,掘果移竹,不遠數千里,百姓佳果美竹無復遺餘。 信悅 性貪鄙,好奇異,尤愛寶物,珠玉不離於手。人士有法書好畫及佳園宅者,悉欲歸已,猶難 人名爲「充隱」。 議復肉刑,斷錢貨,迴復改異,造革紛紜,志無一定,條制森然,動害政理

制。 帝以禪位告廟,出居永安宮,移晉神主於琅邪廟。 車,置旄頭雲罕,樂儛八佾,設鍾虡宮縣,妃爲王后,世子爲太子,其女及孫爵命之號皆如舊 玄乃多斥朝臣爲太宰僚佐,又矯詔使王謐兼太保,領司徒,奉皇帝璽禪位於已。又諷 十一月,玄矯制加其冕十有二旒,建天子旌旗,出警入蹕,乘金根車,駕六馬,備五時副

之勳,微禹之德,左衽將及。太元之末,君子道消,積釁基亂。 爱暨漢魏,咸歸 登壇篡位,以玄牡告天,百僚陪列,而儀注不備,忘稱萬歲,又不易帝諱。榜爲文告天皇后帝 元,故承天理物, 云:「晉帝欽若景運,敬順明命,以命于」玄。 夫天工人代,帝王所以興,匪君莫治,惟德司其 軒,璽已久出,玄甚喜。 初, |玄恐帝不肯爲手詔,又慮璽不可得,逼臨川王寶請帝自爲手詔,因奪取璽。 比臨 勳烈。 必由 一統。 晉自中葉,仍世多故,海西之亂,皇祚殆移,九代廓寧之功,升明黜陟 百官到姑孰勸玄僭僞位,玄僞讓,朝臣固請,玄乃於城南七里立郊, 並聖不可以二君,非賢不可以無主,故世換五帝,鼎遷三代。 鍾於隆安,禍延士庶,理絕人

神不 朔 遵漢魏之則,用集天祿於脫躬。 萬 倫。 欽若曆數,禪位于**朕躬,宜則是古訓,授茲茅土**。 號不 建始,右丞王悠之日:「尽」「建始,趙王 級,鰥寡孤 憑先德遺愛之利 運,遇時來之會,用獲除姦救溺,拯拔 邈,誕啓洪 邦 之始,託王公之上, ·祥,冥符僭逆 如舊典。」遷帝居專陽,即陳留王處潔宮故事。 可 興,其源深矣。 ,惟明靈是饗。」乃下書曰:「夫三才相資,天人所以成功,理由一統,貞夫所以司契,帝 |玄雖身在草澤,見棄時班,義情理感,胡能無慨! 投袂克淸之勞,阿衡撥亂之績, 思覃斯慶,願與億兆聿茲更始。」於是大赦,改元永始,賜天下爵二級,孝悌力田 以乏饗,是用敢不 基 獨不能自存者穀 一景命 玄何 如此。 攸歸,理貫自昔。 自三五 誠仰藉洪基,德漸有由。 功焉 ·奉以欽恭 又下書曰:「夫三恪作賓, 人五 已降,世代參差,雖所由或殊,其歸一也。 朕皇考宣武王聖德高 ! 屬當 惟德 角。 大禮,敬簡良辰,升壇受禪,告類上帝,以永綏衆望,式字 理運之會,猥集樂推之數,以寡昧之身踵下武之重,膺革 其賞賜 人人倫。 倫 中間屯險,弗克負荷,仰瞻宏業,殆若綴旒。 不敏,辭不獲命,稽若令典, 偽號 晉氏 也。」 之制,徒設空文,無其實 夕惕祗 以南康 又改爲永始, 以多難荐臻,曆數唯旣,典章唐虞之準,述 有自來矣。 降永安皇后爲零陵君,琅邪王爲石陽縣 優、罔 之平固 知攸厝。 **爱**暨漢魏, 復是王莽 縣奉晉· **遂升壇燎于南郊,受終于** 也。 君位不可以久虚,人 帝爲平固 始執 初 咸 出 建 權 偽詔, 改 湿量字。 圧,車 之歲,其兆 藉否終之 年爲 旗正

封王 綏爲中書令。 興、永脩、觀陽皆降封百戶,公侯之號如故。又普進諸征鎭軍號各有差。以相國左長史王 安郡公爲縣公,長沙爲臨湘縣公,廬陵爲巴丘縣公,各千戶。其康樂、武昌、南昌、望蔡、建 郡王,祕子蔚爲醴陵縣王,贈沖太傅、宜城郡王,加殊禮,依晉安平王故事,以孫胤襲爵, 爲豫章郡王,叔父雲孫放之爲寧都縣王,豁孫稚玉爲臨沅縣王,豁次子石康爲右將軍、武陵 公,武陵王遵爲彭澤縣侯。追尊其父溫宣武皇帝,廟稱太廟,南康公主爲宣皇后。 王,禪富陽縣王,贈偉侍中、大將軍、義興郡王,以子濬襲爵,爲輔國將軍,濬弟邈西昌縣王。 吏部尚書,沖次子謙爲揚州刺史、新安郡王,謙弟脩爲撫軍大將軍、安成郡王,兄歆臨賀縣 謐爲武昌公,班劍二十人,卞範之爲臨汝公,殷仲文爲東興公,馮該爲魚復侯。 崇桓謙母庾氏爲宣城太妃,加殊禮,給以輦乘。號溫墓曰永崇陵,置守衞四 又降始 封子昇

黄金 尚書都官郎爲賊曹,又增置五校、三將及强弩、積射武衞官。元興三年,玄之永始二年也,尙 也。 重,多被原放。 龍角, 爲顏,四角作金龍,頭銜五色羽葆旒蘇,羣臣竊相謂曰:「此頗似轜車,亦王莽仙蓋之流 玄 入建康宮,逆風迅激,旍旗儀飾皆傾偃。及小會于西堂,設妓樂,殿上施絳綾帳,縷 所謂亢龍有悔者也。」又造金根車,駕六馬。是月,玄臨聽訟觀閱囚徒,罪無輕 有干輿乞者,時或卹之。 其好行小惠如此。自以水德,壬辰,臘于祖。[4]改

苦,朝 如晉室 出 飛其儀蓋。 靡有定所, 已。 祖 七、然則 其父則子悅,位彌高者情理得申,道愈廣者納敬必普也。 | 玄曰:「禮云三昭、三穆,與太祖 迴動 造 其妻劉氏爲皇后,將修殿宇,乃移入東宮。又開東掖、平昌、廣莫及宮殿諸門,皆爲三道。 書答「春蒐」字誤爲「春蒐」,凡所關署皆被降黜。 於京口 以上 一大輦,容三十人坐,以二百人异之。性好畋遊,以體大不堪乘馬,又作徘徊輿,施轉關,令 馳 無滯。 秘 玄 野 書監下承之曰:「祭不及祖,知楚德之不長也。」又毀晉小廟以廣臺榭。 之廟,則宣帝在昭穆之列,不得在太祖之位。昭穆旣錯,太祖無寄,失之遠矣。」玄會 ,斬桓弘於廣陵,河內太守|辛扈興、弘農太守|王元德、 振威將軍童厚之、 |名位不顯,故不欲序列,且以||王莽九廟見譏於前史,遂以一廟矯之,郊廟齋二日而 自篡盜 太祖 勞瘁,怨怒思 性 。忌日見賓客遊宴,唯至亡時一哭而已。 旣不追尊祖會,疑其禮儀,問於羣臣。散騎常侍徐廣據晉典宜追立 叉 夜,壽水 必居廟之主也、昭穆皆自下之稱、則非逆數可知也。禮、太祖東向、左昭右穆。 念暴, 之後,驕奢荒侈,遊獵 入石頭,大桁流壞,殺人甚多。 呼召嚴速, 亂者十 室 八九焉。 直官咸繫馬省前,禁內讙雜,無復朝廷之體。 無度,以夜繼 於是劉裕、劉毅、何無忌等共謀興復。 畫。 玄大綱不理,而糾擿纖微, **春服之內,不廢音樂。」玄出遊水門,飄** 大風吹朱雀門樓,上層墜地。 兄偉 葬日,旦哭晚遊,或一日之中屢 其庶 皆 此 於是百姓疲 竟陵太守劉 裕等斬桓脩 七廟,又 類 母蒸嘗,

風

敬

更

以

爲

第 六 十 九 桓 玄

列

傅

邁謀爲內應。 至期,裕遣周安穆報之,而邁惶遽,遂以告玄。 玄震駭, 即殺扈興等,安穆馳

封邁重安侯,公一宿又殺之。

義軍。 六州, 鉞麾而進,謙等諸軍一時奔潰。 之配以精卒,副援諸軍。於時東北風急,義軍放火,煙塵張天,鼓譟之音震駭京邑。 謙、何澹之屯東陵,卞範之屯覆舟山西,衆合二萬,以距義軍。裕至蔣山,使羸弱貫油帔登 怒也。」玄曰:「卿何不諫。〕對曰:「輦上諸君子皆以爲堯舜之世,臣何敢言」」玄愈忿懼,使桓 諸道術人推算數爲厭勝之法,乃問衆曰:「殷其敗乎。」曹靖之對曰:「神怒人怨,臣實懼焉。」 山,分張旗幟,數道並前。 玄偵候還云:「裕軍四塞,不知多少。」玄益憂惶,遣武衞將軍庾頤 |玄曰:「人或可怨,神何爲怒。」對曰:「移晉宗廟,飄泊失所,大楚之祭,不及於祖,此其所**以** 裕率義軍至竹里,玄移還上宮,百僚步從,召侍官皆入止省中。 加桓謙征討都督、假節,以殷仲文代桓脩,遣頓丘太守吳甫之、右衞將軍皇甫敷北距 裕等於江乘與戰,臨陣斬甫之,進至羅落橋,與敷戰,復梟其首。 玄聞之大懼,乃召 玄率親信數千人聲言赴戰,遂將其子昇、兄子濬出南掖門, 赦揚、豫、徐、克、靑、冀 劉裕執

心勸其戰,」玄不暇答,直以策指天。而經日不得食,左右進以粗飯,咽不能下。昇時年數 初,玄在姑孰,將相星屢有變,篡位之夕,月及太白,又入羽林,玄甚惡之。及敗走,腹 西至石頭,使殷仲文具船,相與南奔。

歲,抱玄胸而撫之,玄悲不自勝。

劉裕 以武 陵王遵 攝萬機,立行臺,總百官。 遺劉毅、劉道規躡玄、誅玄諸兄子及石康兄

權、振兄洪等。

應謝 度,以 葛長民擊破之。 者之儀, 曾未三旬, 納之,張幔屋 罪軍 玄 致虧喪,非戰之罪。 至轉陽,江州刺史郭昶之給其器用兵力。殷仲文自後至, 歎息曰:「敗中復 門,其觀卿等入石頭,無異雲霄中人也。」 衆且二萬, 於城南,署置百官, 玄於道作起居注, 敍其距義軍之事, 樓船器械甚 振,故可 於是不遑與羣下謀議,唯耽思誦述,宣示遠近。 盛 也。」玄於是逼 範之爲尚書僕射, 謂 其羣黨曰:「 乘輿西上。 卿等並 自謂經略指授,算無遺策,諸將 其餘職多用輕資。 **|清塗翼從股躬,都下竊位者方** 桓歆聚黨向歷陽,宣城 望見玄舟,旌旗輿服備帝 玄至江陵, 於是大修舟師, 內史諸 違

稱 以 近 百 天文惡,故還都舊楚,而羣小愚惑,妄生是 玄爲「桓 姓 所服,遂掃平荆雍 喁喁,想望皇澤,宜弘仁風, 玄 以奔敗之後,懼法 詔」、桓胤諫曰:「詔者、施於辭令、不以爲稱謂也。 一匡京室, 令不肅,遂輕怒妄殺,人多離怨。 以收物情。」玄怒曰:「漢高、魏武幾遇敗, 聲被八荒矣。 非, 旣據 方當糾之以 有極 位, 殷仲文諫曰:「陛下少 猛,未宜施之以恩 漢魏之主皆無此言,唯 而 遇此圮運, 但諸 非爲 也。」 將 成成不 播英譽,遠 失 聞 玄 利 ·足也。 北虜 左 耳 右

列

傅

第

不祥 以苻堅爲『苻韶』耳。 必其宜革,可待事平也。」荆州郡守以玄播越, 願陛下稽古帝則、令萬世可法。」玄曰:「此事已行, 或遣使通表,有匪寧之辭,玄悉不受, 今宣敕罷之,

仍乃更令所在表賀遷都。〔六〕

逐懼 爲前 規等 叉遣 也。 不失分。 鋒。 玄遣 與 輒當 禍 破 鬭 輔 魏 郭銓 玄 屯 詠 心 或 之破 江水在 翼 結 將 遊 以鄱陽太守徐放爲散騎常侍,欲遣說解義軍,謂放曰:「諸人不識天命,致此妄作, 申聖旨 於 擊將軍何澹之、武衞將軍庾稚祖、[10]江夏太守桓道恭就郭銓以數千人守湓口 義 軍桓振往義陽聚衆,至弋陽,爲龍驤將軍胡譁所破,振單騎走還。 不能自反。 何澹之、郭昶之於桑落洲,進師尋陽。 修樂洲 軍 桓 歆 一此,朕不食言。」放對曰:「劉裕爲唱端之主,劉毅兄爲陛下所誅,並不可說 於 乘 風 於歷陽,諸葛長民又敗歆於芍陂,散單馬渡淮。 毅率道規及下邳太守孟 何無忌。」玄曰:「卿使若有功,當以吳興相敍。」放遂受使,入無忌 縱 於時 火,盡銳爭先,玄衆大潰,燒輜重夜遁,郭銓歸降。 卿三州所信,可明示朕心,若退軍散甲,當與之更始,各授位任,令 義軍數千,玄兵甚盛,而玄懼有敗衄,常漾輕舸於舫側,故其衆 玄率舟艦二百發江陵,使苻宏、 玄故將劉統、馮 何 無忌 羊僧壽 劉道

稚等聚 莫 殷仲文時在玄艦,求出別船收集散軍,因叛玄,奉二后奔於夏口。 黨 四百 人, 襲破尋陽 城,毅遣 建威 將軍劉懷肅討平之。 玄留永安皇后及皇 玄入江陵城、馮該勸 后於巴

門,左右於闇中斫之,不中,前後相殺交横,」玄僅得至船。 使更下戰,玄不從,欲出漢川,投梁州刺史桓希,而人情乖阻,制令不行。 於是荆州別駕王康產奉帝入南郡 玄乘馬出城,至

時益州刺史毛璩使其從孫祐之、參軍費恬送弟璠喪葬江陵,有衆二百,璩弟子脩之爲

府舍,太守王騰之率文武營衞

時年三十六。又斬石康及濬等五級,庾頤之戰死。昇云:「我是豫章王,諸君勿見殺。」送至 前, 这拔頭上玉導與之, 仍曰:「是何人邪? 敢殺天子」遷曰:「欲殺天子之賊耳。」遂斬之, 期、萬蓋等以身藏玄,並中數十箭而死。

玄被箭,其子昇輒拔去之。

益州督護馮遷抽刀而 江陵市斬之。

矣。其時有童謠云:「長干巷,巷長干,今年殺郎君,後年斬諸桓。」其凶兆符會如此。郎君, **衡陽有雌雞化爲雄,八十日而冠萎。[三]及玄建國於楚,衡陽屬焉,自篡盜至敗,時凡八旬** 初,这在宫中,恒覺不安,若爲鬼神所擾,語其所親云:「恐己當死,故與時競。」元興中,

| 骸等傳送||玄首,梟於||大桁,百姓觀者莫不欣幸。 是月、王騰之奉帝入居太府。桓謙亦聚衆沮中、爲玄舉哀,立喪庭,僞諡爲武悼皇帝。 謂元顯也。

列 傅 第 六 + 九 玄

山客。 檀 武 州 道規 道規等敗績,死沒者千餘人。 放之敗走,還江陵 將 祗 刺 進討武昌,破僞太守王旻。 列 軍 史,侵豫章,江州刺史劉敬宣討走之。 江夏相張暢之、高平太守劉懷肅攻何澹之於西塞磯,破之。 何 艦 孟 無忌等攻桓謙於馬頭,桓蔚於龍洲,皆破之。 毅等平巴陵。 中流,以防越逸。 山圖據魯城,輔國將軍桓山客守偃月壘。[11]劉毅攻魯城,道規攻偃月壘,無忌與 毛璩遣涪陵太守文處茂東下,振遣桓放之爲益州,屯夷陵,處茂距戰, 義軍騰赴,叫聲動山谷,自辰及午,二城俱潰,馮該散走,生擒 義軍退次尋陽,更繕舟甲。毛璩自領梁州,遣將攻漢中,殺桓 魏詠之、劉藩破桓石綏於白茅。 義軍進次夏口。偽鎭東將軍馮該等守夏口,揚 義軍乘勝競進, 義軍發尋陽。 振遣桓蔚代王曠守襄陽 振、該等距戰於 桓亮自號江 、靈溪,

桓亮 之馬 起,知城 之,宗之 二月,桓謙、何澹之、溫楷等奔於姚興。 頭 自豫章,自號鎭南將軍 義 |振 深 元 失利。 已陷, 擁帝出營江津。 年正月,南陽太守魯宗之起義兵襲襄陽,破爲雍州刺史桓蔚。 乃與謙等北走。 時蜀 軍據靈溪 湘州刺刺 魯宗之率衆於炸溪,破偽武賁中郎溫楷,進至 是日 安帝 史。 桓振與宏出自溳城,襲破江陵,劉懷肅自雲杜伐振 苻宏寇安成 反正。 大赦天下,唯逆黨就戮,詔 馮該 、廬陵、劉敬宣遣將討之,宏走入湘中。 軍,推鋒而 前,即 一紀南。 平江陵。 無忌諸軍次江陵 特発恒胤 振自擊宗 振 人。 見火

· 原、苻宏復出寇湘中,害郡守長吏,檀祗討宏於湘東,斬之,廣武將軍郭彌斬·亮於益陽,其餘 等,破之。廣武將軍唐興斬振及偽輔國將軍桓珍,毅於臨鄣斬偽零陵太守劉叔祖。日己桓

擁衆假號皆討平之。

詔徙桓胤及諸黨與於新安諸郡

劉延祖等潛相交結,劉裕以次收斬之, 刺史,使率兵而下,荆楚之衆多應之。 桓石綏,桓氏遂滅。 三年,東陽太守殷仲文與永嘉太守駱球謀反,欲建桓胤爲嗣,曹靖之、桓石松、卞承之、 謙至枝江,荆州刺史劉道規斬之,梁州刺史傳歆 幷誅其家屬。 後桓謙走入蜀, 蜀賊譙縱以謙爲荆州 又斬

卞範之

將爲篡亂,以範之爲丹楊尹。 僭位,以範之爲侍中,班劍二十人,進號後將軍,封臨汝縣公。 **卞範之字敬祖,濟陰宛句人也。[四]識悟聰敏,見美於當世。** 桓玄少與之遊,及玄爲江州,引爲長史,委以心膂之任,潛謀密計, 範之與殷仲文陰撰策命,進範之爲征虜將軍、散騎常侍。 其禪詔,卽範之文也。 太元中, 莫不決之。 自丹楊丞爲始安 後玄

咸畏嫉之。 義軍起,範之屯兵於覆舟山西,爲劉毅所敗,隨玄西走,玄又以範之爲尚書僕

玄旣奢侈無度,範之亦盛營館第。自以佐命元勳,深懷矜伐,以富貴驕人,子弟傲慢,

玄爲劉毅等所敗,左右分散,唯範之在側。 玄平,斬於江陵。

殷仲女

賄,家累千金,常若不足。」玄爲劉裕所敗,隨玄西走,其珍寶玩好悉藏地中,皆變爲土。至 以佐命親貴,厚自封崇,輿馬器服,窮極綺麗,後房伎妾數十,絲竹不絕音。性貪吝,多納貨 巴陵,因奉二后投義軍,而爲鎭軍長史,轉尙書。 仲文之妻,疑而間之,左遷新安太守。仲文於玄雖爲姻親,而素不交密,及聞玄平京師,便 重,兼於王、卞矣。」玄將爲亂,使總領詔命,以爲侍中,領左衞將軍。 棄郡投焉。玄甚悅之,以爲諮議參軍。時王謐見禮而不親,卞範之被親而少禮,而龍遇隆 爲驃騎參軍,甚相賞待。俄轉諮議參軍,後爲元顯征虜長史。會桓玄與朝廷有隙,玄之姊, 初,玄篡位入宫,其牀忽陷,羣下失色,仲文曰:「將由聖德深厚,地不能載。」」玄大悅。 殷仲文,南蠻校尉顗之弟也。少有才藻,美容貌。從兄仲堪薦之於會稽王道子,卽引 玄九錫,仲文之辭也。

驅逼者衆。至如微臣,罪實深矣,進不能見危授命,亡身殉國,退不能辭粟首陽,拂衣高謝 則受制於巨力,質微則無以自保。於理雖可得而言,於臣實非所敢譬。昔桓玄之代,誠復 帝初反正,抗表自解曰:「臣聞洪波振壑,川無恬鱗,驚飇拂野,林無靜柯。 何者?

宸極反正,唯新告始,憲章旣明,品物思舊,臣亦胡顏之厚,可以顯居榮次!乞解所職,待罪 首領,又申之以繫維。 以判忠邪。 遂乃宴安昏寵,叨昧僞封,錫文篡事,曾無獨固。 名義以之俱淪,情節自茲兼撓,宜其極法, 會鎭軍將軍劉裕匡復社稷,大弘善貸,佇一戮於微命,申三驅於大信,旣惠之以 於時皇輿否隔,天人未泰,用忘進退,是以僶俛從事, 自同令人。今

私門。

遠離闕庭,乃心慕戀。」 詔不許。

尉叔文並伏誅。仲文時照鏡不見其面,數日而遇禍。 胤、殷仲文乃腹心之疾,北虜不足爲憂。」義熙三年,又以仲文與駱球等謀反,及其弟南蠻校 惚,遂不過府。無忌疑其薄已,大怒,思中傷之。時屬慕容超南侵,無忌言於劉裕曰:「桓 修謁,無忌故益欽遲之,令府中命文人殷闡、孔甯子之徒撰義構文,以俟其至。仲文失志恍 然數曰:「看此山川形勢、當復出一伯符。」何無忌甚慕之。東陽、無忌所統,仲文許當便道 意 遷爲東陽太守,意彌不平。劉毅愛才好士,深相禮接,臨當之郡,游宴彌日。 仲文因月朔與衆至大司馬府,府中有老槐樹,顧之良久而數曰:「此樹婆娑,無復生 行至富陽,慨 忽

仲文善屬文,爲世所重,謝靈運嘗云:「若殷仲文讀書半袁豹,則文才不減班固。」言其

文多而見書少也。

文

年惟永。俄而義旗電發,忠勇雷奔,半辰而都邑廓清,踰月而凶渠卽戮,更延墜曆,復振頹 內侮。天長喪亂,凶力實繁,踰年之間,奄傾晉祚,自謂法堯禪舜,改物君臨,鼎業方隆,卜 驅勁勇之兵,因晉政之陵遲,乘會稽之酗營,縱其狙詐之計,扇其陵暴之心,敢率犬羊,稱兵 登高以發憤,觀釁而動,竊圖非望。 之幺麼,豈足數哉!適所以干紀亂常,傾宗絕嗣,肇金行之禍難,成宋氏之驅除者乎! 曆表其祥,彤雲玄石呈其瑞,然後光臨大寶,克享鴻名,允徯后之心,副樂推之望。若桓玄 是知神器不可以闇干,天祿不可以妄處者也。夫帝王者,功高宇內,道濟含靈,龍宮鳳 史臣曰:恒玄纂凶,父之餘基。 始則假寵於仲堪,俄而戮殷以逞欲,遂得據全煙之地, 挾姦回之本性,含怒於失職,苞藏其豕心,抗表以稱冤。

贊曰:靈寶隱賊,世載凶德。信順未孚,姦回是則。肆逆遷鼎,憑威縱慝。違天虐人,

覆宗殄國。

校勘記

[1] 殷顗 「顗」,各本作「覬」,今據本傳改。

てニン 朝廷遣銓爲己前鋒 「銓」,各本作「佺期」。校文:殷仲堪傳,玄使郭銓等擊敗各軍於江西口。

「侄」當爲「銓」之誤,又衍「期」字。按:丁說是。通鑑一一一正作「遣銓爲已先鋒」,今據改。

安成郡 各本作「安城郡」,今從宋本作「安成郡」,與地理志下、通鑑一一二、通志一三〇合。

賜兄子濬 「濬」,各本均作「俊」。周校:「俊」當作「濬」。按:濬,偉之子,下文「以子濬襲爵」可

證。世說人名譜亦作「濬」,因據改。

【五〕殷叔文 據殷仲文傳、「叔文」當爲「仲文」之誤。

ハネリ 右丞王悠之 對注:魏書桓玄傳作「左丞王納之」。按:納之、臨之子。

[4] 臘于祖 「于」,各本誤作「子」,今從宋本。

重安侯 「重安」,各本作「安重」,地理志無安重, 宋書、南史武帝紀、通鑑一一三均作「重安」,

今據改。

[元] 仍乃更令所在表賀遷都 校文:「乃」字行。

[10] 庾稚祖 周校:安紀作「庾稚」。

冠萎 「冠萎」下各本有「具」字,今依五行志上、御覽九一八引删。

[1三] 桓山客 見卷八五校記。下同。

[三] 臨鄣 劉毅傳「鄣」作「嶂」,當從之。

CIED 宛句 見卷一四校記。

列

傳第

六

十九

校勘記

晉書卷一百

列傳第七十

王彌

博涉書記。少游俠京都,隱者董仲道見而謂之曰:「君豺聲豹視,好亂樂禍,若天下騷擾,不 王彌,東萊人也。家世二千石。祖頎,魏玄菟太守,武帝時,至汝南太守。 彌有才幹,

作士大夫矣。」

散,衆復大振,晞與之連戰,不能克。彌進兵寇泰山、魯國、譙、梁、陳、汝南、潁川、襄城諸 郡,入許昌,開府庫,取器杖,所在陷沒,多殺守令,有衆數萬,朝廷不能制。 捷,膂力過人,青土號爲「飛豹」。後引兵入寇靑徐,兗州刺史尚晞逆擊,大破之。關退集亡 渚,爲 芍純所敗,亡入長廣山爲羣賊。 彌多權略,凡有所掠,必豫圖成敗,舉無遺策,弓馬迅 惠帝末,妖賊劉柏根起於東萊之城縣,彌率家僮從之,柏根以爲長史。柏根死,聚徒海

望將軍之至,孤今親行將軍之館,輒拂席洗爵,敬待將軍。」及彌見元海,勸稱尊號,元海謂 遣其侍中兼御史大夫郊迎,致書於隬曰:「以將軍有不世之功,超時之德,故有此迎耳。遲 澗,王師進擊,大破之。臟謂其黨劉靈曰:「晉兵尙强,歸無所厝。劉元海昔爲質子,我與之 水。」」於是署彌司隸校尉,加侍中、特進,彌固辭。使隨劉曜寇河內,又與石勒攻臨漳 彌曰:「孤本謂將軍如竇周公耳,今眞吾孔明、仲華也。 烈祖有云: 『吾之有將軍,如魚之有 周旋京師,深有分契,今稱漢王,將歸之,可乎。」靈然之。乃渡河歸元海。 會天下大亂,進逼洛陽,京邑大震,宮城門畫閉。司徒王衍等率百官距守,彌屯七里 元海聞而大悅,

遣北 之,皆不能抗。 魏郡 家,爲舊居人所不禮,皆焚燒城邑,殺二千石長吏以應隬。隬又以二萬人會石勸寇陳郡、潁 部將軍彭默 二千騎寇襄城諸縣,河東、平陽、弘農、上黨諸流人之在潁川、襄城、汝南、南陽、河南者數萬 、汲郡、頓丘、陷五十餘壁、皆調爲軍士。 、長平間,大敗之,死者十六七。元海進隬征東大將軍,封東萊公。與劉曜、石勒等攻 中郎將裴憲次白馬討彌,車騎將軍王堪次東燕討勒,平北將軍曹武次大陽討元海。 永嘉初,寇上黨,圍壺關,東海王越遣淮南內史王曠、安豐太守衞乾等討之,及彌戰於 爲劉聰所敗,見害,衆軍 爾、聰以萬騎至京城,焚二學。 上皆退。 聰渡黃河,帝遣司隸校尉劉暾、將軍宋抽等距 又與勸攻鄴,安北將軍和郁棄城而 東海王越距戰於西明門,彌等敗走。 走。 彌復以 懷帝

川,屯陽翟,遣弟璋與石勒共寇徐兗,因破越軍。

焚燒宮廟,城府蕩盡,百官及男女遇害者三萬餘人,遂遷帝於平陽。 **遂陷宫城,至太極前殿,縱兵大掠。** 彌 後 與曜寇襄城,遂逼京師。時京邑大饑,人相食,百姓流亡,公卿奔河陰。 幽帝於端門, 逼辱羊皇后, 殺皇太子詮, [1] 發掘陵墓, 曜、彌等

阻兵不還,其若子弟宗族何!」爾曰:「善,微子,吾不聞此過也。」於是詣曜謝,結分如初。 誠在將軍,然劉曜皇族,宜小下之。晉二王平吳之鑒,其則不遠,願明將軍以爲慮。 爾長史張嵩諫曰:「明公與國家共興大事,事業甫耳,便相攻討,何面見主上乎!平洛之功 爾謂曜日:「洛陽天下之中,山河四險之固,城池宮室無假營造,可徙平陽都之。」曜不從,焚 曰:「下官聞過,乃是張長史之功。」曜謂嵩曰:「君爲朱建矣, 豈況范生乎」。各賜嵩金百斤。 燒而去。 爾之掠也,曜禁之,隬不從。 隬怒曰:「屠各子,豈有帝王之意乎!汝柰天下何!」遂引衆東屯項關 曜斬其牙門王延以徇,彌怒,與曜阻兵相攻,死者千餘人。 縦將軍

長史曹嶷爲鎭東將軍,給兵五千,多齎寶物還鄉里,招誘亡命,且迎其室。 初,曜以彌先入洛,不待已,怨之,至是嫌隙遂構。劉暾說彌還據靑州,彌然之,乃以左 爾將徐邈、高梁

初,石勒惡彌驍勇,常密爲之備。 爾之破洛陽也,多遺勵美女寶貨以結之。

輒率部曲數千人隨嶷去,彌益衰弱。

晞, 暾。 曹嶷引兵會己,而詐要勸共向靑州。 足定也!勵愈忌彌,陰圖之。 以爲左司馬,願謂勵曰:「公獲苟晞而用之,何其神妙!使晞爲公左,願爲公右,天下不 爾未之知,勸伏兵襲彌,殺之,幷其衆。 劉暾 又勸彌徵曹嶷,藉其衆以誅勸。 暾至東阿,爲勸游騎所獲。 勒見彌與嶷書,大怒,乃殺 於是彌使暾詣青州,令

張昌

類咸共笑之。及李流寇蜀,昌潛遁半年,聚黨數千人,盜得幢麾,詐言臺遣其募人討流。 就食者數千口 者,二千石줲。 調發,人咸不樂西征,昌黨因之誑惑,百姓各不肯去。一而詔書催遣嚴速,所經之界停留 <u>任</u>午詔書發武勇以赴<u></u> 益土,號曰「壬午兵」。自天下多難,數術者云當有帝王興於江左,及此 張昌,本義陽蠻也。少爲平氏縣吏,武力過入,每自占卜,言應當富貴。好論攻戰,儕 由是郡縣官長皆躬出驅逐、展轉不遠、屯聚而爲劫掠。 是歲江夏大稔,流人 五.

將家南奔沔口。 易姓名為 太安二年,昌於安陸縣石巖山屯聚,去郡八十里,諸流人及避戍役者多往從之。昌乃 鎭南大將軍、新野王歆遣騎督靳滿討昌於隨郡西,大戰,滿敗走,昌得其器 太守弓欽遣軍說討,輒爲所破。 昌徒衆日多,遂來攻郡。 欽出戰,大敗,乃

杖,據有江夏,卽其府庫。 造妖言云:「當有聖人出。」

室北 叉流訛言云::「江淮已南當圖反逆,官軍大起,悉誅討之。」 羣小互相扇動,人情惶懼,江沔間 鐵券、金鼓自然而至。乃下赦書,建元神鳳,郊祀、服色依漢故事。其有不應其募者,族誅 殿,又於巖上織竹爲鳥形,衣以五綵,聚肉於其傍,衆鳥羣集,詐云鳳皇降,又言珠袍、玉璽、 爲 百餘家,追隨傴等,不豫妖逆。 陽 士庶莫不從之,惟江夏舊姓江安令王傴、秀才呂蕤不從。昌以三公位徵之,傴、蕤密將宗 時燕起,豎牙旗,鳴鼓角,以應昌,旬月之間,衆至三萬,皆以絳科頭,潛之以毛。」江夏、義 劉尼,稱漢後,以昌爲相國,昌兄味爲車騎將軍,弟放廣武將軍,各領兵。於石巖中作宮 奔汝南戶,投豫州刺史劉喬。鄉人期思令李權、常安令吳鳳、孝廉吳暢糾合善士,得五 Щ [都縣吏丘沈遇於江夏,]昌名之爲聖人,盛車服出迎之,立爲天子,置百官。 沈易姓名

宛,助平南 汝水居人,喬遺 武破武昌 新野王歆上言:「妖賊張昌、劉尼妄稱神聖、犬羊萬計、絳頭毛面、挑刀走戟、其鋒不可 請臺 ,害太守, |敕諸軍,三道救助。」於是劉喬率諸軍據汝南以禦賊,前將軍趙驤領精卒八千據 將軍羊伊 將軍李楊逆擊,大破之。 昌自領其衆。 距守。 昌遣其將軍黃林爲大都督,率二萬人向豫州,前驅李宮欲掠取 西攻宛,破趙驤,害羊伊。 林等東攻弋陽,太守梁桓嬰城固守。 進攻襄陽、害新野王歆。昌別 又遣其將馬

列傳

第七

+

張昌

務,人情漸

離

等攻長沙、湘東、零陵諸郡。 率石冰東破江、揚二州,偽置守長。 昌雖跨帶五州,樹立牧守,皆桀盜小人而無禁制,但以劫掠爲 當時五州之境皆畏逼從逆。又遣其將陳貞、陳蘭、張甫

計,昌乃沈竄于下儁 於竟陵、劉喬又遣將軍李楊、督護尹奉總兵向江夏。 是歲,詔以寧朔將軍、領南蠻校尉劉弘鎭宛,弘遣司馬陶侃、參軍蒯桓、皮初等率衆討 山。〔三明年秋,乃擒之,傳首京師,同黨並夷三族。 侃等與昌苦戰累日,大破之,納降萬

陳敏

起義 運以濟中州,非所以救患周急也。」朝廷從之,以敏爲合肥度支,遷廣陵度支。 **1兵,**人屯不散,京師倉廩空虛,敏建議 陳敏字令通,廬江人也。少有幹能,以郡廉吏補尚書倉部令史。 曰:「南方米穀皆積數 千 车, 時將欲腐敗, 及趙王倫篡逆,三王 而不漕

少擊衆,每戰皆克,遂至揚州。 之必矣。」準乃益敏 曰:「此等本不樂遠戍,故逼迫成賊。 張昌 之亂,遣其將石冰等趣壽春,都督劉準憂惶計無所出。 兵擊之,破吳弘、石冰等, 迴討徐州賊封雲,雲將張統斬雲降。 烏合之衆,其勢易離。 敏遂乘勝逐北,戰數十合。 敏請合率運兵,公分配衆 時敏 敏以功爲廣陵相。 統 時冰 大 軍在 衆十倍,敏以 壽 春,謂準 力,破 時

惠帝幸長安,四方交爭,敏遂有割據江東之志。 其父聞之,怒曰:「滅我門者,必此兒也」」父

亡、去職。

東海王越當西迎大駕,承制起敏爲右將軍、假節、前鋒都督,致書於敏曰:

貢,豈非將軍之功力哉! |江外,精光赫於揚煙。攻堅陷嶮,三十餘戰,師徒無虧,勍敵自滅。五州復全,苞茅入 兵之援,內無運籌之侶,隻身挺立,雄略從橫,擢奇謀於馬首,奮靈計於臨危,金聲振於 將軍建謀富國,則有大漕之勳。及遭冰昌之亂,則首率義徒,以寡敵衆。外無强

卹 率將所領,承書風發,米布軍資,惟將軍所運。 術 既明,已試之功先著,孤與將軍情分特隆,想割草土之哀,抑難居之思,捨絰執戈,來 國難。 今羯賊屯結,遊魂河濟,鼠伏雉竄,藏匿陳留,始欲姦盜,終圖不軌。 將軍孫吳之 天子遠巡,鑾輿未反,引領東眷,有懷山陵。 當憑將軍勠力,王輅有旋。 將軍

時越討豫州刺史劉喬、敏引兵會之、與越俱敗於蕭。

拜敏為 遂相! 敏 揚 因 爲 州 中國 表 刺史,幷假江東首望顧榮等四十餘人爲將軍、郡守,榮並僞從之。 裏。 大亂,遂請東歸,收兵據歷陽。 揚州刺史劉機、丹楊太守王廣等皆棄官奔走。四一敏弟昶知顧榮等有貳 會吳王常侍甘卓自洛至,教卓假稱皇太弟命, 敏爲息娶卓

列

ニ六一六

斌東略諸郡,遂據有吳越之地。一敏命寮佐以己爲都督江東軍事、大司馬、楚公,封十郡,加 心,勸敏殺之,敏不從。一般將精兵數萬據烏江,弟恢率錢端等南寇江州,刺史應邈奔走,弟

東海王軍豁祭酒華譚聞敏自相署置,而顧榮等並江東首望,悉受敏官爵,乃遺榮等

九錫,列上尚書,稱自江入河,奉迎鑾駕。

着日

之黨、稽顙屈膝、不亦羞乎!昔襲勝絕粒、不食漭朝、魯連赴海、恥爲秦臣。君子義行、 |燕庭。況吳會仁人並受國寵,或剖符名郡,或列爲近臣,而便辱身姦人之朝,降節逆叛 露。忠節令圖,君子高行,屈節附逆,義士所恥。王蠋匹夫,志不可屈,於期慕義,隕首 本性凶狡,素無識達,貪榮干運,逆天而動,阻兵作威,盜據吳會,內用凶弟,外委軍吏, 同符千載,遙度雅量,豈獨是安! 上負朝廷寵授之榮,下孤宰輔過禮之惠。天道伐惡,人神所不祐。雖阻長江,命危朝 石冰之亂,朝廷錄敏微功,故加越次之禮,授以上將之任,庶有韓盧一噬之效。而

有諸葛、顧、步、張、朱、陸、全之族,故能鞭笞百越,稱制南州。然兵家之興,不出三世, 怒,命訖丹徒。賴先主承運,雄謀天挺,尙內倚慈母仁明之敎,外杖子布廷爭之忠,又 昔吳之武烈,稱美一代,雖奮奇宛葉,亦受折襄陽。討逆雄氣,志存中夏,臨江發 列傳第七十 陳敏

荆州 舟涉 羈絆之辱。 運未 大皇之絕軌,遠度諸賢,猶當未許也。 瓜步之渚,威震丹楊,擒寇建鄴,而諸賢何顏見中州之士邪! 武旅,順流東下,徐州銳鋒,南據堂邑;征東勁卒,耀威歷陽;飛橋越横江之津,泛 盈百、歸命入臣。今以陳敏倉部令史,七第頑冗,六品下才,欲躡桓王之高蹤,蹈 皇輿東軒,行卽紫館,百僚垂纓,雲翔鳳闕,廟勝之謨,潛運帷幄。 諸君垂頭,不能建翟義之謀;而 顧生俛眉,已受 然後發

體,今成異身。 河渭,擊楫淸歌。 紀特隆,令伯義聲,親好密結。 安,亡而不能存,將何貴乎!永長宿德,情所素重,彦先垂髮, 小寇隔津,音符道鶋,引領南望,情存舊懷。 瞻江長歎,非子誰思!願圖良策,以存嘉謀也。 何爲辱身小寇之手,以蹈逆亂之禍乎!昔爲同志,今已殊域,往爲 上欲與諸賢效翼紫宸,建功帝籍。 忠義之人,何世蔑有!夫危而不能 分著金石,公青早交,恩 如其不 爾,亦可泛舟

之,又遣弟閎爲歷陽太守,至成牛渚。 · 冠榮之徒常懼禍敗, 何康、錢象投募送白事於昶,昶頫頭視書,康揮刀斬之,稱州下已殺敏,敢有動者誅三族,吹 敏 凡才無遠略,一旦據 準遣揚州刺史劉機、寧遠將軍 又得譚書,皆有 有江東,刑政 錢廣家在長城,玘鄉人也,玘潛使圖昶。 慚色。 無章,不爲英俊所服,且子弟凶暴,所在爲患。 **衡彦等出歷陽,敏使弟昶及將軍錢廣次烏江以距 元、榮遣使密報征東大將軍劉準遣兵臨江,** 廣遣 其屬 周

二六一八

誅,於是會稽諸郡並殺敏諸弟無遺焉。 戰,未獲濟,榮以白羽扇麾之,敏衆潰散。 角爲內應。 廣先勒兵在朱雀橋,陳兵水南,紀、榮又說甘卓,卓遂背敏。 敏單騎東奔至江乘, 為義兵所斬, 母及妻子皆伏 敏率萬餘人將與卓

王如

賴少年,夜襲二軍,破之。杜蕤悉衆擊如,戰于涅陽,蕤軍大敗。山簡不能禦,移屯夏口,如 關 之。未幾,衆至四五萬,自號大將軍,領同、確二州牧。 又破襄城。 中荒殘,不願歸,征南將軍山簡、南中郎將杜蕤各遣兵送之,而促期令發。 王如,京兆新豐人也。初爲州武吏,遇亂流移至處。時諸流人有詔並遣還鄉里,如以 於是南安龐寔、「K」馮翊嚴疑、長安侯脫等各帥其黨攻諸城鎮,多殺令長以應 如遂潛結諸無

之,經年不能克,智力並屈,遂嬰城自守。王澄帥軍赴京都,如邀擊破之。 之,旬有二日而克之,勸遂斬脫。如於是大掠沔漢,進逼襄陽。征南山簡使將趙同帥師擊 唇齒,故不攻之。及聞如言,甚悅,遂夜令三軍蓐食待命,鷄鳴而駕,後出者斬,晨壓宛門攻 協,如說쀅曰:「侯脫雖名漢臣,其實漢賊。」如常恐其來襲,兄宜備之。」勵素怒脫貮己,憚如 如懼石勸之攻己也,乃厚賄於勸,結爲兄弟,勸亦假其强而納之。時侯脫據宛,與如不

如爲 刀爲 出, 失,凌果不容而杖之,如甚以爲恥。 容養,更成 歸于王敦。 戲, ||梭所辱,密使人激怒之,動令殺||棱。 如 連 漸漸來前。 [年種穀皆化爲莠,軍中大飢,其黨互相攻劫,官軍進討,各相率來降。 [禍端。] ||楼固請,與之。||梭置諸左右,甚加寵遇。 敦從弟檢愛如驍武,請敦配已麾下。敦曰:「此輩虓險難蓄,汝性忌急,不能 初,敦有不臣之迹,棱每諫之,敦常怒其異己。 如詣檢,因閑宴,請劍舞爲歡,檢從之。 如數與敦諸將角射,屢鬭 敦聞而陽驚,亦捕 如 如計無所 於是 及敦 爭爲 舞 如 聞 過

杜曾

誅之。

歆 鎭 南參軍 杜 會,新野人,南中郎將藏之從祖弟也。少驍勇絕人,能被甲游於水中。始爲新野王 ,歷華容令,至南 蠻司 馬。 凡有戰 陣,勇冠 軍。

覺。甚 曾, 與 其 曾勸令擊之, 黨 會永 信 自相 任之。 嘉 猜 之亂,荆 貮 會荆 亢 、誅其 以爲 州 州 驍 賊 荒梗,故牙門將胡亢聚衆 然。 將數 王 沖自 僧白亢取帳下刀戟付工磨之, 十人,曾心不自安, 號 荆州 刺 史,部衆亦盛, 於竟陵, 潛 謀圖 屢遣 之, 自 因潛引王沖之 號楚公,假 乃卑身屈節以事 兵抄亢 所統,亢 曾竟陵太守。 兵。 於亢,亢弗之 患之,問 亢遣精騎出 亢後 計 於

列

傅

分據沔漢。

得,盡滅其家。 距沖,城中空虛,曾因斬亢而幷其衆,自號南中郎將,領竟陵太守。 會愍帝遣第五猗爲安南將軍、荆州刺史,會迎猗於襄陽,爲兄子娶猗女,遂 曾求南郡太守劉務女不

拜侃, 訪欲生致武昌、而朱軌息昌、趙誘息胤皆乞曾以復冤、於是斬會、而昌、胤臠其肉而噉之。 馬,曾密開門,突侃陣,出其後,反擊其背,侃師遂敗,投水死者數百人。一曾將趨順陽,下馬 屢 「杜曾凶狡,所將之卒皆豺狼也,可謂鴟梟食母之物。 此人不死,州土未寧,足下當識吾 將,今使君諸將無及曾者,未易可逼也。」侃不從,進軍圍之於石城。時曾軍多騎,而侃兵無 言。」|崧以宛中兵少,藉曾爲外援,不從侃言。|曾復率流亡二千餘人圍襄陽,數日不下而還。 戰 不能克,訪潛遣人緣山開道,出會不意以襲之,會衆潰,其將馬儁、蘇溫等執會詣訪降。 及王廙爲荆州刺史,曾距之,廙使將朱軌、趙誘擊曾,皆爲曾所殺。王敦遣周訪討之, 時陶侃新破杜弢,乘勝擊曾,有輕會之色。侃司馬魯恬言於侃曰:「古人爭戰,先料其 告辭而去。 旣而致箋於平南將軍荀崧,求討丹水賊以自效,崧納之。侃遺崧書曰:

杜弢

杜弢字景文,蜀郡成都人也。 祖植,有名蜀土,武帝時爲符節令。父眇,略陽護軍。弢

初以才學著稱,州舉秀才。遭李庠之亂,〔七〕避地南平,太守應詹愛其才而禮之。 後為醴

陵令。

聚衆以應疇。時弢在湘中,賊衆共推弢爲主,弢自稱梁益二州牧、平難將軍、湘州刺史,攻 破郡縣,眺委城走廣州。廣州刺史郭訥遣始興太守嚴佐率衆攻弢,弢逆擊破之。 軍馮素與汝班不協,言於刺史荀眺曰:「流人皆欲反。」 眺以爲然,欲盡誅流人。 班等懼死, 賊李驤殺縣令,屯聚樂鄉,衆數百人,弢與應詹擊驤,破之。蜀人杜疇、蹇撫等復擾湘州,參 王澄復遣王機擊弢,敗於巴陵。 弢遂縱兵肆暴,偽降於山簡,簡以爲廣漢太守。 巴蜀流人汝班、蹇碩等數萬家,布在荆湘間,而爲舊百姓之所侵苦,並懷怨恨。 荆州刺史 會蜀

荆州刺史陶侃等討之,前後數十戰,陂將士多物故,於是請降。帝不許。 弢乃遺應詹書曰: 陵,東侵武昌,害長沙太守崔敷、宜都太守杜鑒、邵陵太守鄭融等。 元帝命征南將軍王敦 眺 之走也,州人推安成太守郭察領州事,因率衆討弢,反爲所敗,察死之。 改 窓 南 破 零

相結聚,欲守善自衞,天下小定,然後輸誠盟府。尋山公鎭夏口,卽具陳之。此公鑒開 與足下思散疑結,求擒其黨帥,惟患算不經遠,力不陷堅耳。及在湖中,懼死求生,遂 復過半,備嘗荼毒,足下之所鑒也。 客主難久,嫌隙易構,不謂樂鄉起變出於不意,時

列

不證於大府邪 未見爭衡之機權也。 **虜,踧思善之衆以極不赦之責,非不戰而屈人之算也。** 侃宣赦書而繼之以進討,豈所以崇奉明詔,示軌憲於四海!逼向義之夫以爲 於三江,威則威矣,然吾衆竊未以爲懼。晉文伐原,以全信爲本,故能使諸侯歸之。陶 文、張休豫詣大府備列起事以來本末,但恐貪功殉名之徒將讒間於聖主之聽,戮吾使 流,豈惟滌蕩瑕穢,乃骨肉之施。 塞之會,察窮通之運,納吾於衆疑之中,非高識玄覩,孰能若此!西州人士得沐浴於清 於市朝以彰叛逆之罪,故未敢遣之。而甘陶卒至,水陸十萬,旌旗曜 吾之赤心,貫於神明,西州人士,卿粗悉之耳。寧當令抱枉於時, 此公薨逝,斯事中廢,賢愚痛毒,竊心自悼。欲遣滕永 驅略烏合,欲與必死者求一戰, 於山澤, 舟艦 叛逆之 盈

裔、雖死之日、猶生之年也。若然、先清方夏、却定中原、吾得一年之糧,使泝流西歸, 必結紐於紀綱,爲一匡於聖世,使吾廁列義徒,負戈前驅,迎皇輿於閶闔,掃長蛇於荒 乎!望卿騰吾箋令,時達盟府,遣大使光臨,使吾得披露肝膽,沒身何恨哉!伏想盟府 夷李雄之逋寇,修禹貢之舊獻,展微勞以補往愆,復州邦以謝鄰國,亦其志也,惟所裁 下抗威千里,聲播汶衡,進宜爲國思靜難之略,退與舊交措枉直之正,不亦綽然有餘裕 **昔虞卿不榮大國之相,與魏齊同其安危,司馬遷明言於李陵,雖刑殘而** 無慨。足

然顒顒十餘萬口,亦勞瘁於警備,思放逸於南畝矣。倒嶽、江、湘列吾左右,若往言有 荷忠順之恕,衡湘無伐叛之虞,隆足下宏納之望,拯吾徒陷溺之艱,焉可金玉其音哉 吾遠州寒士, 與足下出處殊倫,誠不足感神交而濟其傾危。 但顯吾忠誠,則汝嶽

貳,血誠不亮,益梁受殃,不惟鄙門而已。

遂相 使前南海太守王運受弢降,宣詔書大赦,凡諸反逆一皆除之,加弢巴東 可遣大使宣揚聖旨,雲澤沾之於上,百姓沐浴於下,則上下交泰,江左無風塵之虞矣。」帝乃 晉貰斬袪之戮,用能濟翼戴之高勳,隆一匡之美譽,況殴等素無斯愆而稽顙投命邪!以爲 施,受封侯之寵,由恕過以錄功也。 按贱今書, 募忠勇,登壇歃血,義誠慷慨。 因使流寓,居詹郡界,其貞心堅白,詹所委究。 憑 僧甚哀之,乃啓呈弢書,幷上言曰:「弢益州秀才,素有淸望,文理旣優,幹事兼美。 往 結。 血誠亦至矣。 論弢本情,非首作亂階者也。 昔朱鮪自疑於洛陽, 會驤攻燒南平,弢遂東下巴漢,與湘中鄉人相遇,推其素望, 詹竊謂今者當圮運之會, 思弘遠猷, 故齊赦射鉤之誅, 然破湘川,實贱之罪,亦由兵交其間,遂使滋蔓。 光武指河水以明心,鮪感義歸誠,終展力報 李驤爲變樂鄉,劫略良善,弢時出家財,招 監軍

弢受命後,諸將殉功者攻擊之不已, 弢不勝憤怒,遂殺運而使其將王眞領精卒三千爲

奇兵,出江南,向武陵,斷官軍運路。

陶侃使伏波將軍鄭攀邀擊,大破之, 眞步走湘城。

於

是侃等諸軍齊進,眞遂降侃,衆黨散潰。 **弢乃逃遁,不知所在。**

王機 兄矩

王機字令明,長沙人也。 父毅,廣州刺史,甚得南越之情。 機美姿儀,俶儻有度量。 陳

恢之亂,機年十七,率衆擊破之。嘗慕王澄爲人,澄亦雅知之,以爲己亞,遂與友善,內綜

膂,外爲牙爪。 尋用爲成都內史。 機終日醉酒,不存政事,由是百姓怨之,人情騷動

敦 不許。 會澄遇害,機懼禍及,又屬杜弢所在發墓,而獨爲機守冢,機益自疑。 會廣州人背刺史郭訥,迎機爲刺史, 機遂將奴客門生千餘人入廣州, 就王敦求廣州 州部將溫邵

率衆迎機。 敦遣參軍葛幽追之,及於廬陵,機叱幽曰:「何以敢來? 欲取死邪。」幽不敢逼

歸。 衆皆散,乃握節而避機。 郭訥聞邵之納機也,乃遣兵擊邵,反爲所破。 機遂入城就訥求節,訥歎曰:「昔蘇武不失其節,前史以爲美談。此

節天朝所假,義不相與,自可遣兵來取之。」機慚 而 止

求討桂林賊以自效。 機 自以篡州,懼爲王敦所討,乃更求交州。 機爲列上,朝廷許之。王敦以機難制,又欲因機討梁碩,故以降杜弘 時杜弢餘黨杜弘奔臨賀,送金數千 兩

列傳第七十 王機 祖約

機旣 子馳 乃執 以 之勳轉爲交州刺史。 碩不迎機,率兵討碩,爲碩所敗。 機節 爲 使 尋 報碩 而 碩所距,遂往鬱林。 [5] 時杜弘大破桂林賊還,遇機於道,機勸弘取交州。 陶侃爲廣州,到始興,州人皆諫不可輕進,侃不聽。 曰:「當相與迭持,何可獨捉」機遂以節與之。 ,碩曰:「王郎已壞廣州,何可復來破<u>交州也」乃禁州人不許迎之</u>。 碩聞而遣子侯候機於鬱林,機怒其迎遲,賣云:「須至州當相收拷。」碩 碩恐諸僑人爲機,於是悉殺其良者,乃自領交阯太守。 於是機與弘及溫邵、劉沈等並反。 及至州、諸郡縣皆已迎機矣。 府司馬杜讚 弘素有意,

刺史。 爲主簿。」矩意甚惡之。 機 將赴 兄矩,字令式。 職,忽見一 人持奏謁矩,自云京兆杜靈之。 美姿容, 至州月餘卒。 每出游,觀者盈路。 初爲南平太守,豫討陳恢有功,遷廣州 矩問之,答稱:「天上京兆,被使召君

侃先討溫邵

、劉沈,皆殺之。

機遣牙門屈藍還州,詐言增糧,密招誘所部,欲以距侃。

侃即

高掘出其尸斬首,并殺其二子焉。

收藍斬之,遣督護許高討機走之,病死于道。

祖約

祖約字 士少, 豫州 刺史逖之弟也。 初以孝廉爲成皐令,與逖甚相友愛。 永嘉末,隨逖

過江。 元帝稱制,引爲掾屬,與陳留阮字齊名。後轉從事中郎,典選舉

刑傷 衆所 帝不 終不許。 命 輕 聽,約 具瞻。 出 約 虧其膚髮。 妻無男而 旣 無明智以保其身,又孤恩廢命,宜加貶黜,以塞衆謗。」帝不之罪。 便從右司馬營東門私出。 當敬以直內,義以方外,杜漸防萌,式遏寇害。而乃變起蕭牆,患生婢妾,身被 性妬,約亦不敢違忤。 羣小噂嗒,嚻聲遠被,塵穢淸化,垢累明時。天恩含垢,猶復慰喩,而約違 司直劉隗劾之曰:「約幸荷殊寵, 顯位選曹, 銓衡人物, 嘗夜寢於外,忽爲人所傷,疑其妻所爲,約求去職, 隗重加

勢,將 約異母兄光祿大夫納密言於帝曰:「約內懷陵上之心,抑而 及逖 爲 亂階矣。」帝不納。 有功於譙沛,約漸見任遇。逖卒,自侍中代逖爲平西將軍、豫州刺史,領逖之衆。 時人亦謂納與約異生,忌其寵貴,故有此言。 使之可也。 **今顯侍左右,假其權** 而約竟無綏馭之

才,不爲

士卒所附

所表 鎭 欲作涂塘以遏胡寇,約謂爲棄己,彌懷憤恚。先是,太后使蔡謨勞之,約見謨,瞋目攘袂,非 西將軍,使屯壽陽,爲北境藩扞。 請 及王敦舉兵,約歸衞京都,率衆次壽陽,逐敦所署淮南太守任台,以功封五等侯, 多 不 見許,遂懷怨望。 石聰嘗以衆逼之,約屢表請救,而官軍不至。 自以名輩不後都、下,而不豫明帝 顧 命,又望開府,及諸 聰旣 退,朝議 進號 叉

列傳第七十 祖約

約,光謂爲約而擒之,約踰垣獲免。光奔於石勒,而約之諸將復陰結於勵,請爲 其事,於是命逖子沛內史渙、[5]女壻淮南太守許柳以兵會峻。 毁朝政。 石聰來攻之,約衆潰,奔歷陽。 及||峻克京都,矯詔以||約爲侍中、太尉、尚書令。 及蘇峻舉兵,遂推崇約而罪執政,約聞而大喜。 遣兄子渙攻桓宣于皖城,會毛寶援宣,擊渙,敗之。 潁川人陳光率其屬攻之,約左右閻禿貌類 從子智及衍並傾險好亂,又讚成 逖妻,柳之姊也,固諫不從。 內應。 趙胤復 勒遣

中外百餘人悉滅之,婦女伎妾班賜諸胡。 令遐請||約及其宗室。||約知禍及,大飲致醉。 主多怨。」於是勸乃詐約曰:「祖侯遠來、未得喜歡、可集子弟一時俱會。」至日、勸辭之以疾, 當顯明逆順,此漢高祖所以斬丁公也。今忠於事君者莫不顯擢,背叛不臣者無不夷戮,此 遣將軍甘苗從三焦上壓陽,約懼而夜遁,其將牽騰率衆出降。 天下所以歸伏大王也。|祖約猶存,臣切惑之。[10]且|約大引賓客,又占奪鄉里先人田地,地 |約以左右數百人奔於石勸,||勸薄其爲人,不見者久之。||勒將程遐說||刺曰:「天下粗定, 既至於市, 抱其外孫而泣。 **遂殺之,**弁其親屬

沙門,時年十歲。石氏滅後來歸。 人。」乃厚資遣之,遂爲勸將。祖氏之誅也,安多將從人於市觀省,潛取逖庶子道重,藏之爲 初,逖有胡奴曰王安,待之甚厚。及在雍丘,告之曰:「石勒是汝種類,吾亦不在爾

蘇峻

在屯聚,而峻最强。遣長史徐瑋宣檄諸屯,示以王化,又收枯骨而葬之,遠近咸其恩義,推 八,舉孝廉。永嘉之亂,百姓流亡,所在屯聚,峻糾合得數千家,結壘於本縣。于時豪傑所 蘇峻字子高,長廣掖人也。自己父模,安樂相。峻少爲書生,有才學,仕郡主簿。

揚將軍。 衆,恐必爲患,將討之。峻懼,率其所部數百家汎海南渡。 元帝聞之,假峻安集將軍。時曹嶷領靑州刺史,表峻爲掖令,峻辭疾不受。 會周堅反於彭城,峻助討之,有功,除淮陵內史,遷蘭陵相。 既到廣陵,朝廷嘉其遠至,轉鷹 嶷惡其得 峻爲主。

遂射獵於海邊青山中。

深、艾毅重請峻爲內史, 詔聽之, 加奮威將軍。 王敦作逆、詔峻討敦。 ト之不吉,遲迴不進。 及王師敗績,峻退保盱眙。 淮陵故吏徐

夜度竹格渚,拔栅將戰, 峻率其將韓晃於南塘橫截, 大破之。又隨<u>庾亮追破沈充</u>。 |峻曰:「富貴可坐取,何爲自來送死。]|峻不從,遂率衆赴京師,頓於司徒故府。 人疲困。 太寧初,更除臨淮內史。王敦復肆逆,尚書令郗鑒議召峻及劉遐援京都,敦遣峻兄說 沈充、錢鳳謀曰:「北軍新到、未堪攻戰、擊之必克。 若復猶豫,後難犯也。」賊於其 道遠行速,軍 進使持

節 、冠軍將軍、歷陽內史,加散騎常侍,封邵陵公,食邑一千八百戶。

之家 有 人,器械甚精,朝廷以江外寄之。而峻頗懷驕溢,自負其衆,潛有異志,撫納亡命,得罪 峻 逃死者,峻輒蔽匿之。 本以單家聚衆於擾攘之際,歸順之後,志在立功,旣有功於國,威望漸著。 衆力日多,皆仰食縣官,運漕者相屬,稍有不如意,便肆忿言。 至是有銳

無用 逸代領 姑孰 遠近 陷宮城,縱兵大掠,侵逼六宮,窮凶極暴,殘酷無道。 次於陵口 軍 Щ 應 任 頭。 命。 讓 從) 進逼 會結祖約, 謂 家爲,乞補靑州界一荒郡,以展鷹犬之用。」復不許。。峻嚴裝將赴召,而猶豫未決,參軍 時 部 往者 明帝初崩,委政宰輔,護軍庾亮欲徵之。峻聞將徵,遣司馬何仍詣亮曰:「討賊外任, 峻 命,至於內輔,實非所堪。」不從,遂下優詔徵峻爲大司農,加散騎常侍,位特進,以弟 朝 廷遣使諷 曰:「將軍求處荒郡而不見許,事勢如此,恐無生路,不如勒兵自守。」峻從之,遂不 曲 , 慈湖, 與王 ·國危累卵,非我不濟,狡冤旣死,獵犬理自應烹,但當死報造謀者耳。」於是遺參 峻素疑亮欲害己,表曰:「昔明皇帝親執臣手,使臣北討胡寇。今中原未靖, 師戰,頻捷,遂據蔣陵覆舟山,率衆因風 謀爲亂,而以討亮 殺于湖今陶馥 諭 之, 峻曰:「臺下云我欲反,豈得活邪! 及振威將軍 爲名。 約遣 司 馬流。 祖渙、許柳 峻自率渙、柳 驅役百官,光祿勳王彬等皆被捶撻,逼 放 率衆助峻,峻遣將韓晃、張健 火,臺省及諸營寺署 我寧山頭望廷尉,不能廷尉望 衆萬 人, 乘風 時 濟自横江, 蕩盡。 遂

軍,祖渙驍騎將軍,復弋陽王羕爲西陽王、太宰、錄尙書事,羕息播亦復本官。於是改易官 庾亮兄弟不在原例。自爲驃騎領軍將軍、三一錄尚書事,許柳丹楊尹,加前將軍馬雄左衞將 時官有布二十萬匹,金銀五千斤,錢億萬,絹數萬匹,他物稱是,峻盡廢之。口三矯詔大赦,惟 令擔負登蔣山。裸剝士女,皆以壞席苫草自鄣,無草者坐地以土自覆,哀號之聲震動內外。 司,置其親黨,朝廷政事一皆由之。又遣韓晃入義興,張健、自己管商、弘徽等入晉陵。

敗之。 所向 城。嶠等旣到,乃築壘於白石,峻率衆攻之,幾至陷沒。東西抄掠,多所擒虜,兵威日盛,戰 韓晃又攻宣城,害太守桓彝。商等又焚餘杭,而大敗於武康,退還義興。嶠與趙胤率步兵 過無不殘滅。嶠等將至,峻遂遷天子於石頭,逼迫居人,盡聚之後苑,使懷德令匡術守苑 迴趨白木陂,牙門彭世、李千等投之以矛,墜馬,斬首臠割之,焚其骨,三軍皆稱萬歲。 峻司 乃是譽賊。」及後累戰不捷,嶠亦深憚之。管商等進攻吳郡,焚吳縣、海鹽、嘉興,敗諸義軍。 無不克,由是義衆沮衄,人懷異計。 朝士之奔義軍者,皆云:「峻狡黠有智力,其徒黨驍勇, 人,從白石南上,欲以臨之。峻與匡孝將八千人逆戰,峻遣子碩與孝以數十騎先薄趙胤, .無敵。惟當以天討有罪,誅滅不久,若以人事言之,未易除也。」溫嶠怒曰:「諸君怯懦, 時溫嶠、陶侃已唱義於武昌,峻聞兵起,用參軍賈寧計,還據石頭,更分兵距諸義軍,所 |峻望見||胤走,曰:「|孝能破賊,我更不如乎」」因舍其衆,與數騎北下突陣,不得入,將

晃聞峻 千級。 碩。 晃與蘇逸等幷力攻術,不能陷。 馬任讓等共立峻弟逸爲主。求峻尸不獲,碩乃發庾亮父母墓,剖棺焚尸。逸閉城自守。 晃等震懼,以其衆奔張健於曲阿,門阨不得出,更相蹈藉,死者萬數。逸爲李湯所執, 商 死 率衆走延陵,李閎與庱亭諸軍追之,斬獲數千級。商詣庾亮降,匡術舉苑城降。韓 ,引兵赴石頭。 管商及弘徽進攻處亭壘,督護李閎及輕車長史滕含擊破之,斬首 溫嶠等選精銳將攻賊營,碩率驍勇數百渡淮而戰,於陣斬

塘,小大二萬餘口,金銀寶物不可勝數。 梟其首。 萬餘口。 山,惟晃獨出 管商之降也,餘衆並歸張健。 健復與馬雄、韓晃等輕軍俱走,閎率銳兵追之,及於巖山,攻之甚急。 ,帶兩步**靫箭,却據胡牀,彎弓射之,傷殺甚衆**。 健又疑弘徽等不與己同,盡殺之, 更以舟軍自延陵向長 揚烈將軍王允之與吳興諸軍擊健,大破之,獲男女 箭盡,乃斬之。 健等遂降,並 健等不敢下

斬於車騎

府。

孫恩

恭。 而子恭 孫恩字靈 有祕術,嘗就人借瓜刀,其主求之,子恭曰:「當卽相還耳。」旣而刀主行至嘉興, 一秀,琅邪人,孫秀之族也。 世奉五斗米道。 恩叔父泰,字敬遠,師事錢唐杜子

寸。 言。 有魚躍入船中,破魚得瓜刀。 扇 議周勰等皆敬事之,會稽世子元顯亦數詣泰求其祕術。 泰知養性之方,因召還。道子以爲徐州 廣州刺史王懷之以泰行鬱林太守,南越亦歸之。太子少傅王雅先與泰善,言於孝武帝,以 誘百姓,愚者敬之如神,皆竭 動 百姓,私集徒衆,三吳士庶多從之。 王恭之役、泰私合義兵、得數千人、爲國討恭。 會稽內史謝輯發其謀,道子誅之。 ,財產,進子女,以祈福慶。 其爲神效往往如此。 主簿,猶以道術眩惑士庶。 于時朝士皆懼泰爲亂,以其與元顯交厚,咸莫敢 子恭死,泰傳其術。然浮狡有小才,誑 黄門郎孔道、鄱陽太守桓放之、驃騎諮 王珣言於會稽王道子,流之於廣州。 泰見天下兵起, 稍遷輔國將軍、新安太 以爲晉祚將終,

<u>|</u>崇等並出奔。於是<u>|</u>恩據<u>|會</u>稽,自號征東將軍,號其黨曰「長生人」,宣語令誅殺異己,有不同 馬孔福,烏程令夏侯愔等皆遇害。 邈,永嘉太守謝逸,自吾嘉興公顧胤,南康公謝明慧,黃門郎謝沖、張琨,中書郎孔道,太子洗 及東陽、新安等凡八郡,一時俱起,殺長東以應之,旬日之中,衆數十萬。 王凝之,有衆數萬。 欲復讎。及元顯縱暴吳會,百姓不安,恩因其騷動,自海攻上虞,殺縣令,因襲會稽,害內史 恩逃于海。 衆聞泰死,惑之,皆謂蟬蛻登仙,故就海中資給。 於是會稽謝鍼、吳郡陸瓖、吳興丘匹、義興許允之、臨海周胄、永嘉張永 吳國內史桓謙、江心義興太守魏傿、江也臨海太守、新蔡王 恩聚合亡命得百餘人,志 。於是吳興太守謝

者戮及嬰孩,由是死者十七八。畿內諸縣處處蜂起,朝廷震懼,內外戒嚴。 鎭 北將軍劉牢之討之,並轉鬭而前。吳會承平日久,人不習戰,又無器械,故所在多被破 諸賊皆燒倉廩,焚邑屋,刊木堙井,虜掠財貨,相率聚於會稽。 其婦女有嬰累不能去 遣衞將軍謝琰、

牢之等遽於收斂,故恩復得逃海。朝廷以謝琰爲會稽,率徐州文武戍海浦。 十餘萬口,一時逃入海。懼官軍之躡,乃緣道多棄寶物子女,時東土殷實,莫不粲麗盈目, 江,復曰:「我割浙江,不失作句踐也。」尋知牢之已濟江,乃曰:「孤不羞走矣。」乃虜男女二 者,囊簏盛嬰兒投於水,而告之曰:「賀汝先登仙堂,我尋後就汝。」 初, 恩聞八郡響應,告其屬曰:「天下無復事矣,當與諸君朝服而至建康。」旣聞牢之臨

擊之,恩復還於海。 日,復寇刑浦,害謝琰。 隆安四年,恩復入餘姚,破上處,進至刑浦。日日琰遣參軍劉宣之距破之,恩退縮。少 於是復造牢之東屯會稽,吳國內史袁山松築扈瀆壘,日立緣海備恩。 朝廷大震,遣冠軍將軍桓不才、輔國將軍孫無終、寧朔將軍高雅之

陷之,乃浮海而北。 向京口。牢之率衆西擊,未達,而恩已至,劉裕乃總兵緣海距之。及戰,恩衆大敗,狼狽赴 尋又集衆,欲向京都,朝廷駭懼,陳兵以待之。 明年,恩復入浹口,雅之敗績。 劉裕與劉敬宣幷軍躡之於郁洲,累戰,恩復大敗,由是漸衰弱,復沿海 牢之進擊,恩復還于海。 恩至新州,江门不敢進而退,北寇廣陵, 轉寇扈瀆,害袁山松,仍浮海

列

傅

還南。 裕亦尋海耍截,復大破恩於扈瀆,恩遂遠迸海中。

戰死及自溺幷流離被傳賣者,至恩死時裁數千人存,而恩攻沒謝琰、袁山松,陷廣陵,前後 之水仙,投水從死者百數。餘衆復推恩妹夫盧循爲主。自恩初入海,所虜男女之口, 及桓玄用事,恩復寇臨海,臨海太守辛景討破之。 恩窮感,乃赴海自沈,妖黨及妓妾謂 其後

盧循

數十戰,亦殺百姓數萬人。

盧循字于先,小名元龍,司空從事中郎諶之曾孫也。雙眸冏徹,瞳子四轉,善草隸弈棋

之藝。沙門慧遠有鑒裁,見而謂之曰:「君雖體涉風素,而志存不軌。」

餘衆推循爲主。元興二年正月,寇東陽,八月,攻永嘉。劉裕討循至晉安,循窘急,泛海到 循娶孫恩妹。及恩作亂,與循通謀。恩性酷忍,循每諫止之,人士多賴以濟免。 恩亡,

番禺 ,寇廣州,逐刺史吳隱之,自攝州事,號平南將軍,遣使獻貢。時朝廷新誅桓氏,中外多

虞,乃權假循征虜將軍、廣州刺史、平越中郎將。

義熙中,劉裕伐慕容超,循所署始興太守徐道覆,循之姊夫也,使人勸循乘虛而出,循 道覆乃至番禺、說循曰:「朝廷恒以君爲腹心之疾,劉公未有旋日,不乘此機而保一

之機,萬不可失。旣克都邑,劉裕雖還,無能爲也。 日之安,若平齊之後,劉公自率衆至豫章,遣銳師過嶺,雖復君之神武,必不能當也。 君若不同,便當率始興之衆直指尋陽。」 今日

循甚不樂此舉,無以奪其計,乃從之。

者數四,故船版大積,而百姓弗之疑。及道覆舉兵,案賣券而取之,無得隱匿者,乃幷力裝 卽 之,兵敗被害。 之,旬日 初 ,道覆密欲裝舟艦,乃使人伐船材於南康山,僞云將下都貨之。後稱力少不能得致, 而 辨。 逐舉衆寇<u>南康、廬陵、豫章諸郡,守相皆委任奔走。 鎭南將軍何無忌率衆距</u> 如是

所傾,人有死者。 馳,天下不足定也 決,知劉裕已還,欲乾沒一戰,請於新亭至白石,焚舟而上,數道攻之。個多謀少決,欲以萬 憂也。」乃連 全 之計,固不聽。 循遣道覆寇江陵,未至,爲官軍所敗,馳走告循曰:「請幷力攻京都,若克之,江陵非所 弗能 旗而 復 振 下,戎卒十萬,舳艫千計,敗衞將軍劉毅於桑落洲,逕至江寧。 了」

裕懼其侵軼,乃栅石頭,斷

固浦,

三以距之。 列陣南岸,戰又敗績。 道覆以循無斷,乃歎曰:「我終爲盧公所誤,事必無成。使我得爲英雄驅 可據尋陽,幷力取荆州,徐更與都下爭衡,猶可以濟。」因自蔡洲南走,復 乃進攻京口,寇掠諸縣,無所得。 循攻栅不利,船艦為暴風 循謂道覆曰:「師 道覆素有膽

列

傳

第

七

還保廣州。裕先遺孫處從海道據番禺城,循攻之不下。 據尋陽。 裕命衆攻栅,循衆雖死戰,猶不能抗。 俗先遣羣率追討,自統大衆繼進,又敗循於雷池。 裕乘勝擊之,循單舸而走,收散卒得千餘人, 道覆保始興,因險自固。 循欲遁還豫章、自己乃悉力栅斷 循乃襲合

循勢屈,知不免,先鴆妻子十餘人,又召妓妾問曰:「我今將自殺,誰能同者。」多云:「雀

浦,克之,進攻交州。至龍編,刺史杜慧度譎而敗之。

慧度取其尸斬之,及其父嘏,同黨盡獲,傳首京都。 暖領四千兵繼瓊後進。 自號 圖益 鼠貪生,就死實人情所難。」有云:「官尙當死,某豈願生!」於是悉鴆諸辭死者,因自投於水。 出 而請之,至於再三,遂以兵逼縱於輿上。攻躆弟西夷校尉瑾於涪城,城陷,瑾死之,縱乃 梁、秦二州刺史。 州刺史毛璩,與巴西陽昧結謀於五城水口,共逼縱爲主。 義熙元年,刺史遣縱及侯暉等領諸縣氐進兵東下。 。離縱,巴西南充人也。祖獻之,有重名於西土。縱少而謹愼,蜀人愛之。爲安西府參 譙縦 據聞縱反,自略城步還成都,C三己遣參軍王瓊率三千人討縱,又遣弟 縱遣弟明子及暉距瓊於廣漢, [回]瓊擊破暉等, 追至縣竹。 暉有貳志,因梁州人不樂東也,將 縱懼而不當,走投於水,暉引

二伏以待之,大敗瓊衆,死者十八九。益州營戶李騰開城以納縱。

帝,自稱成都王。明年,遣使稱藩於姚興,將順流東寇,以討車騎將軍劉裕爲名,乞師於姚 三璩旣死,縱以從弟洪爲益州刺史,明子爲鎭東將軍、巴州刺史,率其衆五千人屯白

興,且請桓謙爲助,興遣之。

行而 安堵,使復其業。 次瓦解,縱 資,二萬餘人因爲<u>蜀子</u>虜耳。」從之。翌日,進攻皆克,斬侯暉等,於是遂進。 縱之城守者相 逼之,出其不意,侯暉之徒已破膽矣。 兵,伺隙而進,卿以爲何如。」鍾曰:「不然。前揚聲言大將由內水,故道福不敢拾涪,今重軍 守蒯恩等率衆二萬,自江陵討縱。初謀元率,僉難其人,齡石資名素淺,裕違衆拔之,授以 栅,衆未能攻。 石師次平模,去成都二百里,縱遣其大將軍侯暉、尚書僕射譙詵屯平模,夾岸連城,層樓重 麾下之半。臧喜,裕妻弟也,位出其右,又隸焉。齡石次於白帝,縱遣譙道福重兵守涪。 前,成都必不能守。 九年,劉裕以西陽太守朱齡石爲益州刺史,寧朔將軍臧喜、三三下邳太守劉鍾、蘭陵太 乃出奔。 齡石謂劉鍾曰:「天方暑熱,賊今固險,攻之難拔,祗困我師。 吾欲蓄銳息 其尚書令馬耽封倉庫以待王師。 若緩兵相持,虛實相見,陪軍復來,難爲敵也。進不能戰,退無所 正可因其兇而攻之,勢當必克。克平模之後,自可鼓 及齡石入成都,誅縱同祖之親,餘皆

列傳

而得! 追殺之。耽之徙也,謂其徒曰:「朱侯不送我京師,滅衆口也,吾必不免。」乃盥洗而臥,引繩 散金帛以賜其衆,衆受之而走。道福獨奔廣漢,廣漢人杜瑾執之。 「吾養爾等,正爲今日。蜀之存亡,實係在我,不在譙王。我尙在,猶足一戰。」士咸許諾。乃 而死。須臾,齡石師至,日之遂戮尸焉。 |縱之走也,先如其墓,縱女謂縱曰:「走必不免,祗取辱焉。 等死,死於先人之墓可也。」 人誰不死,何懼之甚!」因投縱以劍,中其馬鞍。 縱去之,乃自縊。 朱齡石徙馬耽於越巂, 1. 今欲爲降虜,豈可 道福謂其徒曰:

禍 暴,憑陵險隘,倔强江湖,至已未淹歲稔,咸至誅戮,實自取之,非爲不幸。,峻約同惡相濟,生 之猖狂 使生靈塗炭,神器流離,邦國軫麥秀之哀,宮廟興黍離之痛,豈天意乎。豈人事乎。何醜虜 車競逐。王彌好亂樂禍,挾詐懷姦,命儔嘯侶,伺間候隙,助悖逆於平陽,肆殘忍於都邑,遂 此亂階 延宮闕,方凶比暴,弗是加也。譙縱乘茲釁隙,肆彼姦謀,旋踵而亡,無足論矣。 史臣曰:惠皇失御,政紊朝危,難起蕭牆,毒痡函夏,九州波駭,五嶽塵飛,干戈日尋,戎 而亂離之斯瘼者也!張昌等或鴟張淮浦,或蟻聚荆衡,招烏合之凶徒,逞豺狼之貪 ,孫盧同類相求,嗣成妖逆。至乃干戈掃地,災沴滔天,雖樊謝之毒被含靈,懧郭之

陵虐江漢。孫盧姦慝,約峻殘賊。 贊曰:中朝隳政,王彌肇亂。 神器流離,生靈塗炭。 窮凶極暴"為鬼爲蜮。 縱竊岷峨,旋至顚踣。 **羣妖伺隙**, 構茲多難。 荐食荆衡,

校勘記

(一) 皇太子詮 清河康王傳「詮」作「銓」。

密將宗室 通志一三〇「宗」作「家」。

昌乃沈竄于下儁山 周校:「昌乃沈」當作「昌及沈」。 斠注:沈卽上文之丘沈也。

. E 弟閎爲歷陽太守 陳訓傳、通鑑八六「閎」作「宏」。

周校"惠紀、顧樂傳作「王曠」。按"通鑑八六亦作「王曠」。

王廣

, . ∵ 南安龐宾 周校:懷紀作「新平人龐憲」。

フセン 遭李庠之亂 校文:「庠」當作「特」。

遂往鬱林 「往」、各本作「住」、宋本作「往」、張元濟以爲作「往」是、今從之

たい 內史渙 <u>超</u>宣傳「渙」作「煥」。下同。蘇峻傳亦同,不再出校。

臣切惑之 通志一三〇、册府九四二「切」作「竊」。

長廣掖 人也 地理志下掖屬東萊國,長廣郡有挺縣,疑「掖」乃「挺」之誤。

列

傅 第

七

+

校 勘

記

二六三九

- [三] 峻盡廢之 「廢」,殿本及通鑑九四作「費」。
- 自爲 驃騎領軍將軍 成紀、建康實錄七、通鑑九四皆無「領軍」二字。
- 張健 **(料** 注 一一成紀、魏書司馬叡傳均作「張瑾」。 按:建康實錄七亦作「張瑾」。
- 二 吾 謝逸 安紀、通鑑一一一「謝逸」作「司馬逸」、宋書、南史張進之傳作「司馬逸之」。
- 桓謙 「謙」, 各本作「謹」,誤。 桓謙有傳。 安紀、劉牢之傳、通鑑一一一及魏書司馬叡傳均作

「謙」,今據改。

- 二古 魏傿 安紀、世說賞譽注引魏氏譜、通鑑一一一作「魏隱」、謝琰傳作「魏鄢」。
- 〇〇 刑浦 謝琰傳、通鑑一一一作「邢浦」。
- 二乙 扈瀆壘 袁山松傳、宋書南史武帝紀、通鑑一一一「扈」均作「滬」。
- 新州 通志一三〇及通鑑一一二作「新洲」,胡注云,新洲在京口西大江中。
- 柤浦 安紀、宋書南史宋武帝紀、蒯恩傳、通鑑一一五均作「査浦
- 呈 循欲遁還豫章 各本「欲」作「又」,局本作「欲」,與通志一三〇合,今從之。
- 自略城步還成都 「略城」,各本作「洛城」,今據毛璩傳及通鑑一一四改。
- CIED 明子 安紀作「子明」。
- (三) 臧喜 見卷八四校記。

[三·1] 倔强江湖 「倔」,各本作「屈」,今從宋本。

